



# Deddf yr Amgylchedd Hanesyddol (Cymru) 2023

2023 dsc 3

CYNNWYS

**RHAN 1**

TROSOLWG

1 Trosolwg

**RHAN 2**

HENEBION O DDIDDORDEB HANESYDDOL ARBENNIG

**PENNOD 1**

TERMAU ALLWEDDOL

2 Ystyr "heneb" a "safle heneb"

**PENNOD 2**

COFRESTR O HENEBION O BWYSIGRWYDD CENEDLAETHOL

*Cofrestr o henebion*

3 Dyletswydd i gynnal a chyhoeddi cofrestr o henebion  
4 Hysbysu perchennog etc. pan fo'r gofrestr wedi ei diwygio

*Cynigion i ychwanegu heneb at y gofrestr neu ddileu heneb o'r gofrestr: ymgynghori a gwarchodaeth interim*

5 Ymgynghori cyn ychwanegu heneb at y gofrestr neu ddileu heneb o'r gofrestr

- 6 Gwarchodaeth interim wrth aros am benderfyniad ar ddiwygiadau penodol sy'n ymwneud â'r gofrestr  
 7 Pan ddaw gwarchodaeth interim i ben  
 8 Digollediad am golled neu ddifrod a achosir gan warchodaeth interim

*Adolygu penderfyniadau i ddiwygio'r gofrestr i ychwanegu henebion etc.*

- 9 Adolygu penderfyniad i ychwanegu heneb at y gofrestr etc.  
 10 Darpariaeth atodol ynghylch adolygiadau

### PENNOD 3

#### RHEOLAETHU GWAITH SY'N EFFEITHIO AR HENEBION COFRESTREDIG

##### *Awdurdodi gwaith*

- 11 Gofyniad i waith gael ei awdurdodi  
 12 Awdurdodi dosbarthau o waith  
 13 Awdurdodi gwaith drwy gydsyniad heneb gofrestredig

##### *Ceisiadau am gydsyniad heneb gofrestredig*

- 14 Gwneud cais am gydsyniad heneb gofrestredig  
 15 Declarasiynau o berchnogaeth mewn cysylltiad â heneb  
 16 Pŵer i wrthod ystyried ceisiadau tebyg

##### *Penderfynu ceisiadau am gydsyniad heneb gofrestredig*

- 17 Y weithdrefn ar gyfer penderfynu ceisiadau ac effaith rhoi cydsyniad

##### *Rhoi cydsyniad heneb gofrestredig yn ddarostyngedig i amodau*

- 18 Pŵer i roi cydsyniad yn ddarostyngedig i amodau  
 19 Amod ynghylch y cyfnod y mae rhaid i'r gwaith ddechrau ynddo

##### *Addasu a dirymu cydsyniad heneb gofrestredig*

- 20 Addasu a dirymu cydsyniad

##### *Digollediad*

- 21 Digollediad am wrthod cydsyniad heneb gofrestredig neu roi cydsyniad yn ddarostyngedig i amodau  
 22 Adennill digollediad a dalwyd o dan adran 21 ar ôl rhoi cydsyniad dilynol  
 23 Penderfynu'r swm sy'n adenilladwy o dan adran 22  
 24 Digollediad pan fo gwaith sy'n effeithio ar heneb gofrestredig yn peidio â chael ei awdurdodi

**PENNOD 4****CYTUNDEBAU PARTNERIAETHAU HENEBION COFRESTREDIG**

- 25 Cytundebau partneriaethau henebion cofrestredig
- 26 Darpariaeth bellach ynghylch cytundebau partneriaethau henebion cofrestredig
- 27 Terfynu cytundeb neu ddarpariaeth mewn cytundeb
- 28 Digollediad mewn perthynas â therfynu
- 29 Dehongli

**PENNOD 5****GORFODI RHEOLAETHAU SY'N YMWNEUD Â HENEBION COFRESTREDIG***Troseddau sy'n ymwneud â gwaith anawdurdodedig*

- 30 Y drosedd o gyflawni gwaith anawdurdodedig neu dorri amod mewn cydsyniad

*Hysbysiadau stop dros dro*

- 31 Pŵer Gweinidogion Cymru i ddyroddi hysbysiad stop dros dro
- 32 Hyd etc. hysbysiad stop dros dro
- 33 Y drosedd o dorri hysbysiad stop dros dro
- 34 Digollediad am golled neu ddifrod a achosir gan hysbysiad stop dros dro

*Hysbysiadau gorfodi*

- 35 Pŵer Gweinidogion Cymru i ddyroddi hysbysiad gorfodi
- 36 Cyflwyno hysbysiad gorfodi a'r hysbysiad yn cymryd effaith
- 37 Amrywio hysbysiad gorfodi a thynnu hysbysiad gorfodi yn ôl
- 38 Effaith rhoi cydsyniad heneb gofrestrdig ar hysbysiad gorfodi
- 39 Apêl yn erbyn hysbysiad gorfodi
- 40 Pwerau i fynd ar dir a chymryd camau sy'n ofynnol gan hysbysiad gorfodi
- 41 Y drosedd o fethu â chydymffurfio â hysbysiad gorfodi

*Gwaharddebau*

- 42 Gwaharddeb i atal gwaith anawdurdodedig neu fethiant i gydymffurfio ag amod mewn cydsyniad

**PENNOD 6****CAFFAEL, GWARCHEIDIAETH A MYNEDIAD Y CYHOEDD***Caffael henebion o ddiddordeb hanesyddol arbennig*

- 43 Caffael yn orfodol henebion o ddiddordeb hanesyddol arbennig
- 44 Caffael drwy gytundeb neu rodd henebion o ddiddordeb hanesyddol arbennig

*Gwarcheidiaeth henebion o ddiddordeb hanesyddol arbennig*

- 45 Pŵer i osod heneb o ddiddordeb hanesyddol arbennig o dan warcheidiaeth  
 46 Darpariaeth atodol ynghylch gweithredoedd gwarcheidiaeth  
 47 Swyddogaethau cyffredinol gwarcheidwaid  
 48 Terfynu gwarcheidiaeth

*Caffael a gwarcheidiaeth tir yng nghyffiniau heneb o ddiddordeb hanesyddol arbennig etc.*

- 49 Caffael a gwarcheidiaeth tir yng nghyffiniau heneb  
 50 Caffael hawddfrentiau a hawliau tebyg eraill dros dir yng nghyffiniau heneb

*Cytundebau â meddianwyr henebion neu dir sy'n cydffinio etc.*

- 51 Cytundebau ynghylch rheoli henebion o ddiddordeb hanesyddol arbennig a thir yn eu cyffiniau

*Pwerau perchnogion cyfyngedig*

- 52 Pwerau perchnogion cyfyngedig at ddibenion adrannau 45, 50 a 51

*Trosglwyddo perchnogaeth neu warcheidiaeth a gwaredu tir*

- 53 Trosglwyddo henebion o ddiddordeb hanesyddol arbennig rhwng awdurdodau lleol a Gweinidogion Cymru  
 54 Gwaredu tir a gaffaelir o dan y Bennod hon

*Mynediad y cyhoedd i henebion sydd o dan reolaeth gyhoeddus*

- 55 Mynediad y cyhoedd i henebion sydd o dan reolaeth gyhoeddus  
 56 Pŵer i wneud rheoliadau ac is-ddeddfau mewn cysylltiad â mynediad y cyhoedd i henebion sydd o dan reolaeth gyhoeddus  
 57 Darparu cyfleusterau i'r cyhoedd mewn cysylltiad â henebion o ddiddordeb hanesyddol arbennig

**PENNOD 7****CYFFREDINOL***Difrodi henebion*

- 58 Y drosedd o ddifrodi henebion penodol o ddiddordeb hanesyddol arbennig  
 59 Gorchmynion digolledu am ddifrod i henebion sydd o dan warcheidiaeth  
 60 Cyfyngiadau ar y defnydd o ddatgelyddion metel

*Gwaith brys ar gyfer diogelu heneb gofrestredig*

- 61 Gwaith ar gyfer diogelu heneb gofrestredig mewn achosion brys

*Gwariant a chyngor mewn perthynas â henebion*

- 62 Gwariant ar gaffael a diogelu henebion o ddiddordeb hanesyddol arbennig etc.  
 63 Cyngor gan Weinidogion Cymru a goruchwyllo gwaith ganddynt  
 64 Gwariant gan awdurdodau lleol ar ymchwiliad archaeolegol

*Pwerau mynediad*

- 65 Pwerau mynediad i arolygu henebion cofrestredig etc.  
 66 Pwerau mynediad sy'n ymwneud â gorfodi rheolaethau ar waith  
 67 Pŵer mynediad i dir y credir ei fod yn cynnwys heneb o ddiddordeb hanesyddol arbennig  
 68 Pŵer mynediad i gynnal arohwg a phrisiad mewn cysylltiad â hawliad am ddigollediad  
 69 Darpariaeth atodol ynghylch pwerau mynediad o dan y Rhan hon  
 70 Digollediad am ddifrod a achosir drwy arfer pwerau penodol o dan y Rhan hon  
 71 Trin a diogelu darganfyddiadau

*Atodol*

- 72 Dilysrwydd penderfyniadau a gorchmynion penodol o dan y Rhan hon  
 73 Cais i'r Uchel Lys am adolygiad statudol o benderfyniad neu orchymyn  
 74 Tir y Goron  
 75 Dehongli'r Rhan hon

**RHAN 3****ADEILADAU O DDIDDORDEB PENSAERNÏOL NEU HANESYDDOL ARBENNIG****PENNOD 1****RHESTRU ADEILADAU O DDIDDORDEB ARBENNIG***Rhestr o adeiladau*

- 76 Dyletswydd i gynnal a chyhoeddi rhestr o adeiladau  
 77 Hysbysiad o restru neu ddadrestru adeilad

*Cynigion i restru a dadrestru adeiladau: ymgynghori a gwarchodaeth dros dro*

- 78 Ymgynghori cyn restru neu ddadrestru adeilad  
 79 Gwarchodaeth interim wrth aros am benderfyniad o ran pa un ai i restru adeilad  
 80 Digollediad am golled neu ddifrod a achosir gan warchodaeth interim

*Adolygu penderfyniadau rhestru*

- 81 Adolygu penderfyniad i restru adeilad  
 82 Darpariaeth atodol ynghylch adolygiadau

*Rhestru dros dro*

- 83 Cyflwyno hysbysiad rhestru dros dro  
 84 Rhestru dros dro mewn achosion brys  
 85 Diwedd rhestru dros dro  
 86 Digollediad am golled neu ddifrod a achosir gan restru dros dro

*Adeiladau na fwriedir iddynt gael eu rhestru*

- 87 Tystysgrif nad yw Gweinidogion Cymru yn bwriadu rhestru adeilad

**PENNOD 2****RHEOLAETHU GWAITH SY'N EFFEITHIO AR ADEILADAU RHESTREDIG***Awdurdodi gwaith*

- 88 Gofyniad i waith gael ei awdurdodi  
 89 Awdurdodi gwaith drwy gydsyniad adeilad rhestredig

*Ceisiadau am gydsyniad adeilad rhestredig*

- 90 Gwneud cais am gydsyniad adeilad rhestredig  
 91 Hysbysiad o gais i berchnogion adeilad

*Ymdrin â cheisiadau am gydsyniad*

- 92 Y weithdrefn ar gyfer ymdrin â chais  
 93 Pŵer i wrthod ystyried ceisiadau tebyg  
 94 Atgyfeirio cais at Weinidogion Cymru  
 95 Hysbysu Gweinidogion Cymru cyn rhoi cydsyniad  
 96 Rhoi neu wrthod cydsyniad

*Rhoi cydsyniad adeilad rhestredig yn ddarostyngedig i amodau*

- 97 Pŵer i roi cydsyniad yn ddarostyngedig i amodau  
 98 Amod ynghylch y cyfnod y mae rhaid i'r gwaith ddechrau ynddo  
 99 Cais i amrywio neu ddileu amodau

*Apelau i Weinidogion Cymru*

- 100 Yr hawl i apelio yn erbyn penderfyniad awdurdod cynllunio neu fethiant awdurdod cynllunio i wneud penderfyniad  
 101 Y weithdrefn ar gyfer gwneud apêl  
 102 Cyfyngiad ar amrywio cais ar ôl cyflwyno hysbysiad o apêl  
 103 Penderfyniad ar gais ar ôl cyflwyno hysbysiad o apêl  
 104 Penderfynu apêl

*Achosion arbennig*

- 105 Ceisiadau gan awdurdodau cynllunio a'r Goron  
 106 Ceisiadau sy'n ymwneud â gwaith brys ar dir y Goron

*Addasu a dirymu cydsyniad adeilad rhestredig*

- 107 Addasu a dirymu cydsyniad  
 108 Digollediad pan fo cydsyniad yn cael ei addasu neu ei ddirymu

*Hawl perchennog adeilad rhestredig i'w gwneud yn ofynnol prynu buddiant*

- 109 Hysbysiad prynu pan fo cydsyniad wedi ei wrthod, wedi ei roi yn ddarostyngedig i amodau, wedi ei addasu neu wedi ei ddirymu  
 110 Hysbysiad prynu mewn cysylltiad â thir y Goron  
 111 Darpariaeth bellach ynghylch cyflwyno hysbysiad prynu  
 112 Camau gweithredu yn dilyn cyflwyno hysbysiad prynu

**PENNOD 3****CYTUNDEBAU PARTNERIAETHAU ADEILADAU RHESTREDIG**

- 113 Cytundebau partneriaethau adeiladau rhestredig  
 114 Darpariaeth bellach ynghylch cytundebau partneriaethau adeiladau rhestredig  
 115 Terfynu cytundeb neu ddarpariaeth mewn cytundeb  
 116 Digollediad pan fo cytundeb neu ddarpariaeth yn cael ei derfynu neu ei therfynu

**PENNOD 4****GORFODI RHEOLAETHAU SY'N YMWNEUD AG ADEILADAU RHESTREDIG***Gwaith anawdurdodedig a difrod bwriadol: troseddau*

- 117 Y drosedd o gyflawni gwaith anawdurdodedig neu dorri amod mewn cydsyniad  
 118 Y drosedd o ddifrodi adeilad rhestredig yn fwriadol

*Hysbysiadau stop dros dro*

- 119 Pŵer awdurdod cynllunio i ddyroddi hysbysiad stop dros dro  
 120 Hyd etc. hysbysiad stop dros dro  
 121 Y drosedd o dorri hysbysiad stop dros dro  
 122 Digollediad am golled neu ddifrod a achosir gan hysbysiad stop dros dro

*Hysbysiadau gorfodi a ddyroddir gan awdurdodau cynllunio*

- 123 Pŵer awdurdod cynllunio i ddyroddi hysbysiad gorfodi  
 124 Cyflwyno hysbysiad gorfodi a'r hysbysiad yn cymryd effaith  
 125 Amrywio hysbysiad gorfodi a thynnu hysbysiad gorfodi yn ôl  
 126 Effaith rhoi cydsyniad adeilad rhestredig ar hysbysiad gorfodi

*Apelau ac achosion eraill sy'n ymwneud â hysbysiadau gorfodi*

- 127 Yr hawl i apelio yn erbyn hysbysiad gorfodi  
 128 Penderfynu apêl  
 129 Y seiliau dros apelio i beidio â chael eu codi mewn achosion eraill

*Cydymffurfio â hysbysiadau gorfodi*

- 130 Gorchymyn i ganiatáu camau sy'n ofynnol gan hysbysiad gorfodi  
 131 Pŵer i fynd ar dir a chymryd camau sy'n ofynnol gan hysbysiad gorfodi  
 132 Adennill costau cydymffurfio â hysbysiad gorfodi  
 133 Y drosedd o fethu â chydymffurfio â hysbysiad gorfodi

*Hysbysiadau gorfodi a ddyroddir gan Weinidogion Cymru*

- 134 Pŵer Gweinidogion Cymru i ddyroddi hysbysiad gorfodi

*Gwaharddebau*

- 135 Gwaharddeb i atal gwaith anawdurdodedig neu fethiant i gydymffurfio ag amod mewn cydsyniad

**PENNOD 5****CAFFAEL A DIOGELU ADEILADAU O DDIDDORDEB ARBENNIG***Caffael drwy gytundeb adeiladau o ddiddordeb arbennig*

- 136 Pŵer awdurdod cynllunio i gaffael adeilad drwy gytundeb

*Caffael yn orfodol adeiladau rhestredig y mae angen eu hatgyweirio*

- 137 Pwerau i gaffael adeilad rhestredig yn orfodol at ddiben ei ddiogelu  
 138 Gofyniad i gyflwyno hysbysiad atgyweirio cyn dechrau caffael yn orfodol  
 139 Cais i stopio caffaeliad gorfodol  
 140 Cyfarwyddyd ar gyfer digollediad isafol pan ganiatawyd i adeilad fynd i gyflwr gwael yn fwriadol  
 141 Cais i ddileu cyfarwyddyd ar gyfer digollediad isafol  
 142 Dod â hawliau dros dir a gaffaelwyd yn orfodol i ben

*Rheoli, defnyddio a gwaredu adeiladau*

- 143 Rheoli, defnyddio a gwaredu adeilad a gaffaelir o dan y Bennod hon

*Diogelu adeiladau rhestredig ar frys*

- 144 Gwaith brys i ddiogelu adeilad rhestredig  
 145 Pŵer i'w gwneud yn ofynnol i berchennog dalu costau gwaith diogelu  
 146 Darpariaeth bellach ynghylch adennill costau gwaith diogelu



*Darpariaeth bellach ynghylch diogelu adeiladau rhestredig*

147 Camau ar gyfer diogelu adeiladau rhestredig sydd mewn cyflwr gwael

*Cyllid ar gyfer atgyweirio a chynnal a chadw adeiladau o ddiddordeb arbennig etc.*

- 148 Grant neu fenthyciad gan awdurdod lleol ar gyfer atgyweirio neu gynnal a chadw adeilad  
 149 Adennill grant a roddir gan awdurdod lleol  
 150 Grant gan Weinidogion Cymru ar gyfer atgyweirio neu gynnal a chadw adeilad, gardd etc.  
 151 Gweinidogion Cymru yn derbyn gwaddol ar gyfer cynnal adeilad

**PENNOD 6****CYFFREDINOL***Pwerau mynediad*

- 152 Pwerau i fynd ar dir  
 153 Arfer pŵer i fynd ar dir heb warant  
 154 Gwarant i fynd ar dir  
 155 Darpariaeth atodol ynghylch pwerau mynediad

*Atodol*

- 156 Adeiladau crefyddol esempt  
 157 Dehongli'r Rhan hon

**RHAN 4****ARDALOEDD CADWRAETH***Dynodi ardaloedd cadwraeth*

- 158 Dynodi ardaloedd o ddiddordeb pensaernïol neu hanesyddol arbennig yn ardaloedd cadwraeth

*Dyletswyddau sy'n ymwneud ag ardaloedd cadwraeth*

- 159 Dyletswydd i lunio a chyhoeddi cynigion ar gyfer diogelu a gwella ardaloedd cadwraeth  
 160 Arfer swyddogaethau cynllunio: dyletswydd gyffredinol sy'n ymwneud ag ardaloedd cadwraeth

*Rheolaethu dymchwel mewn ardaloedd cadwraeth*

- 161 Gofyniad i ddymchweliad gael ei awdurdodi  
 162 Awdurdodi dymchweliad drwy gydsyniad ardal gadwraeth  
 163 Cymhwyso Rhan 3 i ardaloedd cadwraeth

*Diogelu adeiladau mewn ardaloedd cadwraeth ar frys*

164 Gwaith brys i ddiogelu adeiladau mewn ardaloedd cadwraeth

*Grantiau a chytundebau ardaloedd cadwraeth*

165 Grant gan Weinidogion Cymru ar gyfer diogelu neu wella ardaloedd cadwraeth

166 Cytundebau ardaloedd cadwraeth

**RHAN 5**

**DARPARIAETH ATODOL YNGHYLCH ADEILADAU O DDIDDORDEB ARBENNIG  
AC ARDALOEDD CADWRAETH**

**PENNOD 1**

**ARFER SWYDDOGAETHAU GAN AWDURDODAU CYNLLUNIO AC AWDURDODAU LLEOL  
ERAILL**

167 Ffioedd a thaliadau am arfer swyddogaethau

168 Trefniadau ar gyfer arfer swyddogaethau mewn perthynas â cheisiadau

169 Trefniadau ar gyfer cael cyngor arbenigol

170 Ffurf ar ddogfennau

171 Cyfraniadau tuag at wariant gan awdurdodau lleol

**PENNOD 2**

**ACHOSION GERBRON GWEINIDOGION CYMRU**

*Darpariaethau gweithdrefnol sy'n gymwys i apelau i Weinidogion Cymru*

172 Ffioedd am apelau

173 Penderfynu apêl gan berson a benodir

*Darpariaethau gweithdrefnol sy'n gymwys i apelau ac achosion eraill gerbron Gweinidogion Cymru*

174 Dewis o ymchwiliad, gwrandawriad neu weithdrefn ysgrifenedig

175 Gofynion gweithdrefnol

*Ymchwiliadau lleol*

176 Pŵer Gweinidogion Cymru i gynnal ymchwiliad lleol

177 Pŵer person sy'n cynnal ymchwiliad i wneud tystiolaeth yn ofynnol

178 Mynediad at dystiolaeth mewn ymchwiliad

179 Talu cynrychiolydd a benodir pan fo mynediad i dystiolaeth wedi ei gyfyngu

*Costau achosion gerbron Gweinidogion Cymru*

180 Talu costau Gweinidogion Cymru

181 Gorchmynion sy'n ymwneud â chostau partion

**PENNOD 3****DILYSRWYDD PENDERFYNIADAU A'U CYWIRO***Dilysrwydd penderfyniadau a gorchmynion*

- 182 Dilysrwydd penderfyniadau a gorchmynion penodol sy'n ymwneud ag adeiladau  
 183 Cais i'r Uchel Lys am adolygiad statudol o benderfyniad neu orchymyn  
 184 Apelio i'r Uchel Lys yn erbyn penderfyniad sy'n ymwneud â hysbysiad gorfodi

*Cywiro penderfyniadau Gweinidogion Cymru*

- 185 Ystyr "dogfen penderfyniad" a "gwall cywiradwy"  
 186 Pŵer i gywiro gwallau cywiradwy mewn dogfennau penderfyniad  
 187 Effaith a dilysrwydd hysbysiad cywiro

**PENNOD 4****CYFFREDINOL***Y Goron*

- 188 Cynrychiolaeth buddiannau'r Goron a buddiannau'r Ddugiaeth mewn tir  
 189 Cyflwyno dogfennau i'r Goron  
 190 Camau gorfodi mewn perthynas â thir y Goron

*Dehongli*

- 191 Ystyr "awdurdod lleol" yn y Rhan hon

**RHAN 6****ASEDAU TREFTADAETH ERAILL A CHOFNODION***Parciau a gerddi hanesyddol*

- 192 Dyletswydd i gynnal a chyhoeddi cofrestr o barciau a gerddi hanesyddol

*Enwau lleoedd hanesyddol*

- 193 Dyletswydd i gynnal a chyhoeddi rhestr o enwau lleoedd hanesyddol

*Cofnodion amgylchedd hanesyddol*

- 194 Dyletswydd i gynnal cofnodion amgylchedd hanesyddol  
 195 Mynediad at gofnodion amgylchedd hanesyddol  
 196 Canllawiau i gyrff cyhoeddus penodol ynghylch cofnodion amgylchedd hanesyddol

## RHAN 7 CYFFREDINOL

*Pwerau i wneud gwybodaeth am fuddiannau mewn tir yn ofynnol*

- 197 Pŵer i wneud gwybodaeth yn ofynnol drwy hysbysiad
- 198 Troseddau mewn cysylltiad ag adran 197
- 199 Gwybodaeth am fuddiannau yn nhir y Goron

### *Troseddau*

- 200 Troseddau gan gyrff corfforedig
- 201 Sancsiynau sifil

### *Digollediad*

- 202 Gwneud hawliadau am ddigollediad
- 203 Penderfynu hawliadau digollediad gan yr Uwch Dribiwnlys
- 204 Digollediad am ddibrisiant yng ngwerth tir

### *Cyflwyno dogfennau*

- 205 Cyflwyno hysbysiadau a dogfennau eraill: cyffredinol
- 206 Darpariaeth ychwanegol ynghylch cyflwyno i bersonau sydd â buddiant mewn tir neu sy'n meddiannu tir

### *Achosion arbennig*

- 207 Diffiniadau sy'n ymwneud â'r Goron
- 208 Tir Eglwys Loegr

### *Cyffredinol*

- 209 Rheoliadau o dan y Ddeddf hon
- 210 Dehongli
- 211 Darpariaeth ganlyniadol a darpariaeth drosiannol etc.
- 212 Dod i rym
- 213 Enw byr

Atodlen 1 - Diwedd gwarchodaeth interim ar gyfer henebion

Atodlen 2 - Penderfyniad ar adolygiad gan berson a benodir gan Weinidogion Cymru

Atodlen 3 - Awdurdodiad ar gyfer dosbarthau o waith

Atodlen 4 - Y weithdrefn ar gyfer gorchmynion sy'n addasu neu'n dirymu cydsyniad heneb gofrestredig

Atodlen 5 - Terfynu drwy orchymyn gytundeb partneriaeth heneb gofrestredig

Atodlen 6 - Achosion o dan Ran 2

Atodlen 7 - Diwedd gwarchodaeth Interim neu restru dros dro ar gyfer adeiladau

Atodlen 8 - Y weithdrefn ar gyfer gorchmynion sy'n addasu neu'n dirymu cydsyniad adeilad rhestredig

Atodlen 9 - Camau gweithredu yn dilyn cyflwyno hysbysiad prynu

Atodlen 10 - Y weithdrefn ar gyfer gorchmynion sy'n terfynu cytundebau partneriaethau adeiladau rhestredig

Atodlen 11 - Effaith adran 161 yn peidio â bod yn gymwys i adeilad

Atodlen 12 - Penderfynu apêl gan berson a benodir neu Weinidogion Cymru

Atodlen 13 - Mân ddiwygiadau, diwygiadau canlyniadol a diddymiadau

Atodlen 14 - Darpariaethau trosiannol a darpariaethau arbed



# Deddf yr Amgylchedd Hanesyddol (Cymru) 2023

Deddf gan Senedd Cymru i gydgrynhoi deddfiadau penodol sy'n ymwneud â chadwraeth amgylchedd hanesyddol Cymru. [14 Mehefin 2023]

**Gan ei fod wedi ei basio gan Senedd Cymru ac wedi derbyn cydsyniad Ei Fawrhydi, deddfir fel a ganlyn:**

## RHAN 1

### TROSOLWG

#### 1 Trosolwg

- (1) Mae'r Ddeddf hon yn ffurfio rhan o god o gyfraith sy'n ymwneud ag amgylchedd hanesyddol Cymru.
- (2) Mae'n cydgrynhoi deddfiadau a gynhwysir yn y canlynol neu a wneir odanynt –
  - (a) Deddf Adeiladau Hanesyddol a Henebion Hynafol 1953 (p. 49);
  - (b) Rhannau 1 a 3 o Ddeddf Henebion Hynafol ac Ardaloedd Archaeolegol 1979 (p. 46);
  - (c) Rhannau 14 a 15 o Ddeddf Cynllunio Gwlad a Thref 1990 (p. 8);
  - (d) Deddf Cynllunio (Adeiladau Rhestredig ac Ardaloedd Cadwraeth) 1990 (p. 9);
  - (e) Rhan 5 o Ddeddf Cynllunio a Phrynu Gorfodol 2004 (p. 5);
  - (f) Deddf yr Amgylchedd Hanesyddol (Cymru) 2016 (dccc 4).
- (3) Mae Rhan 2 o'r Ddeddf hon yn gwneud darpariaeth ynghylch cadwraeth henebion o ddiddordeb hanesyddol arbennig, gan gynnwys darpariaeth ar gyfer –
  - (a) cofrestr o henebion o bwysigrwydd cenedlaethol, a gynhelir gan Weinidogion Cymru,
  - (b) rheolaethu gwaith sy'n effeithio ar henebion cofrestredig, ac
  - (c) caffael henebion, gwarcheidiaeth henebion a diogelu henebion.

- (4) Mae Rhan 3 yn gwneud darpariaeth ynghylch cadwraeth adeiladau o ddiddordeb pensaernïol neu hanesyddol, gan gynnwys darpariaeth ar gyfer –
- rhestr o adeiladau o ddiddordeb pensaernïol neu hanesyddol arbennig, a gynhelir gan Weinidogion Cymru,
  - rheolaethu gwaith sy'n effeithio ar adeiladau rhestredig, ac
  - caffael a diogelu adeiladau.
- (5) Mae Rhan 4 yn gwneud darpariaeth ynghylch ardaloedd cadwraeth, gan gynnwys darpariaeth ar gyfer –
- dynodi ardaloedd o ddiddordeb pensaernïol neu hanesyddol arbennig yn ardaloedd cadwraeth gan awdurdodau cynllunio,
  - rheolaethu gwaith ar gyfer dymchwel adeiladau mewn ardaloedd cadwraeth, ac
  - diogelu ac atgyweirio adeiladau mewn ardaloedd cadwraeth.
- (6) Mae Rhan 5 yn gwneud darpariaeth atodol sy'n ymwneud â Rhannau 3 a 4, gan gynnwys –
- darpariaeth ynghylch achosion gerbron Gweinidogion Cymru o dan y Rhannau hynny, gan gynnwys gwrandawiadau ac ymchwiliadau;
  - darpariaeth ynghylch dilysrwydd penderfyniadau a wneir o dan y Rhannau hynny a chywiro'r penderfyniadau hynny.
- (7) Mae Rhan 6 yn darparu ar gyfer –
- cofrestr o barciau a gerddi hanesyddol;
  - rhestr o enwau lleoedd hanesyddol;
  - cofnodion amgylchedd hanesyddol ar gyfer pob ardal yng Nghymru.
- (8) Mae Rhan 7 yn cynnwys darpariaethau cyffredinol, gan gynnwys diwygiadau i ddeddfiadau eraill a diddymiadau deddfiadau eraill.

## RHAN 2

### HENEBION O DDIDDORDEB HANESYDDOL ARBENNIG

#### PENNOD 1

##### TERMAU ALLWEDDOL

## 2 Ystyr “heneb” a “safle heneb”

- (1) Yn y Ddeddf hon ystyr “heneb” yw –
- unrhyw adeilad, unrhyw strwythur neu unrhyw waith (pa un ai uwchben wyneb y tir neu o dan wyneb y tir) ac unrhyw ogof neu unrhyw gloddiad;
  - safle olion unrhyw adeilad, unrhyw strwythur neu unrhyw waith neu safle olion unrhyw ogof neu gloddiad;
  - safle unrhyw gerbyd, unrhyw lestr, unrhyw gerbyd awyr neu unrhyw strwythur symudol arall, neu ran o wrthrych o'r fath, nad yw'n waith, nac yn ffurfio rhan o unrhyw waith, sy'n heneb o fewn paragraff (a);

- (d) safle olion unrhyw wrthrych neu unrhyw ran o wrthrych a grybwyllir ym mharagraff (c);
  - (e) safle unrhyw beth, neu unrhyw grŵp o bethau, sy'n dystiolaeth o weithgarwch dynol blaenorol (ac eithrio safle sy'n dod o fewn paragraff (b), (c) neu (d)).
- (2) At ddibenion is-adran (1) mae unrhyw beiriannau sydd wedi eu gosod yn sownd wrth heneb i'w trin fel pe baent yn rhan o'r heneb os na ellid eu datgysylltu heb eu datgymalu.
  - (3) Nid yw is-adran (1)(a) yn gymwys i unrhyw adeilad crefyddol sy'n cael ei ddefnyddio am y tro at ddibenion crefyddol; ond mae hyn yn ddarostyngedig i unrhyw eithriadau a bennir mewn rheoliadau a wneir gan Weinidogion Cymru.
  - (4) Nid yw is-adrannau (1)(c) a (d) yn gymwys –
    - (a) i safle unrhyw wrthrych neu ei olion oni bai bod lleoliad y gwrthrych hwnnw neu ei olion yn y safle penodol hwnnw yn fater o ddiddordeb i'r cyhoedd;
    - (b) i safle unrhyw lestr neu ei olion sy'n cael ei warchod gan orchymyn o dan adran 1 o Ddeddf Gwarchod Llongddrylliadau 1973 (p. 33) sy'n dynodi ardal o gwmpas y safle yn ardal gyfyngedig.
  - (5) At ddibenion y Ddeddf hon mae safle heneb yn cynnwys nid yn unig y tir y mae ynddo, arno neu odano ond hefyd unrhyw dir sy'n rhan o'r tir hwnnw neu sy'n cydffinio â'r tir hwnnw y mae'n ymddangos i Weinidogion Cymru neu awdurdod lleol, wrth arfer mewn perthynas â'r heneb honno unrhyw un neu ragor o'u swyddogaethau hwy neu o'i swyddogaethau ef o dan y Rhan hon, ei fod yn hanfodol er mwyn cynnal a diogelu'r heneb.
  - (6) Mae cyfeiriadau yn y Ddeddf hon at heneb yn cynnwys –
    - (a) safle'r heneb o dan sylw,
    - (b) grŵp o henebion, ac
    - (c) unrhyw ran o heneb neu grŵp o henebion.
  - (7) Mae cyfeiriadau yn y Ddeddf hon at safle heneb –
    - (a) yn gyfeiriadau at yr heneb ei hun pan fo'n safle, a
    - (b) mewn unrhyw achos arall yn cynnwys yr heneb ei hun.
  - (8) Yn yr adran hon mae "olion" yn cynnwys unrhyw arlliw neu unrhyw arwydd o fodolaeth flaenorol y peth o dan sylw.

## PENNOD 2

### COFRESTR O HENEBION O BWYSIGRWYDD CENEDLAETHOL

#### *Cofrestr o henebion*

### 3 Dyletswydd i gynnal a chyhoeddi cofrestr o henebion

- (1) Rhaid i Weinidogion Cymru gynnal cofrestr o henebion yng Nghymru y maent yn ystyried eu bod o bwysigrwydd cenedlaethol, a rhaid iddynt gyhoeddi'r gofrestr gyfredol.
- (2) Rhaid i gofnod yn y gofrestr ar gyfer heneb gynnwys map a gynhelir gan Weinidogion Cymru sy'n nodi ffiniau'r heneb.
- (3) Caiff Gweinidogion Cymru ddiwygio'r gofrestr –
  - (a) drwy ychwanegu heneb;



- (b) drwy ddileu heneb;
  - (c) drwy ddiwygio'r cofnod ar gyfer heneb (pa un ai drwy ddileu unrhyw beth a gynhwyswyd yn flaenorol fel rhan o'r heneb neu ychwanegu unrhyw beth nas cynhwyswyd yn flaenorol, neu fel arall).
- (4) Ni chaiff Gweinidogion Cymru ychwanegu at y gofrestr unrhyw adeilad nac unrhyw strwythur a feddiennir fel annedd gan unrhyw berson ac eithrio gofalwr yr adeilad neu'r strwythur neu aelod o deulu'r gofalwr.
  - (5) Mae cofnod yn y gofrestr sy'n cofnodi i heneb gael ei chynnwys yn bridiant tir lleol.
  - (6) Yn y Rhan hon ystyr "y gofrestr" yw'r gofrestr a gynhelir o dan yr adran hon.
  - (7) Yn y Ddeddf hon ystyr "heneb gofrestredig" yw heneb sydd wedi ei chynnwys yn y gofrestr.

#### **4 Hysbysu perchennog etc. pan fo'r gofrestr wedi ei diwygio**

- (1) Mae is-adran (2) yn gymwys pan fo Gweinidogion Cymru yn diwygio'r gofrestr –
  - (a) drwy ychwanegu heneb,
  - (b) drwy ddileu heneb, neu
  - (c) drwy ddiwygio'r cofnod ar gyfer heneb.
- (2) Cyn gynted â phosibl ar ôl diwygio'r gofrestr rhaid i Weinidogion Cymru gyflwyno hysbysiad eu bod wedi gwneud hynny –
  - (a) i bob perchennog a phob meddiannydd ar yr heneb, a
  - (b) i bob awdurdod lleol y mae'r heneb yn ei ardal.
- (3) Pan fo Gweinidogion Cymru wedi ychwanegu heneb at y gofrestr neu wedi diwygio'r cofnod yn y gofrestr ar gyfer heneb –
  - (a) rhaid i'r hysbysiad bennu'r dyddiad y gwnaethant hynny, a
  - (b) rhaid iddynt gynnwys gyda'r hysbysiad gopi o'r cofnod neu'r cofnod diwygiedig ar gyfer yr heneb yn y gofrestr.

*Cynigion i ychwanegu heneb at y gofrestr neu ddileu heneb o'r gofrestr: ymgynghori a gwarchodaeth interim*

#### **5 Ymgynghori cyn ychwanegu heneb at y gofrestr neu ddileu heneb o'r gofrestr**

- (1) Mae is-adran (2) yn gymwys pan fo Gweinidogion Cymru yn cynnig diwygio'r gofrestr –
  - (a) drwy ychwanegu heneb,
  - (b) drwy ddileu heneb, neu
  - (c) drwy ddiwygio'r cofnod ar gyfer heneb i ddileu unrhyw beth a gynhwyswyd yn flaenorol fel rhan o'r heneb neu ychwanegu unrhyw beth nas cynhwyswyd yn flaenorol.
- (2) Rhaid i Weinidogion Cymru gyflwyno hysbysiad i'r personau a grybwyllir yn is-adran (3) –
  - (a) sy'n nodi'r diwygiad arfaethedig, a
  - (b) sy'n gwahodd y personau hynny i gyflwyno sylwadau ysgrifenedig ynghylch y cynnig.

- (3) Y personau yw –
- (a) pob perchennog a phob meddiannydd ar yr heneb,
  - (b) pob awdurdod lleol y mae'r heneb yn ei ardal, ac
  - (c) unrhyw bersonau eraill y mae Gweinidogion Cymru yn ystyried eu bod yn briodol gan fod ganddynt wybodaeth arbennig am yr heneb neu am henebion o ddiddordeb hanesyddol neu archaeolegol yn fwy cyffredinol, neu ddiddordeb arbennig ynddi neu ynddynt.
- (4) Rhaid i hysbysiad o dan is-adran (2) –
- (a) pennu o fewn pa gyfnod y caniateir cyflwyno sylwadau, a
  - (b) yn achos cynnig i ychwanegu heneb neu i ychwanegu unrhyw beth fel rhan o heneb –
    - (i) cynnwys datganiad o effaith adran 6 (gwarchodaeth interim), a
    - (ii) pennu'r dyddiad y mae gwarchodaeth interim yn cymryd effaith o dan yr adran honno.
- (5) Rhaid i'r cyfnod a bennir o dan is-adran (4)(a) fod o leiaf 28 o ddiwrnodau sy'n dechrau â'r diwrnod y cyflwynir yr hysbysiad.

## 6 **Gwarchodaeth interim wrth aros am benderfyniad ar ddiwygiadau penodol sy'n ymwneud â'r gofrestr**

- (1) Mae'r adran hon yn gymwys pan fo Gweinidogion Cymru yn cyflwyno hysbysiad o dan adran 5(2) ynghylch cynnig i ddiwygio'r gofrestr –
- (a) drwy ychwanegu heneb, neu
  - (b) drwy ddiwygio'r cofnod ar gyfer heneb drwy ychwanegu unrhyw beth fel rhan o'r heneb.
- (2) O ddechrau'r diwrnod a bennir o dan adran 5(4)(b)(ii) mae'r Ddeddf hon yn cael effaith –
- (a) yn achos cynnig i ychwanegu heneb at y gofrestr, fel pe bai'r heneb yn heneb gofrestredig;
  - (b) yn achos cynnig i ddiwygio'r cofnod ar gyfer heneb, fel pe bai'r diwygiad wedi ei wneud.
- (3) Cyfeirir yn y Rhan hon at y warchodaeth a roddir yn rhinwedd is-adran (2) fel "gwarchodaeth interim".
- (4) Rhaid i Weinidogion Cymru –
- (a) cyhoeddi rhestr o'r henebion sy'n ddarostyngedig i warchodaeth interim, a
  - (b) darparu copi o'r hysbysiad a gyflwynir o dan adran 5(2) mewn cysylltiad â heneb o'r fath i unrhyw berson sy'n gofyn am gopi.

## 7 **Pan ddaw gwarchodaeth interim i ben**

- (1) Daw gwarchodaeth interim a roddir gan adran 6(2)(a) (cynnig i ychwanegu heneb at y gofrestr) i ben mewn perthynas â heneb –
- (a) pan fo Gweinidogion Cymru yn ychwanegu'r heneb at y gofrestr, ar ddechrau'r diwrnod a bennir yn yr hysbysiad o dan adran 4(2), neu

- (b) pan fo Gweinidogion Cymru yn penderfynu peidio ag ychwanegu'r heneb at y gofrestr, ar ddechrau'r diwrnod a bennir mewn hysbysiad a gyflwynir ganddynt i'r personau a grybwyllir yn is-adran (3).
- (2) Daw gwarchodaeth interim a roddir gan adran 6(2)(b) (cynnig i ddiwygio cofnod yn y gofrestr sy'n ymwneud â heneb) i ben mewn perthynas â heneb—
  - (a) pan fo Gweinidogion Cymru yn diwygio'r cofnod yn y gofrestr, ar ddechrau'r diwrnod a bennir yn yr hysbysiad o dan adran 4(2), neu
  - (b) pan fo Gweinidogion Cymru yn penderfynu peidio â diwygio'r cofnod yn y gofrestr, ar ddechrau'r diwrnod a bennir mewn hysbysiad a gyflwynir ganddynt i'r personau a grybwyllir yn is-adran (3).
- (3) Y personau y cyfeirir atynt yn is-adrannau (1)(b) a (2)(b) yw—
  - (a) pob perchennog a phob meddiannydd ar yr heneb, a
  - (b) pob awdurdod lleol y mae'r heneb yn ei ardal.
- (4) Mae Atodlen 1 yn gwneud darpariaeth ynghylch effaith gwarchodaeth interim yn dod i ben o dan is-adrannau (1)(b) a (2)(b).

## 8 Digollediad am golled neu ddifrod a achosir gan warchodaeth interim

- (1) Mae'r adran hon yn gymwys pan fo gwarchodaeth interim yn dod i ben mewn perthynas â heneb oherwydd hysbysiad o dan adran 7(1)(b) neu (2)(b).
- (2) Mae gan unrhyw berson a oedd â buddiant yn yr heneb pan gymerodd y warchodaeth interim effaith hawlogaeth, wrth wneud hawliad i Weinidogion Cymru, i gael ei ddigolledu ganddynt am unrhyw golled neu unrhyw ddifrod a ddioddefir gan y person y gellir ei phriodoli neu ei briodoli'n uniongyrchol i'r warchodaeth interim.
- (3) Mae'r golled neu'r difrod y mae digollediad yn daladwy amdani neu amdano yn cynnwys unrhyw swm sy'n daladwy gan yr hawlydd mewn cysylltiad â thor contract a achosir gan yr angen i stopio neu ganslo gwaith i'r heneb oherwydd y warchodaeth interim.
- (4) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau pan ddaw'r warchodaeth interim i ben.

*Adolygu penderfyniadau i ddiwygio'r gofrestr i ychwanegu henebion etc.*

## 9 Adolygu penderfyniad i ychwanegu heneb at y gofrestr etc.

- (1) Pan fo Gweinidogion Cymru—
  - (a) yn ychwanegu heneb at y gofrestr, neu
  - (b) yn diwygio'r cofnod yn y gofrestr ar gyfer heneb i ychwanegu unrhyw beth fel rhan o'r heneb,

rhaid i'r hysbysiad o dan adran 4(2) ddatgan y caiff unrhyw berchennog neu unrhyw feddiannydd ar yr heneb wneud cais i Weinidogion Cymru sy'n gofyn am adolygiad o'r penderfyniad.
- (2) Ni chaniateir gwneud cais ond ar y sail nad yw'r heneb neu'r rhan o'r heneb (yn ôl y digwydd) o bwysigrwydd cenedlaethol.

- (3) Pan fo perchennog neu feddiannydd yn gwneud cais am adolygiad, rhaid i Weinidogion Cymru benodi person –
  - (a) i gynnal yr adolygiad, a
  - (b) i wneud penderfyniad ar yr adolygiad.
- (4) Caiff Gweinidogion Cymru drwy reoliadau bennu disgrifiadau o achosion pan fo rhaid iddynt hwy, yn lle person a benodir ganddynt, gynnal adolygiad a gwneud penderfyniad arno.
- (5) Rhaid i Weinidogion Cymru wneud unrhyw ddiwygiad i'r gofrestr y maent yn ystyried ei fod yn briodol i roi effaith i'r penderfyniad ar adolygiad.
- (6) Caiff Gweinidogion Cymru drwy reoliadau ddiwygio is-adran (2) –
  - (a) i ychwanegu sail ar gyfer adolygiad;
  - (b) i addasu sail ar gyfer adolygiad;
  - (c) i ddileu sail ar gyfer adolygiad.

## 10 Darpariaeth atodol ynghylch adolygiadau

- (1) Rhaid i Weinidogion Cymru drwy reoliadau wneud darpariaeth ynghylch –
  - (a) y ffurf a'r ffordd y mae rhaid i gais o dan adran 9 gael ei wneud;
  - (b) yr wybodaeth y mae rhaid ei darparu i Weinidogion Cymru, neu y caiff Gweinidogion Cymru ei gwneud yn ofynnol, mewn cysylltiad â chais;
  - (c) y cyfnod y mae rhaid i gais gael ei wneud ynddo.
- (2) Rhaid i adolygiad o dan adran 9 gael ei gynnal mewn un neu ragor o'r ffyrdd a ganlyn (fel y'i penderfynir gan y person sy'n cynnal yr adolygiad) –
  - (a) drwy ymchwiliad lleol;
  - (b) drwy wrandawriad;
  - (c) ar sail sylwadau ysgrifenedig.
- (3) Caiff Gweinidogion Cymru drwy reoliadau wneud darpariaeth bellach mewn cysylltiad ag adolygiadau o dan adran 9.
- (4) Caiff rheoliadau o dan is-adran (1) neu (3) awdurdodi Gweinidogion Cymru neu bersonau a benodir o dan adran 9(3) –
  - (a) i benderfynu materion o ddisgrifiad a bennir yn y rheoliadau, a
  - (b) i roi cyfarwyddydau mewn perthynas â'r materion hynny.
- (5) Mae Atodlenni 2 a 6 yn gwneud darpariaeth bellach ynghylch adolygiadau o dan adran 9.

### PENNOD 3

#### RHEOLAETHU GWAITH SY'N EFFEITHIO AR HENEBION COFRESTREDIG

##### *Awdurdodi gwaith*

## 11 Gofyniad i waith gael ei awdurdodi

- (1) Ni chaiff person gyflawni gwaith y mae'r adran hon yn gymwys iddo, na pheri na chaniatáu i waith o'r fath gael ei gyflawni, oni bai bod y gwaith wedi ei awdurdodi o dan y Bennod hon.

- (2) Mae'r adran hon yn gymwys –
- (a) i waith sy'n arwain at ddymchwel neu ddinistrio heneb gofrestredig, neu at unrhyw ddifrod i heneb gofrestredig;
  - (b) i waith at ddiben symud ymaith neu atgyweirio heneb gofrestredig neu unrhyw ran ohoni, neu wneud unrhyw addasiadau i'r heneb neu i unrhyw ran ohoni neu unrhyw ychwanegiadau ati neu at unrhyw ran ohoni;
  - (c) i weithrediadau i foddi tir, neu weithrediadau tipio ar dir, y mae heneb gofrestredig ynddo, arno neu odano.

## 12 Awdurdodi dosbarthau o waith

- (1) Mae gwaith y mae adran 11 yn gymwys iddo wedi ei awdurdodi os yw'r gwaith o fewn dosbarth o waith a ddisgrifir yn y tabl yn Atodlen 3.
- (2) Mae awdurdodiad o dan is-adran (1) yn ddarostyngedig i unrhyw eithriadau neu unrhyw amodau a bennir yn y tabl mewn perthynas â gwaith o ddosbarth penodol.
- (3) Caiff Gweinidogion Cymru gyfarwyddo nad yw is-adran (1) yn gymwys i unrhyw heneb gofrestredig a bennir yn y cyfarwyddyd.
- (4) Nid yw cyfarwyddyd o dan is-adran (3) yn cymryd effaith hyd nes bod hysbysiad ohono wedi ei gyflwyno i bob perchennog a phob meddiannydd ar yr heneb o dan sylw.
- (5) Nid yw is-adran (1) yn awdurdodi gwaith yn groes i unrhyw eithriad neu unrhyw amod sydd ynghlwm wrth gydsyniad heneb gofrestredig.
- (6) Mae awdurdodiad o dan is-adran (1) yn cael effaith er budd yr heneb a phob person sydd â buddiant yn yr heneb am y tro; ond mae hyn yn ddarostyngedig i unrhyw ddarpariaeth i'r gwrthwyneb yn Atodlen 3.

## 13 Awdurdodi gwaith drwy gydsyniad heneb gofrestredig

- (1) Mae gwaith y mae adran 11 yn gymwys iddo wedi ei awdurdodi –
  - (a) os yw cydsyniad ysgrifenedig i'w gyflawni wedi ei roi gan Weinidogion Cymru, a
  - (b) os yw'r gwaith yn cael ei gyflawni yn unol â thelerau'r cydsyniad (gan gynnwys unrhyw amodau sydd ynghlwm wrtho).
- (2) Pan –
  - (a) bo gwaith y mae adran 11 yn gymwys iddo wedi ei gyflawni heb fod wedi ei awdurdodi o dan y Bennod hon, a
  - (b) bo Gweinidogion Cymru yn rhoi cydsyniad ysgrifenedig ar gyfer y gwaith, mae'r gwaith wedi ei awdurdodi o adeg rhoi'r cydsyniad.
- (3) Cyfeirir at gydsyniad o dan is-adran (1) neu (2) yn y Rhan hon fel cydsyniad heneb gofrestredig.

*Ceisiadau am gydsyniad heneb gofrestredig*

## 14 Gwneud cais am gydsyniad heneb gofrestredig

- (1) Rhaid i gais am gydsyniad heneb gofrestredig gael ei wneud i Weinidogion Cymru.
- (2) Rhaid i gais –

- (a) nodi'r ardal o dir y mae'n ymwneud â hi,
  - (b) disgrifio'r gwaith y mae'n ymwneud ag ef ac effaith debygol y gwaith ar yr heneb, ac
  - (c) cynnwys unrhyw wybodaeth arall sy'n ofynnol gan Weinidogion Cymru.
- (3) Caiff Gweinidogion Cymru drwy reoliadau wneud darpariaeth ynghylch –
- (a) ffurf a chynnwys cais (a gaiff gynnwys darpariaeth ar gyfer defnyddio ffurflen sydd i'w chyhoeddi neu i'w darparu gan Weinidogion Cymru);
  - (b) sut y mae rhaid gwneud cais;
  - (c) dogfennau neu ddeunyddiau eraill y mae rhaid eu cynnwys gyda chais.
- (4) Caiff Gweinidogion Cymru gytuno â cheisydd y caniateir gwneud cais nad yw'n unol ag is-adran (2) neu unrhyw ddarpariaeth a wneir o dan is-adran (3), os yw'r cais yn ymwneud â gwaith y mae is-adran (5) yn gymwys iddo.
- (5) Mae'r is-adran hon yn gymwys i fân waith a gyflawnir at ddiben –
- (a) symud ymaith neu atgyweirio heneb gofrestredig neu unrhyw ran ohoni, neu
  - (b) gwneud unrhyw addasiadau i'r heneb neu unrhyw ychwanegiadau ati.
- (6) Caiff Gweinidogion Cymru drwy reoliadau bennu achosion ychwanegol pan ganiateir i gais am gydsyniad heneb gofrestredig gael ei wneud mewn ffordd nad yw'n unol ag is-adran (2) neu unrhyw ddarpariaeth a wneir o dan is-adran (3); a chaiff y rheoliadau roi disgrisiwn i Weinidogion Cymru.

## 15 **Declarasiynau o berchnogaeth mewn cysylltiad â heneb**

- (1) Caiff Gweinidogion Cymru wrthod ystyried cais am gydsyniad heneb gofrestredig oni bai bod un o'r declarasiynau a ganlyn a lofnodwyd gan neu ar ran y ceisydd wedi ei gynnwys gyda'r cais –
- (a) declarasiwn nad oedd unrhyw berson ac eithrio'r ceisydd yn berchennog ar yr heneb ar ddechrau'r 21 o ddiwrnodau a ddaeth i ben â diwrnod y cais,
  - (b) declarasiwn bod y ceisydd wedi rhoi hysbysiad i'r holl bersonau (ac eithrio'r ceisydd) a oedd, ar ddechrau'r cyfnod hwnnw, yn berchnogion ar yr heneb, o'r pethau sy'n ofynnol gan is-adran (2) ac unrhyw reoliadau o dan is-adran (3),
  - (c) declarasiwn bod y ceisydd –
    - (i) yn methu â gwneud declarasiwn o dan baragraff (a) na (b),
    - (ii) wedi rhoi hysbysiad i'r rhai hynny o'r personau a grybwyllir ym mharagraff (b) ac a enwir yn y declarasiwn, o'r pethau sy'n ofynnol gan is-adran (2) ac unrhyw reoliadau o dan is-adran (3), ond
    - (iii) wedi methu â chanfod enwau a chyfeiriadau gweddill y personau a grybwyllir ym mharagraff (b), er iddo gymryd pob cam rhesymol i wneud hynny, neu
  - (d) declarasiwn bod y ceisydd –
    - (i) yn methu â gwneud declarasiwn o dan baragraff (a), a



- (ii) er iddo gymryd pob cam rhesymol i wneud hynny, wedi methu â chanfod enwau a chyfeiriadau unrhyw un o'r personau a grybwyllir ym mharagraff (b).
- (2) Rhaid i hysbysiad at ddibenion is-adran (1)(b) neu (c)(ii) –
  - (a) nodi'r heneb y mae'n ymwneud â hi (gan gynnwys cyfeiriad neu leoliad yr heneb, a'i henw (os oes un)),
  - (b) datgan bod cais am gydsyniad heneb gofrestredig i'w wneud mewn perthynas â'r heneb,
  - (c) nodi'r person sy'n gwneud y cais (a, phan fo'r ceisydd yn gwneud cais ar ran rhywun, nodi'r person arall), a
  - (d) disgrifio'r gwaith y mae'r cais yn ymwneud ag ef.
- (3) Caiff Gweinidogion Cymru drwy reoliadau bennu pethau ychwanegol y mae rhaid eu cynnwys mewn hysbysiad.
- (4) Mae'n drosedd i berson gan ymhoni ei fod yn cydymffurfio â'r adran hon –
  - (a) gwneud declarasiwn y mae'r person yn gwybod ei fod yn anwir neu'n gamarweiniol mewn modd perthnasol, neu
  - (b) yn ddi-hid, wneud declarasiwn sy'n anwir neu'n gamarweiniol mewn modd perthnasol.
- (5) Mae person sy'n euog o drosedd o dan is-adran (4) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (6) Yn yr adran hon ystyr "perchennog" yw –
  - (a) perchennog ar yr ystad rydd-ddaliadol, neu
  - (b) tenant o dan les a roddir neu a estynnir am gyfnod penodol sydd ag o leiaf 7 mlynedd yn weddill.

## 16 Pŵer i wrthod ystyried ceisiadau tebyg

- (1) Caiff Gweinidogion Cymru wrthod ystyried cais am gydsyniad heneb gofrestredig –
  - (a) os yw Gweinidogion Cymru, yn y 2 flynedd sy'n dod i ben â'r diwrnod y daw'r cais i law, wedi gwrthod cais tebyg, a
  - (b) os ydynt yn ystyried na fu unrhyw newid sylweddol mewn unrhyw ystyriaethau perthnasol ers i'r cais tebyg gael ei wrthod.
- (2) Caiff Gweinidogion Cymru wrthod ystyried cais am gydsyniad heneb gofrestredig os gwneir y cais ar adeg pan fydd cais tebyg yn cael ei ystyried.
- (3) At ddibenion yr adran hon mae cais yn debyg i gais arall os (a dim ond os) yw Gweinidogion Cymru yn ystyried bod y gwaith y mae'r ceisiadau yn berthnasol iddo yr un fath neu'n sylweddol yr un fath.

*Penderfynu ceisiadau am gydsyniad heneb gofrestredig*

## 17 Y weithdrefn ar gyfer penderfynu ceisiadau ac effaith rhoi cydsyniad

- (1) Caiff Gweinidogion Cymru roi cydsyniad heneb gofrestredig mewn cysylltiad â'r holl waith neu unrhyw ran o'r gwaith y mae cais yn ymwneud ag ef.

- (2) Cyn penderfynu pa un ai i roi cydsyniad heneb gofrestredig ar gais, caiff Gweinidogion Cymru wneud un neu ragor o'r canlynol –
  - (a) peri i ymchwiliad lleol gael ei gynnal,
  - (b) rhoi cyfle i'r ceisydd, ac unrhyw berson arall, i ymddangos gerbron person a benodir gan Weinidogion Cymru a chael gwrandawriad ganddo, neu
  - (c) rhoi cyfle i'r ceisydd, ac unrhyw berson arall, i gyflwyno sylwadau ysgrifenedig i berson a benodir gan Weinidogion Cymru.
- (3) Cyn penderfynu pa un ai i roi cydsyniad heneb gofrestredig ar gais, rhaid i Weinidogion Cymru –
  - (a) ym mhob achos, ystyried unrhyw sylwadau a gyflwynir gan unrhyw berson mewn cysylltiad â'r cais hwnnw, a
  - (b) os cynhaliwyd ymchwiliad neu wrandawriad neu os cyflwynwyd sylwadau yn unol ag is-adran (2)(c), ystyried adroddiad y person a gynhaliodd yr ymchwiliad neu'r gwrandawriad neu y cyflwynwyd y sylwadau iddo.
- (4) Rhaid i Weinidogion Cymru gyflwyno hysbysiad o'u penderfyniad mewn cysylltiad â'r cais i'r ceisydd ac i bob person sydd wedi cyflwyno sylwadau mewn cysylltiad â'r cais.
- (5) Mae cydsyniad heneb gofrestredig yn cael effaith er budd yr heneb a phob person sydd â buddiant yn yr heneb am y tro; ond mae hyn yn ddarostyngedig i delerau'r cydsyniad.
- (6) Mae Atodlen 6 yn gymwys mewn perthynas ag achosion a gynhelir o dan is-adran (2).

*Rhoi cydsyniad heneb gofrestredig yn ddarostyngedig i amodau*

## 18 Pŵer i roi cydsyniad yn ddarostyngedig i amodau

- (1) Caniateir rhoi cydsyniad heneb gofrestredig yn ddarostyngedig i amodau.
- (2) Caiff amod, er enghraifft –
  - (a) gosod gofynion mewn cysylltiad â'r ffordd y mae'r gwaith neu unrhyw ran o'r gwaith i'w gyflawni neu mewn cysylltiad â'r personau sydd i gyflawni'r gwaith neu unrhyw ran o'r gwaith;
  - (b) ei gwneud yn ofynnol i berson a awdurdodir gan Weinidogion Cymru gael cyfle, cyn i unrhyw waith ddechrau, i archwilio'r heneb a'i safle ac i gyflawni unrhyw gloddiadau y mae Gweinidogion Cymru yn ystyried eu bod yn ddymunol at ddiben ymchwiliad archaeolegol.

## 19 Amod ynghylch y cyfnod y mae rhaid i'r gwaith ddechrau ynddo

- (1) Rhaid rhoi cydsyniad heneb gofrestredig yn ddarostyngedig i'r amod bod rhaid i'r gwaith y mae'n ymwneud ag ef ddechrau cyn diwedd cyfnod a bennir yn yr amod ac sy'n dechrau â'r diwrnod y rhoddir y cydsyniad.
- (2) Os rhoddir cydsyniad heb yr amod sy'n ofynnol gan is-adran (1), mae i'w drin fel pe bai wedi ei roi yn ddarostyngedig i'r amod bod rhaid i'r gwaith y mae'n ymwneud ag ef ddechrau o fewn 5 mlynedd sy'n dechrau â'r diwrnod y rhoddwyd y cydsyniad.
- (3) Nid yw'r adran hon yn gymwys –



- (a) i gydsyniad heneb gofrestrredig sy'n darparu ei fod yn peidio â chael effaith ar ddiwedd cyfnod a bennir yn y cydsyniad (ni waeth a yw unrhyw waith wedi dechrau),
- (b) i gydsyniad a roddir o dan adran 13(2) (cydsyniad ar gyfer gwaith sydd eisoes wedi ei gyflawni), nac
- (c) i gydsyniad a roddir gan gytundeb partneriaeth heneb gofrestrredig neu gytundeb rheoli (gweler adrannau 25 a 51).

*Addasu a dirymu cydsyniad heneb gofrestrredig*

**20 Addasu a dirymu cydsyniad**

- (1) Caiff Gweinidogion Cymru drwy orchymyn addasu neu ddirymu cydsyniad heneb gofrestrredig i unrhyw raddau.
- (2) Ni chaniateir gwneud gorchymyn o dan yr adran hon mewn perthynas –
  - (a) â chydsyniad heneb gofrestrredig a roddir o dan adran 13(2) (cydsyniad ar gyfer gwaith sydd eisoes wedi ei gyflawni), na
  - (b) â chydsyniad a roddir gan gytundeb partneriaeth heneb gofrestrredig (gweler Pennod 4).
- (3) Mae Atodlenni 4 a 6 yn gwneud darpariaeth mewn cysylltiad â gorchymynion o dan yr adran hon.

*Digollediad*

**21 Digollediad am wrthod cydsyniad heneb gofrestrredig neu roi cydsyniad yn ddarostyngedig i amodau**

- (1) Mae'r adran hon yn gymwys –
  - (a) pan fo cais am gydsyniad heneb gofrestrredig ar gyfer gwaith o ddisgrifiad a grybwyllir yn is-adran (3) yn cael ei wrthod, neu
  - (b) pan fo cais am gydsyniad heneb gofrestrredig ar gyfer gwaith o ddisgrifiad o'r fath yn cael ei ganiatáu yn ddarostyngedig i amodau.
- (2) Mae gan unrhyw berson sydd â buddiant yn yr heneb o dan sylw hawlogaeth, wrth wneud hawliad i Weindogion Cymru, i gael ei ddigolledu ganddynt am unrhyw wariant yr eir iddo neu unrhyw golled arall neu unrhyw ddifrod arall a ddioddefir gan y person y gellir ei phriodoli neu ei briodoli'n uniongyrchol i effaith y penderfyniad ar y cais; ond mae hyn yn ddarostyngedig i'r darpariaethau a ganlyn yn yr adran hon.
- (3) Y gwaith y mae digollediad yn daladwy mewn cysylltiad ag ef o dan yr adran hon yw –
  - (a) gwaith sy'n rhesymol angenrheidiol ar gyfer cyflawni unrhyw ddatblygiad yr oedd caniatâd cynllunio –
    - (i) wedi ei roi ar ei gyfer (ac eithrio drwy orchymyn datblygu cyffredinol) cyn i'r heneb o dan sylw ddod yn heneb gofrestrredig, a
    - (ii) yn dal i fod yn effeithiol pan wnaed y cais am gydsyniad heneb gofrestrredig,
  - (b) gwaith sy'n ddatblygiad y rhoddir caniatâd cynllunio ar ei gyfer drwy orchymyn datblygu cyffredinol,

- (c) gwaith nad yw'n ddatblygiad, a
  - (d) gwaith sy'n rhesymol angenrheidiol er mwyn parhau â defnydd o'r heneb at ddiben yr oedd yn cael ei defnyddio ato yn union cyn dyddiad y cais am gydsyniad heneb gofrestredig (ond gan anwybyddu unrhyw ddefnydd sy'n torri unrhyw gyfyngiadau cyfreithiol sy'n gymwys i'r defnydd o'r heneb).
- (4) Mae'r digollediad sy'n daladwy o dan yr adran hon mewn cysylltiad â gwaith o fewn is-adran (3)(a) wedi ei gyfyngu i ddigollediad ar gyfer gwariant yr eir iddo neu golled arall neu ddifrod arall a ddioddefir yn rhinwedd y ffaith, o ganlyniad i benderfyniad Gweinidogion Cymru, na ellid cyflawni datblygiad y rhoddwyd y caniatâd cynllunio o dan sylw ar ei gyfer heb dorri adran 11 (gofyniad i waith gael ei awdurdodi).
  - (5) Nid oes gan berson hawlogaeth i gael ei ddigolledu o dan yr adran hon mewn cysylltiad ag unrhyw waith o fewn is-adran (3)(b) nac (c) os byddai'r gwaith o dan sylw neu unrhyw ran o'r gwaith yn arwain at ddymchwel neu ddinistrio'r heneb yn gyfan gwbl neu'n rhannol, neu os gallai wneud hynny.
  - (6) Pan fo cydsyniad heneb gofrestredig yn cael ei roi yn ddarostyngedig i amodau, nid oes gan berson hawlogaeth i gael ei ddigolledu o dan yr adran hon mewn cysylltiad ag unrhyw waith o fewn is-adran (3)(d) oni fyddai cydymffurfio â'r amodau hynny i bob pwrpas yn ei gwneud yn amhosibl defnyddio'r heneb at y diben yr oedd yn cael ei defnyddio ato cyn dyddiad y cais.
  - (7) Wrth asesu unrhyw ddigollediad sy'n daladwy o dan yr adran hon am golled neu ddifrod sy'n ddibrisiant yng ngwerth buddiant mewn tir –
    - (a) mae i'w thybio y byddai unrhyw gais dilynol am gydsyniad heneb gofrestredig ar gyfer gwaith o ddisgrifiad tebyg yn cael ei benderfynu yn yr un ffordd, ond
    - (b) os ymrwymodd Gweinidogion Cymru, yn achos gwrthod cydsyniad heneb gofrestredig, wrth wrthod y cydsyniad hwnnw, i roi cydsyniad ar gyfer gwaith arall a fyddai'n effeithio ar yr heneb pe bai cais yn cael ei wneud, rhaid rhoi sylw i'r ymrwymiad hwnnw.
  - (8) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â –
    - (a) diwrnod yr hysbysiad o wrthod cydsyniad heneb gofrestredig, neu
    - (b) y diwrnod y rhoddir cydsyniad heneb gofrestredig.
  - (9) Yn yr adran hon ystyr "gorchymyn datblygu cyffredinol" yw gorchymyn datblygu o dan adran 59 o Ddeddf Cynllunio Gwlad a Thref 1990 (p. 8) sy'n gymwys i'r holl dir yng Nghymru (yn ddarostyngedig i unrhyw eithriadau a bennir yn y gorchymyn).

## 22 Adennill digollediad a dalwyd o dan adran 21 ar ôl rhoi cydsyniad dilynol

- (1) Mae'r adran hon yn gymwys pan –
  - (a) mewn achos pan fo digollediad o dan adran 21 wedi ei dalu o ganlyniad i wrthod cydsyniad heneb gofrestredig, fo Gweinidogion Cymru wedyn yn rhoi cydsyniad heneb gofrestredig ar gyfer y cyfan neu unrhyw ran o'r gwaith y talwyd y digollediad mewn cysylltiad ag ef, a

- (b) mewn achos pan fo digollediad o dan yr adran honno wedi ei dalu o ganlyniad i roi cydsyniad heneb gofrestredig yn ddarostyngedig i amodau, fo Gweinidogion Cymru wedyn –
  - (i) yn addasu'r cydsyniad fel nad yw'r amodau, neu unrhyw un neu ragor ohonynt, yn gymwys mwyach i'r cyfan neu unrhyw ran o'r gwaith y talwyd y digollediad mewn cysylltiad ag ef, neu
  - (ii) yn rhoi cydsyniad newydd ar gyfer y cyfan neu unrhyw ran o'r gwaith hwnnw heb yr amodau hynny, neu unrhyw un neu ragor ohonynt.
- (2) Nid yw'r adran hon yn gymwys mewn unrhyw achos oni bai bod Gweinidogion Cymru wedi cyflwyno hysbysiad o dalu digollediad i gyngor pob sir neu fwrdeistref sirol y mae'r heneb ynddi.
- (3) Wrth roi neu addasu cydsyniad heneb gofrestredig mewn achos y mae'r adran hon yn gymwys iddo, caiff Gweinidogion Cymru wneud hynny ar delerau nad oes unrhyw waith y talwyd y digollediad mewn cysylltiad ag ef i'w gyflawni o dan y cydsyniad hyd nes y bydd y swm adenilladwy wedi ei ad-dalu i Weinidogion Cymru neu wedi ei sicrhau er boddhad iddynt.
- (4) Yn is-adran (3) mae i "swm adenilladwy" yr ystyr a roddir gan adran 23.
- (5) Rhaid i hysbysiad o dan is-adran (2) bennu –
  - (a) y penderfyniad a arweiniodd at yr hawlogaeth i gael digollediad,
  - (b) yr heneb y mae'r penderfyniad yn effeithio arni, ac
  - (c) swm y digollediad.
- (6) Mae hysbysiad o dan is-adran (2) yn bridiant tir lleol, ac at ddibenion Deddf Pridiannau Tir Lleol 1975 (p. 76) mae'r cyngor y rhoddir hysbysiad iddo o dan yr is-adran honno i'w drin fel pe bai yr awdurdod tarddiadol mewn cysylltiad â'r pridiant.

### **23 Penderfynu'r swm sy'n adenilladwy o dan adran 22**

- (1) Ystyr y "swm adenilladwy" at ddibenion adran 22 yw swm a bennir gan Weinidogion Cymru wrth roi hysbysiad o'u penderfyniad ar y cais am gydsyniad heneb gofrestredig neu yn y gorchymyn sy'n addasu'r cydsyniad (yn ôl y digwydd); ond mae hyn yn ddarostyngedig i is-adran (3).
- (2) Pan fo person a chanddo fuddiant mewn heneb yn gwrthwynebu'r swm a bennir gan Weinidogion Cymru, caiff y person ei gwneud yn ofynnol i'r penderfyniad ar y swm gael ei atgyfeirio i'r Uwch Dribiwnlys.
- (3) Pan fo atgyfeiriad yn cael ei wneud i'r Uwch Dribiwnlys o dan is-adran (2) y swm adenilladwy yw'r swm y mae'r Tribiwnlys yn ei benderfynu.
- (4) Caiff y swm a bennir neu a benderfynir fel y swm adenilladwy o dan yr adran hon fod yn swm sy'n cynrychioli'r cyfan neu unrhyw ran o'r digollediad a delir o dan adran 21.

### **24 Digollediad pan fo gwaith sy'n effeithio ar heneb gofrestredig yn peidio â chael ei awdurdodi**

- (1) Mae'r adran hon yn gymwys pan fo gwaith sy'n effeithio ar heneb gofrestredig a awdurdodwyd yn flaenorol o dan y Bennod hon yn peidio â chael ei awdurdodi –

- (a) oherwydd bod awdurdodiad o dan adran 12 yn peidio â bod yn gymwys (boed hynny oherwydd diwygiad i'r tabl yn Atodlen 3 neu gyfarwyddyd a roddir o dan is-adran (3) o'r adran honno),
  - (b) oherwydd bod cydsyniad heneb gofrestredig wedi ei addasu neu ei ddirymu drwy orchymyn a wneir o dan adran 20, neu
  - (c) yn unol â pharagraff 2 o Atodlen 4, oherwydd bod hysbysiad o addasiad neu ddirymiad arfaethedig cydsyniad heneb gofrestredig wedi ei gyflwyno o dan baragraff 1 o'r Atodlen honno.
- (2) Mae gan unrhyw berson a chanddo fuddiant yn yr heneb hawlogaeth, wrth wneud hawliad i Weinidogion Cymru, i gael ei ddigolledu ganddynt am –
- (a) unrhyw wariant y mae'r person yn mynd iddo wrth gyflawni gwaith a ddaw yn ofer oherwydd bod gwaith pellach yn peidio â chael ei awdurdodi, neu
  - (b) unrhyw golled arall neu unrhyw ddifrod arall a ddioddefir gan y person y gellir ei phriodoli neu ei briodoli'n uniongyrchol i'r ffaith honno.
- (3) Nid oes gan berson hawlogaeth i gael digollediad o dan yr adran hon mewn achos o fewn is-adran (1)(a) oni bai, ar gais am gydsyniad heneb gofrestredig ar gyfer y gwaith o dan sylw, fod cydsyniad yn cael ei wrthod, neu'n cael ei roi yn ddarostyngedig i amodau ac eithrio'r rheini a oedd yn gymwys yn flaenorol yn rhinwedd adran 12.
- (4) At ddibenion yr adran hon mae gwariant yr eir iddo wrth lunio planiau at ddibenion unrhyw waith, neu ar faterion tebyg eraill sy'n baratoadol i unrhyw waith, i'w drin fel pe bai'n wariant yr eir iddo wrth gyflawni'r gwaith.
- (5) Yn ddarostyngedig i hynny, nid oes digollediad yn daladwy o dan yr adran hon mewn cysylltiad –
- (a) â gwaith a gyflawnwyd cyn i awdurdodiad o dan adran 12 fod yn gymwys mewn perthynas â'r gwaith neu cyn i'r cydsyniad heneb gofrestredig o dan sylw gael ei roi (yn ôl y digwydd), neu
  - (b) â cholled arall neu ddifrod arall (ac eithrio colled neu ddifrod sy'n ddibrisiant yng ngwerth buddiant mewn tir) sy'n deillio o unrhyw beth a wnaed neu nas gwnaed cyn i'r awdurdodiad hwnnw fod yn gymwys neu cyn i'r cydsyniad hwnnw gael ei roi.
- (6) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â'r diwrnod y mae'r gwaith yn peidio â chael ei awdurdodi.

#### PENNOD 4

##### CYTUNDEBAU PARTNERIAETHAU HENEBION COFRESTRDIG

#### 25 Cytundebau partneriaethau henebion cofrestredig

- (1) Caiff Gweinidogion Cymru wneud cytundeb o dan yr adran hon ("cytundeb partneriaeth heneb gofrestredig") –
- (a) ag unrhyw berchennog ar heneb gofrestredig, neu
  - (b) ag unrhyw berchennog ar dir sy'n cydffinio â heneb o'r fath neu sydd yng nghyffiniau heneb o'r fath ("tir cysylltiedig").

- (2) Caiff unrhyw un neu ragor o'r personau a ganlyn hefyd fod yn barti i'r cytundeb (yn ogystal â'r perchennog a Gweinidogion Cymru) –
- (a) unrhyw feddiannydd ar yr heneb neu ei thir cysylltiedig;
  - (b) unrhyw berson arall a chanddo fuddiant yn yr heneb neu ei thir cysylltiedig;
  - (c) unrhyw berson sy'n ymwneud â rheoli'r heneb neu ei thir cysylltiedig;
  - (d) unrhyw awdurdod lleol y mae'r heneb neu ei thir cysylltiedig yn ei ardal;
  - (e) unrhyw awdurdod lleol sydd, yn rhinwedd Pennod 6, yn warcheidwad ar yr heneb neu ei thir cysylltiedig;
  - (f) unrhyw berson arall y mae Gweinidogion Cymru yn ystyried ei fod yn briodol gan fod ganddo wybodaeth arbennig am yr heneb neu am henebion o ddiddordeb hanesyddol neu archaeolegol yn fwy cyffredinol, neu ddiddordeb arbennig ynddi neu ynddynt.
- (3) Caiff cytundeb partneriaeth heneb gofrestrdedig roi cydsyniad heneb gofrestrdedig o dan adran 13(1) ar gyfer gwaith penodedig at ddiben –
- (a) symud ymaith neu atgyweirio'r heneb y mae'r cytundeb yn ymwneud â hi, neu
  - (b) gwneud unrhyw addasiadau i'r heneb neu unrhyw ychwanegiadau ati.
- (4) Pan fo cytundeb partneriaeth heneb gofrestrdedig yn rhoi cydsyniad heneb gofrestrdedig yn ddarostyngedig i amodau, rhaid i'r cytundeb bennu'r amodau hynny.
- (5) Caiff cytundeb partneriaeth heneb gofrestrdedig hefyd –
- (a) pennu gwaith a fyddai, neu na fyddai, ym marn y partïon, yn waith y mae adran 11 yn gymwys iddo;
  - (b) gwneud darpariaeth ynghylch cynnal a chadw a diogelu'r heneb neu ei thir cysylltiedig;
  - (c) gwneud darpariaeth ynghylch cyflawni gwaith penodedig, neu wneud unrhyw beth penodedig, mewn perthynas â'r heneb neu ei thir cysylltiedig;
  - (d) darparu ar gyfer mynediad y cyhoedd i'r heneb neu ei thir cysylltiedig a darparu cyfleusterau cysylltiedig, gwybodaeth gysylltiedig neu wasanaethau cysylltiedig i'r cyhoedd;
  - (e) cyfyngu ar fynediad i'r heneb neu ei thir cysylltiedig neu ar y defnydd o'r heneb neu ei thir cysylltiedig;
  - (f) gwahardd gwneud unrhyw beth penodedig mewn perthynas â'r heneb neu ei thir cysylltiedig;
  - (g) darparu i Weinidogion Cymru, neu unrhyw awdurdod lleol y mae'r heneb neu ei thir cysylltiedig yn ei ardal, wneud taliadau o symiau penodedig ac ar delerau penodedig –
    - (i) am gostau unrhyw waith y darperir ar ei gyfer o dan y cytundeb, neu tuag at y costau hynny, neu
    - (ii) yn gydnabyddiaeth am unrhyw gyfyngiad, unrhyw waharddiad neu unrhyw rwymedigaeth a dderbynnir gan unrhyw barti arall i'r cytundeb.
- (6) Caiff cytundeb partneriaeth heneb gofrestrdedig ymwneud â mwy nag un heneb neu fwy nag un darn o dir cysylltiedig.

- (7) Yn yr adran hon ystyr “penodedig” yw wedi ei bennu neu ei ddisgrifio mewn cytundeb partneriaeth heneb gofrestrdedig.

**26 Darpariaeth bellach ynghylch cytundebau partneriaethau henebion cofrestredig**

- (1) Rhaid i gytundeb partneriaeth heneb gofrestrdedig fod yn ysgrifenedig.
- (2) Rhaid i gytundeb partneriaeth heneb gofrestrdedig—
- (a) nodi’r heneb neu’r tir cysylltiedig y mae’n ymwneud â hi neu ag ef;
  - (b) disgrifio unrhyw waith y mae’n ymwneud ag ef;
  - (c) pennu’r dyddiad y mae’n cymryd effaith a’i hyd;
  - (d) gwneud darpariaeth i’r partïon adolygu telerau’r cytundeb ar ysbeidiau a bennir ynddo;
  - (e) gwneud darpariaeth ar gyfer ei amrywio (ond mae hyn yn ddarostyngedig i reoliadau a wneir o dan is-adran (5));
  - (f) gwneud darpariaeth ar gyfer ei derfynu (ond mae hyn yn ddarostyngedig i adran 27).
- (3) Caiff cytundeb partneriaeth heneb gofrestrdedig gynnwys darpariaeth ddeilliadol a darpariaeth ganlyniadol.
- (4) Caiff Gweinidogion Cymru drwy reoliadau bennu telerau eraill y mae rhaid eu cynnwys mewn cytundeb partneriaeth heneb gofrestrdedig.
- (5) Rhaid i Weinidogion Cymru drwy reoliadau wneud darpariaeth ynghylch—
- (a) yr ymgynghoriad y mae rhaid iddo gael ei gynnal cyn i gytundeb partneriaeth heneb gofrestrdedig gael ei wneud neu ei amrywio;
  - (b) y cyhoeddusrwydd y mae rhaid iddo gael ei roi i gytundeb partneriaeth heneb gofrestrdedig cyn neu ar ôl iddo gael ei wneud neu ei amrywio.
- (6) Rhaid i reoliadau o dan is-adran (5)(a) ei gwneud yn ofynnol i Weinidogion Cymru ymgynghori â’r personau a ganlyn cyn gwneud cytundeb partneriaeth heneb gofrestrdedig—
- (a) pob perchennog a phob meddiannydd ar yr heneb neu’r tir cysylltiedig y mae’r cytundeb arfaethedig yn ymwneud â hi neu ag ef;
  - (b) pob awdurdod lleol y mae’r heneb neu’r tir cysylltiedig yn ei ardal;
  - (c) unrhyw awdurdod lleol sydd, yn rhinwedd Pennod 6, yn warcheidwad ar yr heneb neu’r tir cysylltiedig.
- (7) Ni chaiff cytundeb partneriaeth heneb gofrestrdedig osod unrhyw rwymedigaeth neu unrhyw atebolrwydd ar berson nad yw’n barti i’r cytundeb, na rhoi unrhyw hawl i’r person hwnnw; ac nid yw cydsyniad heneb gofrestrdedig a roddir gan gytundeb o’r fath yn cael effaith ond er budd y partïon iddo.
- (8) Caiff Gweinidogion Cymru drwy reoliadau ddatgymhwyso, cymhwyso neu atgynhyrchu, gydag addasiadau neu hebddynt, unrhyw ddarpariaeth yn y Rhan hon at ddibenion cytundebau partneriaethau henebion cofrestredig.



**27 Terfynu cytundeb neu ddarpariaeth mewn cytundeb**

- (1) Caiff Gweinidogion Cymru drwy orchymyn derfynu cytundeb partneriaeth heneb gofrestredig neu unrhyw ddarpariaeth mewn cytundeb o'r fath.
- (2) Caiff gorchymyn o dan is-adran (1) gynnwys darpariaeth atodol, darpariaeth ddeilliadol, darpariaeth ddarfodol, darpariaeth drosiannol neu ddarpariaeth arbed.
- (3) Caniateir i orchymyn o dan yr adran hon sy'n terfynu darpariaeth sy'n rhoi cydsyniad heneb gofrestredig ar gyfer unrhyw waith gael ei wneud ar unrhyw adeg cyn cwblhau'r gwaith, ond nid yw'n effeithio ar gydsyniad heneb gofrestredig ar gyfer gwaith a gyflawnir cyn i'r gorchymyn gymryd effaith.
- (4) Mae Atodlen 5 a pharagraff 1 o Atodlen 6 yn gwneud darpariaeth bellach mewn cysylltiad â gwneud gorchymynion o dan yr adran hon (gan gynnwys darparu ar gyfer hysbysiadau o derfyniad arfaethedig).
- (5) Caiff Gweinidogion Cymru drwy reoliadau ddiwygio Atodlen 5 neu 6, a chaiff y rheoliadau wneud diwygiadau canlyniadol i unrhyw ddarpariaeth arall yn y Ddeddf hon.

**28 Digollediad mewn perthynas â therfynu**

- (1) Mae'r adran hon yn gymwys pan fo Gweinidogion Cymru –
  - (a) yn cyflwyno hysbysiad o derfyniad arfaethedig, neu
  - (b) yn gwneud gorchymyn o dan adran 27,
 mewn perthynas â chytundeb partneriaeth heneb gofrestredig.
- (2) Mae gan unrhyw barti i'r cytundeb a chanddo fuddiant yn yr heneb neu'r tir y mae'r cytundeb yn gymwys iddi neu iddo hawlogaeth, wrth wneud hawliad i Weinidogion Cymru, i gael ei ddigolledu ganddynt –
  - (a) am unrhyw wariant y mae'r parti yn mynd iddo wrth gyflawni gwaith a ddaw yn ofer oherwydd yr hysbysiad neu'r gorchymyn;
  - (b) am unrhyw golled arall neu unrhyw ddifrod arall a ddioddefir gan y parti y gellir ei phriodoli neu ei briodoli'n uniongyrchol i'r hysbysiad neu'r gorchymyn.
- (3) At ddibenion yr adran hon mae gwariant yr eir iddo wrth lunio planiau at ddibenion unrhyw waith, neu ar faterion tebyg eraill sy'n baratoadol i unrhyw waith, i'w drin fel pe bai'n wariant yr eir iddo wrth gyflawni'r gwaith.
- (4) Yn ddarostyngedig i hynny, nid oes digollediad yn daladwy o dan yr adran hon mewn cysylltiad –
  - (a) â gwaith a gyflawnwyd cyn i'r cytundeb partneriaeth heneb gofrestredig, neu'r ddarpariaeth berthnasol yn y cytundeb, gymryd effaith, na
  - (b) â cholled arall neu ddifrod arall (ac eithrio colled neu ddifrod sy'n ddibrisiant yng ngwerth buddiant mewn tir) sy'n deillio o unrhyw beth a wnaed neu nas gwnaed cyn i'r cytundeb neu'r ddarpariaeth gymryd effaith.
- (5) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â'r diwrnod y mae'r hysbysiad o derfyniad arfaethedig neu'r gorchymyn yn cymryd effaith (yn ôl y digwydd).

**29 Dehongli**

Yn y Bennod hon –

mae i “cytundeb partneriaeth heneb gofrestredig” (“*scheduled monument partnership agreement*”) yr ystyr a roddir gan adran 25(1);

mae i “hysbysiad o derfyniad arfaethedig” (“*notice of proposed termination*”) yr ystyr a roddir gan baragraff 1 o Atodlen 5;

ystyr “perchennog” (“*owner*”) yw –

(a) perchennog ar yr ystad rydd-ddaliadol, neu

(b) tenant o dan les a roddir neu a estynnir am gyfnod penodol sydd ag o leiaf 7 mlynedd yn weddill;

mae i “tir cysylltiedig” (“*associated land*”), mewn perthynas â heneb, yr ystyr a roddir gan adran 25(1)(b).

**PENNOD 5****GORFODI RHEOLAETHAU SY’N YMWNEUD Â HENEBION COFRESTRDIG**

*Troseddau sy’n ymwneud â gwaith anawdurdodedig*

**30 Y drosedd o gyflawni gwaith anawdurdodedig neu dorri amod mewn cydsyniad**

- (1) Mae person yn cyflawni trosedd os yw’r person yn cyflawni gwaith, neu’n peri neu’n caniatáu i waith gael ei gyflawni, mewn perthynas â heneb gofrestredig yn groes i adran 11 (gofyniad i waith gael ei awdurdodi).
- (2) Mae person hefyd yn cyflawni trosedd os yw’r person –
  - (a) yn cyflawni gwaith, neu’n peri neu’n caniatáu i waith gael ei gyflawni, mewn perthynas â heneb gofrestredig, a
  - (b) yn methu â chydymffurfio ag amod y rhoddwyd cydsyniad heneb gofrestredig yn ddarostyngedig iddo ar gyfer y gwaith.
- (3) Nid yw is-adran (2) yn cyfyngu ar yr hyn a all fod yn drosedd o dan is-adran (1).
- (4) Mewn achos yn erbyn person am drosedd o dan is-adran (1) mewn perthynas â heneb y rhoddir gwarchodaeth interim iddi –
  - (a) mae’n amddiffyniad i’r person brofi nad oedd y person yn gwybod, ac na ellid bod wedi disgwyl yn rhesymol iddo wybod, bod y warchodaeth interim wedi ei rhoi, a
  - (b) pan fo’r amddiffyniad yn cael ei godi gan berson y dylai hysbysiad fod wedi cael ei gyflwyno iddo o dan adran 5(2), yr erlyniad sydd i brofi i’r hysbysiad gael ei gyflwyno i’r person.
- (5) Mewn achos yn erbyn person am drosedd o dan is-adran (2), mae’n amddiffyniad i’r person brofi iddo gymryd pob rhagofal rhesymol ac arfer pob diwydrwydd dyladwy i osgoi torri’r amod.
- (6) Mewn achos yn erbyn person am drosedd o dan yr adran hon mewn perthynas â gwaith o fewn adran 11(2)(a), mae’n amddiffyniad i’r person brofi iddo gymryd pob rhagofal rhesymol ac arfer pob diwydrwydd dyladwy i osgoi neu atal difrod i’r heneb.



- (7) Mewn achos yn erbyn person am drosedd o dan yr adran hon mewn perthynas â gwaith o fewn adran 11(2)(a) neu (c), mae'n amddiffyniad iddo brofi –
- ei fod, cyn cyflawni'r gwaith neu cyn peri neu ganiatáu i'r gwaith gael ei gyflawni, wedi cymryd pob cam rhesymol i ganfod a oedd heneb gofrestredig yn yr ardal yr oedd y gwaith yn effeithio arni, a
  - nad oedd yn gwybod, ac nad oedd ganddo reswm dros gredu, bod yr heneb o fewn yr ardal yr oedd y gwaith yn effeithio arni neu (yn ôl y digwydd) ei bod yn heneb gofrestredig.
- (8) Mewn achos yn erbyn person am drosedd o dan yr adran hon, mae'n amddiffyniad i'r person brofi –
- bod y gwaith yn angenrheidiol ar frys er lles diogelwch neu iechyd,
  - bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith, ac
  - i hysbysiad ysgrifenedig a oedd yn cyfiawnhau'n fanwl gyflawni'r gwaith gael ei roi i Weinidogion Cymru cyn gynted ag yr oedd yn rhesymol ymarferol.
- (9) Mae person sy'n euog o drosedd o dan yr adran hon yn agored ar euogfarn ddiannod, neu ar euogfarn ar dditiad, i ddirwy.

*Hysbysiadau stop dros dro*

**31 Pŵer Gweinidogion Cymru i ddyroddi hysbysiad stop dros dro**

- (1) Caiff Gweinidogion Cymru ddyroddi hysbysiad stop dros dro os ydynt yn ystyried –
- bod gwaith wedi cael ei gyflawni neu yn cael ei gyflawni mewn perthynas â heneb gofrestredig sy'n golygu torri adran 11 (gofyniad i waith gael ei awdurdodi) neu amod y rhoddwyd cydsyniad heneb gofrestredig yn ddarostyngedig iddo, a
  - y dylai'r gwaith (neu unrhyw ran ohono) gael ei stopio ar unwaith, gan roi sylw i effaith y gwaith ar yr heneb fel un sydd o bwysigrwydd cenedlaethol.
- (2) Rhaid i hysbysiad stop dros dro –
- pennu'r gwaith y mae'n ymwneud ag ef,
  - gwahardd cyflawni'r gwaith (neu unrhyw ran o'r gwaith a bennir yn yr hysbysiad),
  - nodi rhesymau Gweinidogion Cymru dros ddyroddi'r hysbysiad, a
  - datgan effaith adran 33 (y drosedd o dorri hysbysiad stop dros dro).
- (3) Rhaid i Weinidogion Cymru arddangos copi o hysbysiad stop dros dro ar yr heneb neu'r tir y mae'n ymwneud â hi neu ag ef, a rhaid i'r copi bennu'r dyddiad y caiff ei arddangos am y tro cyntaf.
- (4) Ond –
- os nad yw'n rhesymol ymarferol arddangos copi o'r hysbysiad ar yr heneb neu'r tir, neu
  - os yw Gweinidogion Cymru yn ystyried y gallai arddangos copi o'r hysbysiad ar yr heneb neu'r tir ddifrodi'r heneb,

caiff Gweinidogion Cymru, yn lle hynny, arddangos copi mewn lle amlwg mor agos i'r heneb neu'r tir ag y bo'n rhesymol ymarferol.

- (5) Caiff Gweinidogion Cymru gyflwyno copi o'r hysbysiad i unrhyw berson y maent yn ystyried—
  - (a) ei fod yn cyflawni'r gwaith y mae'r hysbysiad yn ei wahardd neu'n peri neu'n caniatáu iddo gael ei gyflawni,
  - (b) ei fod yn feddiannydd ar yr heneb neu'r tir y mae'r hysbysiad yn ymwneud â hi neu ag ef, neu
  - (c) bod ganddo fuddiant yn yr heneb neu'r tir.

### 32 Hyd etc. hysbysiad stop dros dro

- (1) Mae hysbysiad stop dros dro yn cymryd effaith pan arddangosir copi ohono yn unol ag adran 31 am y tro cyntaf.
- (2) Mae hysbysiad stop dros dro yn peidio â chael effaith—
  - (a) ar ddiwedd 28 o ddiwrnodau sy'n dechrau â'r diwrnod pan arddangosir y copi ohono yn unol ag adran 31 am y tro cyntaf, neu
  - (b) os yw'n pennu cyfnod byrrach sy'n dechrau â'r diwrnod hwnnw, ar ddiwedd y cyfnod hwnnw.
- (3) Ond os yw Gweinidogion Cymru yn tynnu'r hysbysiad yn ôl cyn diwedd y cyfnod y byddai fel arall yn cael effaith ar ei gyfer, mae'r hysbysiad yn peidio â chael effaith pan gaiff ei dynnu'n ôl.
- (4) Ni chaiff Gweinidogion Cymru ddyroddi ail hysbysiad stop dros dro neu hysbysiad stop dros dro dilynol mewn perthynas â'r un gwaith oni bai eu bod, ers dyroddi'r hysbysiad blaenorol, wedi cymryd camau gorfodi eraill mewn perthynas â'r toriad y cyfeirir ato yn adran 31(1)(a).
- (5) Yn is-adran (4) mae'r cyfeiriad at gymryd camau gorfodi eraill yn gyfeiriad at—
  - (a) dyroddi hysbysiad gorfodi o dan adran 35, neu
  - (b) cael gwaharddeb o dan adran 42.

### 33 Y drosedd o dorri hysbysiad stop dros dro

- (1) Mae person yn cyflawni trosedd os yw'r person, ar unrhyw adeg pan fydd hysbysiad stop dros dro yn cael effaith, yn cyflawni gwaith sydd wedi ei wahardd gan yr hysbysiad neu'n peri neu'n caniatáu i waith o'r fath gael ei gyflawni.
- (2) Caniateir i berson gael ei gyhuddo o drosedd o dan yr adran hon drwy gyfeirio at ddiwrnod neu gyfnod hwy, a chaniateir iddo gael ei euogfarnu o fwy nag un drosedd mewn perthynas â'r un hysbysiad stop dros dro drwy gyfeirio at gyfnodau gwahanol.
- (3) Mewn achos yn erbyn person am drosedd o dan yr adran hon, mae'n amddiffyniad i'r person brofi nad oedd y person yn gwybod, ac na ellid bod wedi disgwyl yn rhesymol iddo wybod, am fodolaeth yr hysbysiad stop dros dro.
- (4) Mewn achos am drosedd o dan yr adran hon, mae'n amddiffyniad profi—
  - (a) bod y gwaith yn angenrheidiol ar frys er lles diogelwch neu iechyd,

- (b) bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith, ac
  - (c) i hysbysiad ysgrifenedig a oedd yn cyfiawnhau'n fanwl gyflawni'r gwaith gael ei roi i Weinidogion Cymru cyn gynted ag yr oedd yn rhesymol ymarferol.
- (5) Mae person sy'n euog o drosedd o dan yr adran hon yn agored ar euogfarn ddiannod, neu ar euogfarn ar ddiad, i ddirwy.
- (6) Wrth benderfynu swm y ddirwy, rhaid i'r llys roi sylw yn benodol i unrhyw fudd ariannol sydd wedi cronni, neu yr ymddengys ei fod yn debygol o gronni, i'r person o ganlyniad i'r drosedd.

### 34 **Digollediad am golled neu ddifrod a achosir gan hysbysiad stop dros dro**

- (1) Mae'r adran hon yn gymwys pan—
- (a) na fo'r gwaith a bennir mewn hysbysiad stop dros dro, ar yr adeg y mae'r hysbysiad yn cymryd effaith, yn golygu torri adran 11 (gofyniad i waith gael ei awdurdodi) nac amod y rhoddwyd cydsyniad heneb gofrestredig yn ddarostyngedig iddo, neu
  - (b) bo Gweinidogion Cymru yn tynnu'n ôl hysbysiad stop dros dro ar ôl iddo gymryd effaith.
- (2) Nid yw'r adran hon yn gymwys yn rhinwedd is-adran (1)(b) pan—
- (a) bo cydsyniad heneb gofrestredig wedi ei roi ar gyfer y gwaith a bennir yn yr hysbysiad stop dros dro ar ôl i'r hysbysiad gymryd effaith, a
  - (b) bo Gweinidogion Cymru yn tynnu'r hysbysiad yn ôl ar ôl i'r cydsyniad hwnnw gael ei roi.
- (3) Mae gan unrhyw berson a chanddo fuddiant yn yr heneb neu'r tir y mae'r hysbysiad yn ymwneud â hi neu ag ef ar yr adeg y mae'r hysbysiad yn cymryd effaith hawlogaeth, wrth wneud hawliad i Weinidogion Cymru, i gael ei ddigolledu ganddynt am unrhyw golled neu unrhyw ddifrod a ddiodefir gan y person y gellir ei phriodoli neu ei briodoli'n uniongyrchol i effaith yr hysbysiad.
- (4) Mae'r golled neu'r difrod y mae digollediad yn daladwy amdani neu amdano yn cynnwys unrhyw swm sy'n daladwy gan yr hawlydd mewn cysylltiad â thor contract a achosir drwy gymryd camau gweithredu sy'n angenrheidiol i gydymffurfio â'r hysbysiad.
- (5) Nid oes digollediad yn daladwy o dan yr adran hon am golled neu ddifrod y gallai'r hawlydd fod wedi ei hosgoi neu ei osgoi—
- (a) drwy ddarparu gwybodaeth yr oedd hysbysiad gwybodaeth a gyflwynwyd gan Weinidogion Cymru o dan adran 197 yn ei gwneud yn ofynnol i'r hawlydd ei darparu, neu
  - (b) drwy gydweithredu â Gweinidogion Cymru mewn unrhyw ffordd arall wrth ymateb i hysbysiad o'r fath.
- (6) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau—
- (a) mewn achos sy'n dod o fewn is-adran (1)(a) ond nid o fewn is-adran (1)(b), â'r diwrnod y mae'r hysbysiad stop dros dro yn cymryd effaith;

- (b) mewn achos sy'n dod o fewn is-adran (1)(b), â'r diwrnod y mae'r hysbysiad wedi ei dynnu'n ôl.

*Hysbysiadau gorfodi*

**35 Pŵer Gweinidogion Cymru i ddyroddi hysbysiad gorfodi**

- (1) Caiff Gweinidogion Cymru ddyroddi hysbysiad gorfodi os ydynt yn ystyried –
  - (a) bod gwaith sy'n golygu torri adran 11 (gofyniad i waith gael ei awdurdodi) neu amod y rhoddwyd cydsyniad heneb gofrestredig yn ddarostyngedig iddo wedi cael neu yn cael ei gyflawni mewn perthynas â heneb gofrestredig neu dir y mae'r heneb ynddo, arno neu odano, a
  - (b) ei bod yn briodol dyroddi'r hysbysiad, gan roi sylw i effaith y gwaith ar yr heneb fel un sydd o bwysigrwydd cenedlaethol.
- (2) Rhaid i hysbysiad gorfodi –
  - (a) pennu'r toriad honedig, a
  - (b) ei gwneud yn ofynnol i waith a bennir yn yr hysbysiad gael ei stopio, neu ei gwneud yn ofynnol i gamau a bennir yn yr hysbysiad gael eu cymryd at un neu ragor o'r dibenion a nodir yn is-adran (3).
- (3) Y dibenion yw –
  - (a) adfer yr heneb neu'r tir i'w chyflwr neu ei gyflwr cyn i'r toriad ddigwydd,
  - (b) os yw Gweinidogion Cymru yn ystyried na fyddai adfer yn rhesymol ymarferol neu y byddai'n annymunol, cyflawni gwaith pellach i leddfau effaith y toriad, neu
  - (c) rhoi'r heneb neu'r tir yn y cyflwr y byddai wedi bod ynddo pe cydymffurfiwyd â thelerau unrhyw gydsyniad heneb gofrestredig ar gyfer y gwaith y mae'r hysbysiad yn ymwneud ag ef (gan gynnwys unrhyw amodau sydd ynghlwm wrth y cydsyniad).
- (4) Pan fo hysbysiad gorfodi yn gosod gofyniad o dan is-adran (3)(b), mae cydsyniad heneb gofrestredig i'w drin fel pe bai wedi ei roi ar gyfer unrhyw waith sydd wedi ei gyflawni yn unol â'r gofyniad.
- (5) Rhaid i Weinidogion Cymru –
  - (a) cynnal rhestr o bob heneb y mae hysbysiad gorfodi mewn grym mewn cysylltiad â hi a chyhoeddi'r rhestr gyfredol, a
  - (b) darparu copi o'r hysbysiad gorfodi sy'n ymwneud â heneb yn y rhestr i unrhyw berson sy'n gofyn am gopi.

**36 Cyflwyno hysbysiad gorfodi a'r hysbysiad yn cymryd effaith**

- (1) Rhaid i hysbysiad gorfodi bennu –
  - (a) y dyddiad y mae i gymryd effaith, a
  - (b) o fewn pa gyfnod y mae rhaid stopio'r gwaith a bennir yn yr hysbysiad neu y mae rhaid cymryd y camau a bennir ynddo.

- (2) Mae'r hysbysiad yn cymryd effaith ar ddechrau'r diwrnod a bennir o dan is-adran (1)(a); ond pan fo apêl yn cael ei gwneud yn erbyn yr hysbysiad o dan adran 39, mae hyn yn ddarostyngedig i is-adran (4) o'r adran honno.
- (3) Caiff hysbysiad gorfodi bennu cyfnodau gwahanol ar gyfer stopio gwaith gwahanol neu gymryd camau gwahanol.
- (4) Pan fo Gweinidogion Cymru yn dyroddi hysbysiad gorfodi, rhaid iddynt gyflwyno copi o'r hysbysiad –
  - (a) i bob perchennog a phob meddiannydd ar yr heneb neu'r tir y mae'r hysbysiad yn ymwneud â hi neu ag ef;
  - (b) os yw'r heneb neu'r tir wedi ei gosod neu ei osod ond nad y lesddeiliad yw'r meddiannydd, i'r lesddeiliad, ac
  - (c) i unrhyw berson arall a chanddo fuddiant yn yr heneb neu'r tir y mae Gweinidogion Cymru yn ystyried bod yr hysbysiad yn effeithio'n sylweddol arno.
- (5) Rhaid cyflwyno pob copi o'r hysbysiad –
  - (a) cyn diwedd 28 o ddiwrnodau ar ôl y diwrnod y dyroddir yr hysbysiad, a
  - (b) o leiaf 28 o ddiwrnodau cyn y dyddiad a bennir yn yr hysbysiad fel y dyddiad y mae i gymryd effaith.

### 37 Amrywio hysbysiad gorfodi a thynnu hysbysiad gorfodi yn ôl

- (1) Pan fo Gweinidogion Cymru wedi dyroddi hysbysiad gorfodi, cânt –
  - (a) tynnu'r hysbysiad yn ôl;
  - (b) hepgor neu lacio unrhyw ofyniad yn yr hysbysiad, ac yn benodol estyn y cyfnod y mae'r hysbysiad yn ei gwneud yn ofynnol i unrhyw waith gael ei stopio neu unrhyw gam gael ei gymryd ynddo.
- (2) Caiff Gweinidogion Cymru arfer y pwerau yn is-adran (1) pa un a yw'r hysbysiad wedi cymryd effaith ai peidio.
- (3) Nid yw tynnu hysbysiad gorfodi yn ôl yn atal Gweinidogion Cymru rhag dyroddi hysbysiad gorfodi arall.
- (4) Mae is-adran (5) yn gymwys pan oedd Gweinidogion Cymru wedi cyflwyno copïau o'r hysbysiad gorfodi o dan adran 36(4) cyn arfer y pwerau yn is-adran (1).
- (5) Yn union ar ôl arfer unrhyw un o'r pwerau hynny, rhaid i Weinidogion Cymru roi hysbysiad eu bod wedi gwneud hynny i bob person y cyflwynwyd copi o'r hysbysiad gorfodi iddo (neu y byddai copi o'r hysbysiad yn cael ei gyflwyno iddo pe bai'n cael ei ailddyroddi).

### 38 Effaith rhoi cydsyniad heneb gofrestredig ar hysbysiad gorfodi

- (1) Mae'r adran hon yn gymwys os rhoddir, ar ôl i hysbysiad gorfodi gael ei ddyroddi, gydsyniad heneb gofrestredig o dan adran 13(2) –
  - (a) sy'n awdurdodi unrhyw waith y mae'r hysbysiad yn ymwneud ag ef sydd wedi ei gyflawni yn groes i adran 11, neu
  - (b) sy'n awdurdodi gwaith sy'n golygu torri amod y rhoddwyd cydsyniad blaenorol yn ddarostyngedig iddo.

- (2) Mae'r hysbysiad yn peidio â chael effaith (neu nid yw'n cymryd effaith) i'r graddau y mae'n –
  - (a) ei gwneud yn ofynnol i gamau gael eu cymryd sy'n anghyson â'r awdurdodiad i'r gwaith, neu
  - (b) ei gwneud yn ofynnol i gamau gael eu cymryd er mwyn cydymffurfio â'r amod.
- (3) Nid yw'r ffaith bod hysbysiad gorfodi wedi peidio â chael effaith yn gyfan gwbl neu'n rhannol yn rhinwedd yr adran hon yn effeithio ar atebolrwydd unrhyw berson am drosedd mewn cysylltiad â methiant blaenorol i gydymffurfio â'r hysbysiad (gweler adran 41).

### 39 Apêl yn erbyn hysbysiad gorfodi

- (1) Caiff person y cyflwynir copi o hysbysiad gorfodi iddo, neu unrhyw berson arall a chanddo fuddiant yn yr heneb neu'r tir y mae'r hysbysiad yn ymwneud â hi neu ag ef, apelio i lys ynadon yn erbyn yr hysbysiad.
- (2) Caniateir gwneud apêl ar un neu ragor o'r seiliau a ganlyn –
  - (a) nad yw'r materion yr honnir eu bod yn torri adran 11 neu amod mewn cydsyniad heneb gofrestredig wedi digwydd;
  - (b) nad yw'r materion hynny (os digwyddasant) yn doriad o'r fath;
  - (c) bod yr amodau canlynol wedi eu bodloni –
    - (i) bod gwaith i'r heneb neu'r tir yn angenrheidiol ar frys er lles diogelwch neu iechyd,
    - (ii) bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith, a
    - (iii) i hysbysiad ysgrifenedig a oedd yn cyfiawnhau'n fanwl fod angen y gwaith gael ei roi i Weinidogion Cymru cyn gynted ag yr oedd yn rhesymol ymarferol;
  - (d) na chyflwynwyd copi o'r hysbysiad gorfodi i berson fel yr oedd yn ofynnol gan adran 36;
  - (e) bod y cyfnod y mae'r hysbysiad yn ei gwneud yn ofynnol i unrhyw waith gael ei stopio neu unrhyw gamau gael eu cymryd ynddo yn afresymol o fyr.
- (3) Rhaid i apêl gael ei gwneud cyn y dyddiad a bennir yn yr hysbysiad fel y dyddiad y mae i gymryd effaith.
- (4) Pan fo apêl yn cael ei gwneud, nid yw'r hysbysiad yn cael effaith hyd nes bod yr apêl yn cael ei phenderfynu'n derfynol neu ei thynnu'n ôl.
- (5) Ar apêl o dan yr adran hon, caiff llys ynadon gadarnhau'r hysbysiad neu ei ddiddymu.
- (6) Caiff y llys gadarnhau hysbysiad hyd yn oed os na chyflwynwyd copi ohono i berson yr oedd adran 36 yn ei gwneud yn ofynnol i gopi gael ei gyflwyno iddo, os yw'r llys wedi ei fodloni nad yw'r methiant wedi cael effaith andwyol sylweddol ar y person.

### 40 Pwerau i fynd ar dir a chymryd camau sy'n ofynnol gan hysbysiad gorfodi

- (1) Os yw'r cyfnod y mae hysbysiad gorfodi yn ei gwneud yn ofynnol i unrhyw gam gael ei gymryd ynddo wedi dod i ben ac nad yw'r cam wedi ei gymryd, caiff person sydd wedi ei awdurdodi'n ysgrifenedig gan Weinidogion Cymru –



- (a) mynd ar y tir y mae'r heneb ynddo, arno neu odano a chymryd y cam, a
  - (b) adennill oddi wrth berson sydd ar y pryd yn berchennog neu'n lesddeiliad ar yr heneb neu'r tir y costau yr aed iddynt wrth wneud hynny.
- (2) Mae'r atebolrwydd o dan is-adran (1) sydd gan berson sy'n berchennog heneb neu dir dim ond yn rhinwedd bod ganddo hawlogaeth i gael y crogent fel ymddiriedolwr ar gyfer person arall wedi ei gyfyngu i gyfanswm yr arian sydd gan y person, neu y mae'r person wedi ei gael, yn rhinwedd yr hawlogaeth honno.
- (3) Pan fo llys ynadon, ar gais drwy gŵyn a wneir gan berchennog ar heneb gofrestredig neu dir, wedi ei fodloni bod meddiannydd ar yr heneb neu'r tir yn atal y perchennog rhag cymryd camau sy'n ofynnol gan hysbysiad gorfodi, caiff y llys drwy warant awdurdodi'r perchennog i fynd ar y tir a chymryd y camau.

#### 41 Y drosedd o fethu â chydymffurfio â hysbysiad gorfodi

- (1) Pan, ar unrhyw adeg ar ôl diwedd y cyfnod y mae hysbysiad gorfodi yn ei gwneud yn ofynnol i unrhyw waith gael ei stopio neu i unrhyw gam gael ei gymryd ynddo, fo'r gwaith yn cael ei gyflawni neu na fo'r cam wedi ei gymryd, mae person sydd ar y pryd yn berchennog ar yr heneb gofrestredig neu'r tir y mae'r hysbysiad yn ymwneud â hi neu ag ef yn euog o drosedd.
- (2) Caniateir i berson gael ei gyhuddo o drosedd o dan yr adran hon drwy gyfeirio at ddiwrnod neu at gyfnod hwy, a chaniateir i berson gael ei euogfarnu o fwy nag un drosedd mewn perthynas â'r un hysbysiad gorfodi drwy gyfeirio at gyfnodau gwahanol.
- (3) Mewn achos yn erbyn person am drosedd o dan yr adran hon, mae'n amddiffyniad i'r person brofi—
- (a) iddo wneud popeth y gellid bod wedi disgwyl iddo ei wneud i sicrhau i'r gwaith a bennwyd yn yr hysbysiad gael ei stopio neu i'r camau a oedd yn ofynnol gan yr hysbysiad gael eu cymryd, neu
  - (b) nad oedd yn gwybod, ac na ellid bod wedi disgwyl yn rhesymol iddo wybod, am fodolaeth yr hysbysiad gorfodi.
- (4) Mae person sy'n euog o drosedd o dan yr adran hon yn agored ar euogfarn ddiannod, neu ar euogfarn ar ddiad, i ddirwy.
- (5) Wrth benderfynu swm y ddirwy, rhaid i'r llys roi sylw yn benodol i unrhyw fudd ariannol sydd wedi cronni, neu yr ymddengys ei fod yn debygol o Gronni, i'r person o ganlyniad i'r drosedd.

#### *Gwaharddebau*

#### 42 Gwaharddeb i atal gwaith anawdurdodedig neu fethiant i gydymffurfio ag amod mewn cydsyniad

- (1) Caiff Gweinidogion Cymru wneud cais i'r Uchel Lys neu'r llys sirol am waharddeb sy'n atal—
- (a) toriad gwirioneddol neu doriad disgwylidig o adran 11 (gofyniad i waith gael ei awdurdodi) mewn perthynas â heneb gofrestredig neu dir y mae heneb gofrestredig ynddo, arno neu odano, neu

- (b) methiant gwirioneddol neu fethiant disgwyliedig i gydymffurfio ag amod mewn cydsyniad heneb gofrestredig ar gyfer gwaith i heneb gofrestredig.
- (2) Caiff Gweinidogion Cymru wneud cais pa un a ydynt wedi arfer, neu'n cynnig arfer, unrhyw un neu ragor o'u pwerau eraill o dan y Rhan hon ai peidio.
- (3) Caiff y llys roi gwaharddeb ar unrhyw delerau y mae'n ystyried eu bod yn briodol at ddiben atal y toriad.

## PENNOD 6

### CAFFAEL, GWARCHEIDIAETH A MYNEDIAD Y CYHOEDD

#### *Caffael henebion o ddiddordeb hanesyddol arbennig*

#### 43 **Caffael yn orfodol henebion o ddiddordeb hanesyddol arbennig**

- (1) Caiff Gweinidogion Cymru gaffael yn orfodol unrhyw heneb o ddiddordeb hanesyddol arbennig at ddiben sicrhau ei diogelu.
- (2) Mae Deddf Caffael Tir 1981 (p. 67) yn gymwys i gaffaeliad o dan yr adran hon.
- (3) Mae is-adran (4) yn gymwys at ddiben asesu digollediad am unrhyw gaffaeliad o dan yr adran hon o heneb sy'n heneb gofrestredig yn union cyn y diwrnod y gwneir y gorchymyn prynu gorfodol.
- (4) Pan fo'r is-adran hon yn gymwys, mae i'w thybio na fyddai cydsyniad heneb gofrestredig yn cael ei roi ar gyfer unrhyw waith a fyddai'n arwain neu a allai arwain at ddymchwel, dinistrio neu symud ymaith yr heneb neu unrhyw ran ohoni.

#### 44 **Caffael drwy gytundeb neu rodd henebion o ddiddordeb hanesyddol arbennig**

- (1) Caiff Gweinidogion Cymru gaffael drwy gytundeb unrhyw heneb o ddiddordeb hanesyddol arbennig.
- (2) Caiff awdurdod lleol gaffael drwy gytundeb unrhyw heneb o ddiddordeb hanesyddol arbennig yn ei ardal neu yng nghyffiniau ei ardal.
- (3) Caiff Gweinidogion Cymru neu unrhyw awdurdod lleol dderbyn rhodd (pa un ai drwy weithred neu ewyllys) o unrhyw heneb o ddiddordeb hanesyddol arbennig.
- (4) Mae Rhan 1 o Ddeddf Prynu Gorfodol 1965 (p. 56) yn gymwys (i'r graddau y mae'n berthnasol) i gaffaeliad o dan yr adran hon, ac eithrio adrannau 4 i 8, adran 10 ac adran 31 o'r Ddeddf honno.

#### *Gwarcheidiaeth henebion o ddiddordeb hanesyddol arbennig*

#### 45 **Pŵer i osod heneb o ddiddordeb hanesyddol arbennig o dan warcheidiaeth**

- (1) Caiff person sydd â buddiant cymhwysol mewn heneb o ddiddordeb hanesyddol arbennig, gyda chytundeb Gweinidogion Cymru, eu penodi drwy weithred yn warcheidwaid yr heneb.
- (2) Caiff person sydd â buddiant cymhwysol mewn heneb o ddiddordeb hanesyddol arbennig, gyda chytundeb unrhyw awdurdod lleol y mae'r heneb yn ei ardal neu yng nghyffiniau ei ardal, benodi'r awdurdod drwy weithred yn warcheidwad yr heneb.
- (3) Ni chaiff person nad yw'n feddiannydd heneb sefydlu gwarcheidiaeth yr heneb o dan yr adran hon oni bai bod y meddiannydd hefyd yn barti i'r weithred.



- (4) Caiff unrhyw berson arall a chanddo fuddiant yn yr heneb fod yn barti i'r weithred yn ogystal â'r person sy'n sefydlu gwarcheidiaeth yr heneb a (phan nad y person hwnnw yw'r meddiannydd) y meddiannydd.
- (5) Mae'r buddiannau a ganlyn mewn heneb yn fuddiannau cymhwysol at ddibenion yr adran hon—
  - (a) ystad rydd-ddaliadol;
  - (b) ystad lesddaliadol, neu fuddiant mewn meddiant—
    - (i) sydd ag o leiaf 45 o flynyddoedd yn weddill, neu
    - (ii) y gellir ei hadnewyddu neu ei adnewyddu am o leiaf 45 o flynyddoedd;
  - (c) buddiant mewn meddiant am oes y person ei hun neu oes person arall, neu am oesau (pa un a ydynt yn cynnwys oes y person ei hun ai peidio), o dan unrhyw ymddiriedolaeth tir bresennol neu yn y dyfodol pan fo'r ystad neu'r buddiant sy'n ddarostyngedig i'r ymddiriedolaeth yn dod o fewn paragraff (a) neu (b).
- (6) Yn is-adran (5)(c) mae i "ymddiriedolaeth tir" yr un ystyr ag a roddir i "trust of land" yn Neddf Ymddiriedolaethau Tir a Phenodi Ymddiriedolwyr 1996 (p. 47).
- (7) Yn y Bennod hon ystyr "gweithred warcheidiaeth" yw gweithred a gyflawnir o dan is-adran (1) neu (2).

#### **46 Darpariaeth atodol ynghylch gweithredoedd gwarcheidiaeth**

- (1) Mae gweithred warcheidiaeth yn bridiant tir lleol.
- (2) Mae pob person y mae ei deitl i heneb o ddiddordeb hanesyddol arbennig yn deillio o, drwy neu o dan unrhyw berson sydd wedi cyflawni gweithred warcheidiaeth wedi ei rwymo gan y weithred oni bai mai yn rhinwedd unrhyw warediad a wnaed gan y person a gyflawnodd y weithred, cyn dyddiad y weithred honno, y mae teitl y person yn deillio.
- (3) Ni chaiff Gweinidogion Cymru nac awdurdod lleol ddod yn warcheidwaid adeilad neu strwythur a feddiennir fel annedd gan unrhyw berson ac eithrio gofalwr yr adeilad neu'r strwythur neu aelod o deulu'r gofalwr.
- (4) Mae gan unrhyw berson a chanddo unrhyw ystad neu unrhyw fuddiant mewn heneb sydd o dan warcheidiaeth yr un hawl a'r un teitl i'r heneb, a'r un ystad neu'r un buddiant ynddi, ym mhob cyswllt fel pe na bai'r heneb o dan warcheidiaeth; ond mae hyn yn ddarostyngedig i unrhyw ddarpariaeth i'r gwrthwyneb yn y Rhan hon.

#### **47 Swyddogaethau cyffredinol gwarcheidwaid**

- (1) Rhaid i warcheidwad heneb ei chynnal a'i chadw, a chaiff wneud unrhyw beth y mae'r gwarcheidwad yn ystyried ei fod yn angenrheidiol ar gyfer ei chynnal a'i chadw.
- (2) Gwarcheidwad yr heneb sy'n ei rheolaethu ac yn ei rheoli'n llawn, a chaiff wneud unrhyw beth y mae'r gwarcheidwad yn ystyried ei fod yn angenrheidiol ar gyfer ei rheolaethu a'i rheoli'n briodol.
- (3) Mae'r pwerau yn is-adrannau (1) a (2) yn cynnwys pŵer i—
  - (a) gwneud unrhyw archwiliad o'r heneb;
  - (b) agor yr heneb neu wneud cloddiadau ohoni at ddiben archwilio neu fel arall;
  - (c) symud y cyfan neu unrhyw ran o'r heneb ymaith i fan arall at ddibenion ei diogelu.

- (4) Mae'r pŵer yn is-adran (2) yn cynnwys pŵer i'w gwneud yn ofynnol talu tâl mewn cysylltiad ag unrhyw ddefnydd o'r heneb.
- (5) Caiff gwarcheidwad heneb fynd i safle'r heneb at ddiben arfer unrhyw un neu ragor o bwerau'r gwarcheidwad o dan yr adran hon mewn perthynas â hi (a chaiff awdurdodi unrhyw berson arall i fynd i'r safle ac arfer y pwerau hynny ar ei ran).
- (6) Mae is-adrannau (2) i (4) yn ddarostyngedig i unrhyw ddarpariaeth i'r gwrthwyneb yn y weithred warcheidiaeth.

#### 48 Terfynu gwarcheidiaeth

- (1) Caiff gwarcheidwad heneb gytuno â'r personau y mae gweithrediad y weithred warcheidiaeth, am y tro, yn cael effaith uniongyrchol arnynt—
  - (a) i eithrio unrhyw ran o'r heneb o'r warcheidiaeth, neu
  - (b) i ildio gwarcheidiaeth yr heneb.
- (2) Yn absenoldeb cytundeb o'r fath, mae heneb yn parhau i fod o dan warcheidiaeth (oni bai ei bod yn cael ei chaffael gan ei gwarcheidwad) hyd nes bod meddiannydd ar yr heneb sydd â hawlogaeth i derfynu'r warcheidiaeth yn rhoi hysbysiad ysgrifenedig i'r perwyl hwnnw i warcheidwad yr heneb.
- (3) Mae gan feddiannydd ar heneb hawlogaeth i derfynu gwarcheidiaeth yr heneb—
  - (a) os oes gan y meddiannydd fuddiant cymhwysol (o fewn ystyr adran 45(5)) yn yr heneb, a
  - (b) os nad yw'r meddiannydd wedi ei rwymo gan y weithred warcheidiaeth.
- (4) Rhaid i awdurdod lleol ymgynghori â Gweinidogion Cymru cyn gwneud cytundeb o dan is-adran (1).
- (5) Ni chaiff gwarcheidwad heneb wneud cytundeb o dan is-adran (1) oni bai bod y gwarcheidwad wedi ei fodloni, mewn cysylltiad â'r rhan o'r heneb neu'r heneb gyfan (yn ôl y digwydd)—
  - (a) bod trefniadau boddhaol wedi eu gwneud i sicrhau y caiff ei diogelu ar ôl terfynu'r warcheidiaeth, neu
  - (b) nad yw'n ymarferol ei diogelu mwyach (pa un ai oherwydd y gost o'i diogelu neu fel arall).
- (6) Rhaid i gytundeb o dan is-adran (1) gael ei wneud o dan sêl.
- (7) At ddibenion is-adran (1) mae gweithrediad gweithred warcheidiaeth sy'n ymwneud â heneb yn cael effaith uniongyrchol ar berson os yw'r person wedi ei rwymo gan y weithred honno a bod yr heneb yn ei feddiant neu yn ei feddiannaeth.

*Caffael a gwarcheidiaeth tir yng nghyffiniau heneb o ddiddordeb hanesyddol arbennig etc.*

#### 49 Caffael a gwarcheidiaeth tir yng nghyffiniau heneb

- (1) Mae cyfeiriadau yn adrannau 43 i 46 at heneb o ddiddordeb hanesyddol arbennig yn cynnwys unrhyw dir sy'n cydffinio â'r heneb neu sydd yn ei chyffiniau y mae Gweinidogion Cymru yn ystyried, neu (yn ôl y digwydd) y mae awdurdod lleol yn ystyried, bod ei angen yn rhesymol at unrhyw un neu ragor o'r dibenion a grybwyllir yn is-adran (2).

- (2) Y dibenion yw –
- cynnal a chadw'r heneb neu ei hamwynderau;
  - storio offer neu ddeunyddiau ar gyfer cynnal a chadw'r heneb neu ei hamwynderau;
  - darparu neu hwyluso mynediad i'r heneb;
  - rheolaethu neu reoli'r heneb yn briodol;
  - darparu cyfleusterau a gwasanaethau i'r cyhoedd ar gyfer darparu mynediad y cyhoedd i'r heneb neu mewn cysylltiad â darparu mynediad o'r fath.
- (3) Mae'r pŵer i gaffael yn orfodol yn adran 43(1), fel y mae'n gymwys yn rhinwedd is-adran (1) o'r adran hon, i'w ddarllen fel pe bai'r geiriau "at unrhyw un neu ragor o'r dibenion a grybwyllir yn adran 49(2)" wedi eu rhoi yn lle "at ddiben sicrhau ei diogelu".
- (4) Caniateir i dir gael ei gaffael neu ei gymryd i warcheidiaeth yn rhinwedd yr adran hon naill ai ar yr un pryd â'r heneb neu'n ddiweddarach.
- (5) Mae person sy'n warcheidwad unrhyw dir yn rhinwedd yr adran hon yn ei reolaethu ac yn ei reoli'n llawn, a chaiff wneud unrhyw beth y mae'r gwarcheidwad yn ystyried ei fod yn angenrheidiol –
- ar gyfer ei reolaethu a'i reoli'n briodol (gan gynnwys ei gwneud yn ofynnol talu tâl mewn cysylltiad ag unrhyw ddefnydd o'r tir), a
  - ar gyfer defnyddio'r tir at unrhyw un neu ragor o'r dibenion a grybwyllir yn is-adran (2) sy'n ymwneud â'r heneb.
- (6) Caiff person sy'n warcheidwad unrhyw dir yn rhinwedd yr adran hon fynd ar y tir at ddiben arfer pwerau'r gwarcheidwad o dan is-adran (5) (a chaiff awdurdodi unrhyw berson arall i fynd i'r safle ac i arfer y pwerau hynny, ar ei ran).
- (7) Mae adrannau 48(1) i (4) a (7) yn gymwys mewn perthynas ag unrhyw dir a gymerir i warcheidiaeth yn rhinwedd yr adran hon fel y maent yn gymwys mewn perthynas â heneb.
- (8) Ar wahân i unrhyw derfyniad o warcheidiaeth yn rhinwedd adran 48, mae gwarcheidiaeth unrhyw dir o'r fath hefyd yn dod i ben os yw'r heneb o dan sylw –
- yn peidio â bod o dan warcheidiaeth ac eithrio yn rhinwedd cael ei chaffael gan ei gwarcheidwaid, neu
  - yn peidio â bodoli.
- (9) Pan fo Gweinidogion Cymru neu awdurdod lleol yn berchen ar heneb neu pan fo heneb o dan eu gwarcheidiaeth neu ei warcheidiaeth yn rhinwedd y Bennod hon, mae cyfeiriadau yn y Bennod hon at dir sy'n gysylltiedig â'r heneb honno (neu at dir cysylltiedig) yn gyfeiriadau at –
- unrhyw dir a gaffaelir neu a gymerir i warcheidiaeth yn rhinwedd yr adran hon at ddiben a grybwyllir yn is-adran (2), neu
  - unrhyw dir a neilltuir at unrhyw ddiben o'r fath o dan bŵer a roddir gan unrhyw ddeddfiad arall.

**50 Caffael hawddfreintiau a hawliau tebyg eraill dros dir yng nghyffiniau heneb**

- (1) Caiff Gweinidogion Cymru gaffael hawddfrait dros dir sy'n cydffinio ag unrhyw heneb sydd o dan eu perchnogaeth yn rhinwedd y Bennod hon neu sydd yn ei chyffiniau, os ydynt yn ystyried bod angen yr hawddfrait—
  - (a) at unrhyw un neu ragor o'r dibenion a grybwyllir yn adran 49(2) sy'n ymwneud â'r heneb honno, neu
  - (b) ar gyfer defnyddio unrhyw dir sy'n gysylltiedig â'r heneb honno at unrhyw un neu ragor o'r dibenion hynny.
- (2) Caniateir i gaffaeliad o dan is-adran (1) gael ei wneud drwy gytundeb neu'n orfodol.
- (3) Caiff awdurdod lleol gaffael hawddfrait dros dir sy'n cydffinio ag unrhyw heneb sydd o dan ei berchnogaeth yn rhinwedd y Bennod hon neu sydd yn ei chyffiniau, os yw'n ymddangos iddo fod angen yr hawddfrait—
  - (a) at unrhyw un neu ragor o'r dibenion a grybwyllir yn adran 49(2) sy'n ymwneud â'r heneb honno, neu
  - (b) ar gyfer defnyddio unrhyw dir sy'n gysylltiedig â'r heneb honno at unrhyw un neu ragor o'r dibenion hynny.
- (4) Ni chaniateir i gaffaeliad o dan is-adran (3) gael ei wneud ond drwy gytundeb.
- (5) Caiff gwarcheidwad heneb neu unrhyw dir gaffael, er budd yr heneb neu'r tir, hawl berthnasol dros dir sy'n cydffinio â'r heneb neu'r tir neu sydd yn ei chyffiniau neu ei gyffiniau, os yw'r gwarcheidwad yn ystyried bod angen yr hawl—
  - (a) at unrhyw un neu ragor o'r dibenion a grybwyllir yn adran 49(2) sy'n ymwneud â'r heneb honno neu'r tir hwnnw, neu
  - (b) ar gyfer defnyddio unrhyw dir sy'n gysylltiedig â'r heneb honno neu'r tir hwnnw at unrhyw un neu ragor o'r dibenion hynny.
- (6) At ddibenion is-adran (5) ystyr "hawl berthnasol" yw hawl (o unrhyw ddisgrifiad) a fyddai'n hawddfrait pe bai'n cael ei chaffael gan berchennog ar yr heneb neu'r tir o dan sylw.
- (7) O ran caffael hawl o dan is-adran (5)—
  - (a) yn achos Gweinidogion Cymru, caniateir ei wneud drwy gytundeb neu'n orfodol;
  - (b) yn achos awdurdod lleol, ni chaniateir ei wneud ond drwy gytundeb.
- (8) O ran hawl a gaffaelir o dan is-adran (5)—
  - (a) mae i'w thrin at ddibenion ei chaffael o dan yr adran hon ac ym mhob cyswllt arall fel pe bai'n hawddfrait gyfreithiol, a
  - (b) caniateir iddi gael ei gorfodi gan y gwarcheidwaid am y tro ar yr heneb neu'r tir y'i caffaelwyd er ei budd neu ei fudd fel pe baent yn berchennog mewn meddiant ar rydd-daliad yr heneb honno neu'r tir hwnnw.
- (9) Os yw'r amod yn is-adran (10) wedi ei fodloni mewn perthynas â heneb, caniateir i hawl a gaffaelir o dan is-adran (5) drwy gytundeb —
  - (a) cael ei dirymu gan y grantwr, yn ddarostyngedig i unrhyw ddarpariaeth i'r gwrthwyneb yn y cytundeb y'i caffaelwyd odano, a

- (b) cael ei dirymu gan unrhyw olynnydd yn nheithl y grantwr mewn cysylltiad ag unrhyw ran o'r tir y mae'n arferadwy drosto ac y mae gan yr olynnydd fuddiant ynddo.
- (10) Yr amod a grybwyllir yn is-adran (9) yw bod yr heneb –
  - (a) yn peidio â bod o dan warcheidiaeth ac eithrio yn rhinwedd cael ei chaffael gan ei gwarcheidwaid, neu
  - (b) yn peidio â bodoli.
- (11) Mae hawl a gaffaelir o dan is-adran (5) yn bridiant tir lleol.
- (12) Mae'r pwerau caffael yn yr adran hon yn cynnwys pŵer i gaffael hawddfaint neu hawl drwy roi hawl newydd.
- (13) Mae Deddf Caffael Tir 1981 (p. 67) yn gymwys i unrhyw gaffaeliad gorfodol o dan yr adran hon.
- (14) Mae Rhan 1 o Ddeddf Prynu Gorfodol 1965 (p. 56) yn gymwys (i'r graddau y mae'n berthnasol) i gaffaeliad drwy gytundeb o dan yr adran hon, ac eithrio adrannau 4 i 8, adran 10 ac adran 31 o'r Ddeddf honno.

*Cytundebau â meddianwyr henebion neu dir sy'n cydffinio etc.*

## **51 Cytundebau ynghylch rheoli henebion o ddiddordeb hanesyddol arbennig a thir yn eu cyffiniau**

- (1) Caiff Gweinidogion Cymru wneud cytundeb o dan yr adran hon –
  - (a) ag unrhyw feddiannydd ar heneb o ddiddordeb hanesyddol arbennig, neu
  - (b) ag unrhyw feddiannydd ar dir sy'n cydffinio â heneb o'r fath neu sydd yn ei chyffiniau.
- (2) Caiff awdurdod lleol wneud cytundeb o dan yr adran hon –
  - (a) ag unrhyw feddiannydd ar heneb o ddiddordeb hanesyddol arbennig yn ei ardal neu yng nghyffiniau ei ardal, neu
  - (b) ag unrhyw feddiannydd ar dir sy'n cydffinio â heneb o'r fath neu sydd yn ei chyffiniau.
- (3) Cyfeirir at gytundeb o dan yr adran hon yn y Rhan hon fel "cytundeb rheoli".
- (4) Caiff unrhyw berson a chanddo fuddiant mewn heneb o ddiddordeb hanesyddol arbennig neu mewn unrhyw dir sy'n cydffinio â heneb o'r fath neu sydd yn ei chyffiniau fod yn barti i gytundeb rheoli (yn ogystal â'r meddiannydd).
- (5) Caiff cytundeb rheoli –
  - (a) gwneud darpariaeth ynghylch cynnal a chadw a diogelu'r heneb a'i hamwynderau (gan gynnwys, pan fo cytundeb wedi ei wneud gan Weinidogion Cymru, ddarpariaeth sy'n rhoi cydsyniad heneb gofrestrdig o dan adran 13(1) ar gyfer gwaith cynnal a chadw neu ddiogelu penodedig);
  - (b) gwneud darpariaeth ynghylch cyflawni gwaith penodedig, neu wneud unrhyw beth penodedig, mewn perthynas â'r heneb neu'r tir;
  - (c) darparu ar gyfer mynediad y cyhoedd i'r heneb neu'r tir a darparu cyfleusterau cysylltiedig, gwybodaeth gysylltiedig neu wasanaethau cysylltiedig i'r cyhoedd;

- (d) cyfyngu ar fynediad i'r heneb neu'r tir neu'r defnydd o'r heneb neu'r tir;
- (e) gwahardd gwneud unrhyw beth penodedig mewn perthynas â'r heneb neu'r tir;
- (f) darparu i Weinidogion Cymru neu'r awdurdod lleol (yn ôl y digwydd) wneud taliadau o symiau penodedig ac ar delerau penodedig –
  - (i) am gost unrhyw waith y darperir ar ei gyfer o dan y cytundeb, neu tuag at y gost honno, neu
  - (ii) yn gydnabyddiaeth am unrhyw gyfyngiad, unrhyw waharddiad neu unrhyw rwymedigaeth a dderbynnir gan unrhyw barti arall i'r cytundeb.
- (6) Caiff cytundeb rheoli hefyd gynnwys darpariaethau deilliadol a chanlyniadol.
- (7) Pan fo cytundeb rheoli a wneir gan Weinidogion Cymru yn rhoi cydsyniad heneb gofrestredig yn ddarostyngedig i amodau, rhaid i'r cytundeb bennu'r amodau hynny.
- (8) Mae is-adran (9) yn gymwys pan fo cytundeb rheoli yn darparu'n benodol fod y cytundeb yn ei gyfanrwydd neu unrhyw gyfyngiad, unrhyw waharddiad neu unrhyw rwymedigaeth sy'n codi odano i rwymo olynwyr unrhyw barti i'r cytundeb.
- (9) Mae pob person y mae ei deitl i'r heneb neu'r tir o dan sylw yn deillio o'r parti hwnnw, drwyddo neu odano wedi ei rwymo gan y cytundeb, neu gan y cyfyngiad hwnnw, y gwaharddiad hwnnw neu'r rhwymedigaeth honno, oni bai mai yn rhinwedd unrhyw warediad a wnaed gan y parti hwnnw, cyn dyddiad y cytundeb, y mae teitl y person yn deillio.
- (10) Nid yw adran 84 o Ddeddf Cyfraith Eiddo 1925 (p. 20) (pŵer yr Uwch Dribiwnlys i ryddhau neu addasu cyfamodau cyfyngol) yn gymwys i gytundeb rheoli.
- (11) Yn yr adran hon ystyr "penodedig" yw wedi ei bennu neu ei ddisgrifio mewn cytundeb rheoli.

*Pwerau perchnogion cyfyngedig*

**52 Pwerau perchnogion cyfyngedig at ddibenion adrannau 45, 50 a 51**

- (1) Caiff person sefydlu gwarcheidiaeth heneb neu dir o dan adran 45 neu ymuno i gyflawni gweithred warcheidiaeth o dan yr adran honno, er mai perchennog cyfyngedig ar yr heneb neu'r tir ydyw.
- (2) Caiff person roi hawddfaint neu hawl arall dros dir y mae Gweinidogion Cymru neu unrhyw awdurdod lleol wedi eu hawdurdodi neu ei awdurdodi i'w chaffael o dan adran 50, er mai perchennog cyfyngedig ar y tir ydyw.
- (3) Caiff person wneud cytundeb rheoli o dan adran 51 mewn cysylltiad â heneb neu dir, er mai perchennog cyfyngedig ar yr heneb neu'r tir ydyw.
- (4) At ddibenion yr adran hon –
  - (a) mae corff corfforedig neu gorfforaeth undyn yn berchennog cyfyngedig ar unrhyw dir y mae ganddo neu ganddi fuddiant ynddo, a
  - (b) mae unrhyw bersonau eraill yn berchnogion cyfyngedig ar dir y mae ganddynt fuddiant ynddo os ydynt yn dal y buddiant hwnnw yn unrhyw un neu ragor o'r ffyrdd a grybwyllir yn is-adran (5).
- (5) Y ffyrdd o ddal buddiant mewn tir y cyfeirir atynt ym mharagraff (4)(b) yw –



- (a) fel tenant am oes neu berchennog statudol (o fewn yr ystyr a roddir i “tenant for life” a “statutory owner” gan Ddeddf Tir Setledig 1925 (p. 18));
  - (b) fel ymddiriedolwyr tir (o fewn yr ystyr a roddir i “trustees of land” gan Ddeddf Ymddiriedolaethau Tir a Phenodi Ymddiriedolwyr 1996 (p. 47));
  - (c) fel ymddiriedolwyr ar gyfer elusennau neu gomisiynwyr neu ymddiriedolwyr at ddibenion eglwysig, dibenion colegol neu ddibenion cyhoeddus eraill.
- (6) Pan fo person sy’n berchennog cyfyngedig ar unrhyw dir yn rhinwedd dal buddiant yn y tir yn unrhyw un neu ragor o’r ffyrdd a grybwyllir yn is-adran (5) yn cyflawni gweithred warcheidiaeth mewn perthynas â’r tir, mae’r weithred warcheidiaeth yn rhwymo pob perchennog olynol ar unrhyw ystad neu unrhyw fuddiant yn y tir.
- (7) Ond pan fo’r tir, ar ddyddiad y weithred, yn ddarostyngedig i unrhyw lyffethair nad oes modd i’r perchennog cyfyngedig ei gorgyrraedd wrth arfer unrhyw bwerau gwerthu neu reoli a roddir i’r perchennog cyfyngedig gan y gyfraith neu o dan unrhyw setliad neu unrhyw offeryn arall, nid yw’r weithred yn rhwymo’r llyffetheiriwr.
- (8) Pan fo cytundeb rheoli o dan adran 51 y mae perchennog cyfyngedig yn barti iddo yn darparu’n benodol fod y cytundeb yn ei gyfanrwydd neu unrhyw gyfyngiad, unrhyw waharddiad neu unrhyw rwymedigaeth sy’n codi o dan y cytundeb yn rhwymo olynwyr y perchennog cyfyngedig, mae is-adrannau (9) a (10) yn gymwys i’r cytundeb neu (yn ôl y digwydd) i’r cyfyngiad, y gwaharddiad neu’r rhwymedigaeth o dan sylw.
- (9) Pan fo person yn berchennog cyfyngedig yn rhinwedd dal buddiant yn unrhyw un neu ragor o’r ffyrdd a grybwyllir yn is-adran (5), mae’r cytundeb neu’r cyfyngiad, y gwaharddiad neu’r rhwymedigaeth yn rhwymo pob perchennog olynol ar unrhyw ystad neu unrhyw fuddiant yn y tir.
- (10) Ond pan fo’r tir, ar ddyddiad y cytundeb, yn ddarostyngedig i unrhyw lyffethair nad oes modd i’r perchennog cyfyngedig ei gorgyrraedd wrth arfer pwerau gwerthu neu reoli a roddir i’r perchennog cyfyngedig gan y gyfraith neu o dan unrhyw setliad neu unrhyw offeryn arall, nid yw’r cytundeb neu’r cyfyngiad, y gwaharddiad neu’r rhwymedigaeth yn rhwymo’r llyffetheiriwr.

*Trosglwyddo perchnogaeth neu warcheidiaeth a gwaredu tir*

### **53 Trosglwyddo henebion o ddiddordeb hanesyddol arbennig rhwng awdurdodau lleol a Gweinidogion Cymru**

- (1) Pan fo Gweinidogion Cymru yn berchnogion neu’n warcheidwaid heneb neu dir cysylltiedig, cânt drosglwyddo perchnogaeth neu warcheidiaeth yr heneb honno neu’r tir hwnnw i unrhyw awdurdod lleol.
- (2) Pan fo awdurdod lleol yn berchennog neu’n warcheidwad heneb neu dir cysylltiedig, caiff drosglwyddo perchnogaeth neu warcheidiaeth yr heneb honno neu’r tir hwnnw –
  - (a) i Weinidogion Cymru, neu
  - (b) i awdurdod lleol arall.
- (3) Ond ni chaiff Gweinidogion Cymru nac awdurdod lleol drosglwyddo gwarcheidiaeth heneb neu dir cysylltiedig o dan yr adran hon heb gytundeb y personau y mae gweithrediad y weithred warcheidiaeth, am y tro, yn cael effaith uniongyrchol arnynt.



- (4) At ddibenion is-adran (3) mae gweithrediad gweithred warcheidiaeth sy'n ymwneud â heneb neu dir yn cael effaith uniongyrchol ar berson os yw'r person wedi ei rwymo gan y weithred honno a bod yr heneb neu'r tir yn ei feddiant neu yn ei feddiannaeth.

#### **54 Gwaredu tir a gaffaelir o dan y Bennod hon**

- (1) Caiff Gweinidogion Cymru waredu unrhyw dir a gaffaelir ganddynt o dan adran 43, 44 neu 53.
- (2) Caiff awdurdod lleol waredu unrhyw dir a gaffaelir ganddo o dan adran 44 neu 53, ond rhaid iddo ymgynghori â Gweinidogion Cymru cyn gwneud hynny.
- (3) Pan fo'r tir a waredir o dan yr adran hon yn heneb neu'n cynnwys heneb, rhaid i'r gwarediad gael ei wneud ar delerau y mae'r person sy'n gwaredu'r tir yn ystyried y byddant yn sicrhau y caiff yr heneb ei diogelu.
- (4) Ond nid yw is-adran (3) yn gymwys os yw'r person sy'n gwaredu'r tir yn ystyried nad yw'n ymarferol diogelu'r heneb mwyach (pa un ai oherwydd y gost o'i diogelu neu fel arall).

*Mynediad y cyhoedd i henebion sydd o dan reolaeth gyhoeddus*

#### **55 Mynediad y cyhoedd i henebion sydd o dan reolaeth gyhoeddus**

- (1) Rhaid i Weinidogion Cymru ac unrhyw awdurdod lleol sicrhau bod gan y cyhoedd fynediad i unrhyw heneb sydd o dan eu perchnogaeth neu warcheidiaeth neu ei berchnogaeth neu warcheidiaeth yn rhinwedd y Bennod hon; ond mae hyn yn ddarostyngedig—
- (a) i'r darpariaethau a ganlyn yn yr adran hon,
- (b) i unrhyw reoliadau neu is-ddeddfau a wneir o dan adran 56, ac
- (c) i unrhyw ddarpariaeth i'r gwrthwyneb sydd wedi ei chynnwys mewn unrhyw gytundeb sy'n ymwneud â'r heneb a wneir o dan adran 25 neu 51 (cytundebau partneriaethau henebion cofrestredig a chytundebau rheoli).
- (2) Mewn perthynas ag unrhyw heneb o dan warcheidiaeth, mae'r ddyletswydd a osodir gan is-adran (1) hefyd yn ddarostyngedig i unrhyw ddarpariaeth i'r gwrthwyneb yn y weithred warcheidiaeth.
- (3) Mae cyfeiriadau yn yr is-adrannau a ganlyn at heneb—
- (a) mewn perthynas â Gweinidogion Cymru, yn gyfeiriadau at heneb—
- (i) sydd o dan eu perchnogaeth neu eu gwarcheidiaeth yn rhinwedd y Bennod hon;
- (ii) sy'n cael ei rheolaethu neu ei rheoli ganddynt ac eithrio yn rhinwedd y Bennod hon;
- (b) mewn perthynas ag awdurdod lleol, yn gyfeiriadau at heneb sydd o dan ei berchnogaeth neu ei warcheidiaeth yn rhinwedd y Bennod hon.
- (4) Caiff Gweinidogion Cymru neu awdurdod lleol reolaethu amseroedd arferol mynediad y cyhoedd i heneb.

- (5) Caiff Gweinidogion Cymru neu awdurdod lleol atal y cyhoedd rhag cael mynediad i heneb, neu i unrhyw ran ohoni, am unrhyw gyfnod y maent neu y mae'n ystyried ei fod yn angenrheidiol –
  - (a) er lles diogelwch;
  - (b) ar gyfer ei chynnal a'i chadw neu ei diogelu;
  - (c) mewn cysylltiad â digwyddiadau a gynhelir neu weithgareddau eraill wedi eu trefnu a gyflawnir ynddi neu arni.
- (6) Caiff Gweinidogion Cymru neu awdurdod lleol hefyd osod cyfyngiadau a rheolaethau eraill ar fynediad y cyhoedd i heneb, neu i unrhyw ran ohoni, at ddiben a grybwyllir yn is-adran (5).
- (7) Caiff Gweinidogion Cymru neu awdurdod lleol godi tâl ar y cyhoedd am fynediad i heneb.
- (8) Caiff Gweinidogion Cymru neu awdurdod lleol wrthod mynediad i berson i heneb os oes ganddynt neu ganddo reswm dros gredu bod y person yn debygol o wneud unrhyw beth sy'n debygol o ddifrodi'r heneb neu ei hamwynderau neu darfu ar y cyhoedd yn eu mwynhad ohoni.

**56 Pŵer i wneud rheoliadau ac is-ddeddfau mewn cysylltiad â mynediad y cyhoedd i henebion sydd o dan reolaeth gyhoeddus**

- (1) Caiff Gweinidogion Cymru reoleiddio mynediad y cyhoedd i unrhyw heneb sydd o dan eu perchnogaeth neu eu gwarcheidiaeth yn rhinwedd y Bennod hon drwy wneud rheoliadau sy'n gwahardd neu'n rheoleiddio unrhyw weithred neu unrhyw beth sy'n debygol o ddifrodi'r heneb neu ei hamwynderau neu darfu ar y cyhoedd yn eu mwynhad ohoni.
- (2) Caiff rheoliadau o dan is-adran (1) hefyd wneud darpariaeth mewn perthynas ag unrhyw heneb sy'n cael ei rheolaethu neu ei rheoli gan Weinidogion Cymru ac eithrio yn rhinwedd y Bennod hon.
- (3) Caiff awdurdod lleol reoleiddio mynediad y cyhoedd i unrhyw heneb sydd o dan ei berchnogaeth neu ei warcheidiaeth yn rhinwedd y Bennod hon drwy wneud is-ddeddfau sy'n gwahardd neu'n rheoleiddio unrhyw weithred neu unrhyw beth sy'n debygol o ddifrodi'r heneb neu ei hamwynderau neu darfu ar y cyhoedd yn eu mwynhad ohoni.
- (4) Mae person sy'n methu â chydymffurfio â darpariaeth a wneir gan reoliadau neu is-ddeddfau o dan yr adran hon yn cyflawni trosedd.
- (5) Mae person sy'n euog o drosedd o dan is-adran (4) yn agored ar euogfarn ddiannod i ddirwy nad yw'n uwch na lefel 2 ar y raddfa safonol.
- (6) Caiff is-ddeddfau a wneir o dan yr adran hon wneud darpariaeth wahanol mewn perthynas â henebion gwahanol neu ddisgrifiadau gwahanol o heneb.
- (7) Nid yw is-ddeddfau o dan yr adran hon yn cymryd effaith oni chânt eu cadarnhau gan Weinidogion Cymru.
- (8) Caiff Gweinidogion Cymru gadarnhau'r is-ddeddfau gydag addasiadau neu hebddynt.

**57 Darparu cyfleusterau i'r cyhoedd mewn cysylltiad â henebion o ddiddordeb hanesyddol arbennig**

- (1) Caiff Gweinidogion Cymru ddarparu cyfleusterau, gwybodaeth a gwasanaethau eraill i'r cyhoedd ar gyfer darparu mynediad y cyhoedd neu mewn cysylltiad â darparu mynediad y cyhoedd –
  - (a) i unrhyw heneb sydd o dan eu perchnogaeth neu eu gwarcheidiaeth yn rhinwedd y Bennod hon, neu
  - (b) i unrhyw heneb sydd fel arall yn cael ei rheolaethu neu ei rheoli ganddynt.
- (2) Caiff awdurdod lleol ddarparu cyfleusterau, gwybodaeth a gwasanaethau eraill i'r cyhoedd ar gyfer darparu mynediad y cyhoedd i unrhyw heneb sydd o dan ei berchnogaeth neu ei warcheidiaeth yn rhinwedd y Bennod hon neu mewn cysylltiad â darparu mynediad o'r fath.
- (3) Caniateir i gyfleusterau a gwybodaeth neu wasanaethau eraill i'r cyhoedd gael eu darparu o dan yr adran hon yn yr heneb ei hun neu arni neu ar unrhyw dir sy'n gysylltiedig â'r heneb.
- (4) Caiff Gweinidogion Cymru neu awdurdod lleol godi tâl am ddefnyddio unrhyw gyfleuster neu unrhyw wasanaeth a ddarperir ganddynt neu ganddo o dan yr adran hon.

**PENNOD 7**

**CYFFREDINOL**

*Difrodi henebion*

**58 Y drosedd o ddifrodi henebion penodol o ddiddordeb hanesyddol arbennig**

- (1) Mae person sy'n dinistrio neu'n difrodi heneb warchoddedig heb esgus cyfreithlon yn euog o drosedd os oedd y person –
  - (a) yn gwybod neu os dylai'n rhesymol fod wedi gwybod bod yr heneb yn heneb warchoddedig, a
  - (b) yn bwriadu dinistrio neu ddifrodi'r heneb neu'n ddi-hid o ran a fyddai'r heneb yn cael ei difrodi neu ei dinistrio.
- (2) Yn is-adran (1) ystyr "heneb warchoddedig" yw –
  - (a) heneb gofrestredig, neu
  - (b) heneb sydd o dan berchnogaeth neu warcheidiaeth Gweinidogion Cymru neu awdurdod lleol yn rhinwedd y Bennod hon.
- (3) Mae'r adran hon yn gymwys i unrhyw beth a wneir gan neu o dan awdurdod perchennog yr heneb, ac eithrio gweithred ar gyfer cyflawni gwaith a eithrir, fel y mae'n gymwys i unrhyw beth a wneir gan unrhyw berson arall.
- (4) Yn is-adran (3) ystyr "gwaith a eithrir" yw –
  - (a) gwaith sydd wedi ei awdurdodi o dan Bennod 3;
  - (b) gwaith y mae cydsyniad datblygu wedi ei roi ar ei gyfer o dan Ddeddf Cynllunio 2008 (p. 29).
- (5) Mae person sy'n euog o drosedd o dan yr adran hon yn agored –

- (a) ar euogfarn ddiannod, i ddirwy neu i'w garcharu am gyfnod nad yw'n hwy na'r terfyn cymwys o dan adran 224(1A)(b) o'r Cod Dedfrydu, neu'r ddau;
- (b) ar euogfarn ar ddiad, i ddirwy neu i'w garcharu am gyfnod nad yw'n hwy na 2 flynedd, neu'r ddau.

### 59 Gorchmynion digolledu am ddifrod i henebion sydd o dan warcheidiaeth

- (1) Mae is-adran (2) yn gymwys pan fo perchennog neu unrhyw berson arall yn cael ei euogfarnu o drosedd sy'n ymwneud â difrod i heneb a oedd ar adeg y drosedd o dan warcheidiaeth Gweinidogion Cymru neu unrhyw awdurdod lleol yn rhinwedd Pennod 6.
- (2) Mae unrhyw orchymyn digolledu a wneir o dan Bennod 2 o Ran 7 o'r Cod Dedfrydu (gorchmynion digolledu yn erbyn personau a euogfarnwyd) mewn cysylltiad â'r difrod hwnnw i'w wneud o blaid Gweinidogion Cymru neu'r awdurdod lleol o dan sylw (yn ôl gofynion yr achos).

### 60 Cyfyngiadau ar y defnydd o ddatgelyddion metel

- (1) Yn yr adran hon –
  - ystyr “cydsyniad” (“*consent*”) yw cydsyniad ysgrifenedig Gweinidogion Cymru;
  - ystyr “datgelydd metel” (“*metal detector*”) yw unrhyw ddyfais sydd wedi ei dylunio neu ei haddasu i ganfod neu leoli unrhyw fetel neu unrhyw fwyn yn y ddaear;
  - ystyr “man gwarchodedig” (“*protected place*”) yw –
    - (a) safle unrhyw heneb gofrestredig, neu
    - (b) safle unrhyw heneb sydd o dan berchnogaeth neu warcheidiaeth Gweinidogion Cymru neu awdurdod lleol yn rhinwedd Pennod 6.
- (2) Mae person yn cyflawni trosedd os yw'r person yn defnyddio datgelydd metel mewn man gwarchodedig heb gydsyniad i wneud hynny.
- (3) Mae person y rhoddwyd cydsyniad iddo i ddefnyddio datgelydd metel mewn man gwarchodedig yn cyflawni trosedd os yw'r person, wrth ddefnyddio'r datgelydd metel yn y man hwnnw, yn methu â chydymffurfio ag unrhyw amod sydd ynghlwm wrth y cydsyniad.
- (4) Mae person yn cyflawni trosedd os yw'r person, heb gydsyniad i wneud hynny, yn symud ymaith unrhyw wrthrych o ddiddordeb archaeolegol neu hanesyddol y mae'r person wedi ei ddarganfod drwy ddefnyddio datgelydd metel mewn man gwarchodedig.
- (5) Mae person y rhoddwyd cydsyniad iddo i symud ymaith unrhyw wrthrych, neu i ymdrin fel arall ag unrhyw wrthrych, y mae'r person yn ei ddarganfod drwy ddefnyddio datgelydd metel mewn man gwarchodedig yn cyflawni trosedd os yw'r person, wrth symud ymaith y gwrthrych neu wrth ymdrin fel arall ag ef, yn methu â chydymffurfio ag unrhyw amod sydd ynghlwm wrth y cydsyniad.
- (6) Mewn unrhyw achos am drosedd o dan is-adran (2) mae'n amddiffyniad i berson brofi iddo ddefnyddio'r datgelydd metel at ddiben ac eithrio i ganfod neu leoli gwrthrychau o ddiddordeb archaeolegol neu hanesyddol.
- (7) Mewn unrhyw achos am drosedd o dan is-adran (2) neu (4) mae'n amddiffyniad i berson brofi –

- (a) ei fod wedi cymryd pob cam rhesymol i ganfod a oedd y man lle y defnyddiwyd y datgelydd metel yn fan gwarchoddedig, a
  - (b) nad oedd yn gwybod, ac nad oedd ganddo reswm dros gredu, bod y man yn fan gwarchoddedig.
- (8) Mae person sy'n euog o drosedd o dan is-adran (2) neu (3) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (9) Mae person sy'n euog o drosedd o dan is-adran (4) neu (5) yn agored ar euogfarn ddiannod, neu ar euogfarn ar dditiad, i ddirwy.

*Gwaith brys ar gyfer diogelu heneb gofrestredig*

**61 Gwaith ar gyfer diogelu heneb gofrestredig mewn achosion brys**

- (1) Os yw'n ymddangos i Weinidogion Cymru fod unrhyw waith y mae adran 11 (gofyniad i waith gael ei awdurdodi) yn gymwys iddo yn angenrheidiol ar frys i ddiogelu heneb gofrestredig, cânt fynd i safle'r heneb a chyflawni'r gwaith hwnnw.
- (2) Cyn arfer y pŵer yn is-adran (1) rhaid i Weinidogion Cymru roi o leiaf 7 niwrnod clir o rybudd yn ysgrifenedig i bob perchennog a phob meddiannydd ar yr heneb.
- (3) Pan fo Gweinidogion Cymru yn cyflawni gwaith o dan yr adran hon ar gyfer atgyweirio unrhyw ddifrod i heneb gofrestredig –
- (a) mae unrhyw orchymyn digolledu a wnaed yn flaenorol mewn cysylltiad â'r difrod hwnnw o dan Bennod 2 o Ran 7 o'r Cod Dedfrydu o blaid unrhyw berson arall yn orfodadwy (i'r graddau na chydymffurfiwyd ag ef eisoes) fel pe bai wedi ei wneud o blaid Gweinidogion Cymru, a
  - (b) rhaid i unrhyw orchymyn o'r fath a wneir wedyn mewn cysylltiad â'r difrod hwnnw gael ei wneud o blaid Gweinidogion Cymru.
- (4) Pan fo gwaith yn cael ei gyflawni o dan yr adran hon, mae'r gwaith i'w drin fel pe bai'n waith awdurdodedig at ddibenion Pennod 3 (rheolaethu gwaith sy'n effeithio ar henebion cofrestredig).

*Gwariant a chynghor mewn perthynas â henebion*

**62 Gwariant ar gaffael a diogelu henebion o ddiddordeb hanesyddol arbennig etc.**

- (1) Caiff Gweinidogion Cymru dalu cost caffael unrhyw heneb o ddiddordeb hanesyddol arbennig gan unrhyw berson, neu gyfrannu tuag at y gost honno.
- (2) Caiff Gweinidogion Cymru –
- (a) symud ymaith neu gynorthwyo i symud ymaith unrhyw heneb o ddiddordeb hanesyddol arbennig neu unrhyw ran o unrhyw heneb o'r fath i fan arall at ddiben ei diogelu;
  - (b) talu cost symud ymaith unrhyw heneb o'r fath neu unrhyw ran o unrhyw heneb o'r fath i fan arall at ddiben ei diogelu, neu gyfrannu tuag at y gost honno.
- (3) Caiff Gweinidogion Cymru, ar gais perchennog ar unrhyw heneb o ddiddordeb hanesyddol arbennig –
- (a) ymgymryd â gwaith i ddiogelu, cynnal a chadw a rheoli'r heneb neu gynorthwyo'r gwaith hwnnw;

- (b) talu am gost diogelu, cynnal a chadw a rheoli'r heneb, neu gyfrannu tuag at y gost honno.
- (4) Caiff Gweinidogion Cymru gyfrannu tuag at gost darparu cyfleusterau neu wasanaethau i'r cyhoedd gan awdurdod lleol o dan adran 57.
- (5) Caiff awdurdod lleol, ar gais perchennog ar unrhyw heneb o ddiddordeb hanesyddol arbennig yn ei ardal neu yng nghyffiniau ei ardal –
  - (a) ymgymryd â gwaith i ddiogelu, cynnal a chadw a rheoli'r heneb neu gynorthwyo'r gwaith hwnnw;
  - (b) talu am gost diogelu, cynnal a chadw a rheoli'r heneb, neu gyfrannu tuag at y gost honno.
- (6) Ni chaiff Gweinidogion Cymru nac awdurdod lleol fynd i wariant o dan yr adran hon mewn cysylltiad ag unrhyw adeilad neu unrhyw strwythur a feddiennir fel annedd gan unrhyw berson ac eithrio gofalwr yr adeilad neu'r strwythur neu aelod o deulu'r gofalwr.

### **63 Cyngor gan Weinidogion Cymru a goruchwylio gwaith ganddynt**

- (1) Caiff Gweinidogion Cymru roi cyngor ynghylch trin unrhyw heneb o ddiddordeb hanesyddol arbennig.
- (2) Caiff Gweinidogion Cymru hefyd oruchwylio unrhyw waith mewn cysylltiad ag unrhyw heneb o ddiddordeb hanesyddol arbennig os ydynt yn cael eu gwahodd i wneud hynny gan berchennog ar yr heneb.
- (3) Rhaid i Weinidogion Cymru oruchwylio gwaith mewn cysylltiad ag unrhyw heneb gofrestredig, os ydynt yn ystyried bod hynny yn ddoeth (pa un a yw perchennog yn gofyn iddynt wneud hynny ai peidio).
- (4) Caiff Gweinidogion Cymru godi tâl am roi cyngor neu oruchwylio gwaith o dan yr adran hon.

### **64 Gwariant gan awdurdodau lleol ar ymchwiliad archaeolegol**

- (1) Os yw awdurdod lleol yn ystyried y gall unrhyw dir yn ei ardal neu yng nghyffiniau ei ardal gynnwys heneb o ddiddordeb hanesyddol arbennig, neu unrhyw beth arall o ddiddordeb archaeolegol neu hanesyddol, caiff yr awdurdod –
  - (a) cynnal ymchwiliad archaeolegol o'r tir neu gynorthwyo mewn ymchwiliad o'r fath, neu
  - (b) talu cost ymchwiliad archaeolegol o'r tir neu gyfrannu tuag at y gost honno.
- (2) Caiff awdurdod lleol gyhoeddi canlyniadau unrhyw ymchwiliad archaeolegol a gynhelir ganddo, a gynorthwyr ganddo neu a gyllidir yn gyfan gwbl neu'n rhannol ganddo o dan yr adran hon.
- (3) Caniateir i'r pwerau yn is-adran (1) gael eu harfer mewn perthynas ag unrhyw dir sy'n ffurfio rhan o wely'r môr o fewn terfynau atfor y môr tiriogaethol sy'n gyfagos i Gymru.



*Pwerau mynediad***65 Pwerau mynediad i arolygu henebion cofrestredig etc.**

- (1) Caiff person awdurdodedig fynd ar unrhyw dir i arolygu heneb gofrestrredig yn y tir, arno neu odano i asesu ei chyflwr ac i asesu –
  - (a) a oes unrhyw waith sy'n effeithio ar yr heneb yn cael ei gyflawni yn groes i adran 11 (gofyniad i waith gael ei awdurdodi), neu
  - (b) a yw wedi cael ei difrodi neu'n debygol o gael ei difrodi (gan waith o'r fath neu fel arall).
- (2) Caiff person awdurdodedig fynd ar unrhyw dir i arolygu heneb gofrestrredig yn y tir, arno neu odano mewn cysylltiad –
  - (a) â chais am gydsyniad heneb gofrestrredig ar gyfer gwaith sy'n effeithio ar yr heneb honno,
  - (b) â chynnig i addasu neu ddirymu cydsyniad heneb gofrestrredig ar gyfer unrhyw waith o'r fath, neu
  - (c) â chynnig i wneud gorchymyn o dan adran 27 (terfynu cytundeb partneriaeth heneb gofrestrredig neu ddarpariaeth mewn cytundeb).
- (3) Caiff person awdurdodedig fynd ar unrhyw dir i asesu a yw unrhyw waith y mae cydsyniad heneb gofrestrredig neu awdurdodiad o dan adran 12 yn ymwneud ag ef yn cael ei gyflawni neu wedi cael ei gyflawni yn unol â thelerau'r cydsyniad neu'r awdurdodiad (gan gynnwys unrhyw amodau).
- (4) Caiff person awdurdodedig fynd ar unrhyw dir y mae unrhyw waith y mae cydsyniad heneb gofrestrredig neu awdurdodiad o dan adran 12 yn ymwneud ag ef yn cael ei gyflawni arno er mwyn –
  - (a) arolygu'r tir (gan gynnwys unrhyw adeiladau neu unrhyw strwythurau eraill ar y tir) i gofnodi unrhyw faterion o ddiddordeb archaeolegol neu hanesyddol, neu
  - (b) arsylwi ar y gwaith hwnnw yn cael ei gyflawni gyda golwg –
    - (i) ar archwilio a chofnodi unrhyw wrthrychau neu unrhyw ddeunydd arall o ddiddordeb archaeolegol neu hanesyddol a ddarganfyddir yng nghwrs y gwaith hwnnw, a
    - (ii) ar gofnodi unrhyw faterion o ddiddordeb archaeolegol neu hanesyddol a ddarganfyddir yng nghwrs y gwaith hwnnw.
- (5) Caiff person awdurdodedig fynd ar unrhyw dir y mae heneb gofrestrredig ynddo, arno neu odano i godi a chynnal ar safle'r heneb neu gerllaw iddo unrhyw hysbysfyrdau ac unrhyw byst marcio y mae Gweinidogion Cymru yn ystyried eu bod yn ddymunol i warchod yr heneb rhag difrod damweiniol neu fwriadol.
- (6) Ni chaniateir i'r pŵer yn is-adran (5) gael ei arfer heb gytundeb pob perchennog a phob meddiannydd ar y tir.
- (7) Yn yr adran hon ystyr "person awdurdodedig" yw person sydd wedi ei awdurdodi'n ysgrifenedig gan Weinidogion Cymru.



**66 Pwerau mynediad sy'n ymwneud â gorfodi rheolaethau ar waith**

- (1) Caiff person awdurdodedig fynd ar unrhyw dir –
  - (a) i benderfynu a ddylai hysbysiad stop dros dro gael ei ddyroddi;
  - (b) i arddangos copi o hysbysiad stop dros dro yn unol ag adran 31 neu ei osod yn sownd at ddiben ei gyflwyno yn unol ag adran 206(5)(c);
  - (c) i asesu a gydymffurfiwyd â hysbysiad stop dros dro.
- (2) Caiff person awdurdodedig fynd ar unrhyw dir –
  - (a) i benderfynu a ddylai hysbysiad gorfodi gael ei ddyroddi;
  - (b) i osod hysbysiad gorfodi yn sownd at ddiben ei gyflwyno yn unol ag adran 206(5)(c);
  - (c) i asesu a gydymffurfiwyd â hysbysiad gorfodi.
- (3) Yn yr adran hon ystyr “person awdurdodedig” yw person sydd wedi ei awdurdodi'n ysgrifenedig gan Weinidogion Cymru.

**67 Pŵer mynediad i dir y credir ei fod yn cynnwys heneb o ddiddordeb hanesyddol arbennig**

- (1) Caiff person awdurdodedig fynd ar unrhyw dir y mae Gweinidogion Cymru yn gwybod neu y mae ganddynt reswm dros gredu bod heneb o ddiddordeb hanesyddol arbennig ynddo, arno neu odano er mwyn arolygu'r tir (gan gynnwys unrhyw adeilad neu unrhyw strwythur arall arno) gyda golwg ar gofnodi unrhyw faterion o ddiddordeb archaeolegol neu hanesyddol.
- (2) Caiff person awdurdodedig sy'n mynd ar unrhyw dir wrth arfer y pŵer yn is-adran (1) gynnal cloddiadau yn y tir at ddibenion ymchwiliad archaeolegol.
- (3) Er mwyn cynnal cloddiad o dan is-adran (2) mae'n ofynnol cael cytundeb pob person y byddai'n ofynnol cael ei gytundeb i wneud y cloddiad ar wahân i'r adran hon.
- (4) Ond nid yw is-adran (3) yn gymwys os yw Gweinidogion Cymru yn gwybod neu os oes ganddynt reswm dros gredu bod heneb o ddiddordeb hanesyddol arbennig y maent yn gwybod neu'n credu ei bod yn y tir, arno neu odano mewn perygl, neu'n gallu bod mewn perygl, o fod ar fin cael ei difrodi neu ei dinistrio.
- (5) Yn yr adran hon ystyr “person awdurdodedig” yw person sydd wedi ei awdurdodi'n ysgrifenedig gan Weinidogion Cymru

**68 Pŵer mynediad i gynnal arolwg a phrisiad mewn cysylltiad â hawliad am ddiogollediad**

- (1) Caiff person awdurdodedig fynd ar unrhyw dir i gynnal arolwg ohono, neu i amcangyfrif ei werth, mewn cysylltiad â hawliad am ddiogollediad o dan y Rhan hon am unrhyw ddifrod i'r tir hwnnw neu unrhyw dir arall.
- (2) Yn yr adran hon ystyr “person awdurdodedig” yw –
  - (a) swyddog o Swyddfa Brisió Cyllid a Thollau Ei Fawrhydi, neu
  - (b) person sydd wedi ei awdurdodi'n ysgrifenedig gan Weinidogion Cymru.
- (3) Mae'r pŵer i gynnal arolwg o dir o dan yr adran hon yn cynnwys pŵer i chwilio a thurio i benderfynu natur yr isbridd neu i benderfynu a oes mwynau yn bresennol.

**69 Darpariaeth atodol ynghylch pwerau mynediad o dan y Rhan hon**

- (1) Caniateir i bŵer i fynd ar dir o dan y Rhan hon gael ei arfer ar unrhyw adeg resymol; ond nid yw'r is-adran hon yn gymwys i adran 65(5).
- (2) Ni chaiff person sydd wedi ei awdurdodi i fynd ar dir o dan y Rhan hon fynnu mynediad fel hawl i unrhyw dir sydd wedi ei feddiannu oni bai bod rhybudd o'r mynediad bwriadedig wedi ei roi i bob meddiannydd –
  - (a) pan mai diben y mynediad yw cyflawni unrhyw waith ar y tir (ac eithrio cloddiadau wrth arfer y pŵer o dan adran 67), o leiaf 14 o ddiwrnodau cyn diwrnod y mynediad bwriadedig, neu
  - (b) mewn unrhyw achos arall (gan gynnwys cloddiadau wrth arfer y pŵer o dan adran 67), o leiaf 24 awr cyn diwrnod y mynediad bwriadedig.
- (3) Nid yw is-adran (2) yn gymwys i fynediad o dan –
  - (a) adran 61 (ond gweler is-adran (2) o'r adran honno), na
  - (b) adran 66(1).
- (4) Ni chaiff person sydd wedi ei awdurdodi i fynd ar dir o dan y Rhan hon fynd i unrhyw adeilad nac unrhyw strwythur na rhan o adeilad na strwythur a feddiennir fel annedd heb gytundeb pob meddiannydd; ond nid yw'r is-adran hon yn gymwys i'r pŵer yn adran 68.
- (5) Rhaid i berson sydd wedi ei awdurdodi i fynd ar dir o dan y Rhan hon –
  - (a) os yw'n ofynnol iddo wneud hynny gan neu ar ran perchennog neu feddiannydd ar y tir, ddangos tystiolaeth o awdurdodiad y person a datgan diben mynd ar y tir cyn mynd arno;
  - (b) os yw'n ymadael â'r tir ar adeg pan nad oes perchennog neu feddiannydd yn bresennol, ei adael wedi ei ddiogelu yr un mor effeithiol rhag tresmaswyr ag yr oedd pan aeth y person arno.
- (6) Caiff person sy'n mynd ar dir wrth arfer pŵer mynediad o dan y Rhan hon fynd â chynhorthwy neu gyfarpar y bo ei angen yn rhesymol at y diben y mae'r mynediad yn ymwneud ag ef.
- (7) Pan fo person yn cynnal unrhyw ymchwiliad archaeolegol neu unrhyw archwiliad archaeolegol o dir wrth arfer pŵer mynediad o dan y Rhan hon, caiff y person gymryd unrhyw samplau y mae'n ymddangos i'r person y bo eu hangen yn rhesymol at ddiben dadansoddi archaeolegol a symud unrhyw samplau o'r fath ymaith.
- (8) Pan –
  - (a) bo pŵer mynediad o dan y Rhan hon yn arferadwy gan berson ("P1") mewn perthynas ag unrhyw dir, a
  - (b) bo gwaith yn cael ei gyflawni ar y tir gan berson arall ("P2"),
 rhaid i P1, wrth arfer y pŵer mynediad, gydymffurfio ag unrhyw ofynion rhesymol neu unrhyw amodau rhesymol a osodir gan P2 at ddiben atal ymyrryd â'r gwaith neu atal oedi i'r gwaith.
- (9) Nid yw is-adran (8) yn gymwys pan fo'r gwaith o dan sylw yn cael ei gyflawni yn groes i adran 11 (gofyniad i waith gael ei awdurdodi).

- (10) At ddibenion is-adran (8), nid yw gofyniad neu amod yn rhesymol pe byddai cydymffurfio ag ef yn llesteirio arfer y pŵer mynediad neu ddiben y mynediad.
- (11) Mae person sy'n fwriadol yn rhwystro person sy'n arfer pŵer mynediad o dan y Rhan hon yn cyflawni trosedd.
- (12) Mae person sy'n euog o drosedd o dan is-adran (11) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (13) Pan—
- bo person, wrth arfer y pŵer mynediad o dan adran 68, yn cynnig cyflawni gwaith a awdurdodir gan is-adran (3) o'r adran honno, a
  - bo'n ofynnol iddo roi rhybudd o'r mynediad bwriadedig o dan is-adran (2)(a) o'r adran hon,

ni chaiff y person gyflawni'r gwaith oni bai bod y rhybudd o fynediad bwriadedig yn cynnwys hysbysiad o fwriad y person i gyflawni'r gwaith hwnnw.

- (14) Pan—
- wrth arfer y pŵer mynediad o dan adran 68, bo person yn cynnig cyflawni unrhyw waith a awdurdodir gan is-adran (3) o'r adran honno ar dir sy'n perthyn i ymgymerwr statudol, a
  - bo'r ymgymerwr yn gwrthwynebu'r cynnig ar y sail y byddai cyflawni'r gwaith yn ddifrifol niweidiol i gynnal ei ymgymeriad,

ni chaiff y person gyflawni'r gwaith heb gytundeb Gweinidogion Cymru.

## 70 **Digollediad am ddifrod a achosir drwy arfer pwerau penodol o dan y Rhan hon**

- Mae'r adran hon yn gymwys i unrhyw bŵer i fynd ar unrhyw dir, neu i wneud unrhyw beth ar unrhyw dir, o dan adran 40 neu adrannau 65 i 68.
- Mae gan unrhyw berson sydd â buddiant mewn tir hawlogaeth, wrth wneud hawliad i Weinidogion Cymru, i gael ei ddigolledu ganddynt am unrhyw ddifrod a achosir i'r tir neu i eiddo ar y tir wrth arfer pŵer y mae'r adran hon yn gymwys iddo.
- Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â'r diwrnod y cafodd y difrod ei achosi (neu os cafodd y difrod ei achosi dros fwy nag un diwrnod, y diwrnod olaf y cafodd ei achosi).

## 71 **Trin a diogelu darganfyddiadau**

- Mae'r adran hon yn gymwys pan fo person yn mynd ar dir wrth arfer pŵer mynediad o dan y Rhan hon—
  - i gynnal cloddiadau yn y tir neu i gyflawni gwaith sy'n effeithio ar heneb o ddiddordeb hanesyddol arbennig sydd yn y tir, arno neu odano,
  - i asesu neu arsylwi ar waith ar y tir o dan adran 65(3) neu (4)(b), neu
  - i gynnal archwiliad archaeolegol o'r tir.
- Caiff y person—

- (a) cymryd gwarchodaeth dros dro o unrhyw wrthrych o ddi-ddordeb archaeolegol neu hanesyddol a ddarganfyddir yng nghwrs y cloddiadau, y gwaith neu'r archwiliad, a
  - (b) symud y gwrthrych ymaith o'i safle at ddiben ei archwilio, ei brofi, ei drin, ei gofnodi neu ei ddiogelu.
- (3) Ni chaiff yr awdurdod priodol, heb gytundeb pob perchennog, gadw'r gwrthrych am gyfnod sy'n hwy nag y bo angen yn rhesymol –
- (a) i'w archwilio a'i gofnodi, a
  - (b) i gynnal unrhyw brawf neu gyflawni unrhyw driniaeth y mae'n ymddangos i'r awdurdod ei fod neu ei bod yn ddymunol –
    - (i) at ddiben ymchwiliad neu ddadansoddiad archaeolegol, neu
    - (ii) i adfer neu ddiogelu'r gwrthrych.
- (4) Yn is-adran (3) ystyr "awdurdod priodol" yw –
- (a) mewn achos pan gafodd y pŵer mynediad ei arfer gan Weinidogion Cymru neu ar eu rhan, Gweinidogion Cymru, a
  - (b) mewn achos pan gafodd y pŵer mynediad ei arfer gan awdurdod lleol neu ar ei ran, yr awdurdod hwnnw.
- (5) Nid yw'r adran hon yn effeithio ar unrhyw hawl sydd gan y Goron o dan Ddeddf Trysor 1996 (p. 24).

*Atodol*

**72 Dilysrwydd penderfyniadau a gorchmynion penodol o dan y Rhan hon**

- (1) Ni chaniateir cwestiynu dilysrwydd penderfyniad neu orchymyn y mae'r adran hon yn gymwys iddo mewn unrhyw achos cyfreithiol ac eithrio cais am adolygiad statudol o dan adran 73.
- (2) Y penderfyniadau y mae'r adran hon yn gymwys iddynt yw –
  - (a) penderfyniad gan Weinidogion Cymru ar gais am gydsyniad heneb gofrestredig, a
  - (b) penderfyniad ar adolygiad o dan adran 9.
- (3) Mae'r adran hon yn gymwys i orchymyn o dan adran 20 sy'n addasu neu'n dirymu cydsyniad heneb gofrestredig.
- (4) Nid yw'r adran hon yn atal unrhyw lys rhag arfer unrhyw awdurdodaeth mewn perthynas â gwrthodiad neu fethiant i wneud penderfyniad y mae'r adran hon yn gymwys iddo.

**73 Cais i'r Uchel Lys am adolygiad statudol o benderfyniad neu orchymyn**

- (1) Caiff person a dramgwyddir gan benderfyniad neu orchymyn y mae adran 72 yn gymwys iddo wneud cais am adolygiad statudol.
- (2) Mae cais am adolygiad statudol yn gais i'r Uchel Lys sy'n cwestiynu dilysrwydd y penderfyniad neu'r gorchymyn ar y sail –
  - (a) nad yw o fewn y pwerau a roddir gan y Ddeddf hon, neu

- (b) na chydymffurfiwyd â gofyniad perthnasol mewn perthynas â'r penderfyniad neu'r gorchymyn.
- (3) Rhaid i gais am adolygiad statudol gael ei wneud cyn diwedd 6 wythnos sy'n dechrau â thrannoeth y diwrnod y gwneir y penderfyniad neu'r gorchymyn y mae'r cais yn ymwneud ag ef.
- (4) Ar unrhyw gais am adolygiad statudol, caiff yr Uchel Lys –
  - (a) gwneud gorchymyn interim sy'n atal dros dro weithrediad y penderfyniad neu'r gorchymyn y mae'r cais yn ymwneud ag ef, hyd nes y penderfynir yn derfynol ar yr achos;
  - (b) diddymu'r penderfyniad hwnnw neu'r gorchymyn hwnnw os yw wedi ei fodloni –
    - (i) nad yw o fewn y pwerau a roddir gan y Ddeddf hon, neu
    - (ii) bod methiant i gydymffurfio â gofyniad perthnasol mewn perthynas â'r penderfyniad neu'r gorchymyn wedi cael effaith andwyol sylweddol ar fuddiannau'r ceisydd.
- (5) Yn yr adran hon ystyr "gofyniad perthnasol" yw unrhyw ofyniad –
  - (a) yn y Ddeddf hon neu yn Neddf Tribiwnlysoedd ac Ymchwiliadau 1992 (p. 53), neu
  - (b) mewn unrhyw is-ddeddfwriaeth a wneir o dan y Ddeddf hon neu o dan y Ddeddf honno.

#### 74 Tir y Goron

- (1) Nid yw'r Rhan hon yn gymwys mewn perthynas â thir y Goron ond i'r graddau a nodir isod.
- (2) Caniateir cynnwys heneb sydd ar dir y Goron, ynddo neu odano yn y gofrestr.
- (3) Mae unrhyw gyfyngiadau neu unrhyw bwerau a osodir neu a roddir gan y Rhan hon yn gymwys ac yn arferadwy mewn perthynas â thir y Goron ac mewn perthynas ag unrhyw beth a wneir ar dir y Goron ac eithrio gan neu ar ran y Goron, ond nid fel y byddai'n effeithio ar unrhyw fuddiant sydd gan y Goron yn y tir.
- (4) Nid yw'r adran hon yn caniatáu –
  - (a) i bŵer o dan y Rhan hon i fynd ar unrhyw dir, neu i wneud unrhyw beth ar unrhyw dir, gael ei arfer mewn perthynas â thir y Goron, na
  - (b) i fuddiant yn nhir y Goron a ddelir ac eithrio gan neu ar ran y Goron gael ei gaffael yn orfodol o dan y Rhan hon,
 heb gytundeb awdurdod priodol y Goron.

#### 75 Dehongli'r Rhan hon

- (1) Yn y Rhan hon –
  - mae i "archwiliad archaeolegol" ("*archaeological examination*") yr ystyr a roddir gan is-adran (3);
  - ystyr "awdurdod lleol" ("*local authority*") yw –
    - (a) cyngor sir neu gyngor bwrdeistref sirol yng Nghymru, a
    - (b) awdurdod Parc Cenedlaethol yng Nghymru;

mae i “cydsyniad heneb gofrestredig” (“*scheduled monument consent*”) yr ystyr a roddir gan adran 13;

mae i “y gofrestr” (“*the schedule*”) yr ystyr a roddir gan adran 3;

mae “gwaith” (“*works*”) yn cynnwys –

- (a) gweithrediadau i foddi tir neu weithrediadau tipio,
- (b) unrhyw weithrediadau a gyflawnir at ddibenion amaethyddiaeth (o fewn ystyr “agriculture” yn Neddf Cynllunio Gwlad a Thref 1990 (p. 8)) neu goedwigaeth (gan gynnwys coedwigo), ac
- (c) gweithrediadau o unrhyw ddisgrifiad arall;

mae “gwarcheidwad” (“*guardian*”) i’w ddehongli yn unol ag adrannau 45 a 49;

mae i “gwarchodaeth interim” (“*interim protection*”) yr ystyr a roddir gan adran 6(3);

mae i “gweithred warcheidiaeth” (“*guardianship deed*”) yr ystyr a roddir gan adran 45(7);

ystyr “gweithrediadau i foddi tir” (“*flooding operations*”) yw gorchuddio tir â dŵr neu â sylwedd arall sy’n hylifol neu’n rhannol hylifol;

ystyr “gweithrediadau tipio” (“*tipping operations*”) yw tipio pridd neu gloddion neu ddyddodi deunyddiau adeiladu neu ddeunyddiau eraill neu sylwedd adeiladu neu sylwedd arall (gan gynnwys gwastraff) ar unrhyw dir;

mae i “heneb o ddiddordeb hanesyddol arbennig” (“*monument of special historic interest*”) yr ystyr a roddir gan is-adran (6);

ystyr “hysbysiad gorfodi” (“*enforcement notice*”) yw hysbysiad gorfodi a ddyroddir o dan adran 35;

ystyr “hysbysiad stop dros dro” (“*temporary stop notice*”) yw hysbysiad stop dros dro a ddyroddir o dan adran 31;

mae “meddiant” (“*possession*”) yn cynnwys cael rhent ac elw neu’r hawl i gael rhent ac elw (os oes rhent neu elw);

mae i “ymchwiliad archaeolegol” (“*archaeological investigation*”) yr ystyr a roddir gan is-adran (2).

- (2) Yn y Rhan hon ystyr “ymchwiliad archaeolegol” yw unrhyw ymchwiliad o dir, o wrthrychau neu o ddeunydd arall at ddiben cael a chofnodi unrhyw wybodaeth o ddiddordeb archaeolegol neu hanesyddol ac mae’n cynnwys, yn achos ymchwiliad archaeolegol o dir –
- (a) unrhyw ymchwiliad at ddiben darganfod a datgelu a (phan fo’n briodol) adennill a symud ymaith unrhyw wrthrychau neu unrhyw ddeunydd arall o ddiddordeb archaeolegol neu hanesyddol yn y tir, arno neu odano, a
  - (b) archwilio, profi, trin, cofnodi a diogelu unrhyw wrthrychau o’r fath neu unrhyw ddeunydd o’r fath a ddarganfyddir yng nghwrs unrhyw gloddiadau neu unrhyw arolygiadau a gynhelir at ddibenion unrhyw ymchwiliad o’r fath.



- (3) Yn y Rhan hon ystyr “archwiliad archaeolegol”, mewn perthynas â thir, yw unrhyw archwiliad neu unrhyw arolygiad o’r tir (gan gynnwys adeiladau neu strwythurau eraill ar y tir) at ddiben cael a chofnodi unrhyw wybodaeth o ddiddordeb archaeolegol neu hanesyddol.
- (4) Yn y Rhan hon (ac eithrio ym Mhennod 4) mae cyfeiriadau at dir sy’n gysylltiedig â heneb (neu at dir cysylltiedig) i’w dehongli yn unol ag adran 49(9).
- (5) Yn y Rhan hon mae cyfeiriadau at heneb, mewn perthynas â chaffael neu drosglwyddo unrhyw heneb (pa un ai o dan y Rhan hon neu fel arall), yn cynnwys unrhyw fuddiant yn yr heneb neu hawl drosti.
- (6) Yn y Rhan hon ystyr “heneb o ddiddordeb hanesyddol arbennig” yw –
  - (a) unrhyw heneb gofrestredig, a
  - (b) unrhyw heneb arall sy’n gyfan gwbl neu’n bennaf yng Nghymru y mae Gweinidogion Cymru yn ystyried ei bod o ddiddordeb i’r cyhoedd oherwydd y diddordeb hanesyddol, pensaernïol, traddodiadol, artistig neu archaeolegol sy’n gysylltiedig â hi.
- (7) Ond nid yw’r cyfeiriad at heneb yn is-adran (6)(b) yn cynnwys heneb yn, ar neu o dan wely’r môr islaw’r marc distyll.

### RHAN 3

## ADEILADAU O DDIDDORDEB PENSAERNÏOL NEU HANESYDDOL ARBENNIG

### PENNOD 1

#### RHESTRU ADEILADAU O DDIDDORDEB ARBENNIG

##### *Rhestr o adeiladau*

#### 76 Dyletswydd i gynnal a chyhoeddi rhestr o adeiladau

- (1) Rhaid i Weinidogion Cymru gynnal rhestr o adeiladau y mae rhaid iddi gynnwys pob adeilad yng Nghymru y maent yn ystyried ei fod o ddiddordeb pensaernïol neu hanesyddol arbennig, a rhaid iddynt gyhoeddi’r rhestr gyfredol.
- (2) Caiff Gweinidogion Cymru ddiwygio’r rhestr drwy –
  - (a) ychwanegu adeilad,
  - (b) dileu adeilad, neu
  - (c) diwygio’r cofnod ar gyfer adeilad.
- (3) Wrth ystyried a ddylai adeilad gael ei gynnwys yn y rhestr, caiff Gweinidogion Cymru ystyried nid yn unig yr adeilad ei hun ond hefyd –
  - (a) unrhyw ffordd y mae’r tu allan i’r adeilad yn cyfrannu at ddiddordeb pensaernïol neu hanesyddol unrhyw grŵp o adeiladau y mae’n ffurfio rhan ohono, a
  - (b) dymunoldeb diogelu unrhyw nodweddd artiffisial o’r adeilad ar sail ei diddordeb pensaernïol neu hanesyddol.
- (4) Yn is-adran (3)(b) ystyr “nodweddd artiffisial” yw unrhyw nodweddd o’r adeilad sy’n cynnwys strwythur neu wrthrych artiffisial –
  - (a) sy’n sownd wrth yr adeilad, neu



- (b) sy'n ffurfio rhan o'r tir ac sydd o fewn cwrtil yr adeilad.
- (5) Yn y Ddeddf hon ystyr "adeilad rhestredig" yw adeilad sydd wedi ei gynnwys yn y rhestr a gynhelir o dan yr adran hon, ac mae'n cynnwys –
  - (a) unrhyw strwythur neu unrhyw wrthrych artiffisial sy'n sownd wrth yr adeilad ac sy'n atodol iddo;
  - (b) unrhyw strwythur neu unrhyw wrthrych artiffisial arall –
    - (i) sy'n ffurfio rhan o'r tir ac wedi gwneud hynny ers cyn 1 Gorffennaf 1948, a
    - (ii) a oedd o fewn cwrtil yr adeilad, ac yn atodol iddo, ar y dyddiad y cynhwyswyd yr adeilad yn y rhestr am y tro cyntaf, neu ar 1 Ionawr 1969, pa un bynnag oedd y diweddaraf.
- (6) Yn y Rhan hon –
  - (a) ystyr "rhestru" adeilad yw diwygio'r rhestr drwy ychwanegu'r adeilad;
  - (b) ystyr "dadrestru" adeilad yw diwygio'r rhestr drwy ddileu'r adeilad.

#### 77 Hysbysiad o restru neu ddadrestru adeilad

- (1) Cyn gynted â phosibl ar ôl i Weinidogion Cymru restru neu ddadrestru adeilad, rhaid iddynt gyflwyno hysbysiad eu bod wedi gwneud hynny –
  - (a) i bob perchennog a phob meddiannydd ar yr adeilad, a
  - (b) i bob awdurdod lleol perthnasol y mae'r adeilad yn ei ardal.
- (2) Pan fo Gweinidogion Cymru wedi rhestru adeilad –
  - (a) rhaid i'r hysbysiad bennu'r dyddiad y gwnaethant hynny, a
  - (b) rhaid iddynt gynnwys gyda'r hysbysiad gopi o'r cofnod ar gyfer yr adeilad yn y rhestr a gynhelir o dan adran 76.
- (3) Mae copi o gofnod a gyflwynir o dan yr adran hon yn bridiant tir lleol, ac at ddibenion Deddf Pridiannau Tir Lleol 1975 (p. 76) y cyngor sir neu'r cyngor bwrdeistref sirol y cyflwynir y copi iddo yw'r awdurdod tarddiadol o ran y pridiant.
- (4) Rhaid i awdurdod lleol perthnasol gadw'r canlynol ar gael i'r cyhoedd edrych arnynt –
  - (a) copïau o gofnodion yn y rhestr sydd wedi eu cyflwyno iddo o dan yr adran hon, a
  - (b) copïau o unrhyw rannau o'r rhestr a adneuwyd gydag ef o dan adran 2(1) o Ddeddf Cynllunio (Adeiladau Rhestredig ac Ardaloedd Cadwraeth) 1990 (p. 9) neu ddarpariaeth gyfatebol mewn unrhyw Ddeddf gynharach, i'r graddau y mae'r rhannau hynny yn parhau i fod yn gyfredol.
- (5) Rhaid i'r copïau fod ar gael i edrych arnynt –
  - (a) yn rhad ac am ddim,
  - (b) ar adegau rhesymol, ac
  - (c) mewn man cyfleus.
- (6) Yn yr adran hon ystyr "awdurdod lleol perthnasol" yw –
  - (a) cyngor sir neu gyngor bwrdeistref sirol;
  - (b) awdurdod Parc Cenedlaethol;

(c) bwrdd cydgynllunio.

*Cynigion i restru a dadrestru adeiladau: ymgynghori a gwarchodaeth dros dro*

## 78 Ymgynghori cyn restru neu ddadrestru adeilad

- (1) Pan fo Gweinidogion Cymru yn cynnig restru neu ddadrestru adeilad, rhaid iddynt gyflwyno i'r personau a grybwyllir yn is-adran (2) hysbysiad –
  - (a) sy'n nodi'r diwygiad arfaethedig i'r rhestr a gynhelir o dan adran 76, a
  - (b) sy'n gwahodd y personau hynny i gyflwyno sylwadau ysgrifenedig ynghylch y cynnig.
- (2) Y personau yw –
  - (a) pob perchennog a phob meddiannydd ar yr adeilad,
  - (b) pob awdurdod cynllunio y mae'r adeilad yn ei ardal, ac
  - (c) unrhyw bersonau eraill y mae Gweinidogion Cymru yn ystyried eu bod yn briodol a bod ganddynt wybodaeth arbennig am adeiladau o ddiddordeb pensaernïol neu hanesyddol, neu ddiddordeb arbennig ynddynt.
- (3) Rhaid i hysbysiad o dan is-adran (1) –
  - (a) pennu'r cyfnod y caniateir i sylwadau gael eu cyflwyno ynddo, a
  - (b) yn achos cynnig i restru adeilad –
    - (i) cynnwys datganiad o effaith adran 79 (gwarchodaeth interim), a
    - (ii) pennu'r dyddiad y mae gwarchodaeth interim yn cymryd effaith o dan yr adran honno.
- (4) Rhaid i'r cyfnod a bennir o dan is-adran (3)(a) fod o leiaf 28 o ddiwrnodau sy'n dechrau â'r diwrnod y cyflwynir yr hysbysiad.

## 79 Gwarchodaeth interim wrth aros am benderfyniad o ran pa un ai i restru adeilad

- (1) Mae'r adran hon yn gymwys pan fo Gweinidogion Cymru yn cyflwyno hysbysiad o dan adran 78(1) o gynnig i restru adeilad.
- (2) O ddechrau'r diwrnod a bennir o dan adran 78(3)(b)(ii), mae'r Ddeddf hon (ac eithrio adrannau 118 a 137 i 142) a Deddf Cynllunio Gwlad a Thref 1990 (p. 8) yn cael effaith mewn perthynas â'r adeilad fel pe bai'n adeilad rhestredig.
- (3) Cyfeirir at y warchodaeth a roddir yn rhinwedd is-adran (2) yn y Rhan hon fel "gwarchodaeth interim".
- (4) Rhaid i Weinidogion Cymru –
  - (a) cyhoeddi rhestr o'r adeiladau sy'n ddarostyngedig i warchodaeth interim, a
  - (b) darparu copi o'r hysbysiad a gyflwynir o dan adran 78(1) mewn cysylltiad ag adeilad o'r fath i unrhyw berson sy'n gofyn am gopi.
- (5) Daw gwarchodaeth interim i ben mewn perthynas ag adeilad –
  - (a) pan fo Gweinidogion Cymru yn restru'r adeilad, ar ddechrau'r diwrnod a bennir yn yr hysbysiad o dan adran 77(1);

- (b) pan fo Gweinidogion Cymru yn penderfynu peidio â rhestru'r adeilad, ar ddechrau'r diwrnod a bennir mewn hysbysiad a gyflwynir –
  - (i) i bob perchennog a phob meddiannydd ar yr adeilad, a
  - (ii) i bob awdurdod cynllunio y mae'r adeilad yn ei ardal.
- (6) Mae Atodlen 7 yn gwneud darpariaeth ynghylch effaith gwarchodaeth interim yn dod i ben o dan is-adran (5)(b).
- (7) Nid yw'r adran hon yn gymwys i adeilad sy'n heneb gofrestredig.

## 80 **Digollediad am golled neu ddifrod a achosir gan warchodaeth interim**

- (1) Mae'r adran hon yn gymwys pan fo gwarchodaeth interim yn dod i ben mewn perthynas ag adeilad oherwydd bod Gweinidogion Cymru yn cyflwyno hysbysiad o dan adran 79(5)(b) eu bod wedi penderfynu peidio â rhestru'r adeilad.
- (2) Mae gan unrhyw berson a oedd â buddiant yn yr adeilad pan gymerodd y warchodaeth interim effaith hawlogaeth, wrth wneud hawliad i Weinidogion Cymru, i gael ei ddigolledu ganddynt am unrhyw golled neu unrhyw ddifrod a ddioddefir gan y person y gellir ei phriodoli neu ei briodoli'n uniongyrchol i'r warchodaeth interim.
- (3) Mae'r golled neu'r difrod y mae digollediad yn daladwy amdani neu amdano yn cynnwys unrhyw swm sy'n daladwy gan yr hawlydd mewn cysylltiad â thor contract a achosir gan yr angen i stopio neu ganslo gwaith i'r adeilad oherwydd y warchodaeth interim.
- (4) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau pan ddaw'r warchodaeth interim i ben.
- (5) Pan oedd yr adeilad yn ddarostyngedig yn flaenorol i restru dros dro o dan adran 83 a ddaeth i ben oherwydd i'r warchodaeth interim gymryd effaith –
  - (a) mae'r cyfeiriad yn is-adran (2) at yr amser pan gymerodd y warchodaeth interim effaith i'w drin fel pe bai'n gyfeiriad at yr amser pan gymerodd y rhestru dros dro effaith;
  - (b) mae'r cyfeiriad yn yr is-adran honno at golled neu ddifrod y gellir ei phriodoli neu ei briodoli'n uniongyrchol i'r warchodaeth interim yn cynnwys colled neu ddifrod y gellir ei phriodoli neu ei briodoli'n uniongyrchol i'r rhestru dros dro;
  - (c) mae'r cyfeiriad yn is-adran (3) at yr angen i stopio neu ganslo gwaith oherwydd y warchodaeth interim yn cynnwys yr angen i wneud hynny oherwydd y rhestru dros dro.

### *Adolygu penderfyniadau rhestru*

## 81 **Adolygu penderfyniad i restru adeilad**

- (1) Pan fo Gweinidogion Cymru yn rhestru adeilad, rhaid i'r hysbysiad o dan adran 77(1) ddatgan y caiff unrhyw berchennog neu unrhyw feddiannydd ar yr adeilad wneud cais i Weinidogion Cymru yn gofyn am adolygiad o'r penderfyniad.
- (2) Ni chaniateir gwneud cais ond ar y sail nad yw'r adeilad o ddiddordeb pensaernïol neu hanesyddol arbennig.
- (3) Pan fo perchennog neu feddiannydd yn gwneud cais am adolygiad, rhaid i Weinidogion Cymru benodi person –

- (a) i gynnal yr adolygiad, a
  - (b) i wneud penderfyniad ar yr adolygiad.
- (4) Caiff Gweinidogion Cymru drwy reoliadau bennu disgrifiadau o achosion pan fydd rhaid iddynt hwy, yn hytrach na pherson a benodir ganddynt, gynnal adolygiad a gwneud penderfyniad arno.
- (5) Rhaid i Weinidogion Cymru wneud unrhyw ddiwygiad i'r rhestr a gynhelir o dan adran 76 y maent yn ystyried ei fod yn briodol i roi effaith i benderfyniad ar adolygiad.
- (6) Caiff Gweinidogion Cymru drwy reoliadau ddiwygio is-adran (2)–
- (a) i ychwanegu sail ar gyfer adolygiad;
  - (b) i addasu sail ar gyfer adolygiad;
  - (c) i ddileu sail ar gyfer adolygiad.

## 82 Darpariaeth atodol ynghylch adolygiadau

- (1) Rhaid i Weinidogion Cymru drwy reoliadau wneud darpariaeth ynghylch –
- (a) y ffurf a'r ffordd y mae rhaid i gais o dan adran 81 gael ei wneud;
  - (b) yr wybodaeth y mae rhaid ei darparu i Weinidogion Cymru, neu y gall fod yn ofynnol ganddynt, mewn cysylltiad â chais;
  - (c) y cyfnod y mae rhaid i gais gael ei wneud ynddo.
- (2) Rhaid i adolygiad o dan adran 81 gael ei gynnal mewn un neu ragor o'r ffyrdd a ganlyn (fel y'i penderfynir gan y person sy'n cynnal yr adolygiad) –
- (a) drwy ymchwiliad lleol;
  - (b) drwy wrandawriad;
  - (c) ar sail sylwadau ysgrifenedig.
- (3) Pan fo adolygiad yn cael ei gynnal gan berson a benodir gan Weinidogion Cymru, mae gan y person a benodir yr un pwerau a'r un dyletswyddau mewn perthynas â'r adolygiad ag sydd gan Weinidogion Cymru o dan –
- (a) unrhyw reoliadau a wneir o dan adran 175 (gofynion gweithdrefnol), a
  - (b) adrannau 180 a 181 (costau Gweinidogion Cymru a chostau partion).
- (4) Pan fo adolygiad yn cael ei gynnal drwy ymchwiliad lleol, mae adran 177 (pŵer i wneud tystiolaeth yn ofynnol) yn gymwys i'r ymchwiliad fel y mae'n gymwys i ymchwiliad a gynhelir o dan Ran 5.
- (5) Caiff Gweinidogion Cymru drwy reoliadau wneud darpariaeth bellach mewn cysylltiad ag adolygiadau o dan adran 81.
- (6) Mae Atodlen 2 yn gwneud darpariaeth bellach ynghylch swyddogaethau personau a benodir gan Weinidogion Cymru i gynnal adolygiadau o dan adran 81.

*Rhestru dros dro***83 Cyflwyno hysbysiad rhestru dros dro**

- (1) Mae'r adran hon yn gymwys os yw awdurdod cynllunio yn ystyried bod adeilad yn ei ardal nad yw'n adeilad rhestredig (ac nad yw'n cael ei drin fel pe bai'n adeilad rhestredig yn rhinwedd adran 79(2)) –
  - (a) o ddiddordeb pensaernïol neu hanesyddol arbennig, a
  - (b) mewn perygl o gael ei ddymchwel neu o gael ei newid mewn ffordd a fyddai'n effeithio ar ei gymeriad fel adeilad o ddiddordeb pensaernïol neu hanesyddol arbennig.
- (2) Caiff yr awdurdod gyflwyno hysbysiad rhestru dros dro i bob perchennog a phob meddiannydd ar yr adeilad.
- (3) Mae hysbysiad rhestru dros dro yn hysbysiad –
  - (a) sy'n datgan bod yr awdurdod cynllunio –
    - (i) yn ystyried bod yr adeilad o ddiddordeb pensaernïol neu hanesyddol arbennig, a
    - (ii) wedi gofyn i Weinidogion Cymru ystyried ei restru, a
  - (b) sy'n esbonio effaith is-adran (4), adran 85 ac Atodlen 7.
- (4) Cyn gynted ag y bo hysbysiad rhestru dros dro wedi ei gyflwyno i bob perchennog a phob meddiannydd ar yr adeilad y mae'n ymwneud ag ef, mae'r Ddeddf hon (ac eithrio adrannau 118 a 137 i 142) a Deddf Cynllunio Gwlad a Thref 1990 (p. 8) yn cael effaith mewn perthynas â'r adeilad fel pe bai'n adeilad rhestredig.
- (5) Cyfeirir yn y Rhan hon at y warchodaeth a roddir yn rhinwedd is-adran (4) fel "rhestru dros dro".
- (6) Nid yw'r adran hon nac adran 84 yn gymwys –
  - (a) i adeilad sy'n heneb gofrestredig, na
  - (b) i adeilad crefyddol esempt.

**84 Rhestru dros dro mewn achosion brys**

- (1) Mae'r adran hon yn gymwys os yw awdurdod cynllunio yn ystyried ei bod yn fater o frys y dylai rhestru dros dro gymryd effaith mewn perthynas ag adeilad yn ei ardal.
- (2) Caiff yr awdurdod, yn lle cyflwyno hysbysiad rhestru dros dro i bob perchennog a phob meddiannydd ar yr adeilad –
  - (a) gosod yr hysbysiad yn sownd mewn lle gweladwy ar yr adeilad, neu
  - (b) os nad yw'n rhesymol ymarferol gosod yr hysbysiad yn sownd ar yr adeilad, neu os yw'r awdurdod yn ystyried y gellid difrodi'r adeilad wrth wneud hynny, arddangos yr hysbysiad mewn lle amlwg mor agos i'r adeilad ag y bo'n rhesymol ymarferol.
- (3) Mae gosod neu arddangos hysbysiad yn unol ag is-adran (2) i'w drin at ddibenion adran 83(4) fel pe bai'r hysbysiad wedi ei gyflwyno i bob perchennog a phob meddiannydd ar yr adeilad.

- (4) Rhaid i'r hysbysiad esbonio, yn rhinwedd ei fod wedi ei osod neu ei arddangos yn unol ag is-adran (2), fod yr hysbysiad i'w drin fel pe bai wedi ei gyflwyno at y dibenion hynny.

## 85 Diwedd rhestru dros dro

- (1) Mae rhestru dros dro adeilad yn cael effaith tan ddiwedd y 6 mis sy'n dechrau â'r diwrnod y mae'n cymryd effaith o dan adran 83(4), oni bai ei fod yn dod i ben o dan is-adran (2) neu (3).
- (2) Os yw Gweinidogion Cymru yn cyflwyno hysbysiad o dan adran 78(1) o gynnig i restru'r adeilad, daw rhestru dros dro i ben pan fydd gwarchodaeth interim yn cymryd effaith mewn perthynas â'r adeilad (ac mae'r adeilad yn parhau i gael ei drin fel pe bai'n adeilad rhestredig at ddibenion penodol yn rhinwedd adran 79(2)).
- (3) Os yw Gweinidogion Cymru yn hysbysu'r awdurdod cynllunio yn ysgrifenedig nad ydynt yn bwriadu ymgynghori o dan adran 78 ar gynnig i restru'r adeilad, daw rhestru dros dro i ben ar ddechrau'r diwrnod a bennir yn yr hysbysiad.
- (4) Mae Atodlen 7 yn gwneud darpariaeth ynghylch effaith rhestru dros dro yn dod i ben –
- ar ddiwedd y cyfnod o 6 mis a grybwyllir yn is-adran (1), neu
  - oherwydd bod Gweinidogion Cymru yn rhoi hysbysiad o dan is-adran (3) nad ydynt yn bwriadu ymgynghori ar gynnig i restru'r adeilad.
- (5) Os daw rhestru dros dro i ben mewn perthynas ag adeilad oherwydd bod Gweinidogion Cymru yn hysbysu'r awdurdod cynllunio nad ydynt yn bwriadu ymgynghori ar gynnig i restru'r adeilad –
- rhaid i'r awdurdod roi hysbysiad o'r penderfyniad hwnnw ar unwaith i bob perchennog a phob meddiannydd ar yr adeilad;
  - ni chaiff yr awdurdod gyflwyno hysbysiad rhestru dros dro arall mewn cysylltiad â'r adeilad yn ystod y 12 mis sy'n dechrau â'r diwrnod y mae Gweinidogion Cymru yn rhoi'r hysbysiad.

## 86 Digollediad am golled neu ddifrod a achosir gan restru dros dro

- (1) Mae'r adran hon yn gymwys pan fo rhestru dros dro yn dod i ben mewn perthynas ag adeilad –
- ar ddiwedd y cyfnod o 6 mis a grybwyllir yn adran 85(1), neu
  - oherwydd bod Gweinidogion Cymru yn rhoi hysbysiad o dan adran 85(3) nad ydynt yn bwriadu ymgynghori ar gynnig i restru'r adeilad.
- (2) Mae gan unrhyw berson a oedd â buddiant yn yr adeilad pan gymerodd y rhestru dros dro effaith hawlogaeth, wrth wneud hawliad i'r awdurdod cynllunio y mae'r adeilad yn ei ardal, i gael ei ddigolledu gan yr awdurdod am unrhyw golled neu unrhyw ddifrod a ddioddefir gan y person y gellir ei phriodoli neu ei briodoli'n uniongyrchol i'r rhestru dros dro.
- (3) Mae'r golled neu'r difrod y mae digollediad yn daladwy amdani neu amdano yn cynnwys unrhyw swm sy'n daladwy gan yr hawlydd mewn cysylltiad â thor contract a achosir gan yr angen i stopio neu ganslo gwaith i'r adeilad oherwydd y rhestru dros dro.
- (4) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau pan ddaw'r rhestru dros dro i ben.



*Adeiladau na fwriedir iddynt gael eu rhestru***87 Tystysgrif nad yw Gweinidogion Cymru yn bwriadu rhestru adeilad**

- (1) Caiff Gweinidogion Cymru, ar gais unrhyw berson, ddyroddi tystysgrif sy'n datgan nad ydynt yn bwriadu rhestru adeilad.
- (2) Yn ystod y 5 mlynedd sy'n dechrau â'r diwrnod y dyroddir y dystysgrif—
  - (a) ni chaiff Gweinidogion Cymru restru'r adeilad na chyflwyno hysbysiad o dan adran 78(1) o gynnig i restru'r adeilad;
  - (b) ni chaiff awdurdod cynllunio y mae'r adeilad yn ei ardal gyflwyno hysbysiad rhestru dros dro mewn perthynas â'r adeilad.
- (3) Rhaid i geisydd am dystysgrif roi hysbysiad o'r cais i bob awdurdod cynllunio y mae'r adeilad yn ei ardal ar yr un pryd ag y mae'n cyflwyno'r cais i Weinidogion Cymru.

**PENNOD 2****RHEOLAETHU GWAITH SY'N EFFEITHIO AR ADEILADAU RHESTREDIG***Awdurdodi gwaith***88 Gofyniad i waith gael ei awdurdodi**

- (1) Ni chaiff person gyflawni gwaith y mae'r adran hon yn gymwys iddo, neu beri i waith o'r fath gael ei gyflawni, oni bai bod y gwaith wedi ei awdurdodi o dan adran 89.
- (2) Mae'r adran hon yn gymwys—
  - (a) i waith ar gyfer addasu neu estyn adeilad rhestredig mewn unrhyw ffordd a fyddai'n effeithio ar ei gymeriad fel adeilad o ddiddordeb pensaernïol neu hanesyddol arbennig;
  - (b) i waith ar gyfer dymchwel adeilad rhestredig.
- (3) Ond nid yw'r adran hon yn gymwys—
  - (a) i waith mewn perthynas ag adeilad sy'n heneb gofrestredig (ond gweler adran 11);
  - (b) i waith mewn perthynas ag adeilad crefyddol esempt;
  - (c) i waith ar gyfer dymchwel adeilad sydd ar gau ar gyfer addoli rheolaidd gan y cyhoedd, neu ran o adeilad o'r fath, yn unol â darpariaeth a wneir o dan Ran 6 o Fesur Cenhadaeth a Bugeiliol 2011 (Rhif 3) gan gynllun bugeiliol adeiladau eglwysi neu gynllun bugeiliol (gwaredu adeiladau eglwysi);
  - (d) i waith a gyflawnir gan neu ar ran y Goron o dan yr amgylchiadau a nodir ym mharagraffau (a) i (d) o adran 117(4) (gwaith brys).

**89 Awdurdodi gwaith drwy gydsyniad adeilad rhestredig**

- (1) Mae gwaith y mae adran 88 yn gymwys iddo wedi ei awdurdodi—
  - (a) os yw cydsyniad ysgrifenedig i'w gyflawni wedi ei roi gan yr awdurdod cynllunio y mae'r adeilad yn ei ardal neu gan Weinidogion Cymru, a
  - (b) os yw'r gwaith yn cael ei gyflawni yn unol â thelerau'r cydsyniad (gan gynnwys unrhyw amodau sydd ynghlwm wrtho).



- (2) Pan—
- (a) bo gwaith y mae adran 88 yn gymwys iddo wedi ei gyflawni heb gael ei awdurdodi o dan is-adran (1), a
  - (b) bo'r awdurdod cynllunio neu Weinidogion Cymru yn rhoi cydsyniad ysgrifenedig ar gyfer y gwaith,
- mae'r gwaith wedi ei awdurdodi o adeg rhoi'r cydsyniad hwnnw.
- (3) Cyfeirir at gydsyniad o dan is-adran (1) neu (2) yn y Ddeddf hon fel cydsyniad adeilad rhestredig.

*Ceisiadau am gydsyniad adeilad rhestredig*

**90 Gwneud cais am gydsyniad adeilad rhestredig**

- (1) Rhaid i gais am gydsyniad adeilad rhestredig gael ei wneud i'r awdurdod cynllunio y mae'r adeilad rhestredig yn ei ardal, oni bai ei fod yn cael ei wneud i Weinidogion Cymru yn unol—
- (a) â rheoliadau a wneir o dan adran 105 (ceisiadau gan awdurdodau cynllunio neu'r Goron),
  - (b) ag adran 106 (ceisiadau sy'n ymwneud â gwaith brys ar dir y Goron),
  - (c) ag adran 305 neu 306 o Ddeddf Tai 1985 (p. 68) (ceisiadau gan awdurdodau tai lleol am gydsyniad i ddymchwel adeiladau mewn cysylltiad â chaffael tir ar gyfer ei glirio), neu
  - (d) ag unrhyw ddeddfiad arall.
- (2) Rhaid i gais am gydsyniad adeilad rhestredig gynnwys—
- (a) digon o wybodaeth i adnabod yr adeilad rhestredig y mae'n ymwneud ag ef, gan gynnwys plan,
  - (b) unrhyw blaniau eraill ac unrhyw luniadau eraill sy'n angenrheidiol i ddisgrifio'r gwaith y mae'n ymwneud ag ef, ac
  - (c) unrhyw wybodaeth arall sy'n ofynnol gan yr awdurdod cynllunio neu Weinidogion Cymru (yn ôl y digwydd).
- (3) Caiff Gweinidogion Cymru drwy reoliadau wneud darpariaeth ynghylch—
- (a) ffurf a chynnwys cais (a gaiff gynnwys darpariaeth ar gyfer defnyddio ffurflen sydd i'w chyhoeddi neu i'w darparu gan Weinidogion Cymru neu berson arall);
  - (b) sut y mae rhaid gwneud cais.
- (4) Rhaid i Weinidogion Cymru drwy reoliadau ei gwneud yn ofynnol i berson sy'n gwneud cais o ddisgrifiad a bennir yn y rheoliadau gynnwys gyda'r cais ddatganiad ynghylch—
- (a) sut y bydd y gwaith yn effeithio ar gymeriad yr adeilad rhestredig fel adeilad o ddiddordeb pensaernïol neu hanesyddol arbennig, a
  - (b) y naill neu'r llall o'r canlynol, neu'r ddau ohonynt (fel y'i pennir yn y rheoliadau)—
    - (i) yr egwyddorion dylunio sydd wedi eu cymhwyso i'r gwaith;
    - (ii) sut yr ymdriniwyd â materion sy'n ymwneud â mynediad i'r adeilad.
- (5) Caiff Gweinidogion Cymru drwy reoliadau wneud darpariaeth ynghylch—

- (a) ffurf a chynnwys datganiad sy'n ofynnol o dan is-adran (4);
  - (b) dogfennau neu ddeunyddiau eraill y mae rhaid eu cynnwys gyda chais.
- (6) Ni chaiff awdurdod cynllunio ystyried cais a wneir iddo am gydsyniad adeilad rhestredig os yw'r cais yn methu â chydymffurfio â gofyniad a osodir gan yr adran hon neu odani.

## 91 Hysbysiad o gais i berchnogion adeilad

- (1) Caiff Gweinidogion Cymru drwy reoliadau ei gwneud yn ofynnol i geisydd am gydsyniad adeilad rhestredig –
- (a) rhoi hysbysiad o'r cais i bob person (ac eithrio'r ceisydd) sydd ar ddyddiad a bennir yn y rheoliadau yn berchennog ar unrhyw ran o'r adeilad rhestredig y mae'r cais yn ymwneud ag ef, a
  - (b) cynnwys gyda'r cais dystysgrif a ddyroddir gan y ceisydd sy'n datgan y cydymffurfiwyd ag unrhyw ofynion yn y rheoliadau.
- (2) Caiff y rheoliadau wneud darpariaeth ynghylch –
- (a) ffurf a chynnwys hysbysiad neu dystysgrif (a gaiff gynnwys darpariaeth ar gyfer defnyddio ffurflen sydd i'w chyhoeddi neu i'w darparu gan Weinidogion Cymru neu berson arall);
  - (b) sut y mae rhaid rhoi hysbysiad (a gaiff gynnwys darpariaeth sy'n ei gwneud yn ofynnol ei gyhoeddi).
- (3) Ni chaniateir i gais am gydsyniad adeilad rhestredig gael ei ystyried os na chydymffurfiwyd ag unrhyw ofynion a osodir o dan is-adran (1) neu (2).
- (4) Caiff Gweinidogion Cymru drwy reoliadau ddarparu, pan fo hysbysiad wedi ei roi o gais yn unol â gofynion a osodir o dan yr is-adrannau hynny –
- (a) na chaniateir penderfynu'r cais yn ystod cyfnod a bennir yn y rheoliadau;
  - (b) bod rhaid i'r awdurdod cynllunio neu Weinidogion Cymru, wrth benderfynu'r cais, ystyried sylwadau a gyflwynir yn ystod y cyfnod hwnnw gan unrhyw berson sy'n berchennog ar unrhyw ran o'r adeilad rhestredig.
- (5) Mae'n drosedd i berson, wrth ymhoni ei fod yn cydymffurfio â gofyniad a osodir o dan is-adran (1) neu (2) –
- (a) dyroddi tystysgrif sy'n cynnwys datganiad y mae'r person yn gwybod ei fod yn anwir neu'n gamarweiniol mewn modd perthnasol, neu
  - (b) yn ddi-hid ddyroddi tystysgrif sy'n cynnwys datganiad sy'n anwir neu'n gamarweiniol mewn modd perthnasol.
- (6) Mae person sy'n euog o drosedd o dan is-adran (5) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (7) Yn yr adran hon ystyr "perchennog" yw –
- (a) perchennog ar yr ystad rydd-ddaliadol, neu
  - (b) tenant o dan les a roddir neu a estynnir am gyfnod penodol sydd ag o leiaf 7 mlynedd yn weddill.

*Ymdrin â cheisiadau am gydsyniad***92 Y weithdrefn ar gyfer ymdrin â chais**

- (1) Rhaid i awdurdod cynllunio ymdrin â chais am gydsyniad adeilad rhestredig a wneir i'r awdurdod oni bai –
  - (a) ei bod yn ofynnol iddo beidio ag ystyried y cais o dan adran 90(6) neu 91(3), neu ei fod yn gwrthod gwneud hynny o dan adran 93 (ceisiadau tebyg), neu
  - (b) ei bod yn ofynnol iddo atgyfeirio'r cais at Weinidogion Cymru o dan adran 94.
- (2) Caiff Gweinidogion Cymru drwy reoliadau –
  - (a) gosod gofynion sy'n ymwneud â chyhoeddusrwydd ar gyfer ceisiadau am gydsyniad adeilad rhestredig a wneir i awdurdodau cynllunio neu Weinidogion Cymru;
  - (b) gosod gofynion ar gyfer ymgynghori neu hysbysu mewn perthynas â cheisiadau;
  - (c) darparu na chaniateir penderfynu cais yn ystod cyfnod a bennir yn y rheoliadau;
  - (d) ei gwneud yn ofynnol i awdurdodau cynllunio neu Weinidogion Cymru, wrth benderfynu ceisiadau, ystyried ymatebion gan bersonau yr ymgynghorir â hwy neu a hysbysir;
  - (e) gwneud darpariaeth ynghylch o fewn pa gyfnod o amser y mae rhaid i awdurdod cynllunio neu Weinidogion Cymru ymdrin â chais.
- (3) Caiff Gweinidogion Cymru gyfarwyddo awdurdod cynllunio i hysbysu personau a bennir yn y cyfarwyddyd –
  - (a) am gais a wneir i'r awdurdod am gydsyniad adeilad rhestredig, a
  - (b) am y penderfyniad a wneir gan yr awdurdod ar y cais.
- (4) Caiff cyfarwyddyd ymwneud –
  - (a) ag achos penodol, neu
  - (b) ag achosion sydd o ddisgrifiad a bennir yn y cyfarwyddyd.

**93 Pŵer i wrthod ystyried ceisiadau tebyg**

- (1) Caiff awdurdod cynllunio wrthod ystyried cais am gydsyniad adeilad rhestredig os yw'r amod cyntaf a'r ail amod wedi eu bodloni.
- (2) Yr amod cyntaf yw bod unrhyw un neu ragor o'r canlynol wedi digwydd yn ystod y 2 flynedd sy'n dod i ben â'r diwrnod y mae'r awdurdod yn cael y cais –
  - (a) bod Gweinidogion Cymru wedi gwrthod cais tebyg am gydsyniad adeilad rhestredig a gyfeiriwyd atynt o dan adran 94,
  - (b) bod Gweinidogion Cymru wedi gwrthod –
    - (i) apêl o dan adran 100(2) yn erbyn gwrthod cais tebyg am gydsyniad adeilad rhestredig, neu
    - (ii) apêl o dan adran 100(3) sy'n ymwneud â chais tebyg, neu
  - (c) bod yr awdurdod cynllunio wedi gwrthod dau neu ragor o geisiadau tebyg am gydsyniad adeilad rhestredig ac ym mhob achos –

- (i) ni fu apêl i Weinidogion Cymru, neu
  - (ii) mae unrhyw apêl i Weinidogion Cymru wedi ei thynnu'n ôl.
- (3) Yr ail amod yw bod yr awdurdod cynllunio yn ystyried na fu unrhyw newid sylweddol mewn unrhyw ystyriaethau perthnasol ers –
- (a) i Weinidogion Cymru wrthod y cais tebyg, mewn achos sy'n dod o fewn is-adran (2)(a),
  - (b) i Weinidogion Cymru wrthod yr apêl, mewn achos sy'n dod o fewn is-adran (2)(b), neu
  - (c) i'r awdurdod cynllunio wrthod cais tebyg yn fwyaf diweddar, mewn achos sy'n dod o fewn is-adran (2)(c).
- (4) At ddibenion yr adran hon mae cais yn debyg i gais arall os (a dim ond os) yw'r awdurdod cynllunio yn ystyried bod yr adeilad rhestredig a'r gwaith y mae'r ceisiadau yn ymwneud â hwy yr un fath neu'r un fath i raddau helaeth.

#### 94 **Atgyfeirio cais at Weinidogion Cymru**

- (1) Caiff Gweinidogion Cymru gyfarwyddo awdurdod cynllunio i atgyfeirio cais am gydsyniad adeilad rhestredig atynt i'w benderfynu yn lle ymdrin â'r cais ei hun.
- (2) Caiff cyfarwyddyd ymwneud â chais penodol, neu â cheisiadau mewn perthynas ag adeiladau a bennir yn y cyfarwyddyd.
- (3) Rhaid i awdurdod cynllunio atgyfeirio cais y mae cyfarwyddyd o dan yr adran hon yn gymwys iddo at Weinidogion Cymru.
- (4) Rhaid i awdurdod cynllunio atgyfeirio cais am gydsyniad adeilad rhestredig at Weinidogion Cymru i'w benderfynu, heb gael cyfarwyddyd i wneud hynny, os ceisir y cydsyniad o ganlyniad i gynigion a gynhwysir mewn cais am orchymyn o dan adran 1 neu 3 o Ddeddf Trafnidiaeth a Gweithfeydd 1992 (p. 42) (gorchmynion sy'n ymwneud ag adeiladu neu weithredu rheilffyrdd, tramffyrdd, dyfrffyrdd mewndirol etc.).
- (5) Mae Pennod 2 o Ran 5 yn gwneud darpariaeth ynghylch y weithdrefn ar gyfer ystyried ceisiadau a atgyfeirir at Weinidogion Cymru o dan yr adran hon.
- (6) Mae penderfyniad Gweinidogion Cymru ar gais yn derfynol.

#### 95 **Hysbysu Gweinidogion Cymru cyn rhoi cydsyniad**

- (1) Ni chaiff awdurdod cynllunio y gwneir cais am gydsyniad adeilad rhestredig iddo roi cydsyniad oni bai –
  - (a) ei fod wedi hysbysu Gweinidogion Cymru am y cais, gan roi manylion y gwaith y ceisir cydsyniad ar ei gyfer, a
  - (b) bod yr amod cyntaf neu'r ail amod wedi ei fodloni.
- (2) Yr amod cyntaf yw bod yr 28 o ddiwrnodau sy'n dechrau â'r diwrnod yr hysbyswyd Gweinidogion Cymru wedi dod i ben heb i Weinidogion Cymru naill ai –
  - (a) cyfarwyddo'r awdurdod i atgyfeirio'r cais atynt o dan adran 94, neu
  - (b) hysbysu'r awdurdod bod angen rhagor o amser arnynt i ystyried pa un ai i roi cyfarwyddyd o dan yr adran honno.

- (3) Yr ail amod yw bod Gweinidogion Cymru wedi hysbysu'r awdurdod nad ydynt yn bwriadu ei gyfarwyddo i atgyfeirio'r cais atynt.
- (4) Caiff Gweinidogion Cymru drwy reoliadau ddarparu nad yw is-adran (1) yn gymwys i geisiadau am gydsyniad adeilad rhestredig sydd o ddisgrifiad a bennir yn y rheoliadau.
- (5) Caiff Gweinidogion Cymru gyfarwyddo awdurdod cynllunio –
  - (a) nad yw is-adran (1) i fod yn gymwys i gais i'r awdurdod am gydsyniad adeilad rhestredig, neu
  - (b) bod is-adran (1) i fod yn gymwys i gais i'r awdurdod er gwaethaf unrhyw ddarpariaeth a wneir gan reoliadau o dan is-adran (4) neu gan gyfarwyddyd o dan baragraff (a).
- (6) Caiff cyfarwyddyd ymwneud –
  - (a) â chais penodol am gydsyniad adeilad rhestredig, neu
  - (b) â cheisiadau sydd o ddisgrifiad a bennir yn y cyfarwyddyd,
 ac mae'n cael effaith mewn perthynas ag unrhyw gais nad yw'r awdurdod wedi ei benderfynu.
- (7) Caiff Gweinidogion Cymru bennu disgrifiad o geisiadau o dan is-adran (4) neu (6)(b) drwy gyfeirio at farn unrhyw berson, argaeledd cyngor arbenigol mewn perthynas â'r ceisiadau, neu unrhyw amgylchiad arall.

## 96 Rhoi neu wrthod cydsyniad

- (1) Wrth benderfynu cais am gydsyniad adeilad rhestredig, caiff awdurdod cynllunio neu Weinidogion Cymru roi neu wrthod cydsyniad.
- (2) Wrth ystyried pa un ai i roi cydsyniad adeilad rhestredig, rhaid i awdurdod cynllunio neu Weinidogion Cymru roi sylw arbennig i ddymunoldeb diogelu –
  - (a) yr adeilad rhestredig y mae'r cais yn ymwneud ag ef,
  - (b) safle'r adeilad, ac
  - (c) unrhyw nodweddion o ddiddordeb pensaernïol neu hanesyddol arbennig sydd gan yr adeilad.
- (3) Mae cydsyniad adeilad rhestredig yn cael effaith er budd yr adeilad rhestredig a'r tir y mae arno, a phob person sydd â buddiant yn yr adeilad a'r tir am y tro; ond mae hyn yn ddarostyngedig i delerau'r cydsyniad.

*Rhoi cydsyniad adeilad rhestredig yn ddarostyngedig i amodau*

## 97 Pŵer i roi cydsyniad yn ddarostyngedig i amodau

- (1) Caniateir rhoi cydsyniad adeilad rhestredig yn ddarostyngedig i amodau.
- (2) Caniateir i amod, er enghraifft, ei gwneud yn ofynnol –
  - (a) i nodweddion penodol yr adeilad rhestredig gael eu diogelu, naill ai fel rhan ohono neu ar ôl cael eu datgysylltu ohono;
  - (b) i unrhyw ddifrod a achosir i'r adeilad gan y gwaith gael ei unioni ar ôl i'r gwaith gael ei gwblhau;

- (c) i'r adeilad neu unrhyw ran ohono gael ei ailadeiladu neu ei hailadeiladu ar ôl cyflawni unrhyw waith, gan ddefnyddio deunyddiau gwreiddiol i'r graddau y bo'n ymarferol a chan wneud unrhyw addasiadau, a bennir yn yr amodau, i'r tu mewn i'r adeilad.
- (3) Caniateir rhoi cydsyniad hefyd yn ddarostyngedig i amod sy'n ei gwneud yn ofynnol i fanylion penodedig y gwaith (pa un a ydynt wedi eu nodi mewn cais am gydsyniad ai peidio) gael eu cymeradwyo'n ddiweddarach.
- (4) Rhaid i amod a osodir o dan is-adran (3) –
- (a) yn achos cydsyniad a roddir gan awdurdod cynllunio, ei gwneud yn ofynnol cael cymeradwyaeth yr awdurdod hwnnw;
- (b) yn achos cydsyniad a roddir gan Weinidogion Cymru, bennu pa un ai cymeradwyaeth yr awdurdod cynllunio neu gymeradwyaeth Gweinidogion Cymru sy'n ofynnol.
- (5) Rhaid i gydsyniad i ddymchwel adeilad rhestredig gael ei roi yn ddarostyngedig i amod na chaniateir i'r gwaith ddechrau –
- (a) hyd nes bod hysbysiad o'r cynnig i ddymchwel yr adeilad wedi ei roi i Gomisiwn Brenhinol Henebion Cymru, a
- (b) hyd nes, ar ôl rhoi'r hysbysiad hwnnw, fod y Comisiwn Brenhinol –
- (i) wedi cael mynediad rhesymol i'r adeilad am o leiaf 1 mis at ddiben ei gofnodi, neu
- (ii) wedi datgan yn ysgrifenedig ei fod wedi cwblhau cofnodi'r adeilad neu nad yw'n dymuno ei gofnodi.
- (6) Os rhoddir cydsyniad i ddymchwel adeilad rhestredig heb yr amod sy'n ofynnol gan is-adran (5), mae i'w drin fel pe bai wedi ei roi yn ddarostyngedig i'r amod hwnnw.
- (7) Caniateir i gydsyniad i ddymchwel adeilad rhestredig hefyd gael ei roi yn ddarostyngedig i amod na chaniateir i'r gwaith ddechrau hyd nes –
- (a) bod contract ar gyfer gwaith i ailddatblygu'r safle wedi ei wneud, a
- (b) bod caniatâd cynllunio wedi ei roi ar gyfer y gwaith ailddatblygu hwnnw.
- (8) Nid yw is-adrannau (5) a (6) yn atal amodau eraill rhag cael eu gosod at ddiben galluogi cofnodi adeilad rhestredig.
- (9) Caiff Gweinidogion Cymru drwy reoliadau roi cyfeiriadau at gorff arall yn lle'r cyfeiriadau yn is-adran (5) at Gomisiwn Brenhinol Henebion Cymru.

## 98 Amod ynghylch y cyfnod y mae rhaid i'r gwaith ddechrau ynddo

- (1) Rhaid i gydsyniad adeilad rhestredig gael ei roi yn ddarostyngedig i'r amod bod rhaid i'r gwaith y mae'n ymwneud ag ef ddechrau cyn diwedd cyfnod a bennir yn yr amod ac sy'n dechrau â'r diwrnod y rhoddir y cydsyniad.
- (2) Os rhoddir cydsyniad heb yr amod sy'n ofynnol gan is-adran (1), mae i'w drin fel pe bai wedi ei roi yn ddarostyngedig i'r amod bod rhaid i'r gwaith y mae'n ymwneud ag ef ddechrau o fewn 5 mlynedd sy'n dechrau â'r diwrnod y'i rhodddwyd.
- (3) Nid yw'r adran hon yn gymwys –



- (a) i gydsyniad o dan adran 89(2) (cydsyniad ar gyfer gwaith sydd wedi ei gyflawni eisoes);
- (b) i gydsyniad a roddir gan gytundeb partneriaeth adeilad rhestredig (gweler adran 113).

**99 Cais i amrywio neu ddileu amodau**

- (1) Pan fo cydsyniad adeilad rhestredig wedi ei roi yn ddarostyngedig i amodau, caiff unrhyw berson sydd â buddiant yn yr adeilad rhestredig wneud cais i'r amodau gael eu hamrywio neu eu dileu.
- (2) Rhaid i'r cais nodi pa amrywiad neu ddilead o amodau y gwneir cais amdano.
- (3) Mae adrannau 90 i 95 (ac eithrio adran 90(4) a (5)(a)) yn gymwys i gais o dan yr adran hon fel y maent yn gymwys i gais am gydsyniad adeilad rhestredig.
- (4) Ar gais o dan yr adran hon, caiff yr awdurdod cynllunio neu Weinidogion Cymru, yn ogystal ag amrywio neu ddileu amodau'r cydsyniad, osod amodau newydd sy'n ganlyniadol ar yr amrywiad neu'r dilead.
- (5) Nid yw'r adran hon yn gymwys i gydsyniad a roddir gan gytundeb partneriaeth adeilad rhestredig.

*Apelau i Weinidogion Cymru*

**100 Yr hawl i apelio yn erbyn penderfyniad awdurdod cynllunio neu fethiant awdurdod cynllunio i wneud penderfyniad**

- (1) Mae'r adran hon yn gymwys pan fo cais wedi ei wneud i awdurdod cynllunio –
  - (a) am gydsyniad adeilad rhestredig,
  - (b) i amodau cydsyniad adeilad rhestredig gael eu hamrywio neu eu dileu, neu
  - (c) i fanylion gwaith o dan amod mewn cydsyniad adeilad rhestredig gael eu cymeradwyo.
- (2) Caiff y ceisydd apelio i Weinidogion Cymru os yw'r awdurdod cynllunio –
  - (a) yn gwrthod y cais, neu
  - (b) yn caniatáu'r cais yn ddarostyngedig i amodau neu, yn achos cais i amodau gael eu hamrywio neu eu dileu, yn ei ganiatáu ac yn gosod amodau newydd.
- (3) Caiff y ceisydd hefyd apelio i Weinidogion Cymru os nad yw'r awdurdod cynllunio wedi gwneud dim un o'r canlynol o fewn y cyfnod penderfynu –
  - (a) rhoi hysbysiad i'r ceisydd o'i benderfyniad ar y cais, neu
  - (b) yn achos cais am gydsyniad adeilad rhestredig neu i amodau gael eu hamrywio neu eu dileu, rhoi hysbysiad i'r ceisydd ei fod –
    - (i) wedi arfer ei bŵer o dan adran 93 i wrthod ystyried y cais, neu
    - (ii) wedi atgyfeirio'r cais at Weinidogion Cymru o dan adran 94.
- (4) Yn is-adran (3) ystyr "y cyfnod penderfynu" yw –
  - (a) y cyfnod a bennir mewn rheoliadau a wneir gan Weinidogion Cymru, neu



- (b) cyfnod hwy y cytunir arno yn ysgrifenedig rhwng y ceisydd a'r awdurdod cynllunio.

### 101 Y weithdrefn ar gyfer gwneud apêl

- (1) Rhaid gwneud apêl o dan adran 100 drwy gyflwyno hysbysiad o apêl i Weinidogion Cymru.
- (2) Caiff y seiliau dros apelio a ddatgenir yn yr hysbysiad gynnwys (ar eu pen eu hunain neu gyda seiliau eraill) –
  - (a) honiad nad yw'r adeilad y mae'r apêl yn ymwneud ag ef o ddiddordeb pensaernïol neu hanesyddol arbennig ac y dylai gael ei ddadrestru, neu
  - (b) yn achos adeilad sy'n ddarostyngedig i warchodaeth interim neu restru dros dro, honiad na ddylai'r adeilad gael ei restru.
- (3) Caiff Gweinidogion Cymru drwy reoliadau wneud darpariaeth ynghylch –
  - (a) ffurf hysbysiad o apêl (a gaiff gynnwys darpariaeth ar gyfer defnyddio ffurflen sydd i'w chyhoeddi neu i'w darparu gan Weinidogion Cymru neu berson arall);
  - (b) gwybodaeth y mae rhaid iddi gael ei chynnwys gyda hysbysiad o apêl;
  - (c) y ffordd a'r cyfnod y mae rhaid cyflwyno hysbysiad o apêl ynddi neu o'i fewn (a gaiff gynnwys darpariaeth sy'n galluogi Gweinidogion Cymru i estyn y cyfnod).
- (4) Mae adran 91 (hysbysiad i berchnogion adeilad) yn gymwys mewn perthynas ag apelau o dan adran 100 sy'n ymwneud â cheisiadau am gydsyniad adeilad rhestredig neu i amodau gael eu hamrywio neu eu dileu, ond fel pe bai cyfeiriadau at gais a cheisydd yn gyfeiriadau at apêl ac apelydd.
- (5) Rhaid i'r cyfnod a bennir gan reoliadau o dan is-adran (3)(c) fod o leiaf 28 o ddiwrnodau sy'n dechrau â thrannoeth –
  - (a) yn achos apêl o dan is-adran (2) o adran 100, y diwrnod y mae'r ceisydd yn cael hysbysiad o'r penderfyniad;
  - (b) yn achos apêl o dan is-adran (3) o'r adran honno, ddiwedd y cyfnod penderfynu (sydd â'r un ystyr ag yn yr is-adran honno).

### 102 Cyfyngiad ar amrywio cais ar ôl cyflwyno hysbysiad o apêl

- (1) Unwaith y bydd hysbysiad o apêl o dan adran 100 wedi ei gyflwyno, ni chaniateir amrywio'r cais y mae'r apêl yn ymwneud ag ef ac eithrio o dan amgylchiadau a bennir mewn rheoliadau a wneir gan Weinidogion Cymru.
- (2) Pan fo cais yn cael ei amrywio o dan yr adran hon, caiff Gweinidogion Cymru gyfarwyddo bod rhaid ymgynghori ymhellach mewn perthynas â'r cais.

### 103 Penderfyniad ar gais ar ôl cyflwyno hysbysiad o apêl

- (1) Mae'r adran hon yn gymwys os yw person sydd wedi gwneud cais am gydsyniad adeilad rhestredig yn apelio o dan adran 100(3) (methiant i roi hysbysiad o benderfyniad).
- (2) Ni chaiff Gweinidogion Cymru benderfynu'r apêl cyn diwedd y cyfnod a bennir mewn rheoliadau a wneir gan Weinidogion Cymru ac sy'n dechrau â'r diwrnod y cyflwynir yr hysbysiad o apêl.

- (3) Caiff yr awdurdod cynllunio roi hysbysiad o'i benderfyniad ar y cais y mae'r apêl yn ymwneud ag ef ar unrhyw adeg cyn diwedd y cyfnod hwnnw.
- (4) Os yw'r awdurdod yn rhoi hysbysiad yn unol ag is-adran (3) mai gwrthod y cais yw ei benderfyniad –
  - (a) rhaid trin yr apêl fel apêl o dan adran 100(2) yn erbyn y gwrthodiad, a
  - (b) rhaid i Weinidogion Cymru roi cyfle i'r apelydd i ddiwygio'r seiliau dros apelio.
- (5) Os yw'r awdurdod yn rhoi hysbysiad yn unol ag is-adran (3) mai caniatáu'r cais yn ddarostyngedig i amodau yw ei benderfyniad, rhaid i Weinidogion Cymru roi cyfle i'r apelydd –
  - (a) i fwrw ymlaen â'r apêl fel apêl o dan adran 100(2) yn erbyn caniatáu'r cais yn ddarostyngedig i amodau, a
  - (b) i ddiwygio'r seiliau dros apelio.

#### **104 Penderfynu apêl**

- (1) Ar apêl o dan adran 100 caiff Gweinidogion Cymru –
  - (a) caniatáu neu wrthod yr apêl, neu
  - (b) gwrthdroi neu amrywio unrhyw ran o benderfyniad yr awdurdod cynllunio ar y cais y mae'r apêl yn ymwneud ag ef (pa un a yw'r apêl yn ymwneud â'r rhan honno ai peidio),

a chânt ymdrin â'r cais fel pe bai wedi ei wneud iddynt hwy.
- (2) Pan wnaed yr apêl o dan adran 100(3) (methiant i roi hysbysiad o benderfyniad) ac nad yw'r awdurdod cynllunio wedi rhoi hysbysiad o dan adran 103(3), mae i'w thybio at ddibenion is-adran (1) i'r awdurdod benderfynu gwrthod y cais.
- (3) Ar apêl o dan adran 100 caiff Gweinidogion Cymru hefyd arfer eu pŵer o dan adran 76 i ddadrestru'r adeilad y mae'r apêl yn ymwneud ag ef.
- (4) Mae Pennod 2 o Ran 5 yn gwneud darpariaeth ynghylch y weithdrefn ar gyfer ystyried apelau (gan gynnwys darpariaeth iddynt gael eu penderfynu gan bersonau a benodir gan Weinidogion Cymru).
- (5) Mae penderfyniad Gweinidogion Cymru ar apêl yn derfynol.

#### *Achosion arbennig*

#### **105 Ceisiadau gan awdurdodau cynllunio a'r Goron**

- (1) Caiff Gweinidogion Cymru drwy reoliadau ddarparu nad yw darpariaeth a wneir gan neu o dan y Ddeddf hon i fod yn gymwys, neu ei bod i fod yn gymwys gydag addasiadau, i gais a grybwyllir yn is-adran (2) a wneir –
  - (a) gan awdurdod cynllunio, neu
  - (b) gan neu ar ran y Goron.
- (2) Mae'r ceisiadau y cyfeirir atynt yn is-adran (1) yn geisiadau –
  - (a) am gydsyniad adeilad rhestredig,
  - (b) i amodau cydsyniad adeilad rhestredig gael eu hamrywio neu eu dileu, neu

(c) i fanylion gwaith o dan amod mewn cydsyniad adeilad rhestredig gael eu cymeradwyo.

(3) Caiff y rheoliadau, yn benodol, ddarparu i gais gael ei wneud i Weinidogion Cymru.

**106 Ceisiadau sy'n ymwneud â gwaith brys ar dir y Goron**

(1) Caiff awdurdod priodol y Goron wneud cais am gydsyniad adeilad rhestredig i Weinidogion Cymru (yn lle gwneud cais i awdurdod cynllunio) –

(a) os yw'r adeilad rhestredig y mae'r cais yn ymwneud ag ef ar dir y Goron, a

(b) os yw awdurdod priodol y Goron yn ardystio –

(i) bod y gwaith y ceisir cydsyniad ar ei gyfer o bwysigrwydd cenedlaethol, a

(ii) ei bod yn angenrheidiol i'r gwaith gael ei gyflawni fel mater o frys.

(2) Cyn gwneud y cais, rhaid i awdurdod priodol y Goron gyhoeddi hysbysiad mewn un neu ragor o bapurau newydd sy'n cylchredeg yn ardal leol yr adeilad rhestredig –

(a) sy'n disgrifio'r gwaith arfaethedig, a

(b) sy'n datgan ei fod yn cynnig gwneud y cais i Weinidogion Cymru o dan yr adran hon.

(3) Pan fo awdurdod priodol y Goron yn gwneud cais o dan yr adran hon –

(a) rhaid iddo roi i Weinidogion Cymru ddatganiad o'i seiliau dros wneud y cais;

(b) caiff Gweinidogion Cymru ei gwneud yn ofynnol iddo roi iddynt unrhyw wybodaeth bellach y maent yn ystyried ei bod yn angenrheidiol i'w galluogi i benderfynu'r cais.

(4) Cyn gynted ag y bo'n ymarferol ar ôl cael dogfen neu ddeunydd arall yn rhinwedd is-adran (3), rhaid i Weinidogion Cymru roi copi o'r ddogfen neu'r deunydd arall ar gael i'r cyhoedd edrych arno yn ardal leol y gwaith arfaethedig.

(5) Rhaid i Weinidogion Cymru, yn unol ag unrhyw ofynion a osodir gan reoliadau, gyhoeddi hysbysiad o'r cais ac o'r ffaith bod dogfennau a deunydd arall ar gael i edrych arnynt.

(6) Rhaid i Weinidogion Cymru ymgynghori â'r personau a ganlyn ynghylch y cais –

(a) yr awdurdod cynllunio y mae'r adeilad rhestredig yn ei ardal, a

(b) unrhyw berson arall a bennir mewn rheoliadau.

(7) Mae Pennod 2 o Ran 5 yn gwneud darpariaeth ynghylch y weithdrefn ar gyfer ystyried ceisiadau a wneir i Weinidogion Cymru o dan yr adran hon.

(8) Nid yw is-adran (4) yn gymwys i'r graddau y mae dogfen neu ddeunydd arall yn ddarostyngedig i gyfarwyddyd o dan adran 178 (cyfyngu mynediad at dystiolaeth ar sail diogelwch gwladol).

(9) Mae penderfyniad Gweinidogion Cymru ar gais yn derfynol.

(10) Yn yr adran hon mae cyfeiriadau at reoliadau yn gyfeiriadau at reoliadau a wneir gan Weinidogion Cymru.

*Addasu a dirymu cydsyniad adeilad rhestredig***107 Addasu a dirymu cydsyniad**

- (1) Pan fo cydsyniad adeilad rhestredig wedi ei roi ar gais neu apêl o dan y Rhan hon, caiff yr awdurdod cynllunio y mae'r adeilad rhestredig yn ei ardal neu Weinidogion Cymru drwy orchymyn addasu neu ddirymu'r cydsyniad i unrhyw raddau.
- (2) Caniateir i orchymyn sy'n addasu neu'n dirymu cydsyniad adeilad rhestredig ar gyfer unrhyw waith gael ei wneud ar unrhyw adeg cyn cwblhau'r gwaith, ond nid yw'n effeithio ar gydsyniad ar gyfer gwaith sydd wedi ei gyflawni cyn i'r gorchymyn gymryd effaith.
- (3) Yn Atodlen 8—
  - (a) mae Rhan 1 yn gwneud darpariaeth ynghylch y gweithdrefnau y mae rhaid eu dilyn cyn i orchymyn a wneir gan awdurdod cynllunio o dan yr adran hon gymryd effaith (naill ai gyda chadarnhad gan Weinidogion Cymru neu hebdo);
  - (b) mae Rhan 2 yn gwneud darpariaeth ynghylch y weithdrefn y mae rhaid ei dilyn cyn i Weinidogion Cymru wneud gorchymyn o dan yr adran hon.

**108 Digollediad pan fo cydsyniad yn cael ei addasu neu ei ddirymu**

- (1) Mae'r adran hon yn gymwys pan fo cydsyniad adeilad rhestredig yn cael ei addasu neu ei ddirymu gan orchymyn o dan adran 107—
  - (a) sydd wedi ei wneud gan awdurdod cynllunio ac wedi ei gadarnhau gan Weinidogion Cymru, neu
  - (b) sydd wedi ei wneud gan Weinidogion Cymru.
- (2) Mae gan unrhyw berson sydd â buddiant yn yr adeilad rhestredig y mae'r cydsyniad yn ymwneud ag ef hawlogaeth, wrth wneud hawliad i'r awdurdod cynllunio, i gael ei ddigolledu gan yr awdurdod—
  - (a) am unrhyw wariant yr eir iddo gan y person wrth gyflawni gwaith y mae addasu neu ddirymu'r cydsyniad yn peri ei fod yn waith ofer;
  - (b) am unrhyw golled arall neu unrhyw ddifrod arall a ddioddefir gan y person y gellir ei phriodoli neu ei briodoli'n uniongyrchol i'r addasu neu'r dirymu.
- (3) At ddibenion yr adran hon mae gwariant yr eir iddo wrth lunio planiau at ddibenion unrhyw waith, neu ar faterion tebyg eraill sy'n baratoadol i unrhyw waith, i'w drin fel pe bai'n wariant yr eir iddo wrth gyflawni'r gwaith.
- (4) Yn ddarostyngedig i hynny, nid oes digollediad yn daladwy o dan yr adran hon mewn cysylltiad—
  - (a) â gwaith a gyflawnir cyn rhoi'r cydsyniad adeilad rhestredig sydd wedi ei addasu neu ei ddirymu, neu
  - (b) â cholled neu ddifrod arall (ac eithrio colled neu ddifrod sy'n ddibrisiant yng ngwerth buddiant mewn tir) sy'n deillio o unrhyw beth a wnaed neu nas gwnaed cyn i'r cydsyniad gael ei roi.
- (5) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â'r diwrnod y mae addasu neu ddirymu'r cydsyniad yn cymryd effaith.
- (6) Yn is-adran (2) ystyr "yr awdurdod cynllunio" yw—

- (a) yr awdurdod cynllunio a wnaeth y gorchymyn o dan adran 107, neu
- (b) os gwnaed y gorchymyn gan Weinidogion Cymru, yr awdurdod cynllunio y mae'r adeilad rhestredig y mae'r gorchymyn yn ymwneud ag ef yn ei ardal.

*Hawl perchennog adeilad rhestredig i'w gwneud yn ofynnol prynu buddiant*

**109 Hysbysiad prynu pan fo cydsyniad wedi ei wrthod, wedi ei roi yn ddarostyngedig i amodau, wedi ei addasu neu wedi ei ddirymu**

- (1) Mae'r adran hon yn gymwys pan—
  - (a) ar gais am gydsyniad adeilad rhestredig, fo cydsyniad yn cael ei wrthod neu ei roi yn ddarostyngedig i amodau, neu
  - (b) bo gorchymyn o dan adran 107 yn addasu neu'n dirymu cydsyniad adeilad rhestredig.
- (2) Os yw perchennog ar yr adeilad rhestredig y mae'r cais neu'r gorchymyn yn ymwneud ag ef yn honni—
  - (a) bod y set gyntaf o amodau wedi ei bodloni mewn perthynas â'r adeilad, a
  - (b) bod y set gyntaf a'r ail set o amodau wedi eu bodloni mewn perthynas ag unrhyw dir cysylltiedig,

caiff y perchennog gyflwyno hysbysiad prynu i'r awdurdod cynllunio y mae'r adeilad rhestredig yn ei ardal.
- (3) Mae hysbysiad prynu yn hysbysiad sy'n ei gwneud yn ofynnol i'r awdurdod cynllunio brynu buddiant y perchennog yn yr adeilad rhestredig a'r tir cysylltiedig.
- (4) Y set gyntaf o amodau yw—
  - (a) bod yr adeilad rhestredig a'r tir cysylltiedig y cyflwynir yr hysbysiad mewn cysylltiad â hwy yn anefnyddiadwy yn eu cyflwr presennol,
  - (b) mewn achos pan fo cydsyniad adeilad rhestredig wedi ei roi yn ddarostyngedig i amodau neu wedi ei addasu drwy osod amodau, nad yw'n bosibl gwneud yr adeilad na'r tir yn ddefnyddiadwy drwy gyflawni'r gwaith y mae'r cydsyniad yn ymwneud ag ef yn unol â'r amodau, ac
  - (c) pa un bynnag, nad yw'n bosibl gwneud yr adeilad na'r tir yn ddefnyddiadwy drwy gyflawni unrhyw waith arall y rhoddwyd cydsyniad adeilad rhestredig ar ei gyfer neu y mae'r awdurdod cynllunio neu Weinidogion Cymru wedi ymrwmo i roi cydsyniad adeilad rhestredig ar ei gyfer.
- (5) Yr ail set o amodau yw—
  - (a) na ellir gwahanu'n sylweddol y defnydd o'r tir cysylltiedig oddi wrth y defnydd o'r adeilad rhestredig, a
  - (b) y dylid trin y tir cysylltiedig, ynghyd â'r adeilad, fel un daliad.
- (6) Yn yr adran hon ac yn Atodlen 9—
 

ystyr "defnyddiadwy" ("usable"), mewn perthynas ag adeilad rhestredig neu dir cysylltiedig, yw bod modd gwneud defnydd rhesymol fuddiol ohono;

ystyr “tir cysylltiedig” (“associated land”), mewn perthynas ag adeilad rhestredig, yw tir –

- (a) sy’n cynnwys yr adeilad, sy’n cydffinio ag ef neu sy’n gyfagos iddo, a
  - (b) a berchnogir gyda’r adeilad.
- (7) Wrth benderfynu a yw adeilad rhestredig a’r tir cysylltiedig yn ddefnyddiadwy yn eu cyflwr presennol, rhaid anwybyddu defnydd arfaethedig o’r adeilad neu’r tir pe bai’n golygu –
- (a) cyflawni gwaith y mae cydsyniad adeilad rhestredig, nad yw wedi ei roi ac nad yw awdurdod cynllunio na Gweinidogion Cymru wedi ymrwymo i’w roi, yn ofynnol ar ei gyfer, neu
  - (b) cyflawni datblygiad nad yw caniatâd cynllunio wedi ei roi ar ei gyfer ac nad yw awdurdod cynllunio na Gweinidogion Cymru wedi ymrwymo i roi caniatâd ar ei gyfer.
- (8) Nid yw adeilad rhestredig yn anefnyddiadwy yn ei gyflwr presennol –
- (a) os achoswyd cyflwr presennol yr adeilad gan doriad o adran 88 (gofyniad i waith gael ei awdurdodi) neu o amod y rhoddwyd cydsyniad adeilad rhestredig yn ddarostyngedig iddo, a
  - (b) pe gellid gwneud yr adeilad yn ddefnyddiadwy drwy gymryd camau sy’n ofynnol neu a allai fod yn ofynnol gan hysbysiad gorfodi o dan adran 123.

#### 110 Hysbysiad prynu mewn cysylltiad â thir y Goron

- (1) Ni chaiff perchennog buddiant preifat yn nhir y Goron gyflwyno hysbysiad prynu mewn cysylltiad â’r buddiant hwnnw oni bai –
- (a) bod y perchennog wedi cynnig gwaredu’r buddiant i awdurdod priodol y Goron am bris sy’n hafal i’r digollediad (ac os na chytunir arno, mae i’w benderfynu yn yr un ffordd â’r digollediad) a fyddai’n daladwy am y buddiant pe bai’n cael ei gaffael yn unol â hysbysiad prynu, a
  - (b) bod awdurdod priodol y Goron wedi gwrthod y cynnig.
- (2) Dim ond awdurdod priodol y Goron a gaiff gyflwyno hysbysiad prynu mewn cysylltiad â buddiant y Goron neu fuddiant y Ddugiaeth mewn tir –
- (a) sy’n rhan o Ystad y Goron,
  - (b) sy’n perthyn i’w Fawrhydi yn hawl Ei ystadau preifat,
  - (c) sy’n perthyn i’w Fawrhydi yn hawl Dugiaeth Caerhirfryn, neu
  - (d) sy’n perthyn i Ddugiaeth Cernyw.
- (3) Ni chaniateir cyflwyno hysbysiad prynu mewn cysylltiad â buddiant y Goron neu fuddiant y Ddugiaeth mewn unrhyw dir arall.

#### 111 Darpariaeth bellach ynghylch cyflwyno hysbysiad prynu

- (1) Rhaid cyflwyno hysbysiad prynu o fewn 12 mis sy’n dechrau –



- (a) yn achos hysbysiad sy'n ymwneud â phenderfyniad i wrthod cydsyniad adeilad rhestredig neu i'w roi yn ddarostyngedig i amodau, â'r diwrnod y gwneir y penderfyniad, neu
  - (b) yn achos hysbysiad sy'n ymwneud â gorchymyn o dan adran 107 sy'n addasu neu'n dirymu cydsyniad adeilad rhestredig, â'r diwrnod y mae'r gorchymyn yn cymryd effaith.
- (2) Mewn achos pan fo Gweinidogion Cymru yn penderfynu apêl yn erbyn penderfyniad gan awdurdod cynllunio i wrthod cydsyniad adeilad rhestredig neu i'w roi yn ddarostyngedig i amodau, mae'r cyfeiriad yn is-adran (1)(a) at y diwrnod y gwneir y penderfyniad i'w ddarllen fel pe bai'n gyfeiriad at y diwrnod y mae Gweinidogion Cymru yn penderfynu'r apêl.
- (3) Caiff Gweinidogion Cymru ar unrhyw adeg estyn y cyfnod ar gyfer cyflwyno hysbysiad prynu mewn achos penodol, os ydynt wedi eu bodloni bod rhesymau da dros wneud hynny.
- (4) Caiff Gweinidogion Cymru drwy reoliadau wneud darpariaeth ynghylch sut y mae rhaid cyflwyno hysbysiad prynu.
- (5) Pan fo hysbysiad atgyweirio wedi ei gyflwyno i berchennog ar adeilad rhestredig o dan adran 138, nid oes gan y perchennog hawlogaeth i gyflwyno hysbysiad prynu mewn cysylltiad â'r adeilad –
- (a) cyn diwedd y 3 mis sy'n dechrau â'r diwrnod y cyflwynir yr hysbysiad atgyweirio, neu
  - (b) os dechreuir caffael yr adeilad yn orfodol o dan adran 137 yn ystod y cyfnod hwnnw, oni bai bod y caffaeliad gorfodol yn cael ei derfynu.
- (6) Ni chaiff perchennog ar adeilad rhestredig sydd wedi cyflwyno hysbysiad prynu ddiwygio'r hysbysiad; ond nid yw hynny yn atal y perchennog rhag cyflwyno hysbysiad prynu pellach sy'n ymwneud â'r un penderfyniad neu'r un gorchymyn.
- (7) Os yw perchennog yn cyflwyno hysbysiad prynu pellach sy'n ymwneud â'r un penderfyniad neu'r un gorchymyn, mae'r hysbysiad cynharach i'w drin fel pe bai wedi ei dynnu'n ôl oni bai bod yr hysbysiad diweddarach yn datgan nad yw'r perchennog yn bwriadu ei dynnu'n ôl.
- (8) At ddibenion is-adran (5) –
- (a) mae caffaeliad gorfodol yn cael ei ddechrau –
    - (i) gan awdurdod cynllunio pan fydd yn cyflwyno'r hysbysiad sy'n ofynnol gan adran 12 o Ddeddf Caffael Tir 1981 (p. 67);
    - (ii) gan Weinidogion Cymru pan fyddant yn cyflwyno'r hysbysiad sy'n ofynnol gan baragraff 3(1) o Atodlen 1 i'r Ddeddf honno;
  - (b) mae caffaeliad gorfodol yn cael ei derfynu –
    - (i) yn achos caffaeliad gan awdurdod cynllunio, pan fydd y gorchymyn prynu gorfodol wedi ei dynnu'n ôl neu pan fydd Gweinidogion Cymru yn penderfynu peidio â'i gadarnhau;
    - (ii) yn achos caffaeliad gan Weinidogion Cymru, pan fyddant yn penderfynu peidio â gwneud y gorchymyn prynu gorfodol.

**112 Camau gweithredu yn dilyn cyflwyno hysbysiad prynu**

Mae Atodlen 9 yn gwneud darpariaeth ynghylch y camau gweithredu sydd i'w cymryd gan awdurdodau cynllunio a Gweinidogion Cymru yn dilyn cyflwyno hysbysiad prynu.

**PENNOD 3****CYTUNDEBAU PARTNERIAETHAU ADEILADAU RHESTREDIG****113 Cytundebau partneriaethau adeiladau rhestredig**

- (1) Caiff awdurdod cynllunio wneud cytundeb o dan yr adran hon ag unrhyw berchennog ar adeilad rhestredig, neu ran o adeilad rhestredig, sydd yn ei ardal.
- (2) Caiff unrhyw un neu ragor o'r personau a ganlyn hefyd fod yn barti i'r cytundeb (yn ogystal â'r perchennog a'r awdurdod) –
  - (a) Gweinidogion Cymru;
  - (b) unrhyw feddiannydd ar yr adeilad;
  - (c) unrhyw berson arall sydd â buddiant yn yr adeilad;
  - (d) unrhyw berson sy'n ymwneud â rheoli'r adeilad;
  - (e) unrhyw berson arall y mae'r awdurdod cynllunio yn ystyried ei fod yn briodol gan fod ganddo wybodaeth arbennig am yr adeilad, neu ddiddordeb arbennig ynddo, neu wybodaeth arbennig am adeiladau o ddiddordeb pensaernïol neu hanesyddol yn fwy cyffredinol, neu ddiddordeb arbennig ynddynt.
- (3) Caiff Gweinidogion Cymru wneud cytundeb o dan yr adran hon ag unrhyw berchennog ar adeilad rhestredig neu ran o adeilad rhestredig.
- (4) Caiff unrhyw un neu ragor o'r personau a ganlyn hefyd fod yn barti i'r cytundeb (yn ogystal â'r perchennog a Gweinidogion Cymru) –
  - (a) unrhyw awdurdod cynllunio y mae'r adeilad neu'r rhan yn ei ardal;
  - (b) unrhyw feddiannydd ar yr adeilad;
  - (c) unrhyw berson arall sydd â buddiant yn yr adeilad;
  - (d) unrhyw berson sy'n ymwneud â rheoli'r adeilad;
  - (e) unrhyw berson arall y mae Gweinidogion Cymru yn ystyried ei fod yn briodol gan fod ganddo wybodaeth arbennig am yr adeilad, neu ddiddordeb arbennig ynddo, neu wybodaeth arbennig am adeiladau o ddiddordeb pensaernïol neu hanesyddol yn fwy cyffredinol, neu ddiddordeb arbennig ynddynt.
- (5) Cyfeirir at gytundeb o dan yr adran hon fel "cytundeb partneriaeth adeilad rhestredig" yn y Ddeddf hon.
- (6) Caiff cytundeb partneriaeth adeilad rhestredig roi cydsyniad adeilad rhestredig o dan adran 89(1) ar gyfer gwaith penodedig ar gyfer addasu neu estyn yr adeilad rhestredig y mae'r cytundeb yn ymwneud ag ef.
- (7) Pan fo cytundeb partneriaeth adeilad rhestredig yn rhoi cydsyniad adeilad rhestredig yn ddarostyngedig i amodau, rhaid i'r cytundeb bennu'r amodau hynny.
- (8) Caiff cytundeb partneriaeth adeilad rhestredig hefyd –

- (a) pennu gwaith a fyddai neu na fyddai, ym marn y partïon, yn effeithio ar gymeriad yr adeilad rhestredig fel adeilad o ddiddordeb pensaernïol neu hanesyddol arbennig;
  - (b) gwneud darpariaeth ynghylch cynnal a chadw a diogelu'r adeilad;
  - (c) gwneud darpariaeth ynghylch cyflawni gwaith penodedig, neu wneud unrhyw beth penodedig, mewn perthynas â'r adeilad;
  - (d) darparu ar gyfer mynediad y cyhoedd i'r adeilad a darparu cyfleusterau cysylltiedig, gwybodaeth gysylltiedig neu wasanaethau cysylltiedig i'r cyhoedd;
  - (e) cyfyngu ar fynediad i'r adeilad neu ar y defnydd o'r adeilad;
  - (f) gwahardd gwneud unrhyw beth penodedig mewn perthynas â'r adeilad;
  - (g) darparu i awdurdod cynllunio neu Weinidogion Cymru wneud taliadau o symiau penodedig ac ar delerau penodedig –
    - (i) am gostau unrhyw waith y darperir ar ei gyfer o dan y cytundeb, neu tuag at y costau hynny, neu
    - (ii) yn gydnabyddiaeth am unrhyw gyfyngiad, unrhyw waharddiad neu unrhyw rwymedigaeth a dderbynnir gan unrhyw barti arall i'r cytundeb.
- (9) Caiff cytundeb partneriaeth adeilad rhestredig ymwneud â mwy nag un adeilad rhestredig neu fwy nag un rhan o adeilad rhestredig, ond dim ond os yw'r partïon i'r cytundeb yn cynnwys mewn perthynas â phob adeilad neu bob rhan –
- (a) perchennog ar yr adeilad hwnnw neu'r rhan honno, a
  - (b) yr awdurdod cynllunio y mae'r adeilad hwnnw neu'r rhan honno yn ei ardal neu Weinidogion Cymru.
- (10) Yn yr adran hon –
- ystyr "penodedig" ("*specified*") yw wedi ei bennu neu ei ddisgrifio mewn cytundeb partneriaeth adeilad rhestredig;
- ystyr "perchennog" ("*owner*"), mewn perthynas ag adeilad rhestredig neu ran o adeilad rhestredig, yw person –
- (a) sy'n berchen ar yr ystad rydd-ddaliadol yn yr adeilad neu'r rhan, neu
  - (b) sy'n denant o dan les ar yr adeilad neu'r rhan a roddir neu a estynnir am gyfnod penodol sydd ag o leiaf 7 mlynedd yn weddill.

#### 114 Darpariaeth bellach ynghylch cytundebau partneriaethau adeiladau rhestredig

- (1) Rhaid i gytundeb partneriaeth adeilad rhestredig fod yn ysgrifenedig.
- (2) Rhaid i gytundeb partneriaeth adeilad rhestredig –
  - (a) cynnwys digon o wybodaeth i adnabod yr adeilad rhestredig y mae'n ymwneud ag ef, gan gynnwys plan;
  - (b) cynnwys unrhyw blaniau eraill ac unrhyw luniadau eraill sy'n angenrheidiol i ddisgrifio unrhyw waith y mae'n ymwneud ag ef;
  - (c) pennu'r dyddiad y mae'n cymryd effaith a'i hyd;

- (d) gwneud darpariaeth i'r partïon adolygu telerau'r cytundeb ar ysbeidiau a bennir ynddo;
  - (e) gwneud darpariaeth ar gyfer ei amrywio (ond mae hyn yn ddarostyngedig i reoliadau o dan is-adran (5));
  - (f) gwneud darpariaeth ar gyfer ei derfynu (ond mae hyn yn ddarostyngedig i adran 115).
- (3) Caiff cytundeb partneriaeth adeilad rhestredig gynnwys darpariaeth ddeilliadol a darpariaeth ganlyniadol.
- (4) Caiff Gweinidogion Cymru drwy reoliadau bennu telerau eraill y mae rhaid eu cynnwys mewn cytundeb partneriaeth adeilad rhestredig.
- (5) Rhaid i Weinidogion Cymru drwy reoliadau wneud darpariaeth ynghylch—
- (a) yr ymgynghoriad y mae rhaid ei gynnal cyn i gytundeb partneriaeth adeilad rhestredig gael ei wneud neu ei amrywio;
  - (b) y cyhoeddusrwydd y mae rhaid ei roi i gytundeb partneriaeth adeilad rhestredig cyn neu ar ôl iddo gael ei wneud neu ei amrywio.
- (6) Wrth ystyried pa un ai i wneud cytundeb partneriaeth adeilad rhestredig sy'n rhoi cydsyniad adeilad rhestredig, neu amrywio cytundeb fel ei fod yn rhoi cydsyniad, rhaid i awdurdod cynllunio neu Weinidogion Cymru roi sylw arbennig i ddymunoldeb diogelu—
- (a) yr adeilad rhestredig y mae'r cytundeb yn ymwneud ag ef,
  - (b) safle'r adeilad, ac
  - (c) unrhyw nodweddion o ddiddordeb pensaernïol neu hanesyddol arbennig sydd gan yr adeilad.
- (7) Ni chaiff cytundeb partneriaeth adeilad rhestredig osod unrhyw rwymedigaeth neu unrhyw atebolrwydd ar berson nad yw'n barti i'r cytundeb, na rhoi unrhyw hawl i berson o'r fath; ac nid yw cydsyniad adeilad rhestredig a roddir gan gytundeb o'r fath yn cael effaith ond er budd y partïon iddo.
- (8) Caiff Gweinidogion Cymru drwy reoliadau—
- (a) datgymhwyso, neu gymhwyso neu atgynhyrchu gydag addasiadau neu hebddynt, unrhyw ddarpariaeth yn adrannau 90 i 104 (rhoi cydsyniad adeilad rhestredig) neu Bennod 4 (gorfodi) at ddibenion cytundebau partneriaethau adeiladau rhestredig, a
  - (b) darparu i unrhyw ddarpariaeth arall yn y Ddeddf hon fod yn gymwys gydag addasiadau sy'n ganlyniadol ar ddarpariaeth a wneir o dan baragraff (a).

### 115 Terfynu cytundeb neu ddarpariaeth mewn cytundeb

- (1) Caiff awdurdod cynllunio drwy orchymyn derfynu cytundeb partneriaeth adeilad rhestredig y mae'n barti iddo neu unrhyw ddarpariaeth mewn cytundeb o'r fath.
- (2) Caiff Gweinidogion Cymru drwy orchymyn derfynu cytundeb partneriaeth adeilad rhestredig (pa un a ydynt yn barti iddo ai peidio) neu unrhyw ddarpariaeth mewn cytundeb o'r fath.
- (3) Caiff gorchymyn o dan yr adran hon gynnwys darpariaeth atodol, darpariaeth ddeilliadol, darpariaeth ddarfodol, darpariaeth drosiannol neu ddarpariaeth arbed.

- (4) Caniateir i orchymyn o dan yr adran hon sy'n terfynu darpariaeth sy'n rhoi cydsyniad adeilad rhestredig ar gyfer unrhyw waith gael ei wneud ar unrhyw adeg cyn cwblhau'r gwaith, ond nid yw'n effeithio ar gydsyniad adeilad rhestredig ar gyfer gwaith sydd wedi ei gyflawni cyn i'r gorchymyn gymryd effaith.
- (5) Yn Atodlen 10—
  - (a) mae Rhan 1 yn gwneud darpariaeth ynghylch y weithdrefn y mae rhaid ei dilyn cyn i orchymyn a wneir gan awdurdod cynllunio o dan yr adran hon gymryd effaith;
  - (b) mae Rhan 2 yn gwneud darpariaeth ynghylch y weithdrefn y mae rhaid ei dilyn cyn i Weinidogion Cymru wneud gorchymyn o dan yr adran hon.
- (6) Caiff Gweinidogion Cymru drwy reoliadau ddiwygio Atodlen 10, a chaiff y rheoliadau wneud diwygiadau canlyniadol i unrhyw ddarpariaeth arall yn y Ddeddf hon.

#### **116 Digollediad pan fo cytundeb neu ddarpariaeth yn cael ei derfynu neu ei therfynu**

- (1) Mae'r adran hon yn gymwys pan fo cytundeb partneriaeth adeilad rhestredig, neu unrhyw ddarpariaeth mewn cytundeb o'r fath, yn cael ei derfynu neu ei therfynu gan orchymyn o dan adran 115.
- (2) Mae gan unrhyw berson hawlogaeth, wrth wneud hawliad i'r awdurdod cynllunio, i gael ei ddigolledu gan yr awdurdod—
  - (a) am unrhyw wariant yr eir iddo gan y person wrth gyflawni gwaith y mae terfynu'r cytundeb neu'r ddarpariaeth yn peri ei fod yn waith ofer;
  - (b) am unrhyw golled arall neu unrhyw ddifrod arall a ddioddefir gan y person y gellir ei phriodoli neu ei briodoli'n uniongyrchol i'r terfynu.
- (3) At ddibenion yr adran hon mae gwariant yr eir iddo wrth lunio planiau at ddibenion unrhyw waith, neu ar faterion tebyg eraill sy'n baratoadol i unrhyw waith, i'w drin fel pe bai'n wariant yr eir iddo wrth gyflawni'r gwaith.
- (4) Yn ddarostyngedig i hynny, nid oes digollediad yn daladwy o dan yr adran hon mewn cysylltiad—
  - (a) â gwaith a gyflawnwyd cyn i'r cytundeb partneriaeth adeilad rhestredig, neu'r ddarpariaeth berthnasol yn y cytundeb, gymryd effaith, neu
  - (b) â cholled neu ddifrod arall (ac eithrio colled neu ddifrod sy'n ddibrisiant yng ngwerth buddiant mewn tir) sy'n deillio o unrhyw beth a wnaed neu nas gwnaed cyn i'r cytundeb neu'r ddarpariaeth gymryd effaith.
- (5) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau â'r diwrnod y mae terfynu'r cytundeb neu'r ddarpariaeth yn cymryd effaith.
- (6) Yn is-adran (2) ystyr "yr awdurdod cynllunio" yw—
  - (a) yr awdurdod cynllunio a wnaeth y gorchymyn o dan adran 115, neu
  - (b) os gwnaed y gorchymyn gan Weinidogion Cymru, yr awdurdod cynllunio y mae'r adeilad rhestredig, neu'r rhan o adeilad rhestredig y mae'r gorchymyn yn ymwneud ag ef neu hi, yn ei ardal.

- (7) Caiff Gweinidogion Cymru drwy reoliadau ddiwygio'r adran hon, a chaiff y rheoliadau wneud diwygiadau canlyniadol i unrhyw ddarpariaeth arall yn y Ddeddf hon.

#### PENNOD 4

#### GORFODI RHEOLAETHAU SY'N YMWNEUD AG ADEILADAU RHESTREDIG

##### *Gwaith anawdurdodedig a difrod bwriadol: troseddau*

#### 117 Y drosedd o gyflawni gwaith anawdurdodedig neu dorri amod mewn cydsyniad

- (1) Mae person yn cyflawni trosedd os yw'r person yn cyflawni gwaith, neu'n peri i waith gael ei gyflawni, mewn perthynas ag adeilad rhestredig yn groes i adran 88 (gofyniad i waith gael ei awdurdodi).
- (2) Mae person hefyd yn cyflawni trosedd os yw'r person –
  - (a) yn cyflawni gwaith, neu'n peri i waith gael ei gyflawni, mewn perthynas ag adeilad rhestredig, a
  - (b) yn methu â chydymffurfio ag amod y rhoddwyd cydsyniad adeilad rhestredig yn ddarostyngedig iddo ar gyfer y gwaith.
- (3) Nid yw is-adran (2) yn cyfyngu ar yr hyn a all fod yn drosedd o dan is-adran (1).
- (4) Mewn achos yn erbyn person am drosedd o dan yr adran hon, mae'n amddiffyniad i'r person brofi –
  - (a) bod gwaith yn angenrheidiol ar frys er lles diogelwch neu iechyd neu ar gyfer diogelu'r adeilad,
  - (b) nad oedd yn ymarferol sicrhau diogelwch neu iechyd neu sicrhau bod yr adeilad yn cael ei ddiogelu drwy gyflawni gwaith atgyweirio neu waith i ategu neu gysgodu'r adeilad dros dro,
  - (c) bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith, a
  - (d) i hysbysiad ysgrifenedig a oedd yn cyfiawnhau'n fanwl gyflawni'r gwaith gael ei roi i'r awdurdod cynllunio y mae'r adeilad yn ei ardal, neu yr oedd yr adeilad yn ei ardal, cyn gynted ag yr oedd yn rhesymol ymarferol.
- (5) Mewn achos yn erbyn person am drosedd o dan yr adran hon mewn perthynas ag adeilad y rhoddir gwarchodaeth interim iddo –
  - (a) mae'n amddiffyniad i'r person brofi nad oedd y person yn gwybod, ac na ellid bod wedi disgwyl yn rhesymol iddo wybod, bod y warchodaeth interim wedi ei rhoi, a
  - (b) pan fo'r amddiffyniad yn cael ei godi gan berson y dylai hysbysiad fod wedi cael ei gyflwyno iddo o dan adran 78(1), yr erlyniad sydd i brofi i'r hysbysiad gael ei gyflwyno i'r person.
- (6) Mae person sy'n euog o drosedd o dan yr adran hon yn agored –
  - (a) ar euogfarn ddiannod, i ddirwy neu i'w garcharu am gyfnod nad yw'n hwy na'r terfyn cymwys o dan adran 224(1A)(b) o'r Cod Dedfrydu, neu'r ddau;
  - (b) ar euogfarn ar ddiad, i ddirwy neu i'w garcharu am gyfnod nad yw'n hwy na 2 flynedd, neu'r ddau.



- (7) Wrth benderfynu swm unrhyw ddirwy sydd i'w gosod ar berson a euogfarnwyd o drosedd o dan yr adran hon, rhaid i'r llys roi sylw yn benodol i unrhyw fudd ariannol sydd wedi cronni, neu yr ymddengys ei fod yn debygol o gronni, i'r person o ganlyniad i'r drosedd.

### 118 Y drosedd o ddifrodi adeilad rhestredig yn fwriadol

- (1) Mae person yn cyflawni trosedd os yw'r person, gyda'r bwriad o achosi difrod i adeilad rhestredig, yn gwneud unrhyw beth neu'n caniatáu i unrhyw beth gael ei wneud –
- sy'n achosi difrod i'r adeilad neu sy'n debygol o arwain at ddifrod iddo, a
  - y byddai gan y person hawlogaeth i'w wneud neu ei ganiatáu oni bai am yr is-adran hon.
- (2) Nid yw is-adran (1) yn gymwys –
- i waith y rhoddwyd cydsyniad adeilad rhestredig ar ei gyfer;
  - i unrhyw beth a wneir mewn perthynas â heneb gofrestrredig (ond gweler adran 58);
  - i waith mewn perthynas ag adeilad crefyddol esempt;
  - i unrhyw beth a awdurdoddir gan ganiatâd cynllunio a roddwyd neu a gaiff ei drin fel pe bai wedi ei roi ar gais o dan Ddeddf Cynllunio Gwlad a Thref 1990 (p. 8);
  - i unrhyw beth y rhoddwyd cydsyniad datblygu ar ei gyfer o dan Ddeddf Cynllunio 2008 (p. 29).
- (3) Mae person sy'n euog o drosedd o dan is-adran (1) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (4) Os yw person a euogfarnwyd o drosedd o dan is-adran (1) yn methu â chymryd unrhyw gamau rhesymol sy'n angenrheidiol i atal difrod neu ddifrod pellach sy'n deillio o'r drosedd, mae'r person yn euog o drosedd bellach.
- (5) Mae person sy'n euog o drosedd o dan is-adran (4) yn agored ar euogfarn ddiannod i ddirwy nad yw'n fwy nag un rhan o ddeg o lefel 3 ar y raddfa safonol ar gyfer pob diwrnod y mae'r methiant yn parhau.

#### *Hysbysiadau stop dros dro*

### 119 Pŵer awdurdod cynllunio i ddyroddi hysbysiad stop dros dro

- (1) Caiff awdurdod cynllunio ddyroddi hysbysiad stop dros dro os yw'n ystyried –
- bod gwaith wedi cael ei gyflawni neu yn cael ei gyflawni mewn perthynas ag adeilad rhestredig yn ei ardal sy'n golygu torri adran 88 (gofyniad i waith gael ei awdurdodi) neu amod y rhoddwyd cydsyniad adeilad rhestredig yn ddarostyngedig iddo, a
  - y dylai'r gwaith (neu unrhyw ran o'r gwaith) gael ei stopio ar unwaith, gan roi sylw i'w effaith ar gymeriad yr adeilad fel un sydd o ddiddordeb pensaernïol neu hanesyddol arbennig.
- (2) Rhaid i hysbysiad stop dros dro –
- pennu'r gwaith y mae'n ymwneud ag ef,
  - gwahardd cyflawni'r gwaith (neu unrhyw ran o'r gwaith a bennir yn yr hysbysiad),

- (c) nodi rhesymau'r awdurdod dros ddyroddi'r hysbysiad, a
  - (d) datgan effaith adran 121 (y drosedd o dorri hysbysiad stop dros dro).
- (3) Rhaid i'r awdurdod cynllunio arddangos copi o'r hysbysiad stop dros dro ar yr adeilad rhestredig y mae'n ymwneud ag ef; a rhaid i'r copi bennu'r dyddiad y caiff ei arddangos am y tro cyntaf.
- (4) Ond –
- (a) os nad yw'n rhesymol ymarferol arddangos copi o'r hysbysiad ar yr adeilad, neu
  - (b) os yw'r awdurdod yn ystyried y gallai arddangos copi o'r hysbysiad ar yr adeilad ei ddifrodi,
- caiff yr awdurdod, yn lle hynny, arddangos copi mewn lle amlwg mor agos i'r adeilad ag y bo'n rhesymol ymarferol.
- (5) Caiff yr awdurdod gyflwyno copi o'r hysbysiad i unrhyw berson y mae'r awdurdod yn ystyried –
- (a) ei fod yn cyflawni'r gwaith y mae'r hysbysiad yn ei wahardd neu'n peri neu'n caniatáu iddo gael ei gyflawni,
  - (b) ei fod yn feddiannydd ar yr adeilad rhestredig y mae'r hysbysiad yn ymwneud ag ef, neu
  - (c) bod ganddo fuddiant yn yr adeilad.
- (6) Ni chaiff hysbysiad stop dros dro wahardd cyflawni gwaith o ddisgrifiad, neu o dan amgylchiadau, a bennir mewn rheoliadau a wneir gan Weinidogion Cymru.

## 120 Hyd etc. hysbysiad stop dros dro

- (1) Mae hysbysiad stop dros dro yn cymryd effaith pan arddangosir copi ohono yn unol ag adran 119 am y tro cyntaf.
- (2) Mae hysbysiad stop dros dro yn peidio â chael effaith –
- (a) ar ddiwedd 28 o ddiwrnodau sy'n dechrau â'r diwrnod pan arddangosir y copi ohono yn unol ag adran 119 am y tro cyntaf, neu
  - (b) os yw'n pennu cyfnod byrrach sy'n dechrau â'r diwrnod hwnnw, ar ddiwedd y cyfnod hwnnw.
- (3) Ond os yw'r awdurdod cynllunio yn tynnu'r hysbysiad yn ôl cyn diwedd y cyfnod y byddai fel arall yn cael effaith ar ei gyfer, mae'r hysbysiad yn peidio â chael effaith pan gaiff ei dynnu'n ôl.
- (4) Ni chaiff awdurdod cynllunio ddyroddi ail hysbysiad stop dros dro neu hysbysiad stop dros dro dilynol mewn perthynas â'r un gwaith oni bai ei fod, ers dyroddi'r hysbysiad blaenorol, wedi cymryd camau gorfodi eraill mewn perthynas â'r toriad y cyfeirir ato yn adran 119(1)(a).
- (5) Yn is-adran (4) mae'r cyfeiriad at gymryd camau gorfodi eraill yn gyfeiriad at –
- (a) dyroddi hysbysiad gorfodi o dan adran 123, neu
  - (b) cael gwaharddeb o dan adran 135.

**121 Y drosedd o dorri hysbysiad stop dros dro**

- (1) Mae person yn cyflawni trosedd os yw'r person, ar unrhyw adeg pan fydd hysbysiad stop dros dro yn cael effaith, yn cyflawni gwaith sydd wedi ei wahardd gan yr hysbysiad neu'n peri neu'n caniatáu i waith o'r fath gael ei gyflawni.
- (2) Caniateir i berson gael ei gyhuddo o drosedd o dan yr adran hon drwy gyfeirio at ddiwrnod neu at gyfnod hwy, a chaniateir iddo gael ei euogfarnu o fwy nag un drosedd mewn perthynas â'r un hysbysiad stop dros dro drwy gyfeirio at gyfnodau gwahanol.
- (3) Mewn achos yn erbyn person am drosedd o dan yr adran hon, mae'n amddiffyniad i'r person brofi nad oedd y person yn gwybod, ac na ellid bod wedi disgwyl yn rhesymol iddo wybod, am fodolaeth yr hysbysiad stop dros dro.
- (4) Mewn achos am drosedd o dan yr adran hon, mae'n amddiffyniad profi—
  - (a) bod gwaith i'r adeilad rhestredig yn angenrheidiol ar frys er lles diogelwch neu iechyd neu ar gyfer diogelu'r adeilad,
  - (b) nad oedd yn ymarferol sicrhau diogelwch neu iechyd neu sicrhau bod yr adeilad yn cael ei ddiogelu drwy gyflawni gwaith atgyweirio neu waith i ategu neu gysgod i'r adeilad dros dro,
  - (c) bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith, a
  - (d) i hysbysiad ysgrifenedig a oedd yn cyfiawnhau'n fanwl gyflawni'r gwaith gael ei roi i'r awdurdod cynllunio y mae'r adeilad yn ei ardal, neu yr oedd yr adeilad yn ei ardal, cyn gynted ag yr oedd yn rhesymol ymarferol.
- (5) Mae person sy'n euog o drosedd o dan yr adran hon yn agored ar euogfarn ddiannod, neu ar euogfarn ar dditiad, i ddirwy.
- (6) Wrth benderfynu swm y ddirwy, rhaid i'r llys roi sylw yn benodol i unrhyw fudd ariannol sydd wedi cronni, neu yr ymddengys ei fod yn debygol o gronni, i'r person o ganlyniad i'r drosedd.

**122 Digollediad am golled neu ddifrod a achosir gan hysbysiad stop dros dro**

- (1) Mae'r adran hon yn gymwys pan—
  - (a) na fo'r gwaith a bennir mewn hysbysiad stop dros dro, ar yr adeg y bydd yr hysbysiad yn cymryd effaith, yn golygu torri adran 88 (gofyniad i waith gael ei awdurdodi) neu amod y rhoddwyd cydsyniad adeilad rhestredig yn ddarostyngedig iddo, neu
  - (b) bo awdurdod cynllunio yn tynnu'n ôl hysbysiad stop dros dro ar ôl iddo gymryd effaith.
- (2) Nid yw'r adran hon yn gymwys yn rhinwedd is-adran (1)(b) pan—
  - (a) bo cydsyniad adeilad rhestredig wedi ei roi ar gyfer y gwaith a bennir yn yr hysbysiad stop dros dro ar ôl i'r hysbysiad gymryd effaith, a
  - (b) bo'r awdurdod cynllunio yn tynnu'r hysbysiad yn ôl ar ôl i'r cydsyniad hwnnw gael ei roi.

- (3) Mae gan unrhyw berson a chanddo fuddiant yn yr adeilad rhestredig y mae'r hysbysiad yn ymwneud ag ef ar yr adeg y mae'r hysbysiad yn cymryd effaith hawlogaeth, wrth wneud hawliad i'r awdurdod cynllunio, i gael ei ddigolledu gan yr awdurdod am unrhyw golled neu unrhyw ddifrod a ddioddefir gan y person y gellir ei phriodoli neu ei briodoli'n uniongyrchol i effaith yr hysbysiad.
- (4) Mae'r golled neu'r difrod y mae digollediad yn daladwy amdani neu amdano yn cynnwys unrhyw swm sy'n daladwy gan yr hawlydd mewn cysylltiad â thor contract a achosir drwy gymryd camau gweithredu sy'n angenrheidiol i gydymffurfio â'r hysbysiad.
- (5) Nid oes digollediad yn daladwy o dan yr adran hon am golled neu ddifrod y gallai'r hawlydd fod wedi ei hosgoi neu ei osgoi—
  - (a) drwy ddarparu gwybodaeth yr oedd hysbysiad a gyflwynwyd gan yr awdurdod cynllunio o dan adran 197 o'r Ddeddf hon neu adran 16 o Ddeddf Llywodraeth Leol (Darpariaethau Amrywiol) 1976 (p. 57) yn ei gwneud yn ofynnol i'r hawlydd ei darparu, neu
  - (b) drwy gydweithredu â'r awdurdod cynllunio mewn unrhyw ffordd arall wrth ymateb i hysbysiad o'r fath.
- (6) Rhaid i hawliad am ddigollediad o dan yr adran hon gael ei wneud yn ysgrifenedig o fewn 6 mis sy'n dechrau—
  - (a) mewn achos sy'n dod o fewn is-adran (1)(a) ond nid o fewn is-adran (1)(b), â'r diwrnod y mae'r hysbysiad stop dros dro yn cymryd effaith;
  - (b) mewn achos sy'n dod o fewn is-adran (1)(b), â'r diwrnod y mae'r hysbysiad wedi ei dynnu'n ôl.

*Hysbysiadau gorfodi a ddyroddir gan awdurdodau cynllunio*

**123 Pŵer awdurdod cynllunio i ddyroddi hysbysiad gorfodi**

- (1) Caiff awdurdod cynllunio ddyroddi hysbysiad gorfodi os yw'n ystyried—
  - (a) bod gwaith sy'n golygu torri adran 88 (gofyniad i waith gael ei awdurdodi) neu amod y rhoddwyd cydsyniad adeilad rhestredig yn ddarostyngedig iddo wedi cael ei gyflawni neu yn cael ei gyflawni mewn perthynas ag adeilad rhestredig yn ei ardal, a
  - (b) ei bod yn briodol dyroddi'r hysbysiad, gan roi sylw i effaith y gwaith ar gymeriad yr adeilad fel adeilad o ddiddordeb pensaernïol neu hanesyddol arbennig.
- (2) Rhaid i hysbysiad gorfodi—
  - (a) pennu'r toriad honedig, a
  - (b) ei gwneud yn ofynnol i gamau a bennir yn yr hysbysiad gael eu cymryd at un neu ragor o'r dibenion a nodir yn is-adran (3).
- (3) Y dibenion yw—
  - (a) adfer yr adeilad rhestredig i'w gyflwr cyn i'r toriad ddigwydd,
  - (b) os yw'r awdurdod cynllunio yn ystyried na fyddai gwaith adfer yn rhesymol ymarferol neu y byddai'n annymunol, cyflawni gwaith pellach i leddfu effaith y toriad, neu

- (c) rhoi'r adeilad yn y cyflwr y byddai wedi bod ynddo pe cydymffurfiwyd â thelerau unrhyw gydsyniad adeilad rhestredig ar gyfer y gwaith y mae'r hysbysiad yn ymwneud ag ef (gan gynnwys unrhyw amodau sydd ynghlwm wrth y cydsyniad).
- (4) Pan fo hysbysiad gorfodi yn gosod gofyniad o dan is-adran (3)(b), mae cydsyniad adeilad rhestredig i'w drin fel pe bai wedi ei roi ar gyfer unrhyw waith sydd wedi ei gyflawni yn unol â'r gofyniad.

#### **124 Cyflwyno hysbysiad gorfodi a'r hysbysiad yn cymryd effaith**

- (1) Rhaid i hysbysiad gorfodi bennu –
  - (a) y dyddiad y mae i gymryd effaith, a
  - (b) o fewn pa gyfnod y mae rhaid cymryd y camau a bennir ynddo.
- (2) Mae'r hysbysiad yn cymryd effaith ar ddechrau'r diwrnod a bennir o dan is-adran (1)(a); ond pan fo apêl yn cael ei gwneud yn erbyn yr hysbysiad o dan adran 127, mae hyn yn ddarostyngedig i adrannau 127(4)(a) a 184(5).
- (3) Caiff hysbysiad gorfodi bennu cyfnodau gwahanol ar gyfer cymryd camau gwahanol.
- (4) Pan fo awdurdod cynllunio yn dyroddi hysbysiad gorfodi, rhaid iddo gyflwyno copi o'r hysbysiad –
  - (a) i bob perchennog a phob meddiannydd ar yr adeilad rhestredig y mae'r hysbysiad yn ymwneud ag ef, a
  - (b) i unrhyw berson arall a chanddo fuddiant yn yr adeilad y mae'r awdurdod yn ystyried bod yr hysbysiad yn effeithio'n sylweddol arno.
- (5) Rhaid cyflwyno pob copi o'r hysbysiad –
  - (a) cyn diwedd 28 o ddiwrnodau ar ôl y diwrnod y dyroddir yr hysbysiad, a
  - (b) o leiaf 28 o ddiwrnodau cyn y dyddiad a bennir yn yr hysbysiad fel y dyddiad y mae i gymryd effaith.

#### **125 Amrywio hysbysiad gorfodi a thynnu hysbysiad gorfodi yn ôl**

- (1) Pan fo awdurdod cynllunio wedi dyroddi hysbysiad gorfodi, caiff –
  - (a) tynnu'r hysbysiad yn ôl;
  - (b) hepgor neu lacio unrhyw ofyniad yn yr hysbysiad, ac yn benodol estyn y cyfnod y mae'r hysbysiad yn ei gwneud yn ofynnol i unrhyw gam gael ei gymryd ynddo.
- (2) Caiff yr awdurdod arfer y pwerau yn is-adran (1) pa un a yw'r hysbysiad wedi cymryd effaith ai peidio.
- (3) Nid yw tynnu hysbysiad gorfodi yn ôl yn atal yr awdurdod cynllunio rhag dyroddi hysbysiad gorfodi arall.
- (4) Mae is-adran (5) yn gymwys pan oedd yr awdurdod cynllunio wedi cyflwyno copïau o'r hysbysiad gorfodi o dan adran 124(4) cyn arfer y pwerau yn is-adran (1).
- (5) Yn union ar ôl arfer unrhyw un o'r pwerau hynny, rhaid i'r awdurdod roi hysbysiad ei fod wedi gwneud hynny i bob person y cyflwynwyd copi o'r hysbysiad gorfodi iddo (neu y byddai copi o'r hysbysiad yn cael ei gyflwyno iddo pe bai'n cael ei ailddyroddi).

**126 Effaith rhoi cydsyniad adeilad rhestredig ar hysbysiad gorfodi**

- (1) Mae'r adran hon yn gymwys os rhoddir, ar ôl i hysbysiad gorfodi gael ei ddyroddi, gydsyniad adeilad rhestredig o dan adran 89(2) –
  - (a) sy'n awdurdodi unrhyw waith y mae'r hysbysiad yn ymwneud ag ef sydd wedi ei gyflawni yn groes i adran 88, neu
  - (b) sy'n awdurdodi gwaith sy'n golygu torri amod y rhoddwyd cydsyniad blaenorol yn ddarostyngedig iddo.
- (2) Mae'r hysbysiad yn peidio â chael effaith (neu nid yw'n cymryd effaith) i'r graddau y mae'n –
  - (a) ei gwneud yn ofynnol i gamau gael eu cymryd sy'n anghyson â'r awdurdodiad i'r gwaith, neu
  - (b) ei gwneud yn ofynnol i gamau gael eu cymryd er mwyn cydymffurfio â'r amod.
- (3) Nid yw'r ffaith bod hysbysiad gorfodi wedi peidio â chael effaith yn gyfan gwbl neu'n rhannol yn rhinwedd yr adran hon yn effeithio ar atebolrwydd unrhyw berson am drosedd mewn cysylltiad â methiant blaenorol i gydymffurfio â'r hysbysiad (gweler adran 133).

*Apelau ac achosion eraill sy'n ymwneud â hysbysiadau gorfodi*

**127 Yr hawl i apelio yn erbyn hysbysiad gorfodi**

- (1) Caiff y personau a ganlyn apelio i Weinidogion Cymru yn erbyn hysbysiad gorfodi (pa un a oes copi o'r hysbysiad wedi ei gyflwyno iddynt ai peidio) –
  - (a) unrhyw berson a chanddo fuddiant yn yr adeilad rhestredig y mae'r hysbysiad yn ymwneud ag ef;
  - (b) unrhyw berson sydd, yn rhinwedd trwydded –
    - (i) yn meddiannu'r adeilad ar y diwrnod y dyroddir yr hysbysiad, a
    - (ii) yn parhau i'w feddiannu pan wneir yr apêl.
- (2) Caniateir gwneud apêl ar un neu ragor o'r seiliau a ganlyn –
  - (a) nad yw'r adeilad o ddiddordeb pensaernïol neu hanesyddol arbennig;
  - (b) nad yw'r materion yr honnir eu bod yn torri adran 88 neu amod yn y cydsyniad adeilad rhestredig wedi digwydd;
  - (c) nad yw'r materion hynny (os digwyddasant) yn doriad o'r fath;
  - (d) bod yr amodau a ganlyn wedi eu bodloni –
    - (i) bod y gwaith i'r adeilad yn angenrheidiol ar frys er lles diogelwch neu iechyd neu ar gyfer diogelu'r adeilad,
    - (ii) nad oedd yn ymarferol sicrhau diogelwch neu iechyd neu sicrhau bod yr adeilad yn cael ei ddiogelu drwy gyflawni gwaith atgyweirio neu waith i ategu neu gysgod i'r adeilad dros dro, a
    - (iii) bod y gwaith a gyflawnwyd wedi ei gyfyngu i isafswm y mesurau a oedd yn angenrheidiol ar unwaith;



- (e) y dylai cydsyniad adeilad rhestredig gael ei roi ar gyfer y gwaith y mae'r hysbysiad yn ymwneud ag ef, neu y dylai unrhyw amod perthnasol yn y cydsyniad adeilad rhestredig a roddwyd ar gyfer y gwaith gael ei ddileu neu gael ei ddisodli gan amodau gwahanol;
  - (f) na chyflwynwyd copi o'r hysbysiad i berson fel sy'n ofynnol gan adran 124;
  - (g) na fyddai camau y mae'r hysbysiad yn eu gwneud yn ofynnol o dan adran 123(3)(a) yn ateb y diben o adfer cymeriad yr adeilad;
  - (h) bod camau y mae'r hysbysiad yn eu gwneud yn ofynnol at unrhyw un neu ragor o'r dibenion a nodir yn adran 123(3) yn mynd y tu hwnt i'r hyn sy'n angenrheidiol at y diben o dan sylw;
  - (i) bod y cyfnod y mae'r hysbysiad yn ei gwneud yn ofynnol i unrhyw gam gael ei gymryd ynddo yn afresymol o fyr.
- (3) Rhaid i apêl gael ei gwneud drwy –
- (a) cyflwyno hysbysiad o apêl i Weinidogion Cymru cyn y dyddiad a bennir yn yr hysbysiad gorfodi fel y dyddiad y mae i gymryd effaith,
  - (b) anfon hysbysiad o apêl at Weinidogion Cymru mewn llythyr wedi ei gyfeirio'n briodol a'i ragdalau a'i bostio atynt ar adeg pan fyddai, yng nghwrs arferol y post, yn cael ei ddanfôn atynt cyn y dyddiad hwnnw, neu
  - (c) anfon hysbysiad o apêl at Weinidogion Cymru drwy ddefnyddio cyfathrebiadau electronig ar adeg pan fyddai, yng nghwrs arferol trosglwyddo, yn cael ei ddanfôn atynt cyn y dyddiad hwnnw.
- (4) Pan fo apêl wedi ei gwneud –
- (a) nid yw'r hysbysiad gorfodi yn cael effaith hyd nes y penderfynir yn derfynol ar yr apêl neu y tynnir yr apêl yn ôl; ond mae hyn yn ddarostyngedig i unrhyw orchymyn o dan adran 184(5);
  - (b) nid oes gan yr apelydd nac unrhyw berson arall hawlogaeth, mewn unrhyw achos arall a ddechreuodd ar ôl i'r apêl gael ei gwneud, i honni na chyflwynwyd yr hysbysiad gorfodi i'r apelydd yn unol ag adran 124.
- (5) Rhaid i apelydd gyflwyno datganiad ysgrifenedig i Weinidogion Cymru sy'n cynnwys gwybodaeth sy'n ofynnol gan reoliadau a wneir gan Weinidogion Cymru.
- (6) Rhaid i'r apelydd gyflwyno'r datganiad naill ai –
- (a) gyda'r hysbysiad o apêl, neu
  - (b) o fewn y cyfnod a bennir mewn rheoliadau a wneir gan Weinidogion Cymru.
- (7) Pan fo apêl yn cael ei gwneud ar fwy nag un sail, os yw'r apelydd yn methu â rhoi gwybodaeth sy'n ofynnol o dan is-adran (5) mewn perthynas â sail o fewn y cyfnod a bennir o dan is-adran (6)(b), caiff Gweinidogion Cymru benderfynu'r apêl heb ystyried y sail honno.
- (8) Mae Pennod 2 o Ran 5 yn gwneud darpariaeth ynghylch y weithdrefn ar gyfer ystyried apelau o dan yr adran hon (gan gynnwys darpariaeth iddynt gael eu penderfynu gan bersonau a benodir gan Weinidogion Cymru).

**128 Penderfynu apêl**

- (1) Ar apêl o dan adran 127, caiff Gweinidogion Cymru –
  - (a) cywiro unrhyw ddiffyg, unrhyw wall neu unrhyw gamddisgrifiad yn yr hysbysiad gorfodi y mae'r apêl yn ymwneud ag ef, neu
  - (b) amrywio telerau'r hysbysiad,
 os ydynt wedi eu bodloni na fydd y cywiriad neu'r amrywiad yn achosi anghyfiawnder i'r apelydd na'r awdurdod cynllunio.
- (2) Pan fo Gweinidogion Cymru yn penderfynu apêl –
  - (a) os ydynt yn caniatáu'r apêl, cânt ddiddymu'r hysbysiad gorfodi;
  - (b) rhaid iddynt roi unrhyw gyfarwyddydau sy'n angenrheidiol i roi effaith i'w penderfyniad.
- (3) Wrth benderfynu apêl caiff Gweinidogion Cymru –
  - (a) rhoi cydsyniad adeilad rhestredig ar gyfer unrhyw ran o'r gwaith y mae'r hysbysiad gorfodi yn ymwneud ag ef;
  - (b) dileu unrhyw amod y rhoddwyd cydsyniad adeilad rhestredig yn ddarostyngedig iddo a rhoi unrhyw amod arall yn ei le, pa un a yw'n fwy neu'n llai beichus;
  - (c) arfer eu pŵer o dan adran 76 i ddadrestu'r adeilad y mae'r apêl yn ymwneud ag ef.
- (4) Pan fyddai fel arall yn sail dros benderfynu caniatáu apêl na chyflwynwyd copi o'r hysbysiad gorfodi i berson yr oedd yn ofynnol cyflwyno copi iddo, caiff Gweinidogion Cymru anwybyddu'r ffaith honno os nad yw'r methiant wedi cael effaith andwyol sylweddol ar yr apelydd na'r person hwnnw.
- (5) Caiff Gweinidogion Cymru –
  - (a) gwrthod apêl os yw'r apelydd yn methu â chydymffurfio ag adran 127(6);
  - (b) caniatáu apêl a diddymu'r hysbysiad gorfodi os yw'r awdurdod cynllunio yn methu, o fewn y cyfnod a bennir mewn rheoliadau a wneir o dan adran 175, â chydymffurfio â gofyniad yn y rheoliadau –
    - (i) i gyflwyno datganiad o'r sylwadau y mae'r awdurdod yn cynnig eu gwneud ar apêl sy'n cynnwys y materion a bennir yn y rheoliadau, neu
    - (ii) i anfon at Weinidogion Cymru gopi o'r hysbysiad gorfodi a rhestr o'r personau y cyflwynwyd copïau iddynt.
- (6) Mae penderfyniad Gweinidogion Cymru ar yr apêl (gan gynnwys unrhyw benderfyniad sy'n ymwneud ag arfer y pwerau a roddir gan is-adran (3)) yn derfynol.

**129 Y seiliau dros apelio i beidio â chael eu codi mewn achosion eraill**

Ni chaniateir cwestiynu dilysrwydd hysbysiad gorfodi, ar unrhyw un neu ragor o'r seiliau y caniateir gwneud apêl arnynt o dan adran 127, mewn unrhyw achos ac eithrio apêl o dan yr adran honno.

*Cydymffurfio â hysbysiadau gorfodi***130 Gorchymyn i ganiatáu camau sy'n ofynnol gan hysbysiad gorfodi**

- (1) Caiff perchennog tir wneud cais drwy gŵyn i lys ynadon am orchymyn sy'n ei gwneud yn ofynnol i berson arall a chanddo fuddiant yn y tir ganiatáu i'r perchennog gymryd camau sy'n ofynnol gan hysbysiad gorfodi.
- (2) Caiff y llys wneud gorchymyn o'r fath os yw wedi ei fodloni bod y person arall yn atal y perchennog rhag cymryd camau sy'n ofynnol gan yr hysbysiad gorfodi.

**131 Pŵer i fynd ar dir a chymryd camau sy'n ofynnol gan hysbysiad gorfodi**

- (1) Os yw'r cyfnod y mae hysbysiad gorfodi yn ei gwneud yn ofynnol i unrhyw gam gael ei gymryd ynddo wedi dod i ben ac nad yw'r cam wedi ei gymryd, caiff yr awdurdod cynllunio a ddyroddodd yr hysbysiad, ar unrhyw adeg resymol, fynd ar y tir y mae'r hysbysiad yn ymwneud ag ef a chymryd y cam.
- (2) Mae person sy'n fwriadol yn rhwystro person sy'n arfer pŵer o dan is-adran (1) yn cyflawni trosedd.
- (3) Mae person sy'n euog o drosedd o dan is-adran (2) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (4) Nid yw'r adran hon yn gymwys mewn perthynas â thir y Goron.

**132 Adennill costau cydymffurfio â hysbysiad gorfodi**

- (1) Pan fo awdurdod cynllunio yn arfer y pwerau o dan adran 131(1) i fynd ar dir a chymryd cam sy'n ofynnol gan hysbysiad gorfodi, caiff yr awdurdod adennill oddi wrth berson sydd ar y pryd yn berchennog ar y tir y costau y mae'n mynd iddynt yn rhesymol wrth wneud hynny.
- (2) Os yw awdurdod cynllunio yn ceisio adennill costau o dan is-adran (1) oddi wrth berchennog ar dir —
  - (a) y mae ganddo hawlogaeth i gael crogent y tir dim ond fel asiant neu ymddiriedolwr ar gyfer person arall (y "penadur"), a
  - (b) nad oes ganddo, ac nad oedd ganddo ar unrhyw adeg ers y diwrnod pan fynnwyd bod y costau yn cael eu talu, ddigon o arian ar ran y penadur i dalu'r costau yn llawn,

mae atebolrwydd yr asiant neu'r ymddiriedolwr wedi ei gyfyngu i gyfanswm yr arian y mae'r asiant neu'r ymddiriedolwr wedi ei gael ar ran y penadur ers y diwrnod hwnnw.

- (3) Os yw is-adran (2) yn atal awdurdod cynllunio rhag adennill y cyfan o'i gostau oddi wrth asiant neu ymddiriedolwr, caiff eu hadennill oddi wrth y penadur, neu'n rhannol oddi wrth y penadur ac yn rhannol oddi wrth yr asiant neu'r ymddiriedolwr.
- (4) Pan fo copi o hysbysiad gorfodi wedi cael ei gyflwyno mewn cysylltiad ag adeilad rhestredig, mae —
  - (a) costau y mae perchennog neu feddiannydd ar yr adeilad yn mynd iddynt at ddiben cydymffurfio â'r hysbysiad, a

- (b) symiau y mae perchennog ar dir yn eu talu o dan is-adran (1) mewn cysylltiad â chostau y mae'r awdurdod cynllunio yn mynd iddynt wrth gymryd camau sy'n ofynnol gan yr hysbysiad,

i'w trin fel pe aed iddynt neu pe baent wedi eu talu at ddefnydd ac ar gais y person a gyflawnodd y gwaith y mae'r hysbysiad yn ymwneud ag ef.

- (5) Mae'r costau y gellir eu hadennill gan awdurdod cynllunio o dan is-adran (1), hyd nes iddynt gael eu hadennill, yn bridiant ar y tir y mae'r hysbysiad gorfodi yn ymwneud ag ef.
- (6) Mae'r pridiant yn cymryd effaith fel pridiant tir lleol ar ddechrau'r diwrnod ar ôl y diwrnod y mae'r awdurdod yn cwblhau'r cam y mae'r costau'n ymwneud ag ef.
- (7) Mae is-adran (8) yn gymwys pan –
  - (a) bo awdurdod cynllunio yn symud ymaith ddeunyddiau o dir yng nghwrs cymryd camau sy'n ofynnol gan hysbysiad gorfodi, a
  - (b) na fo perchennog y deunyddiau, o fewn 3 diwrnod ar ôl y diwrnod y cânt eu symud ymaith, yn hawlio'r deunyddiau ac yn mynd â hwy i ffwrdd.
- (8) O ran yr awdurdod cynllunio –
  - (a) caiff werthu'r deunyddiau, a
  - (b) os yw'n gwneud hynny, rhaid iddo dalu'r enillion i'r person a oedd yn berchen ar y deunyddiau, ar ôl didynnu unrhyw gostau y gall yr awdurdod eu hadennill oddi wrth y person.
- (9) Ni chaiff awdurdod cynllunio adennill costau o dan yr adran hon oddi wrth y Goron.

### 133 Y drosedd o fethu â chydymffurfio â hysbysiad gorfodi

- (1) Pan, ar unrhyw adeg ar ôl diwedd y cyfnod y mae hysbysiad gorfodi yn ei gwneud yn ofynnol i unrhyw gam gael ei gymryd ynddo, na fo'r cam wedi ei gymryd, mae person sydd ar y pryd yn berchennog ar yr adeilad rhestredig y mae'r hysbysiad yn ymwneud ag ef yn euog o drosedd.
- (2) Caniateir i berson gael ei gyhuddo o drosedd o dan yr adran hon drwy gyfeirio at ddiwrnod neu at gyfnod hwy, a chaniateir iddo gael ei euogfarnu o fwy nag un drosedd mewn perthynas â'r un hysbysiad gorfodi drwy gyfeirio at gyfnodau gwahanol.
- (3) Mewn achos yn erbyn person am drosedd o dan yr adran hon, mae'n amddiffyniad i'r person profi –
  - (a) iddo wneud popeth y gellid bod wedi disgwyl iddo ei wneud i sicrhau i'r camau a oedd yn ofynnol gan yr hysbysiad gael eu cymryd, neu
  - (b) na chyflwynwyd copi o'r hysbysiad gorfodi i'r person ac nad oedd yn ymwybodol o'i fodolaeth.
- (4) Mae person sy'n euog o drosedd o dan yr adran hon yn agored ar euogfarn ddiannod, neu ar euogfarn ar ddiad, i ddirwy.
- (5) Wrth benderfynu swm y ddirwy, rhaid i'r llys roi sylw yn benodol i unrhyw fudd ariannol sydd wedi cronni, neu yr ymddengys ei fod yn debygol o gronni, i'r person o ganlyniad i'r drosedd.

*Hysbysiadau gorfodi a ddyroddir gan Weinidogion Cymru***134 Pŵer Gweinidogion Cymru i ddyroddi hysbysiad gorfodi**

- (1) Caiff Gweinidogion Cymru ddyroddi hysbysiad gorfodi os ydynt yn ystyried –
  - (a) bod gwaith sy'n golygu torri adran 88 (gofyniad i waith gael ei awdurdodi) neu amod y rhoddwyd cydsyniad adeilad rhestredig yn ddarostyngedig iddo wedi cael ei gyflawni neu yn cael ei gyflawni mewn perthynas ag adeilad rhestredig, a
  - (b) ei bod yn briodol dyroddi'r hysbysiad, gan roi sylw i effaith y gwaith ar gymeriad yr adeilad fel adeilad o ddiddordeb pensaernïol neu hanesyddol arbennig.
- (2) Cyn dyroddi'r hysbysiad, rhaid i Weinidogion Cymru ymgynghori â'r awdurdod cynllunio y mae'r adeilad yn ei ardal.
- (3) Mae hysbysiad gorfodi a ddyroddir gan Weinidogion Cymru yn cael yr un effaith ag un a ddyroddir gan awdurdod cynllunio.
- (4) Mae adrannau 123 i 132 yn gymwys mewn perthynas â hysbysiad gorfodi a ddyroddir gan Weinidogion Cymru fel pe bai cyfeiriadau at awdurdod cynllunio yn gyfeiriadau at Weinidogion Cymru.

*Gwaharddebau***135 Gwaharddeb i atal gwaith anawdurdodedig neu fethiant i gydymffurfio ag amod mewn cydsyniad**

- (1) Caiff awdurdod cynllunio wneud cais i'r Uchel Lys neu'r llys sirol am waharddeb i atal –
  - (a) toriad gwirioneddol neu doriad disgwylidig o adran 88 (gofyniad i waith gael ei awdurdodi) mewn perthynas ag adeilad rhestredig yn ei ardal, neu
  - (b) methiant gwirioneddol neu fethiant disgwylidig i gydymffurfio ag amod mewn cydsyniad adeilad rhestredig ar gyfer gwaith i adeilad rhestredig yn ei ardal.
- (2) Caiff awdurdod wneud cais pa un a yw wedi arfer, neu'n cynnig arfer, unrhyw un neu ragor o'i bwerau eraill o dan y Rhan hon ai peidio.
- (3) Caiff y llys roi gwaharddeb ar unrhyw delerau y mae'n ystyried eu bod yn briodol at ddiben atal y toriad.
- (4) Caiff rheolau llys ddarparu i waharddeb gael ei dyroddi yn erbyn person nad yw'n hysbys pwy ydyw.
- (5) Ni chaniateir dyroddi gwaharddeb o dan yr adran hon yn erbyn y Goron.

**PENNOD 5****CAFFAEL A DIOGELU ADEILADAU O DDIDDORDEB ARBENNIG***Caffael drwy gytundeb adeiladau o ddiddordeb arbennig***136 Pŵer awdurdod cynllunio i gaffael adeilad drwy gytundeb**

- (1) Caiff awdurdod cynllunio gaffael drwy gytundeb –
  - (a) unrhyw adeilad sy'n gyfan gwbl neu'n bennaf yng Nghymru y mae'n ystyried ei fod o ddiddordeb pensaernïol neu hanesyddol arbennig, a
  - (b) unrhyw dir y mae'r amodau yn is-adran (2) wedi eu bodloni mewn cysylltiad ag ef.

- (2) Yr amodau yw –
- (a) bod y tir yn cynnwys yr adeilad, yn cydffinio ag ef neu'n gyfagos iddo, a
  - (b) bod yr awdurdod cynllunio yn ystyried bod angen y tir –
    - (i) ar gyfer diogelu'r adeilad neu ei amwynderau,
    - (ii) ar gyfer darparu neu hwyluso mynediad iddo, neu
    - (iii) ar gyfer ei reolaethu'n briodol neu ei reoli'n briodol.
- (3) Mae Rhan 1 o Ddeddf Prynu Gorfodol 1965 (p. 56) yn gymwys (i'r graddau y mae'n berthnasol) i gaffaeliad o dan yr adran hon, ac eithrio adrannau 4 i 8, adran 10 ac adran 31 o'r Ddeddf honno.
- (4) Mae cyfeiriadau yn y Rhan honno at "the execution of the works" i'w darllen mewn perthynas â chaffaeliad o dan yr adran hon fel pe baent yn cynnwys cyflawni gwaith adeiladu neu waith cynnal a chadw sydd wedi ei awdurdodi gan adran 203 o Ddeddf Tai a Chynllunio 2016 (p. 22) (pŵer i drechu hawddfreintiau a hawliau eraill).

*Caffael yn orfodol adeiladau rhestredig y mae angen eu hatgyweirio*

### 137 Pwerau i gaffael adeilad rhestredig yn orfodol at ddiben ei ddiogelu

- (1) Mae'r adran hon yn gymwys os yw Gweinidogion Cymru –
- (a) yn ystyried nad yw camau rhesymol yn cael eu cymryd ar gyfer diogelu adeilad rhestredig yn briodol, a
  - (b) wedi eu bodloni bod achos cymhellol er budd y cyhoedd i'r adeilad gael ei gaffael yn orfodol at ddiben ei ddiogelu.
- (2) Caiff Gweinidogion Cymru –
- (a) awdurdodi'r awdurdod cynllunio y mae'r adeilad rhestredig yn ei ardal i gaffael yn orfodol yr adeilad ac unrhyw dir y mae'r amodau yn is-adran (3) wedi eu bodloni mewn cysylltiad ag ef, neu
  - (b) caffael yr adeilad a'r tir eu hunain yn orfodol.
- (3) Yr amodau yw –
- (a) bod y tir yn cynnwys yr adeilad, yn cydffinio ag ef neu'n gyfagos iddo, a
  - (b) bod Gweinidogion Cymru yn ystyried bod angen y tir –
    - (i) ar gyfer diogelu'r adeilad neu ei amwynderau,
    - (ii) ar gyfer darparu neu hwyluso mynediad iddo, neu
    - (iii) ar gyfer ei reolaethu'n briodol neu ei reoli'n briodol.
- (4) Nid yw'r adran hon yn caniatáu caffael –
- (a) adeilad sy'n heneb gofrestrdedig (ond gweler adran 43), neu
  - (b) adeilad crefyddol esempt.
- (5) Nid yw'r adran hon yn caniatáu caffael buddiant yn nhir y Goron oni bai –
- (a) bod y buddiant yn cael ei ddal ac eithrio gan neu ar ran y Goron, a
  - (b) bod awdurdod priodol y Goron yn cytuno i'r caffaeliad.
- (6) Mae Deddf Caffael Tir 1981 (p. 67) yn gymwys i gaffaeliad o dan yr adran hon.



- (7) Yn y Bennod hon ystyr “awdurdod caffael” yw –
- (a) yn achos caffaeliad neu gaffaeliad arfaethedig o dan is-adran (2)(a), yr awdurdod cynllunio sy’n caffael neu’n cynnig caffael yr adeilad rhestredig neu’r tir;
  - (b) yn achos caffaeliad neu gaffaeliad arfaethedig o dan is-adran (2)(b), Gweinidogion Cymru.

### 138 Gofyniad i gyflwyno hysbysiad atgyweirio cyn dechrau caffael yn orfodol

- (1) Ni chaiff awdurdod caffael ddechrau caffael adeilad rhestredig yn orfodol o dan adran 137 oni bai –
- (a) bod yr awdurdod wedi cyflwyno hysbysiad atgyweirio i bob perchennog ar yr adeilad,
  - (b) bod y 2 fis sy’n dechrau â’r diwrnod y cyflwynwyd yr hysbysiad atgyweirio wedi dod i ben, ac
  - (c) nad yw’r hysbysiad atgyweirio wedi ei dynnu’n ôl.
- (2) Mae hysbysiad atgyweirio yn hysbysiad –
- (a) sy’n pennu’r gwaith y mae’r awdurdod yn ystyried ei fod yn rhesymol angenrheidiol ar gyfer diogelu’r adeilad rhestredig yn briodol, a
  - (b) sy’n esbonio effaith adrannau 137 i 141 o’r Ddeddf hon ac adran 49 o Ddeddf Cynllunio (Adeiladau Rhestredig ac Ardaloedd Cadwraeth) 1990 (p. 9) (rhagdybiaeth ynghylch cydsyniad adeilad rhestredig wrth asesu digollediad am gaffaeliad gorfodol).
- (3) Os –
- (a) yw adeilad rhestredig yn cael ei ddymchwel ar ôl cyflwyno hysbysiad atgyweirio mewn cysylltiad ag ef, ond
  - (b) bod Gweinidogion Cymru wedi eu bodloni y byddent wedi cadarnhau neu wedi gwneud gorchymyn prynu gorfodol mewn cysylltiad â’r adeilad pe na bai wedi cael ei ddymchwel,

nid yw dymchwel yr adeilad yn atal caffael safle’r adeilad yn orfodol o dan adran 137.

- (4) Caiff awdurdod caffael ar unrhyw adeg dynnu’n ôl hysbysiad atgyweirio y mae wedi ei gyflwyno i unrhyw berson; ac os yw’n gwneud hynny, rhaid iddo roi hysbysiad i’r person ar unwaith ei fod wedi ei dynnu’n ôl.
- (5) At ddibenion is-adran (1) mae awdurdod caffael yn dechrau caffaeliad gorfodol pan fydd yn cyflwyno’r hysbysiad sy’n ofynnol gan adran 12 o Ddeddf Caffael Tir 1981 (p. 67) neu baragraff 3(1) o Atodlen 1 i’r Ddeddf honno.

### 139 Cais i stopio caffaeliad gorfodol

- (1) Mae’r adran hon yn gymwys pan fo gorchymyn prynu gorfodol ar gyfer caffael adeilad rhestredig o dan adran 137 yn cael ei wneud gan awdurdod cynllunio neu’n cael ei lunio ar ffurf ddrafft gan Weinidogion Cymru.
- (2) Caiff unrhyw berson a chanddo fuddiant yn yr adeilad rhestredig wneud cais i lys ynadon am orchymyn na chaniateir cymryd unrhyw gamau pellach mewn perthynas â’r gorchymyn prynu gorfodol.

- (3) Rhaid i'r cais gael ei wneud o fewn 28 o ddiwrnodau ar ôl y diwrnod y cyflwynir yr hysbysiad sy'n ofynnol gan adran 12 o Ddeddf Caffael Tir 1981 (p. 67) neu baragraff 3(1) o Atodlen 1 i'r Ddeddf honno.
- (4) Os yw'r llys ynadon wedi ei fodloni bod camau rhesymol wedi eu cymryd ar gyfer diogelu'r adeilad rhestredig yn briodol, rhaid iddo wneud y gorchymyn y gwnaed cais amdano.
- (5) Caiff unrhyw berson a dramgwyddir gan benderfyniad y llys ynadon ar y cais apelio yn erbyn y penderfyniad i Lys y Goron.

**140 Cyfarwyddyd ar gyfer digollediad isafol pan ganiatawyd i adeilad fynd i gyflwr gwael yn fwriadol**

- (1) Caiff gorchymyn prynu gorfodol ar gyfer caffael adeilad rhestredig o dan adran 137 gynnwys cyfarwyddyd ar gyfer digollediad isafol os yw'r awdurdod caffael wedi ei fodloni y caniatawyd i'r adeilad fynd i gyflwr gwael yn fwriadol at ddiben cyfiawnhau ei ddymchwel a datblygu'r safle neu unrhyw safle cydffiniol.
- (2) Mae cyfarwyddyd ar gyfer digollediad isafol yn gyfarwyddyd, wrth asesu digollediad am gaffael yr adeilad rhestredig yn orfodol, ei bod i'w thybio—
  - (a) na fyddai caniatâd cynllunio yn cael ei roi ar gyfer unrhyw ddatblygiad o safle'r adeilad, a
  - (b) na fyddai cydsyniad adeilad rhestredig yn cael ei roi ar gyfer unrhyw waith ar gyfer dymchwel, addasu neu estyn yr adeilad ac eithrio gwaith sy'n angenrheidiol i'w adfer i gyflwr priodol ac i'w gynnal mewn cyflwr priodol.
- (3) Pan fo cyfarwyddyd ar gyfer digollediad isafol wedi ei gynnwys mewn gorchymyn a wnaed gan awdurdod cynllunio neu a luniwyd ar ffurf ddrafft gan Weinidogion Cymru, rhaid i'r datganiad o effaith y gorchymyn yn yr hysbysiad sy'n ofynnol gan adran 12 o Ddeddf Caffael Tir 1981 (p. 67) neu baragraff 3(1) o Atodlen 1 i'r Ddeddf honno—
  - (a) cynnwys datganiad bod y cyfarwyddyd wedi ei gynnwys, a
  - (b) esbonio effaith y cyfarwyddyd.
- (4) Os yw Gweinidogion Cymru yn cadarnhau neu'n gwneud gorchymyn prynu gorfodol sy'n cynnwys cyfarwyddyd ar gyfer digollediad isafol, mae'r digollediad am y caffaeliad gorfodol i'w asesu yn unol â'r cyfarwyddyd, er gwaethaf unrhyw beth i'r gwrthwyneb yn—
  - (a) Deddf Digollediad Tir 1961 (p. 33),
  - (b) Deddf Cynllunio Gwlad a Thref 1990 (p. 8),
  - (c) adran 49 o Ddeddf Cynllunio (Adeiladau Rhestredig ac Ardaloedd Cadwraeth) 1990 (p. 9), neu
  - (d) y Ddeddf hon.

**141 Cais i ddileu cyfarwyddyd ar gyfer digollediad isafol**

- (1) Mae'r adran hon yn gymwys pan fo cyfarwyddyd ar gyfer digollediad isafol wedi ei gynnwys mewn gorchymyn prynu gorfodol ar gyfer caffael adeilad rhestredig o dan adran 137 a wnaed gan awdurdod cynllunio neu a luniwyd ar ffurf ddrafft gan Weinidogion Cymru.

- (2) Caiff unrhyw berson a chanddo fuddiant yn yr adeilad rhestredig wneud cais i lys ynadon am orchymyn nad yw cyfarwyddyd ar gyfer digollediad isafol i'w gynnwys yn y gorchymyn prynu gorfodol fel y'i cadarnheir neu y'i gwneir gan Weinidogion Cymru.
- (3) Rhaid i'r cais gael ei wneud o fewn 28 o ddiwrnodau ar ôl y diwrnod y cyflwynir yr hysbysiad sy'n ofynnol gan adran 12 o Ddeddf Caffael Tir 1981 (p. 67) neu baragraff 3(1) o Atodlen 1 i'r Ddeddf honno.
- (4) Os yw'r llys ynadon wedi ei fodloni na chaniatawyd i'r adeilad rhestredig fynd i gyflwr gwael yn fwriadol at y diben a grybwyllir yn adran 140(1), rhaid iddo wneud y gorchymyn y gwnaed cais amdano.
- (5) Caiff unrhyw berson a dramgwyddir gan benderfyniad y llys ynadon ar y cais apelio yn erbyn y penderfyniad i Lys y Goron.
- (6) Mae'r hawliau a roddir gan yr adran hon yn ychwanegol at yr hawliau a roddir gan adran 139 ac nid ydynt yn cyfyngu arnynt.

#### 142 **Dod â hawliau dros dir a gaffaelwyd yn orfodol i ben**

- (1) Wrth gwblhau caffaeliad gorfodol o dir o dan adran 137 –
  - (a) mae'r holl hawliau tramwy preifat dros y tir wedi eu diddymu,
  - (b) mae'r holl hawliau i osod cyfarpar, ei gadw neu ei gynnal a'i gadw ar y tir, odano neu drosto wedi eu diddymu, ac
  - (c) mae gan yr awdurdod caffael hawlogaeth i unrhyw gyfarpar ar y tir, odano neu drosto.
- (2) Nid yw is-adran (1) yn gymwys –
  - (a) i unrhyw hawl y mae gan ymgymwrwr statudol hawlogaeth iddi, nac i gyfarpar sy'n perthyn i ymgymwrwr statudol, at ddiben cynnal ei ymgymeriad,
  - (b) i unrhyw hawl a roddir gan y cod cyfathrebu electronig neu yn unol â'r cod hwnnw i weithredwr rhwydwaith cod cyfathrebu electronig, nac i unrhyw gyfarpar cyfathrebu electronig sydd wedi ei osod at ddibenion rhwydwaith o'r fath, nac
  - (c) i unrhyw hawl nac i unrhyw gyfarpar a bennir gan yr awdurdod caffael mewn cyfarwyddyd a roddir cyn cwblhau'r caffaeliad.
- (3) Mae is-adran (1) hefyd yn ddarostyngedig i unrhyw gytundeb (pa un a yw wedi ei wneud cyn neu ar ôl cwblhau'r caffaeliad) rhwng yr awdurdod caffael a'r person sydd â hawlogaeth i'r hawl neu y mae'r cyfarpar yn perthyn iddo.
- (4) Mae gan unrhyw berson sy'n dioddef colled drwy ddiddymu hawl neu drosglwyddo cyfarpar o dan yr adran hon hawlogaeth i gael ei ddigolledu gan yr awdurdod caffael.
- (5) Mae digollediad o dan yr adran hon i'w benderfynu yn unol â Deddf Digollediad Tir 1961 (p. 33).
- (6) Yn is-adran (2)(b) –
 

ystyr "cod cyfathrebu electronig" ("*electronic communications code*") yw'r cod a nodir yn Atodlen 3A i Ddeddf Cyfathrebiadau 2003 (p. 21);

mae i “cyfarpar cyfathrebu electronig”, “gweithredwr” a “rhwydwaith cod cyfathrebu electronig” yr un ystyron ag a roddir i “electronic communications apparatus”, “operator” ac “electronic communications code network” gan baragraff 1(1) o Atodlen 17 i Ddeddf Cyfathrebiadau 2003.

*Rheoli, defnyddio a gwaredu adeiladau*

**143 Rheoli, defnyddio a gwaredu adeilad a gaffaelir o dan y Bennod hon**

- (1) Pan fo awdurdod cynllunio yn caffael adeilad neu dir arall o dan y Bennod hon, caiff wneud unrhyw drefniadau ar gyfer rheoli, defnyddio neu waredu'r adeilad neu'r tir y mae'n ystyried eu bod yn briodol at ddiben diogelu'r adeilad neu'r tir.
- (2) Am ddarpariaeth bellach ynghylch y defnydd o dir y mae awdurdod cynllunio yn ei gaffael drwy gytundeb o dan adran 136, gweler adrannau 232, 233 a 235 (neilltuo, gwaredu a datblygu), 242 (trechu hawliau i feddiannu) a 243 (cyd-gorff i ddal tir) o Ddeddf Cynllunio Gwlad a Thref 1990 (p. 8).
- (3) Pan fo Gweinidogion Cymru yn caffael adeilad neu dir arall o dan adran 137, cânt –
  - (a) gwneud unrhyw drefniadau y maent yn ystyried eu bod yn briodol ar gyfer rheoli'r adeilad neu'r tir, gwarchodaeth ohono neu'r defnydd ohono, a
  - (b) gwaredu'r adeilad neu'r tir, neu ymdrin â'r adeilad neu'r tir mewn unrhyw ffordd arall.
- (4) Am ddarpariaeth sy'n dileu cyfyngiadau ar y defnydd o fathau penodol o dir a gaffaelir o dan y Bennod hon, gweler adrannau 238 i 240 (tir cysegredig a chladdfeydd) a 241 (tiroedd comin, manau agored a rhandiroedd tanwydd neu ardd gae) o Ddeddf Cynllunio Gwlad a Thref 1990.

*Diogelu adeiladau rhestredig ar frys*

**144 Gwaith brys i ddiogelu adeilad rhestredig**

- (1) Caiff awdurdod lleol gyflawni unrhyw waith y mae'n ystyried ei fod yn angenrheidiol ar frys ar gyfer diogelu adeilad rhestredig yn ei ardal.
- (2) Caiff Gweinidogion Cymru gyflawni unrhyw waith y maent yn ystyried ei fod yn angenrheidiol ar frys ar gyfer diogelu unrhyw adeilad rhestredig.
- (3) Mae'r gwaith y caniateir ei gyflawni o dan yr adran hon yn cynnwys gwaith i ategu neu gysgodî'r adeilad rhestredig dros dro.
- (4) Os yw'r adeilad rhestredig neu unrhyw ran ohono yn cael ei ddefnyddio at ddiben preswyl, dim ond os na fyddai'n ymyrryd yn afresymol â'r defnydd hwnnw y caniateir cyflawni gwaith o dan yr adran hon.
- (5) Rhaid rhoi o leiaf 7 niwrnod clir o rybudd ysgrifenedig o'r bwriad i gyflawni gwaith o dan yr adran hon –
  - (a) i bob perchennog ar yr adeilad rhestredig, a
  - (b) os yw'r adeilad neu unrhyw ran ohono yn cael ei ddefnyddio at ddiben preswyl, i bob meddiannydd ar yr adeilad.
- (6) Rhaid i'r rhybudd ddisgrifio'r gwaith y cynigir ei gyflawni.
- (7) Ni chaniateir cyflawni gwaith o dan yr adran hon mewn perthynas –

- (a) ag adeilad sy'n heneb gofrestredig (ond gweler adran 61),
- (b) ag adeilad crefyddol esempt, neu
- (c) ag adeilad rhestredig ar dir y Goron.

**145 Pŵer i'w gwneud yn ofynnol i berchennog dalu costau gwaith diogelu**

- (1) Pan fo gwaith ar gyfer diogelu adeilad rhestredig wedi ei gyflawni gan awdurdod lleol neu Weinidogion Cymru o dan adran 144, caiff yr awdurdod lleol neu (yn ôl y digwydd) Weinidogion Cymru gyflwyno hysbysiad i unrhyw berchennog ar yr adeilad rhestredig sy'n ei gwneud yn ofynnol i'r perchennog dalu costau'r gwaith.
- (2) Pan fo'r gwaith yn waith i ategu neu gysgodi'r adeilad rhestredig dros dro neu'n cynnwys gwaith o'r fath—
  - (a) mae'r costau y caniateir eu hadennill yn cynnwys unrhyw wariant parhaus sy'n ymwneud â rhoi ar gael y cyfarpar neu'r deunyddiau a ddefnyddir, a
  - (b) caniateir rhoi hysbysiadau o dan is-adran (1) o bryd i'w gilydd mewn cysylltiad â'r gwariant parhaus hwnnw.
- (3) Mae is-adran (4) yn gymwys os yw'r perchennog, o fewn 28 o ddiwrnodau ar ôl y diwrnod y cyflwynir hysbysiad o dan is-adran (1), yn cwyno'n ysgrifenedig i Weinidogion Cymru—
  - (a) bod rhywfaint neu'r cyfan o'r gwaith yn ddiangen ar gyfer diogelu'r adeilad rhestredig,
  - (b) yn achos gwaith i ategu neu gysgodi adeilad rhestredig dros dro, fod y trefniadau dros dro wedi parhau am gyfnod afresymol o amser,
  - (c) bod y swm a bennir yn yr hysbysiad yn afresymol, neu
  - (d) y byddai adennill y swm hwnnw yn achosi caledi i'r perchennog.
- (4) Rhaid i Weinidogion Cymru—
  - (a) penderfynu i ba raddau y mae sail dda i gŵyn y perchennog, a
  - (b) cyflwyno hysbysiad o'u penderfyniad—
    - (i) i'r perchennog, a
    - (ii) os rhoddwyd yr hysbysiad o dan is-adran (1) gan awdurdod lleol, i'r awdurdod hwnnw.
- (5) Rhaid i'r hysbysiad o benderfyniad Gweinidogion Cymru ddatgan—
  - (a) y rhesymau dros y penderfyniad, a
  - (b) y swm y maent wedi penderfynu y caniateir iddo gael ei adennill.
- (6) Caiff perchennog neu awdurdod lleol y cyflwynir hysbysiad iddo o dan is-adran (4)(b), o fewn 28 o ddiwrnodau ar ôl y diwrnod y cyflwynir yr hysbysiad, apelio i'r llys sirol yn erbyn penderfyniad Gweinidogion Cymru.

**146 Darpariaeth bellach ynghylch adennill costau gwaith diogelu**

- (1) Mae'r costau y caiff awdurdod lleol neu Weinidogion Cymru eu hadennill o dan adran 145 yn dwyn llog, ar y gyfradd a bennir mewn rheoliadau a wneir gan Weinidogion Cymru, o'r adeg y daw'r hysbysiad o dan is-adran (1) o'r adran honno yn weithredol hyd nes y caiff yr holl symiau sy'n ddyledus o dan yr adran honno eu hadennill.

- (2) Mae'r costau ac unrhyw log yn adenilladwy gan yr awdurdod lleol neu (yn ôl y digwydd) Weinidogion Cymru fel dyled.
- (3) Mae'r costau ac unrhyw log, o'r adeg pan ddaw'r hysbysiad o dan adran 145(1) yn weithredol hyd nes iddynt gael eu hadennill, yn bridiant ar y tir y mae'r adeilad rhestredig o dan sylw arno.
- (4) Mae'r pridiant yn cymryd effaith, ar yr adeg y daw'r hysbysiad yn weithredol, fel pridiant cyfreithiol sy'n bridiant tir lleol.
- (5) At ddiben gorfodi'r pridiant, mae gan yr awdurdod lleol neu (yn ôl y digwydd) Weinidogion Cymru yr un pwerau a rhwymedïau o dan Ddeddf Cyfraith Eiddo 1925 (p. 20) ac fel arall fel pe bai neu pe baent yn forgeisai drwy weithred sydd â phwerau i werthu'r tir, gwneud lesoedd, derbyn ildio lesoedd a phenodi derbynnydd.
- (6) Mae'r pŵer i benodi derbynnydd yn arferadwy ar unrhyw adeg ar ôl diwedd 1 mis yn dechrau â'r diwrnod y mae'r pridiant yn cymryd effaith.
- (7) At ddibenion yr adran hon mae hysbysiad o dan adran 145(1) yn dod yn weithredol –
  - (a) pan na fo unrhyw gŵyn wedi ei gwneud i Weinidogion Cymru o fewn y cyfnod y cyfeirir ato yn adran 145(3), ar ddiwedd y cyfnod hwnnw;
  - (b) pan fo cwyn wedi ei gwneud ond na wneir apêl i'r llys sirol o fewn y cyfnod y cyfeirir ato yn adran 145(6), ar ddiwedd y cyfnod hwnnw;
  - (c) pan fo apêl wedi ei gwneud a bod y penderfyniad ar yr apêl yn cadarnhau penderfyniad Gweinidogion Cymru o dan adran 145(4) (gydag amrywiad neu heb amrywiad), ar adeg y penderfyniad;
  - (d) pan fo apêl wedi ei gwneud ond ei bod yn cael ei thynnu'n ôl, ar adeg y tynnu'n ôl.

*Darpariaeth bellach ynghylch diogelu adeiladau rhestredig*

**147 Camau ar gyfer diogelu adeiladau rhestredig sydd mewn cyflwr gwael**

- (1) Caiff Gweinidogion Cymru drwy reoliadau wneud darpariaeth ar gyfer rhoi pwerau i awdurdodau lleol neu Weinidogion Cymru i gymryd camau i sicrhau bod adeiladau rhestredig sydd wedi mynd i gyflwr gwael yn cael eu diogelu'n briodol, ac mewn cysylltiad â rhoi'r pwerau hynny.
- (2) Caiff y rheoliadau, yn benodol, ddarparu ar gyfer –
  - (a) hysbysiadau sy'n ei gwneud yn ofynnol i berchnogion adeiladau rhestredig sydd wedi mynd i gyflwr gwael gyflawni gwaith i sicrhau eu bod yn cael eu diogelu'n briodol ("hysbysiadau diogelu");
  - (b) apelau yn erbyn hysbysiadau diogelu;
  - (c) troseddau am fethu â chydymffurfio â hysbysiadau diogelu.
- (3) Caiff rheoliadau o dan yr adran hon –
  - (a) datgymhwyso, neu gymhwyso neu atgynhyrchu gydag addasiadau neu hebddynt, unrhyw ddarpariaeth yn y Rhan hon neu Ran 5 neu 7;
  - (b) diwygio'r Rhan hon neu'r Rhannau hynny.
- (4) Ni chaiff rheoliadau o dan yr adran hon wneud unrhyw ddarpariaeth sy'n rhwymo'r Goron.



*Cyllid ar gyfer atgyweirio a chynnal a chadw adeiladau o ddiddordeb arbennig etc.*

**148 Grant neu fenthyciad gan awdurdod lleol ar gyfer atgyweirio neu gynnal a chadw adeilad**

- (1) Caiff awdurdod lleol perthnasol gyfrannu tuag at unrhyw wariant yr aed iddo, neu yr eir iddo, wrth atgyweirio neu gynnal a chadw –
  - (a) adeilad rhestredig sydd yn ardal yr awdurdod neu yn ei chyffiniau, neu
  - (b) adeilad yn ardal yr awdurdod nad yw'n adeilad rhestredig ond y mae'r awdurdod yn ystyried ei fod o ddiddordeb pensaernïol neu hanesyddol arbennig.
- (2) Ar yr un pryd â gwneud cyfraniad o'r fath, caiff yr awdurdod hefyd gyfrannu tuag at unrhyw wariant yr aed iddo, neu yr eir iddo, wrth gynnal a chadw unrhyw ardd –
  - (a) sy'n cael ei meddiannu gyda'r adeilad, a
  - (b) sy'n cydffinio ag ef neu'n gyfagos iddo.
- (3) Caniateir i gyfraniad o dan yr adran hon gael ei wneud drwy grant neu fenthyciad.
- (4) Caiff awdurdod lleol perthnasol roi benthyciad o dan yr adran hon ar unrhyw delerau ac unrhyw amodau y mae'n penderfynu arnynt, a all er enghraifft gynnwys teler bod y benthyciad yn ddi-log.
- (5) Caiff awdurdod lleol perthnasol –
  - (a) ildio ei hawl i gael ad-daliad o fenthyciad neu unrhyw log sy'n weddill, a
  - (b) cytuno â'r benthyciwr i amrywio unrhyw un neu ragor o delerau ac amodau benthyciad.
- (6) Caiff awdurdod lleol perthnasol roi grant o dan yr adran hon yn ddarostyngedig i unrhyw amodau y mae'n ystyried eu bod yn briodol, a all er enghraifft gynnwys amod bod rhaid i dderbynydd y grant wneud cytundeb â'r awdurdod at ddiben sicrhau mynediad y cyhoedd i'r cyfan neu ran o'r adeilad neu'r ardd y mae'r grant yn ymwneud ag ef neu â hi.
- (7) Yn yr adran hon ac yn adran 149, ystyr "awdurdod lleol perthnasol" yw –
  - (a) cyngor sir neu gyngor bwrdeistref sirol yng Nghymru;
  - (b) awdurdod Parc Cenedlaethol yng Nghymru;
  - (c) bwrdd cydgynllunio a gyfansoddir o dan adran 2(1B) o Ddeddf Cynllunio Gwlad a Thref 1990 (p. 8).

**149 Adennill grant a roddir gan awdurdod lleol**

- (1) Mae'r adran hon yn gymwys pan fo awdurdod lleol perthnasol yn rhoi grant o dan adran 148.
- (2) Os na chydymffurfir ag unrhyw un neu ragor o amodau a osodir wrth roi'r grant, caiff yr awdurdod adennill swm y grant, neu unrhyw ran o'r swm hwnnw, oddi wrth dderbynydd y grant.
- (3) Mae is-adrannau (4) a (5) yn gymwys os, yn ystod y 3 blynedd sy'n dechrau â'r diwrnod y rhoddir y grant –

- (a) gwaredir y cyfan neu ran o'r buddiant yr oedd derbynnydd y grant yn ei ddal neu ei dal yn yr adeilad neu'r ardd y mae'r grant yn ymwneud ag ef neu â hi ar y diwrnod y rhoddwyd y grant ("y buddiant perthnasol"), a
  - (b) gwneir y gwarediad drwy werthu, drwy gyfnewid neu drwy les am gyfnod o 21 o flynyddoedd o leiaf.
- (4) Os gwneir y gwarediad gan dderbynnydd y grant neu gan berson y mae derbynnydd y grant wedi rhoi rhan o'r buddiant perthnasol iddo, caiff yr awdurdod lleol perthnasol adennill swm y grant, neu unrhyw ran o'r swm hwnnw, oddi wrth dderbynnydd y grant.
- (5) Os gwneir y gwarediad gan berson y mae derbynnydd y grant wedi rhoi'r cyfan o'r buddiant perthnasol iddo, caiff yr awdurdod adennill swm y grant, neu unrhyw ran o'r swm hwnnw, oddi wrth y person y rhoddwyd y rhodd iddo.
- (6) Ni chaiff awdurdod lleol perthnasol adennill symiau o dan yr adran hon sydd, gyda'i gilydd, yn fwy na swm y grant.
- (7) Yn yr adran hon mae cyfeiriadau at roi buddiant i berson yn gyfeiriadau at ei roi i'r person yn uniongyrchol neu'n anuniongyrchol, ac eithrio ar farwolaeth deiliad y buddiant.

**150 Grant gan Weinidogion Cymru ar gyfer atgyweirio neu gynnal a chadw adeilad, gardd etc.**

- (1) Caiff Gweinidogion Cymru roi grantiau i dalu unrhyw wariant yr aed iddo, neu yr eir iddo, wrth—
- (a) atgyweirio neu gynnal a chadw adeilad y maent yn ystyried ei fod o ddiddordeb pensaernïol neu hanesyddol arbennig,
  - (b) cynnal a chadw unrhyw dir sy'n cynnwys adeilad o'r fath, yn cydffinio ag ef neu'n gyfagos iddo,
  - (c) atgyweirio neu gynnal a chadw unrhyw wrthrychau a gedwir fel arfer mewn adeilad o'r fath, neu
  - (d) cynnal a chadw gardd neu dir arall y maent yn ystyried ei bod neu ei fod o ddiddordeb hanesyddol arbennig.
- (2) Mae'r darpariaethau a ganlyn yn yr adran hon yn gymwys—
- (a) pan fo Gweinidogion Cymru yn rhoi grant o dan is-adran (1) ar delerau sy'n darparu y gellir ei adennill o dan yr adran hon, a
  - (b) pan fo Gweinidogion Cymru, cyn neu wrth roi'r grant, yn rhoi hysbysiad ysgrifenedig i dderbynnydd y grant sydd—
    - (i) yn crynhoi effaith yr adran hon, a
    - (ii) yn pennu cyfnod, sy'n dechrau â'r diwrnod y rhoddir y grant ac sy'n dod i ben heb fod yn fwy na 10 mlynedd ar ôl y diwrnod hwnnw, y caniateir adennill y grant ynddo yn unol ag is-adrannau (4) i (6) ("y cyfnod adennill").
- (3) Os na chydymffurfir ag unrhyw un neu ragor o amodau a osodir wrth roi'r grant, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth dderbynnydd y grant.
- (4) Mae is-adrannau (5) a (6) yn gymwys os, yn ystod y cyfnod adennill—

- (a) caiff y cyfan neu ran o'r buddiant yr oedd derbynydd y grant yn ei ddal, ar y diwrnod y rhoddwyd y grant, yn yr adeilad, y tir neu'r gwrthrychau ("y buddiant perthnasol") y mae'r grant yn ymwneud ag ef neu â hwy ei waredu neu ei gwaredu, a
  - (b) gwneir y gwarediad drwy werthu, drwy gyfnewid neu drwy les am gyfnod o 21 o flynyddoedd o leiaf.
- (5) Os gwneir y gwarediad gan dderbynydd y grant neu gan berson y mae derbynydd y grant wedi rhoi rhan o'r buddiant perthnasol iddo, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth dderbynydd y grant.
- (6) Os gwneir y gwarediad gan berson y mae derbynydd y grant wedi rhoi'r cyfan o'r buddiant perthnasol iddo, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth y person y rhoddwyd y rhodd iddo.
- (7) Ni chaiff Gweinidogion Cymru adennill symiau o dan yr adran hon sydd, gyda'i gilydd, yn fwy na swm y grant.
- (8) Yn yr adran hon mae cyfeiriadau at roi buddiant i berson yn gyfeiriadau at ei roi i'r person yn uniongyrchol neu'n anuniongyrchol, ac eithrio ar farwolaeth deiliad y buddiant.

#### 151 Gweinidogion Cymru yn derbyn gwaddol ar gyfer cynnal adeilad

- (1) Mae'r adran hon yn gymwys –
- (a) pan fo offeryn yn cynnwys darpariaeth sy'n ymhonni ei bod yn rhodd eiddo o unrhyw fath i Weinidogion Cymru ar ymddiriedolaeth i ddefnyddio incwm yr eiddo (naill ai am gyfnod cyfyngedig neu am gyfnod amhenodol) ar gyfer neu tuag at atgyweirio a chynnal a chadw adeilad perthnasol, neu adeilad perthnasol ynghyd ag eiddo arall,
  - (b) pan na fo'r ddarpariaeth yn creu ymddiriedolaeth elusennol, ac
  - (c) pan fo Gweinidogion Cymru yn derbyn y rhodd.
- (2) Yn yr adran hon –
- ystyr "adeilad perthnasol" (*"relevant building"*) yw –
- (a) adeilad y mae Gweinidogion Cymru yn ystyried ei fod o ddiddordeb pensaernïol neu hanesyddol arbennig ac –
    - (i) ar yr adeg y daw'r offeryn ymddiriedolaeth i rym, y mae ganddynt hawlogaeth i fuddiant ynddo, neu y bydd ganddynt hawlogaeth i fuddiant ynddo yn fuan, neu
    - (ii) sydd, ar yr adeg honno, o dan eu rheolaeth neu'n cael ei reoli ganddynt neu a fydd o dan eu rheolaeth neu'n cael ei reoli ganddynt yn fuan, neu
  - (b) adeilad sydd, ar yr adeg honno, o dan eu gwarcheidiaeth o dan Bennod 6 o Ran 2 neu a fydd o dan eu gwarcheidiaeth felly yn fuan;
- ystyr "cronfa'r ymddiriedolaeth" (*"trust fund"*) yw'r eiddo a roddir i Weinidogion Cymru ac unrhyw eiddo sydd am y tro yn cynrychioli'r eiddo hwnnw;
- ystyr "ymddiriedolaeth waddol" (*"endowment trust"*) yw'r ymddiriedolaeth y cyfeirir ati yn is-adran (1)(a).

- (3) Nid effeithir ar ddilysrwydd y rhodd na dilysrwydd yr ymddiriedolaeth waddol gan unrhyw reol gyfreithiol neu unrhyw reol ecwiti na fyddai wedi effeithio ar eu dilysrwydd pe bai'r ymddiriedolaeth wedi bod yn un elusennol ac mae eu dilysrwydd i'w drin fel pe na bai unrhyw reol gyfreithiol o'r fath neu unrhyw reol ecwiti o'r fath erioed wedi effeithio arno.
- (4) Tra bo'r ymddiriedolaeth waddol yn parhau, mae gan Weinidogion Cymru yr un pwerau o ran rheoli, gwaredu a buddsoddi mewn perthynas â chronfa'r ymddiriedolaeth ag a roddir gan y gyfraith i ymddiriedolwyr tir mewn perthynas â'r tir a'r enillion o'i werthu.
- (5) Mae'r pwerau a roddir gan is-adran (4) yn ychwanegol at unrhyw bwerau a roddir i Weinidogion Cymru gan yr offeryn ymddiriedolaeth ac nid ydynt yn cyfyngu arnynt.
- (6) Tra bo'r ymddiriedolaeth waddol yn parhau, os bydd digwyddiad –
  - (a) sy'n cael, ar unwaith, yr effaith nad oes gan Weinidogion Cymru hawlogaeth i unrhyw fuddiant yn yr adeilad y mae'r ymddiriedolaeth yn ymwneud ag ef ac nad oes ganddynt yr adeilad o dan eu rheolaeth neu nad yw'r adeilad yn cael ei reoli ganddynt, a
  - (b) na fyddai fel arall yn peri i'r ymddiriedolaeth waddol ddod i ben neu gael ei thrin fel pe bai wedi methu,

pan ddaw'r digwyddiad hwnnw i fod, mae'r ymddiriedolaeth waddol yn dod i ben ac mae cronfa'r ymddiriedolaeth yn pasio fel y byddai pe bai'r ymddiriedolaeth yn methu.

- (7) Mae is-adran (8) yn gymwys os yw'r offeryn ymddiriedolaeth yn cynnwys darpariaeth sy'n ymhomni ei bod yn rhoi cronfa'r ymddiriedolaeth, neu'n cyfarwyddo i gronfa'r ymddiriedolaeth gael ei dal, ar ymddiriedolaeth at ddibenion elusennol os yw'r ymddiriedolaeth waddol yn methu neu'n dod i ben.
- (8) Nid effeithir ar ddilysrwydd y rhodd na dilysrwydd y cyfarwyddyd gan unrhyw reol gyfreithiol sy'n ymwneud â bytholbarhadau neu unrhyw reol ecwiti sy'n ymwneud â bytholbarhadau ac mae eu dilysrwydd i'w drin fel pe na bai unrhyw reol gyfreithiol o'r fath neu unrhyw reol ecwiti o'r fath erioed wedi effeithio arno.
- (9) Yn is-adran (4) mae i "ymddiriedolwyr tir" yr un ystyr ag a roddir i "trustees of land" yn Neddf Ymddiriedolaethau Tir a Phenodi Ymddiriedolwyr 1996 (p. 47) (gweler adran 1(1) o'r Ddeddf honno).

## PENNOD 6

### CYFFREDINOL

#### *Pwerau mynediad*

#### **152 Pwerau i fynd ar dir**

- (1) Caiff person sydd wedi ei awdurdodi'n ysgrifenedig gan Weinidogion Cymru fynd ar unrhyw dir i gynnal arolwg o adeilad ar y tir hwnnw neu ar unrhyw dir arall mewn cysylltiad â chynnig i restru neu ddadrestru'r adeilad.
- (2) Caiff person sydd wedi ei awdurdodi'n ysgrifenedig gan awdurdod cynllunio fynd ar unrhyw dir i gynnal arolwg o adeilad ar y tir hwnnw neu ar unrhyw dir arall mewn cysylltiad â chynnig i gyflwyno hysbysiad rhestru dros dro mewn perthynas â'r adeilad.

- (3) Caiff person sydd wedi ei awdurdodi'n ysgrifenedig gan awdurdod cynllunio neu Weinidogion Cymru fynd ar unrhyw dir –
  - (a) i gynnal arolwg o'r tir hwnnw neu unrhyw dir arall mewn cysylltiad â chynnig i wneud gorchymyn o dan adran 107 (addasu neu ddirymu cydsyniad adeilad rhestredig neu gydsyniad ardal gadwraeth),
  - (b) i gynnal arolwg o'r tir hwnnw neu unrhyw dir arall mewn cysylltiad â chynnig i wneud gorchymyn o dan adran 115 (terfynu cytundeb partneriaeth adeilad rhestredig neu ddarpariaeth mewn cytundeb), neu
  - (c) i asesu a yw trosedd wedi cael ei chyflawni neu yn cael ei chyflawni o dan adran 91(5), 117 neu 118.
- (4) Caiff person sydd wedi ei awdurdodi'n ysgrifenedig gan awdurdod cynllunio fynd ar unrhyw dir –
  - (a) i benderfynu a ddylai hysbysiad stop dros dro gael ei ddyroddi,
  - (b) i arddangos copi o hysbysiad stop dros dro yn unol ag adran 119, neu
  - (c) i asesu a gydymffurfiwyd â hysbysiad stop dros dro.
- (5) Caiff person sydd wedi ei awdurdodi'n ysgrifenedig gan awdurdod cynllunio neu Weinidogion Cymru fynd ar unrhyw dir –
  - (a) i gynnal arolwg o'r tir hwnnw neu unrhyw dir arall mewn cysylltiad â chynnig i ddyroddi hysbysiad gorfodi,
  - (b) i asesu â gydymffurfiwyd â hysbysiad gorfodi,
  - (c) i asesu a yw adeilad rhestredig ar y tir hwnnw neu ar unrhyw dir arall yn cael ei gynnal a'i gadw mewn cyflwr priodol,
  - (d) i gynnal arolwg o'r tir hwnnw neu unrhyw dir arall mewn cysylltiad â chynnig i gyflwyno hysbysiad atgyweirio o dan adran 138, neu
  - (e) i asesu a gydymffurfiwyd â hysbysiad atgyweirio.
- (6) Caiff person sydd wedi ei awdurdodi'n ysgrifenedig gan awdurdod lleol neu Weinidogion Cymru fynd ar unrhyw dir –
  - (a) i benderfynu a ddylai gwaith gael ei gyflawni o dan adran 144 ar gyfer diogelu adeilad ar y tir hwnnw neu ar unrhyw dir arall, neu
  - (b) i gyflawni gwaith o dan yr adran honno ar gyfer diogelu adeilad ar y tir hwnnw neu ar unrhyw dir arall.
- (7) Caiff person awdurdodedig fynd ar unrhyw dir i gynnal arolwg ohono, neu i amcangyfrif ei werth, mewn cysylltiad â hawliad am ddigollediad sy'n daladwy gan awdurdod cynllunio neu Weinidogion Cymru o dan y Rhan hon mewn perthynas â'r tir hwnnw neu unrhyw dir arall.
- (8) Yn is-adran (7) ystyr "person awdurdodedig" yw –
  - (a) swyddog o Swyddfa Brisio Cyllid a Thollau Ei Fawrhydi, neu
  - (b) person sydd wedi ei awdurdodi'n ysgrifenedig gan yr awdurdod cynllunio neu Weinidogion Cymru (yn ôl y digwydd).
- (9) Mae pŵer i gynnal arolwg o dir o dan yr adran hon yn cynnwys pŵer i chwilio a thurio i benderfynu natur yr isbridd neu i benderfynu a oes mwynau yn bresennol.

**153 Arfer pŵer i fynd ar dir heb warant**

- (1) Caniateir i bŵer i fynd ar dir o dan adran 152 gael ei arfer ar unrhyw adeg resymol.
- (2) Ni chaiff person sydd wedi ei awdurdodi i fynd ar dir o dan adran 152 fynnu mynediad fel hawl i unrhyw dir sydd wedi ei feddiannu oni bai bod o leiaf 24 awr o rybudd o'r mynediad bwriadedig wedi ei roi i bob meddiannydd.
- (3) Nid yw is-adran (2) yn gymwys i'r pŵer i fynd ar dir o dan adran 152(4) (hysbysiadau stop dros dro).
- (4) O ran person sydd wedi ei awdurdodi i fynd ar dir o dan adran 152—
  - (a) rhaid iddo, os yw'n ofynnol iddo wneud hynny gan neu ar ran unrhyw berchennog ar y tir neu unrhyw feddiannydd ar y tir, ddangos tystiolaeth o awdurdodiad y person a datgan diben mynd ar y tir cyn mynd arno;
  - (b) caiff fynd ag unrhyw bersonau eraill sy'n angenrheidiol ar y tir;
  - (c) rhaid iddo, os yw'n ymadael â'r tir ar adeg pan nad oes perchennog neu feddiannydd yn bresennol, ei adael wedi ei ddiogelu yr un mor effeithiol rhag tresmaswyr ag yr oedd pan aeth y person arno.
- (5) Pan—
  - (a) bo person yn cynnig cyflawni gwaith wrth arfer pŵer mynediad o dan adran 152, a
  - (b) bo'n ofynnol i'r person roi rhybudd o'r mynediad bwriadedig o dan is-adran (2) o'r adran hon,

ni chaiff y person gyflawni'r gwaith oni bai bod y rhybudd o'r mynediad bwriadedig yn cynnwys hysbysiad o fwriad y person i gyflawni'r gwaith.

- (6) Pan—
  - (a) bo person yn cynnig cyflawni gwaith wrth arfer pŵer mynediad o dan adran 152 ar dir sy'n perthyn i ymgymerwr statudol, a
  - (b) bo'r ymgymerwr yn gwrthwynebu'r gwaith arfaethedig ar y sail y byddai ei gyflawni yn ddifrifol niweidiol i gynnal ei ymgymeriad,
 ni chaiff y person gyflawni'r gwaith heb gytundeb y Gweinidog priodol.
- (7) Ni chaiff person fynd ar dir y Goron wrth arfer pŵer o dan adran 152 heb gytundeb—
  - (a) person y mae'n ymddangos i'r person sy'n ceisio mynediad i'r tir fod hawlogaeth ganddo i roi'r cytundeb hwnnw, neu
  - (b) awdurdod priodol y Goron.
- (8) Nid yw is-adrannau (2) i (6) yn gymwys i unrhyw beth a wneir yn rhinwedd is-adran (7).
- (9) Yn is-adran (6) mae i "Gweinidog priodol" yr ystyr a roddir i "appropriate Minister" gan adran 265 o Ddeddf Cynllunio Gwlad a Thref 1990 (p. 8).

**154 Gwarant i fynd ar dir**

- (1) Mae'r adran hon yn gymwys os yw ynad heddwch wedi ei fodloni ar sail gwybodaeth ysgrifenedig ar lw—
  - (a) bod sail resymol dros fynd ar dir at ddiben a grybwyllir yn adran 152, a
  - (b) bod—



- (i) mynediad i'r tir wedi ei wrthod neu fod gwrthodiad yn cael ei ddisgwyl yn rhesymol, neu
  - (ii) yr achos yn un brys.
- (2) Caiff yr ynad heddwch ddyroddi gwarant sy'n rhoi pŵer i fynd ar y tir i unrhyw berson sydd wedi ei awdurdodi'n ysgrifenedig gan berson a gaiff awdurdodi mynediad o dan adran 152 at y diben o dan sylw.
  - (3) At ddibenion is-adran (1)(b) mae mynediad i dir i'w drin fel pe bai wedi ei wrthod os na cheir ateb i gais am fynediad o fewn cyfnod rhesymol.
  - (4) Mae adran 152(9) yn gymwys i bŵer i gynnal arolwg o dir a roddir drwy warant o dan yr adran hon.
  - (5) Mae gwarant o dan yr adran hon yn rhoi pŵer i fynd ar dir –
    - (a) ar un achlysur yn unig, a
    - (b) ar adeg resymol yn unig, oni bai bod yr achos yn un brys.
  - (6) O ran person sydd wedi ei awdurdodi i fynd ar dir o dan yr adran hon –
    - (a) rhaid iddo, os yw'n ofynnol iddo wneud hymny gan neu ar ran unrhyw berchennog ar y tir neu unrhyw feddiannydd ar y tir, ddangos tystiolaeth o awdurdodiad y person a datgan diben y mynediad cyn mynd ar y tir,
    - (b) caiff fynd ag unrhyw bersonau eraill sy'n angenrheidiol ar y tir,
    - (c) rhaid iddo, os yw'n ymadael â'r tir ar adeg pan nad oes perchennog neu feddiannydd yn bresennol, ei adael wedi ei ddiogelu yr un mor effeithiol rhag tresmaswyr ag yr oedd pan aeth y person arno.
  - (7) Mae gwarant o dan yr adran hon yn peidio â chael effaith ar ddiwedd 1 mis sy'n dechrau â'r diwrnod y'i dyroddir.
  - (8) Nid yw'r adran hon yn gymwys mewn perthynas â thir y Goron.

#### 155 **Darpariaeth atodol ynghylch pwerau mynediad**

- (1) Mae'r adran hon yn gymwys pan fo gan berson bŵer i fynd ar dir a roddir gan adran 152 neu drwy warant o dan adran 154.
- (2) Mae person sy'n rhwystrô'n fwriadol berson sy'n arfer y pŵer mynediad yn cyflawni trosedd.
- (3) Mae person sy'n euog o drosedd o dan is-adran (2) yn agored ar euogfarn ddiannod i ddirwy nad yw'n uwch na lefel 3 ar y raddfa safonol.
- (4) Os achosir difrod i dir neu eiddo arall –
  - (a) wrth arfer y pŵer mynediad, neu
  - (b) wrth wneud unrhyw arolwg at y diben y rhoddwyd y pŵer mynediad ato, caiff person sy'n dioddef y difrod adennill digollediad oddi wrth y person a awdurdododd y mynediad.
- (5) Rhaid gwneud hawliad am ddigollediad o dan is-adran (4) yn ysgrifenedig o fewn 6 mis sy'n dechrau â'r diwrnod yr achoswyd y difrod (neu os achoswyd y difrod dros fwy nag un diwrnod, y diwrnod olaf y'i hachoswyd).

- (6) Mae person yn cyflawni trosedd os yw'r person yn datgelu gwybodaeth a gafodd y person wrth arfer y pŵer mynediad, ac sy'n ymwneud â phroses weithgynhyrchu neu gyfrinach fasnach, at ddiben ac eithrio'r un yr awdurdodwyd y person i fynd ar y tir ato.
- (7) Mae person sy'n euog o drosedd o dan is-adran (6) yn agored –
  - (a) ar euogfarn ddiannod, i ddirwy;
  - (b) ar euogfarn ar ddiad, i ddirwy neu i'w garcharu am gyfnod nad yw'n hwy na 2 flynedd, neu'r ddau.
- (8) Nid yw'r adran hon yn gymwys i unrhyw beth a wneir yn rhinwedd adran 153(7) (mynediad ar dir y Goron).

*Atodol***156 Adeiladau crefyddol esempt**

- (1) Caiff Gweinidogion Cymru drwy reoliadau ddarparu bod adeilad crefyddol a ddefnyddir at ddibenion crefyddol yn adeilad crefyddol esempt at ddibenion –
  - (a) adrannau 83 a 84 (rhestru adeiladau dros dro);
  - (b) adran 88 (gofyniad i waith sy'n effeithio ar adeilad rhestredig gael ei awdurdodi);
  - (c) adran 118 (y drosedd o ddifrodi adeilad rhestredig yn fwriadol);
  - (d) adran 137 (caffael adeilad rhestredig yn orfodol at ddiben ei ddiogelu);
  - (e) adran 144 (gwaith brys i ddiogelu adeilad rhestredig).
- (2) At ddibenion adran 88 mae adeilad i'w drin fel pe bai'n un sy'n cael ei ddefnyddio at ddibenion crefyddol pe bai'n cael ei ddefnyddio at y dibenion hynny oni bai am y gwaith o dan sylw.
- (3) Caiff rheoliadau o dan yr adran hon –
  - (a) gwneud darpariaeth mewn perthynas ag adeiladau crefyddol o ddisgrifiad a bennir yn y rheoliadau (pa un ai drwy gyfeirio at ffydd crefyddol neu enwad crefyddol, defnydd a wneir o'r adeiladau, neu unrhyw amgylchiad arall) neu mewn perthynas ag adeilad penodol;
  - (b) gwneud darpariaeth mewn perthynas ag adeilad crefyddol cyfan neu ran o adeilad crefyddol;
  - (c) darparu bod adeilad yn adeilad crefyddol esempt dim ond mewn perthynas â gwaith o ddisgrifiad a bennir yn y rheoliadau (pa un ai drwy gyfeirio at raddau'r gwaith, y person sy'n cyflawni'r gwaith, neu unrhyw amgylchiad arall);
  - (d) gwneud darpariaeth wahanol ar gyfer adeiladau mewn ardaloedd gwahanol;
  - (e) gwneud diwygiadau canlyniadol i unrhyw ddarpariaeth arall yn y Ddeddf hon.
- (4) Yn yr adran hon o ran cyfeiriadau at adeilad crefyddol –
  - (a) maent yn cynnwys unrhyw strwythur neu unrhyw wrthrych artiffisial sy'n sownd wrth adeilad crefyddol neu sydd o fewn ei gwrtil;
  - (b) nid ydynt yn cynnwys adeilad sy'n cael ei ddefnyddio, neu sydd ar gael i'w ddefnyddio, gan weinidog crefydd yn gyfan gwbl neu'n bennaf fel preswylfa i gyflawni dyletswyddau'r swydd honno ohoni.

**157 Dehongli'r Rhan hon**

Yn y Rhan hon –

mae “adeilad crefyddol esempt” (“*exempt religious building*”) i’w ddehongli yn unol ag adran 156;

ystyr “awdurdod lleol” (“*local authority*”) yw –

- (a) cyngor sir neu gyngor bwrdeistref sirol yng Nghymru;
- (b) awdurdod Parc Cenedlaethol yng Nghymru;
- (c) cyngor cymuned;
- (d) comisiynydd heddlu a throseddu yng Nghymru;
- (e) awdurdod tân ac achub yng Nghymru a gyfansoddwyd gan gynllun o dan adran 2 o Ddeddf y Gwasanaethau Tân ac Achub 2004 (p. 21) neu gynllun y mae adran 4 o’r Ddeddf honno yn gymwys iddo;
- (f) corff yng Nghymru sy’n gorff codi ardoll o fewn ystyr “levying body” yn adran 74(1) o Ddeddf Cyllid Llywodraeth Leol 1988 (p. 41);
- (g) corff yng Nghymru y mae adran 75 o’r Ddeddf honno (ardollau arbennig) yn gymwys iddo;
- (h) cyd-fwrdd neu gyd-bwyllgor, os yw pob un o’r awdurdodau sy’n ei gyfansoddi yn awdurdod lleol o fewn paragraffau (a) i (g);

ystyr “Cymru” (“*Wales*”) yw ardal gyfunol y siroedd a’r bwrdeistrefi sirol yng Nghymru;

mae i “gwarchodaeth interim” (“*interim protection*”) yr ystyr a roddir gan adran 79(3);

ystyr “hysbysiad gorfodi” (“*enforcement notice*”) yw hysbysiad gorfodi a ddyroddir o dan adran 123 neu 134 (yn ôl y digwydd);

ystyr “hysbysiad stop dros dro” (“*temporary stop notice*”) yw hysbysiad stop dros dro a ddyroddir o dan adran 119;

mae i “rhestru” (“*listing*”) a “dadrestru” (“*de-listing*”), mewn perthynas ag adeilad, yr ystyron a roddir gan adran 76(6);

mae i “rhestru dros dro” (“*temporary listing*”) yr ystyr a roddir gan adran 83(5).

**RHAN 4****ARDALOEDD CADWRAETH**

*Dynodi ardaloedd cadwraeth*

**158 Dynodi ardaloedd o ddiddordeb pensaernïol neu hanesyddol arbennig yn ardaloedd cadwraeth**

(1) Rhaid i awdurdod cynllunio –

- (a) o bryd i’w gilydd benderfynu pa rannau o’i ardal sy’n ardaloedd o ddiddordeb pensaernïol neu hanesyddol arbennig y mae’n ddymunol diogelu neu wella eu cymeriad neu eu golwg, a
- (b) dynodi’r rhannau hynny yn ardaloedd cadwraeth.

- (2) Caiff awdurdod cynllunio amrywio neu ganslo dynodiad.
- (3) Os yw awdurdod cynllunio yn dynodi ardal gadwraeth, neu'n amrywio neu'n canslo dynodiad, rhaid iddo roi hysbysiad ei fod wedi gwneud hynny i Weinidogion Cymru.
- (4) Rhaid i'r hysbysiad gynnwys digon o wybodaeth i adnabod yr ardal yr effeithir arni.
- (5) Rhaid i'r awdurdod cynllunio gyhoeddi'r hysbysiad gydag eglurhad o effaith y dynodiad, yr amrywiad neu'r canslo –
  - (a) yn y London Gazette, a
  - (b) mewn o leiaf un papur newydd sy'n cylchredeg yn ardal yr awdurdod.
- (6) Mae dynodiad o dan yr adran hon yn bridiant tir lleol.

*Dyletswyddau sy'n ymwneud ag ardaloedd cadwraeth*

**159 Dyletswydd i lunio a chyhoeddi cynigion ar gyfer diogelu a gwella ardaloedd cadwraeth**

- (1) Rhaid i awdurdod cynllunio o bryd i'w gilydd lunio a chyhoeddi cynigion ar gyfer diogelu a gwella unrhyw ran o'i ardal sy'n ardal gadwraeth.
- (2) Rhaid i'r awdurdod gyflwyno'r cynigion i'w hystyried i gyfarfod cyhoeddus a gynhelir yn yr ardal gadwraeth y mae'r cynigion yn ymwneud â hi neu, pan na fo lle addas yn yr ardal gadwraeth, mor agos iddi ag y bo'n rhesymol ymarferol.
- (3) Rhaid i'r awdurdod roi sylw i unrhyw safbwyntiau, ynghylch y cynigion, a fynegir yn y cyfarfod.

**160 Arfer swyddogaethau cynllunio: dyletswydd gyffredinol sy'n ymwneud ag ardaloedd cadwraeth**

- (1) Wrth arfer swyddogaeth gynllunio mewn perthynas ag adeilad neu dir arall mewn ardal gadwraeth, rhaid i berson roi sylw arbennig i ddymunoldeb diogelu neu wella cymeriad neu olwg yr ardal honno.
- (2) Yn yr adran hon ystyr "swyddogaeth gynllunio" yw unrhyw swyddogaeth o dan neu yn rhinwedd y canlynol –
  - (a) Rhan 3, y Rhan hon, Rhan 5 neu Ran 7 fel y mae'n gymwys at ddibenion unrhyw un neu ragor o'r Rhannau hynny,
  - (b) Deddf Cynllunio Gwlad a Thref 1990 (p. 8), neu
  - (c) adran 70 neu 73 o Ddeddf Diwygio Cyfraith Lesddaliad, Tai a Datblygu Trefol 1993 (p. 28) (cynlluniau rheoli ystad).

*Rheolaethu dymchwel mewn ardaloedd cadwraeth*

**161 Gofyniad i ddymchweliad gael ei awdurdodi**

- (1) Ni chaiff person gyflawni gwaith ar gyfer dymchwel adeilad y mae'r adran hon yn gymwys iddo, neu beri i waith o'r fath gael ei gyflawni, oni bai bod y gwaith wedi ei awdurdodi o dan adran 162.
- (2) Mae'r adran hon yn gymwys i unrhyw adeilad mewn ardal gadwraeth, ac eithrio –
  - (a) adeilad sy'n heneb gofrestredig (ond gweler adran 11);
  - (b) adeilad rhestredig (ond gweler adran 88);

- (c) adeilad o ddisgrifiad a bennir mewn rheoliadau a wneir gan Weinidogion Cymru;
  - (d) adeilad o ddisgrifiad a bennir mewn cyfarwyddyd a roddir i awdurdod cynllunio unigol gan Weinidogion Cymru.
- (3) Caiff Gweinidogion Cymru gyfarwyddo awdurdod cynllunio bod yr adran hon, er gwaethaf unrhyw ddarpariaeth a wneir gan reoliadau o dan is-adran (2)(c), i fod yn gymwys i adeilad o ddisgrifiad a bennir yn y cyfarwyddyd.
- (4) Nid yw is-adran (1) yn gwahardd gwaith a gyflawnir gan neu ar ran y Goron o dan yr amgylchiadau a nodir ym mharagraffau (a) i (d) o adran 117(4) (gwaith brys).
- (5) Mae Atodlen 11 yn gwneud darpariaeth ynghylch effaith yr adran hon yn peidio â bod yn gymwys i adeilad.

### 162 Awdurdodi dymchweliad drwy gydsyniad ardal gadwraeth

- (1) Mae gwaith ar gyfer dymchwel adeilad y mae adran 161 yn gymwys iddo wedi ei awdurdodi—
- (a) os yw cydsyniad ysgrifenedig i'w gyflawni wedi ei roi gan yr awdurdod cynllunio y mae'r adeilad yn ei ardal neu gan Weinidogion Cymru, a
  - (b) os yw'r gwaith yn cael ei gyflawni yn unol â thelerau'r cydsyniad (gan gynnwys unrhyw amodau sydd ynghlwm wrtho).
- (2) Pan—
- (a) bo gwaith ar gyfer dymchwel adeilad y mae adran 161 yn gymwys iddo wedi ei gyflawni heb gael ei awdurdodi, a
  - (b) bo'r awdurdod cynllunio neu Weinidogion Cymru yn rhoi cydsyniad ysgrifenedig ar gyfer y gwaith,
- mae'r gwaith wedi ei awdurdodi o adeg rhoi'r cydsyniad hwnnw.
- (3) Cyfeirir at gydsyniad o dan is-adran (1) neu (2) yn y Ddeddf hon fel cydsyniad ardal gadwraeth.

### 163 Cymhwyso Rhan 3 i ardaloedd cadwraeth

- (1) Mae'r darpariaethau a ganlyn yn Rhan 3 yn gymwys mewn perthynas ag adeiladau y mae adran 161 yn gymwys iddynt fel y maent yn gymwys i adeiladau rhestredig—
- (a) Pennod 2 (rheolaethu gwaith), ac eithrio—
    - (i) adrannau 88 a 89;
    - (ii) adran 90(1)(c) a (4)(b);
    - (iii) adran 95;
    - (iv) adran 96(2);
    - (v) adran 97(5), (6) ac (9);
    - (vi) adrannau 98(3)(b) a 99(5);
    - (vii) adran 101(2);
    - (viii) adran 104(3);
    - (ix) adran 111(5) ac (8);

- (b) Pennod 4 (gorfodi), ac eithrio –
    - (i) adran 117(5);
    - (ii) adran 118;
    - (iii) adran 128(3)(c);
  - (c) Pennod 6 (cyffredinol), ac eithrio –
    - (i) adran 152(1), (2), (3)(b) a (5)(c) i (e);
    - (ii) adran 156.
- (2) Wrth eu cymhwyso mewn perthynas ag adeiladau y mae adran 161 yn gymwys iddynt –
- (a) mae'r darpariaethau a gymhwysir gan is-adran (1) i'w darllen fel be bai –
    - (i) unrhyw gyfeiriad at gydsyniad adeilad rhestredig yn gyfeiriad at gydsyniad ardal gadwraeth;
    - (ii) unrhyw gyfeiriad at gymeriad adeilad rhestredig yn gyfeiriad at gymeriad neu olwg yr ardal gadwraeth y mae'r adeilad ynddi;
    - (iii) unrhyw gyfeiriad arall at adeilad rhestredig yn gyfeiriad at adeilad y mae adran 161 yn gymwys iddo;
    - (iv) unrhyw gyfeiriad at adran 88 yn gyfeiriad at adran 161;
  - (b) mae'r darpariaethau a gymhwysir gan is-adran (1)(a) i'w darllen fel pe bai –
    - (i) yn adran 98(3)(a), y cyfeiriad at adran 89(2) yn gyfeiriad at adran 162(2);
    - (ii) yn adran 99(3), "adrannau 90 i 94" wedi ei roi yn lle "adrannau 90 i 95";
  - (c) mae'r darpariaethau a gymhwysir gan is-adran (1)(b) i'w darllen fel pe bai –
    - (i) yn adrannau 117(4), 121(4) a 127(2)(d), y cyfeiriadau at ddiogelu'r adeilad wedi eu hepgor;
    - (ii) yn adran 126(1), y cyfeiriad at adran 89(2) yn gyfeiriad at adran 162(2);
    - (iii) yn adran 127(2), "nad oes angen cadw'r adeilad er lles diogelu neu wella cymeriad neu olwg yr ardal gadwraeth y mae ynddi" wedi ei roi yn lle paragraff (a);
  - (d) mae'r darpariaethau a gymhwysir gan is-adran (1)(c) i'w darllen fel pe bai, yn adran 152(3)(c), y cyfeiriad at adran 118 wedi ei hepgor.
- (3) Caiff Gweinidogion Cymru drwy reoliadau ddiwygio'r adran hon i wneud darpariaeth ychwanegol neu ddarpariaeth wahanol ynghylch cymhwyso Penodau 2, 4 a 6 o Ran 3 mewn perthynas ag adeiladau y mae adran 161 yn gymwys iddynt.



*Diogelu adeiladau mewn ardaloedd cadwraeth ar frys***164 Gwaith brys i ddiogelu adeiladau mewn ardaloedd cadwraeth**

- (1) Mae is-adran (2) yn gymwys pan fo Gweinidogion Cymru yn ystyried bod diogelu adeilad mewn ardal gadwraeth yn bwysig ar gyfer cynnal cymeriad neu olwg yr ardal honno.
- (2) Caiff Gweinidogion Cymru gyfarwyddo bod adran 144 (gwaith brys) yn gymwys i'r adeilad fel y mae'n gymwys i adeiladau rhestredig.
- (3) Pan fo cyfarwyddyd yn cael effaith mewn perthynas ag adeilad –
  - (a) mae adrannau 144 i 146 i'w darllen fel pe bai cyfeiriadau at adeilad rhestredig yn gyfeiriadau at yr adeilad;
  - (b) mae adran 144(7) i'w darllen fel pe bai paragraff (b) wedi ei hepgor.

*Grantiau a chytundebau ardaloedd cadwraeth***165 Grant gan Weinidogion Cymru ar gyfer diogelu neu wella ardaloedd cadwraeth**

- (1) Caiff Gweinidogion Cymru roi grantiau i dalu unrhyw wariant perthnasol y maent yn ystyried ei fod wedi gwneud neu y bydd yn gwneud cyfraniad sylweddol at ddiogelu neu wella cymeriad neu olwg ardal gadwraeth.
- (2) Mae gwariant yn berthnasol at ddibenion is-adran (1) os aed iddo neu os eir iddo wrth wneud y gwaith diogelu neu wella a grybwyllir yn yr is-adran honno, mewn cysylltiad â'r gwaith diogelu neu wella hwnnw, neu gyda golwg ar hybu'r gwaith diogelu neu wella hwnnw.
- (3) Mae'r darpariaethau a ganlyn yn yr adran hon yn gymwys pan –
  - (a) bo Gweinidogion Cymru yn rhoi grant o dan is-adran (1) mewn perthynas ag adeilad neu dir arall ar delerau sy'n darparu y gellir ei adennill o dan yr adran hon, a
  - (b) cyn neu wrth roi'r grant, fo Gweinidogion Cymru yn rhoi hysbysiad ysgrifenedig i dderbynnydd y grant sy'n –
    - (i) crynhoi effaith yr adran hon, a
    - (ii) pennu cyfnod, sy'n dechrau â'r diwrnod y rhoddir y grant ac sy'n dod i ben heb fod yn hwy na 10 mlynedd ar ôl y diwrnod hwnnw, y gellir adennill y grant ynddo yn unol ag is-adrannau (5) i (7) ("y cyfnod adennill").
- (4) Os na chydymffurfir ag unrhyw un neu ragor o amodau a osodir wrth roi'r grant, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth dderbynnydd y grant.
- (5) Mae is-adrannau (6) a (7) yn gymwys os, yn ystod y cyfnod adennill –
  - (a) caiff y cyfan neu ran o'r buddiant yr oedd derbynnydd y grant yn ei ddal, ar y diwrnod y rhoddiwyd y grant, yn yr adeilad neu dir arall ("y buddiant perthnasol") y mae'r grant yn ymwneud ag ef ei waredu neu ei gwaredu, a
  - (b) caiff y gwarediad ei wneud drwy werthu, drwy gyfnewid neu drwy les am gyfnod o 21 o flynyddoedd o leiaf.

- (6) Os caiff y gwarediad ei wneud gan dderbynnydd y grant neu gan berson y mae derbynnydd y grant wedi rhoi rhan o'r buddiant perthnasol iddo, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth dderbynnydd y grant.
- (7) Os caiff y gwarediad ei wneud gan berson y mae derbynnydd y grant wedi rhoi'r cyfan o'r buddiant perthnasol iddo, caiff Gweinidogion Cymru adennill swm y grant, neu unrhyw ran o'r swm hwnnw, oddi wrth y person y rhoddwyd y rhodd iddo.
- (8) Ni chaiff Gweinidogion Cymru adennill symiau o dan yr adran hon sydd, gyda'i gilydd, yn fwy na swm y grant.
- (9) Yn yr adran hon mae cyfeiriadau at roi buddiant i berson yn gyfeiriadau at ei roi i'r person yn uniongyrchol neu'n anuniongyrchol, ac eithrio ar farwolaeth deiliad y buddiant.

#### 166 Cytundebau ardaloedd cadwraeth

- (1) Caiff Gweinidogion Cymru wneud cytundeb ardal gadwraeth ag un neu ragor o awdurdodau cynllunio.
- (2) Mae cytundeb ardal gadwraeth yn gytundeb y bydd swm penodedig o arian yn cael ei roi o'r neilltu am gyfnod penodedig o flynyddoedd at ddiben rhoi grantiau ar gyfer atgyweirio adeiladau sydd mewn ardal gadwraeth ac –
  - (a) sydd wedi eu cynnwys mewn rhestr a lunnir at ddibenion y cytundeb gan y partiön iddo, neu ganddynt hwy ac awdurdodau cynllunio eraill, neu
  - (b) a ddangosir ar fap a luniwyd at y dibenion hynny gan y partiön, neu ganddynt hwy ac awdurdodau cynllunio eraill.
- (3) Caiff Gweinidogion Cymru dalu grant at ddibenion cytundeb ardal gadwraeth i awdurdod cynllunio sy'n barti i'r cytundeb neu i unrhyw berson arall.
- (4) Caiff Gweinidogion Cymru wneud trefniadau ag unrhyw awdurdod o'r fath ynghylch sut y mae'r cytundeb i'w gyflawni (gan gynnwys trefniadau ar gyfer cynnig a thalu grantiau o dan yr adran hon).
- (5) Mae adran 165(4) i (9) yn gymwys i grant o dan yn yr adran hon, ond gan gymryd bod y cyfnod adennill yn 3 blynedd sy'n dechrau â'r diwrnod y rhoddir y grant.

### RHAN 5

#### DARPARIAETH ATODOL YNGHYLCH ADEILADAU O DDIDDORDEB ARBENNIG AC ARDALOEDD CADWRAETH

#### PENNOD 1

#### ARFER SWYDDOGAETHAU GAN AWDURDODAU CYNLLUNIO AC AWDURDODAU LLEOL ERAILL

#### 167 Ffioedd a thaliadau am arfer swyddogaethau

- (1) Caiff Gweinidogion Cymru drwy reoliadau ei gwneud yn ofynnol i ffi gael ei thalu neu i dâl gael ei dalu i awdurdod cynllunio am –
  - (a) cyflawni unrhyw un neu ragor o'i swyddogaethau o dan Ran 3, Rhan 4, y Rhan hon neu Ran 7 fel y mae'n gymwys at ddibenion unrhyw un neu ragor o'r Rhannau hynny;

- (b) gwneud unrhyw beth y bwriedir iddo hwyluso cyflawni unrhyw un neu ragor o'r swyddogaethau hynny, neu sy'n ffafriol i'w cyflawni neu'n ddeilliadol i'w cyflawni.
- (2) Caiff rheoliadau o dan yr adran hon yn benodol –
- gwneud darpariaeth ynghylch pryd y mae rhaid talu ffi neu dâl;
  - gwneud darpariaeth ynghylch pwy y mae rhaid iddo dalu ffi neu dâl;
  - gwneud darpariaeth ynghylch sut y mae ffi neu dâl i'w chyfrifo neu ei gyfrifo (gan gynnwys pwy sydd i'w chyfrifo neu ei gyfrifo);
  - pennu amgylchiadau pan fo ffi neu dâl i'w hepgor neu i'w had-dalu neu ei ad-dalu (yn gyfan gwbl neu'n rhannol);
  - pennu amgylchiadau pan nad oes ffi neu dâl i'w thalu neu ei dalu;
  - gwneud darpariaeth ynghylch effaith talu neu fethu â thalu ffi neu dâl yn unol â'r rheoliadau (a gaiff gynnwys darpariaeth sy'n diwygio, yn diddymu neu'n dirymu unrhyw ddeddfiad, gan gynnwys unrhyw ddarpariaeth yn y Ddeddf hon);
  - pennu amgylchiadau pan fo ffi neu dâl sy'n daladwy i un awdurdod cynllunio i'w throsglwyddo neu ei drosglwyddo i awdurdod cynllunio arall.
- (3) Os yw rheoliadau o dan yr adran hon yn darparu i awdurdod cynllunio gyfrifo swm unrhyw ffioedd neu daliadau, rhaid i'r awdurdod sicrhau, gan ystyried un flwyddyn ariannol gydag un arall, nad yw ei incwm o'r ffioedd neu'r taliadau yn fwy na chost cyflawni'r swyddogaethau, neu wneud y pethau, y maent yn ymwneud â hwy.

#### 168 Trefniadau ar gyfer arfer swyddogaethau mewn perthynas â cheisiadau

- Mae adrannau 319ZA i 319ZD o Ddeddf Cynllunio Gwlad a Thref 1990 (p. 8) (cyflawni swyddogaethau sy'n ymwneud â cheisiadau) yn gymwys i arfer gan awdurdod cynllunio ei swyddogaethau mewn perthynas â cheisiadau o dan neu yn rhinwedd Rhannau 3 a 4 fel y maent yn gymwys i arfer ei swyddogaethau mewn perthynas â cheisiadau o dan y Ddeddf honno.
- Ni chaniateir cwestiynu dilysrwydd cydsyniad neu benderfyniad a roddir neu a wneir, neu yr ymhonnir ei fod wedi ei roi neu ei wneud, gan awdurdod cynllunio mewn cysylltiad â chais a wneir o dan neu yn rhinwedd y naill neu'r llall o'r Rhannau hynny mewn unrhyw achos cyfreithiol, nac mewn unrhyw achos arall o dan y Ddeddf hon, ar y sail y dylai'r cydsyniad neu'r penderfyniad fod wedi ei roi neu ei wneud gan awdurdod cynllunio arall.

#### 169 Trefniadau ar gyfer cael cyngor arbenigol

- Caiff Gweinidogion Cymru gyfarwyddo awdurdod cynllunio ar unrhyw adeg i gyflwyno i'w cymeradwyo ganddynt y trefniadau y mae'r awdurdod yn cynnig eu gwneud ar gyfer cael cyngor arbenigol mewn cysylltiad â'i swyddogaethau perthnasol.
- Rhaid i'r awdurdod gyflwyno ei drefniadau arfaethedig i Weinidogion Cymru o fewn y cyfnod a bennir yn y cyfarwyddyd.
- Os nad yw Gweinidogion Cymru wedi eu bodloni â'r trefniadau y mae'r awdurdod ("awdurdod A") yn cynnig eu gwneud, cânt gyfarwyddo awdurdod A ac awdurdod cynllunio arall a bennir yn y cyfarwyddyd ("awdurdod B") –

- (a) i wneud cytundeb o dan adran 113 o Ddeddf Llywodraeth Leol 1972 (p. 70) i osod ar gael i awdurdod A wasanaethau personau a gyflogir gan awdurdod B sy'n gymwys i roi'r cyngor arbenigol, neu
  - (b) i wneud trefniadau i awdurdod B arfer unrhyw un neu ragor o swyddogaethau perthnasol awdurdod A.
- (4) Caiff cyfarwyddyd o dan is-adran (3)(b) wneud darpariaeth ynghylch telerau'r trefniadau.
- (5) Cyn rhoi cyfarwyddyd o dan is-adran (3) rhaid i Weinidogion Cymru ymgynghori â'r ddau awdurdod cynllunio.
- (6) At ddibenion yr adran hon swyddogaethau perthnasol awdurdod cynllunio yw ei swyddogaethau o dan neu yn rhinwedd –
- (a) adrannau 83 a 84 (rhestru adeiladau dros dro),
  - (b) Pennod 2 (rhoi, addasu a dirymu cydsyniad) o Ran 3,
  - (c) Pennod 3 (cytundebau partneriaethau adeiladau rhestredig) o'r Rhan honno,
  - (d) Pennod 4 (gorfodi rheolaethau) o'r Rhan honno,
  - (e) adran 314A(1) o Ddeddf Cynllunio Gwlad a Thref 1990 (p. 8) (caniatâd cynllunio ar gyfer datblygiad sy'n effeithio ar adeiladau rhestredig), ac
  - (f) adrannau 158 i 163 o'r Ddeddf hon (dynodi ardaloedd cadwraeth, dyletswyddau awdurdodau cynllunio a rheolaethu dymchwel).

#### 170 Ffurf ar ddogfennau

Caiff Gweinidogion Cymru drwy reoliadau bennu ffurf a chynnwys unrhyw hysbysiad, unrhyw orchymyn neu unrhyw ddogfen arall y mae awdurdod lleol wedi ei awdurdodi i'w gyflwyno neu ei chyflwyno, i'w wneud neu ei gwneud neu i'w ddyroddi neu ei dyroddi neu y mae'n ofynnol iddo ei gyflwyno neu ei chyflwyno, ei wneud neu ei gwneud neu ei ddyroddi neu ei dyroddi o dan neu yn rhinwedd Rhan 3, Rhan 4, y Rhan hon neu Ran 7 fel y mae'n gymwys at ddibenion unrhyw un neu ragor o'r Rhannau hynny.

#### 171 Cyfraniadau tuag at wariant gan awdurdodau lleol

- (1) Caiff unrhyw awdurdod lleol neu unrhyw ymgymwrwr statudol gyfrannu tuag at wariant yr eir iddo gan awdurdod cynllunio neu awdurdod lleol arall wrth arfer, neu mewn cysylltiad ag arfer, ei swyddogaethau o dan Ran 3 (gan gynnwys ei swyddogaethau o dan y Rhan honno fel y'i cymhwysir gan adran 163).
- (2) Nid yw is-adran (1) yn gymwys i wariant yr eir iddo –
- (a) wrth dalu digollediad o dan adrannau 80, 86, 108, 116 a 122 (ond nid yw hyn yn atal awdurdod rhag cydymffurfio â chyfarwyddyd o dan is-adran (3)(b)), neu
  - (b) wrth arfer, neu mewn cysylltiad ag arfer, swyddogaethau o dan adrannau 143 i 146, 148 a 149.
- (3) Pan fo digollediad yn daladwy gan awdurdod cynllunio neu awdurdod lleol arall o ganlyniad i unrhyw beth a wneir o dan Benodau 1 i 4 o Ran 3 (gan gynnwys unrhyw beth a wneir o dan Bennod 2 neu 4 o'r Rhan honno fel y'i cymhwysir gan adran 163), caiff Gweinidogion Cymru –

- (a) cyfrannu tuag at dalu'r digollediad, os gwnaed y peth yn gyfan gwbl neu'n rhannol er budd gwasanaeth a ddarperir gan Weinidogion Cymru, neu
  - (b) cyfarwyddo awdurdod lleol arall i gyfrannu swm y mae Gweinidogion Cymru yn ystyried ei fod yn rhesymol, gan roi sylw i unrhyw fudd sy'n cronni i'r awdurdod arall hwnnw o ganlyniad i wneud y peth.
- (4) Nid yw is-adran (3)(b) yn gymwys pan fo awdurdod cynllunio yn agored i dalu digollediad o dan adran 116 o ganlyniad i derfynu cytundeb partneriaeth adeilad rhestredig neu ddarpariaeth mewn cytundeb o'r fath.
- (5) Mewn achos o'r fath, caiff Gweinidogion Cymru gyfarwyddo unrhyw awdurdod cynllunio arall sy'n barti i'r cytundeb, neu a oedd yn barti i'r cytundeb, i ad-dalu'r awdurdod y mae'r digollediad yn daladwy ganddo, yn gyfan gwbl neu'n rhannol.
- (6) Ni chaiff Gweinidogion Cymru roi cyfarwyddyd o dan is-adran (5) oni bai eu bod wedi ymgynghori â'r holl awdurdodau cynllunio sy'n bartion i'r cytundeb, neu a oedd yn bartion i'r cytundeb.

## PENNOD 2

### ACHOSION GERBRON GWEINIDOGION CYMRU

#### *Darpariaethau gweithdrefnol sy'n gymwys i apelau i Weinidogion Cymru*

#### 172 Ffioedd am apelau

- (1) Caiff Gweinidogion Cymru drwy reoliadau ei gwneud yn ofynnol i berson sy'n gwneud apêl y mae'r adran hon yn gymwys iddo dalu ffi i Weinidogion Cymru.
- (2) Mae'r adran hon yn gymwys—
  - (a) i apêl o dan adran 100 (apêl yn erbyn penderfyniad neu fethiant i wneud penderfyniad ar gais am gydsyniad adeilad rhestredig neu gydsyniad ardal gadwraeth, i amrywio neu ddileu amodau neu i gymeradwyo manylion);
  - (b) i apêl o dan adran 127 (apêl yn erbyn hysbysiad gorfodi).
- (3) Caiff rheoliadau o dan yr adran hon yn benodol—
  - (a) gwneud darpariaeth ynghylch pryd y mae rhaid talu ffi;
  - (b) gwneud darpariaeth ynghylch sut y mae ffi i'w chyfrifo (gan gynnwys pwy sydd i'w chyfrifo);
  - (c) pennu amgylchiadau pan fo ffi i'w hepgor neu ei had-dalu (yn gyfan gwbl neu'n rhannol);
  - (d) pennu amgylchiadau pan nad oes ffi i'w thalu;
  - (e) gwneud darpariaeth ynghylch effaith talu neu fethu â thalu ffi yn unol â'r rheoliadau (a gaiff gynnwys darpariaeth sy'n diwygio, yn diddymu neu'n dirymu unrhyw ddeddfiad, gan gynnwys unrhyw ddarpariaeth yn y Ddeddf hon).

#### 173 Penderfynu apêl gan berson a benodir

- (1) Mae apêl y mae'r adran hon yn gymwys iddi i'w phenderfynu gan berson a benodir gan Weinidogion Cymru (yn hytrach na chan Weinidogion Cymru).
- (2) Mae'r adran hon yn gymwys—

- (a) i apêl o dan adran 100 (apêl yn erbyn penderfyniad neu fethiant i wneud penderfyniad ar gais am gydsyniad adeilad rhestredig neu gydsyniad ardal gadwraeth, i amrywio neu ddileu amodau neu i gymeradwyo manylion);
  - (b) i apêl o dan adran 127 (apêl yn erbyn hysbysiad gorfodi).
- (3) Ond nid yw'r adran hon yn gymwys i apêl –
- (a) os yw'n apêl o ddisgrifiad a bennir mewn rheoliadau a wneir gan Weinidogion Cymru, neu
  - (b) os yw Gweinidogion Cymru yn cyfarwyddo bod yr apêl i'w phenderfynu ganddynt hwy yn hytrach na chan berson a benodir.
- (4) Nid yw'r adran hon yn effeithio ar unrhyw ddarpariaeth yn y Ddeddf hon neu mewn rheoliadau a wneir odani sy'n darparu y caniateir i apêl gael ei gwneud i Weinidogion Cymru, neu fod rhaid i hysbysiad o apêl gael ei gyflwyno i Weinidogion Cymru.
- (5) Pan fo person a benodir yn penderfynu apêl, mae penderfyniad y person a benodir i'w drin fel pe bai'n benderfyniad gan Weinidogion Cymru.
- (6) Mae Atodlen 12 yn gwneud darpariaeth bellach mewn cysylltiad â phenodiadau o dan is-adran (1) a chyfarwyddydau o dan is-adran (3)(b).

*Darpariaethau gweithdrefnol sy'n gymwys i apelau ac achosion eraill gerbron Gweinidogion Cymru*

#### **174 Dewis o ymchwiliad, gwrandawriad neu weithdrefn ysgrifenedig**

- (1) Rhaid i Weinidogion Cymru ym mhob achos benderfynu'r weithdrefn ar gyfer ystyried achos y mae'r adran hon yn gymwys iddo.
- (2) Rhaid i benderfyniad ddarparu i'r achos gael ei ystyried mewn un neu ragor o'r ffyrdd a ganlyn –
  - (a) mewn ymchwiliad lleol;
  - (b) mewn gwrandawriad;
  - (c) ar sail sylwadau ysgrifenedig.
- (3) Rhaid i Weinidogion Cymru wneud penderfyniad cyn diwedd y cyfnod a bennir mewn rheoliadau a wneir gan Weinidogion Cymru.
- (4) Caniateir i benderfyniad gael ei amrywio drwy benderfyniad pellach ar unrhyw adeg cyn penderfynu'r achos y mae'r penderfyniad yn ymwneud ag ef.
- (5) Rhaid i Weinidogion Cymru hysbysu'r personau a ganlyn am benderfyniad –
  - (a) y ceisydd neu'r apelydd (fel y bo'n briodol), a
  - (b) yr awdurdod cynllunio o dan sylw.
- (6) Rhaid i Weinidogion Cymru gyhoeddi'r meini prawf y byddant yn eu cymhwyso wrth wneud penderfyniadau.
- (7) Mae'r adran hon yn gymwys i'r achosion a ganlyn –
  - (a) cais a atgyfeirir at Weinidogion Cymru o dan adran 94 (atgyfeirio cais am gydsyniad adeilad rhestredig neu gydsyniad ardal gadwraeth neu i amrywio neu ddileu amodau);



- (b) apêl o dan adran 100 (apêl yn erbyn penderfyniad neu fethiant i wneud penderfyniad ar gais am gydsyniad, i amrywio neu ddileu amodau neu i gymeradwyo manylion);
  - (c) cais am gydsyniad adeilad rhestredig neu gydsyniad ardal gadwraeth a wneir i Weinidogion Cymru o dan adran 106 (gwaith brys ar dir y Goron);
  - (d) apêl o dan adran 127 (apêl yn erbyn hysbysiad gorfodi).
- (8) Caiff Gweinidogion Cymru drwy reoliadau ddiwygio is-adran (7) –
- (a) i ychwanegu achos o dan neu yn rhinwedd Rhan 3, Rhan 4 neu’r Rhan hon,
  - (b) i ddileu achos, neu
  - (c) i addasu disgrifiad o achos.

### 175 Gofynion gweithdrefnol

- (1) Caiff Gweinidogion Cymru drwy reoliadau wneud darpariaeth ynghylch y weithdrefn sydd i’w dilyn mewn cysylltiad –
- (a) ag achos ar unrhyw gais, unrhyw apêl neu unrhyw atgyfeiriad a wneir i neu at Weinidogion Cymru o dan neu yn rhinwedd Rhan 3 neu 4 (pa un a yw’n cael ei ystyried mewn ymchwiliad lleol, mewn gwrandawriad neu ar sail sylwadau ysgrifenedig);
  - (b) ag unrhyw ymchwiliad lleol neu unrhyw wrandawriad arall a gynhelir neu sydd i’w gynnal gan Weinidogion Cymru neu ar eu rhan o dan neu yn rhinwedd unrhyw ddarpariaeth yn y Rhannau hynny neu’r Rhan hon.
- (2) Caiff y rheoliadau gynnwys darpariaeth ynghylch –
- (a) y weithdrefn sydd i’w dilyn mewn cysylltiad â materion paratoadol ar gyfer ymchwiliad neu wrandawriad neu gyflwyno sylwadau ysgrifenedig neu faterion sy’n codi yn dilyn ymchwiliad neu wrandawriad neu gyflwyno sylwadau ysgrifenedig;
  - (b) cynnal achos.
- (3) Caiff y rheoliadau gynnwys darpariaeth ynghylch y weithdrefn sydd i’w dilyn –
- (a) pan fo camau wedi eu cymryd gyda golwg ar gynnal ymchwiliad neu wrandawriad nad yw’n digwydd,
  - (b) pan fo camau wedi eu cymryd gyda golwg ar benderfynu unrhyw fater gan berson a benodir gan Weinidogion Cymru a bod yr achos yn destun cyfarwyddyd bod rhaid i’r mater gael ei benderfynu yn lle hynny gan Weinidogion Cymru, neu
  - (c) pan fo camau wedi eu cymryd yn unol â chyfarwyddyd o’r fath a bod cyfarwyddyd pellach yn cael ei roi sy’n dirymu’r cyfarwyddyd hwnnw,
- a chânt ddarparu bod camau o’r fath i’w trin fel pe baent yn cydymffurfio, yn gyfan gwbl neu’n rhannol, â gofynion y rheoliadau.
- (4) Caiff y rheoliadau –

- (a) pennu terfyn amser y mae rhaid i barti i achos gyflwyno sylwadau ysgrifenedig ac unrhyw ddogfennau ategol oddi mewn iddo, neu alluogi Gweinidogion Cymru i roi cyfarwyddydau sy'n gosod y terfyn amser mewn achos penodol neu mewn achosion o ddisgrifiad penodol;
  - (b) galluogi Gweinidogion Cymru i fynd ymlaen i wneud penderfyniad gan ystyried dim ond y sylwadau ysgrifenedig a'r dogfennau ategol a gyflwynwyd o fewn y terfyn amser;
  - (c) galluogi Gweinidogion Cymru, ar ôl rhoi hysbysiad ysgrifenedig i'r partion o'u bwriad i wneud hynny, i fynd ymlaen i wneud penderfyniad er na chyflwynwyd unrhyw sylwadau ysgrifenedig o fewn y terfyn amser, os ydynt yn ystyried bod ganddynt ddigon o ddeunydd ger eu bron i'w galluogi i ddod i benderfyniad ar rinweddau'r achos.
- (5) Caiff y rheoliadau hefyd wneud darpariaeth ynghylch yr amgylchiadau pan –
- (a) caniateir i gyfarwyddyd ynghylch talu costau Gweinidogion Cymru gael ei roi o dan adran 180;
  - (b) caniateir i orchymyn ynghylch talu costau parti gael ei wneud o dan adran 181.
- (6) Caiff y rheoliadau ddarparu na chaniateir, o dan amgylchiadau a bennir yn y rheoliadau, godi mater mewn achos ar apêl i Weinidogion Cymru oni bai –
- (a) y codwyd y mater yn flaenorol cyn adeg a bennir yn y rheoliadau, neu
  - (b) y dangosir na ellid bod wedi codi'r mater cyn yr adeg honno.

*Ymchwiliadau lleol***176 Pŵer Gweinidogion Cymru i gynnal ymchwiliad lleol**

- (1) Caiff Gweinidogion Cymru beri i ymchwiliad lleol gael ei gynnal at ddibenion arfer unrhyw un neu ragor o'u swyddogaethau o dan neu yn rhinwedd Rhan 3, Rhan 4 neu'r Rhan hon.
- (2) Gweler hefyd baragraff 3(1) o Atodlen 12 ar gyfer y pŵer sydd gan berson a benodir gan Weinidogion Cymru o dan adran 173 i gynnal ymchwiliad lleol mewn cysylltiad ag apêl.

**177 Pŵer person sy'n cynnal ymchwiliad i wneud tystiolaeth yn ofynnol**

- (1) Caiff person sy'n cynnal ymchwiliad lleol o dan y Rhan hon ei gwneud yn ofynnol drwy wŷs i unrhyw berson –
  - (a) bod yn bresennol yn yr ymchwiliad, ar adeg ac mewn lle a ddatgenir yn y wŷs, a rhoi tystiolaeth, neu
  - (b) dangos unrhyw ddogfennau sydd ym meddiant y person neu sydd o dan reolaeth y person, sy'n ymwneud ag unrhyw fater o dan sylw yn yr ymchwiliad.
- (2) Caiff y person sy'n cynnal yr ymchwiliad gymryd tystiolaeth ar lw, ac at y diben hwnnw caiff weinyddu llwon.
- (3) Nid yw gwŷs o dan yr adran hon yn ei gwneud yn ofynnol i berson fod yn bresennol yn yr ymchwiliad oni bai bod treuliau angenrheidiol y person ar gyfer bod yn bresennol yn cael eu talu neu eu cynnig i'r person.

- (4) Ni chaniateir ei gwneud yn ofynnol o dan yr adran hon i berson ddangos teitl (nac unrhyw offeryn sy'n ymwneud â theitl) unrhyw dir nad yw'n perthyn i awdurdod lleol.
- (5) Mae'n drosedd i berson—
  - (a) gwrthod cydymffurfio â gofyniad mewn gwŷs o dan yr adran hon neu fethu'n fwriadol â chydymffurfio â gofyniad o'r fath, neu
  - (b) newid, atal, cuddio neu ddinistrio'n fwriadol ddogfen y mae'n ofynnol i'r person ei dangos o dan yr adran hon, neu y mae'r person yn agored i orfod ei dangos o dan yr adran hon.
- (6) Mae person sy'n euog o drosedd o dan is-adran (5) yn agored ar euogfarn ddiannod i ddirwy nad yw'n uwch na lefel 3 ar y raddfa safonol neu i'w garcharu am gyfnod nad yw'n hwy na'r uchafswm cyfnod am droseddau diannod, neu'r ddau.
- (7) Yn is-adran (6) ystyr "yr uchafswm cyfnod am droseddau diannod" yw—
  - (a) mewn perthynas â throsedd a gyflawnir cyn i adran 281(5) o Ddeddf Cyfiawnder Troseddol 2003 (p. 44) ddod i rym, 6 mis;
  - (b) mewn perthynas â throsedd a gyflawnir ar ôl iddi ddod i rym, 51 o wythnosau.

#### 178 Mynediad at dystiolaeth mewn ymchwiliad

- (1) Mewn ymchwiliad lleol a gynhelir o dan y Rhan hon—
  - (a) rhaid clywed tystiolaeth lafar yn gyhoeddus, a
  - (b) rhaid i dystiolaeth ddogfennol fod ar gael i'r cyhoedd edrych arni.
- (2) Ond os yw awdurdod gweinidogol wedi ei fodloni bod y ddau amod yn is-adran (3) wedi eu bodloni mewn perthynas ag ymchwiliad, caiff gyfarwyddo nad yw tystiolaeth o ddisgrifiad a bennir yn y cyfarwyddyd i'w chlywed nac ar gael i edrych arni yn yr ymchwiliad hwnnw ond gan bersonau a bennir yn y cyfarwyddyd neu gan bersonau o ddisgrifiad a bennir ynddo.
- (3) Yr amodau yw—
  - (a) y byddai rhoi tystiolaeth o ddisgrifiad penodol yn gyhoeddus neu ei rhoi ar gael i'r cyhoedd edrych arni yn debygol o arwain at ddatgelu gwybodaeth—
    - (i) am ddiogelwch cenedlaethol, neu
    - (ii) am y mesurau a gymerwyd neu sydd i'w cymryd i sicrhau diogelwch unrhyw dir neu unrhyw eiddo arall, a
  - (b) y byddai datgelu'r wybodaeth i'r cyhoedd yn erbyn y buddiant cenedlaethol.
- (4) Os yw awdurdod gweinidogol yn ystyried rhoi cyfarwyddyd o dan yr adran hon, caiff y Cwnsler Cyffredinol benodi person ("cynrychiolydd a benodir") i gynrychioli buddiannau unrhyw berson a fydd yn cael ei atal rhag clywed unrhyw dystiolaeth neu edrych ar unrhyw dystiolaeth mewn ymchwiliad lleol os rhoddir y cyfarwyddyd.
- (5) Os nad oes cynrychiolydd a benodir pan fydd awdurdod gweinidogol yn rhoi cyfarwyddyd o dan yr adran hon, caiff y Cwnsler Cyffredinol benodi person yn gynrychiolydd a benodir ar unrhyw adeg at ddibenion yr ymchwiliad.
- (6) Caiff Gweinidogion Cymru drwy reoliadau wneud darpariaeth ynghylch—

- (a) y weithdrefn sydd i'w dilyn gan awdurdod gweinidogol cyn iddo roi cyfarwyddyd o dan yr adran hon mewn achos pan fo cynrychiolydd a benodir;
  - (b) swyddogaethau cynrychiolydd a benodir.
- (7) Yn yr adran hon ac adran 179, ystyr "awdurdod gweinidogol" yw Gweinidogion Cymru neu'r Ysgrifennydd Gwladol.

**179 Talu cynrychiolydd a benodir pan fo mynediad i dystiolaeth wedi ei gyfyngu**

- (1) Mae'r adran hon yn gymwys os yw person wedi ei benodi o dan adran 178 yn gynrychiolydd a benodir at ddibenion ymchwiliad lleol, pa un a yw'r ymchwiliad yn digwydd ai peidio.
- (2) Caiff awdurdod gweinidogol gyfarwyddo person ("y person cyfrifol") i dalu ffioedd a threuliau'r cynrychiolydd a benodir.
- (3) Rhaid i'r person cyfrifol fod yn berson y mae'r awdurdod gweinidogol yn ystyried ei fod â buddiant yn yr ymchwiliad, neu y byddai wedi bod â buddiant yn yr ymchwiliad, mewn perthynas –
  - (a) â diogelwch cenedlaethol, neu
  - (b) â'r mesurau a gymerwyd neu sydd i'w cymryd i sicrhau diogelwch unrhyw dir neu unrhyw eiddo arall.
- (4) Os nad yw'r cynrychiolydd a benodir a'r person cyfrifol yn gallu cytuno ar swm y ffioedd a'r treuliau, rhaid i'r swm gael ei benderfynu gan yr awdurdod gweinidogol a roddodd y cyfarwyddyd.
- (5) Rhaid i'r awdurdod gweinidogol beri i'r swm y cytunir arno rhwng y cynrychiolydd a benodir a'r person cyfrifol, neu a benderfynir gan yr awdurdod gweinidogol, gael ei ardystio.
- (6) Gellir adennill y swm ardystiedig oddi wrth y person cyfrifol fel dyled.

*Costau achosion gerbron Gweinidogion Cymru*

**180 Talu costau Gweinidogion Cymru**

- (1) Mae'r adran hon yn gymwys i'r achosion a ganlyn –
  - (a) achos ar gais, apêl neu atgyfeiriad a wneir i neu at Weinidogion Cymru o dan neu yn rhinwedd Rhan 3 neu 4 (pa un a yw'n cael ei ystyried neu ei hystyried mewn ymchwiliad lleol, mewn gwrandawriad neu ar sail sylwadau ysgrifenedig);
  - (b) unrhyw ymchwiliad lleol neu unrhyw wrandawriad arall a gynhelir neu sydd i'w gynnal gan Weinidogion Cymru neu ar eu rhan o dan neu yn rhinwedd unrhyw ddarpariaeth yn y Rhannau hynny neu'r Rhan hon.
- (2) Caiff Gweinidogion Cymru roi cyfarwyddyd sy'n ei gwneud yn ofynnol i'r ceisydd neu'r apelydd, neu awdurdod cynllunio neu barti arall i'r achos, dalu'r costau y mae Gweinidogion Cymru yn mynd iddynt mewn perthynas â'r achos (neu gymaint o'r costau ag a gyfarwyddir gan Weinidogion Cymru).
- (3) Mae'r costau y mae Gweinidogion Cymru yn mynd iddynt mewn perthynas ag unrhyw achos yn cynnwys –

- (a) yr holl gost weinyddol y mae Gweinidogion Cymru yn mynd iddi mewn cysylltiad â'r achos, gan gynnwys yn benodol swm rhesymol y maent yn ei benderfynu mewn cysylltiad â chostau staff cyffredinol a gorbenion Llywodraeth Cymru;
  - (b) costau mewn cysylltiad ag ymchwiliad neu wrandawriad nad yw'n digwydd.
- (4) Caiff Gweinidogion Cymru drwy reoliadau bennu swm dyddiol safonol ar gyfer achos o ddisgrifiad penodedig.
- (5) Pan fo achos o ddisgrifiad penodedig yn digwydd, rhaid cymryd mai'r costau y mae Gweinidogion Cymru yn mynd iddynt yw –
- (a) y swm dyddiol safonol am bob diwrnod (neu gyfran briodol o'r swm hwnnw am ran o ddiwrnod) y mae person penodedig yn ymwneud ag ymdrin â'r achos;
  - (b) costau yr eir iddynt mewn gwirionedd mewn cysylltiad ag ymdrin â'r achos –
    - (i) ar lwfansau teithio neu gynhaliaeth, neu
    - (ii) ar ddarparu llety neu gyfleusterau eraill;
  - (c) unrhyw gostau y gellir eu priodoli i benodi personau penodedig i gynorthwyo i ymdrin â'r achos;
  - (d) unrhyw gostau neu alldaliadau cyfreithiol yr eir iddynt neu a wneir gan Weinidogion Cymru neu ar eu rhan mewn cysylltiad â'r achos.
- (6) Yn yr adran hon ystyr "penodedig" yw wedi ei bennu mewn rheoliadau a wneir gan Weinidogion Cymru.

### 181 Gorchmynion sy'n ymwneud â chostau partïon

- (1) Mae'r adran hon yn gymwys i'r achosion a ganlyn –
- (a) achos ar gais, apêl neu atgyfeiriad a wneir i neu at Weinidogion Cymru o dan neu yn rhinwedd Rhan 3 neu 4 (pa un a yw'n cael ei ystyried neu ei hystyried mewn ymchwiliad lleol, mewn gwrandawriad neu ar sail sylwadau ysgrifenedig);
  - (b) unrhyw ymchwiliad lleol neu unrhyw wrandawriad arall a gynhelir neu sydd i'w gynnal gan Weinidogion Cymru neu ar eu rhan o dan neu yn rhinwedd unrhyw ddarpariaeth yn y Rhannau hynny neu'r Rhan hon.
- (2) Caiff Gweinidogion Cymru wneud gorchmynion ynghylch –
- (a) costau'r ceisydd neu'r apelydd neu awdurdod cynllunio neu barti arall i'r achos (a all gynnwys costau mewn cysylltiad ag ymchwiliad neu wrandawriad nad yw'n digwydd), a
  - (b) y person neu'r personau sydd i dalu'r costau hynny.
- (3) Ond ni chaiff Gweinidogion Cymru orchymyn i berson dalu costau parti arall oni bai eu bod wedi eu bodloni –
- (a) bod y person wedi ymddwyn yn afresymol mewn perthynas â'r achos, a
  - (b) bod ymddygiad afresymol y person wedi achosi i'r parti arall fynd i wariant diangen neu wariant a wastraffwyd.
- (4) Rhaid i'r pŵer i wneud gorchmynion o dan yr adran hon hefyd gael ei arfer yn unol ag unrhyw ddarpariaeth a wneir o dan adran 175(5)(b) (gofynion gweithdrefnol).

## PENNOD 3

## DILYSRWYDD PENDERFYNIADAU A'U CYWIRO

*Dilysrwydd penderfyniadau a gorchmynion***182 Dilysrwydd penderfyniadau a gorchmynion penodol sy'n ymwneud ag adeiladau**

- (1) Ni chaniateir cwestiynu dilysrwydd penderfyniad neu orchymyn y mae'r adran hon yn gymwys iddo mewn unrhyw achos cyfreithiol ac eithrio cais am adolygiad statudol o dan adran 183.
- (2) Y penderfyniadau y mae'r adran hon yn gymwys iddynt yw –
  - (a) penderfyniad ar adolygiad o dan adran 81 (adolygu penderfyniad rhestru);
  - (b) penderfyniad ar gais a atgyfeirir at Weinidogion Cymru o dan adran 94 (atgyfeirio cais am gydsyniad adeilad rhestredig neu gydsyniad ardal gadwraeth neu i amrywio neu ddileu amodau);
  - (c) penderfyniad ar apêl o dan adran 100 (apêl yn erbyn penderfyniad neu fethiant i wneud penderfyniad ar gais am gydsyniad, i amrywio neu ddileu amodau neu i gymeradwyo manylion);
  - (d) penderfyniad ar gais am gydsyniad adeilad rhestredig neu gydsyniad ardal gadwraeth a wneir i Weinidogion Cymru o dan adran 106 (gwaith brys ar dir y Goron);
  - (e) penderfyniad o dan baragraff 2 o Atodlen 9 i gadarnhau neu beidio â chadarnhau hysbysiad prynu, gan gynnwys –
    - (i) penderfyniad i gadarnhau'r hysbysiad mewn perthynas â rhan yn unig o'r tir y mae'n ymwneud ag ef, a
    - (ii) penderfyniad i roi cydsyniad adeilad rhestredig neu gydsyniad ardal gadwraeth, neu gyfarwyddo bod rhaid rhoi cydsyniad, yn hytrach na chadarnhau'r hysbysiad mewn perthynas â'r tir neu unrhyw ran ohono;
  - (f) penderfyniad o dan adran 128(3)(a) neu (b) (penderfynu apêl yn erbyn hysbysiad gorfodi) i roi cydsyniad adeilad rhestredig neu gydsyniad ardal gadwraeth neu i ddileu amod mewn cydsyniad.
- (3) Y gorchmynion y mae'r adran hon yn gymwys iddynt yw –
  - (a) gorchymyn o dan adran 107 (addasu neu ddirymu cydsyniad) a wneir gan awdurdod cynllunio (pa un a yw wedi ei gadarnhau gan Weinidogion Cymru ai peidio) neu Weinidogion Cymru;
  - (b) gorchymyn o dan adran 115 (terfynu cytundeb partneriaeth adeilad rhestredig neu ddarpariaeth mewn cytundeb) a wneir gan awdurdod cynllunio neu Weinidogion Cymru;
  - (c) gorchymyn o dan adran 181 (gorchmynion sy'n ymwneud â chostau partion) a wneir mewn cysylltiad â phenderfyniad a grybwyllir yn is-adran (2) neu orchymyn a grybwyllir ym mharagraff (a) neu (b).
- (4) Nid yw'r adran hon yn atal unrhyw lys rhag arfer unrhyw awdurdodaeth mewn perthynas â gwrthodiad neu fethiant i wneud penderfyniad y mae'r adran hon yn gymwys iddo.



**183 Cais i'r Uchel Lys am adolygiad statudol o benderfyniad neu orchymyn**

- (1) Caiff person a dramgwyddir gan benderfyniad neu orchymyn y mae adran 182 yn gymwys iddo, neu'r awdurdod sy'n ymwneud yn uniongyrchol â phenderfyniad neu orchymyn o'r fath, wneud cais am adolygiad statudol.
- (2) Mae cais am adolygiad statudol yn gais i'r Uchel Lys sy'n cwestiynu dilysrwydd y penderfyniad neu'r gorchymyn ar y sail –
  - (a) nad yw o fewn y pwerau a roddir gan y Ddeddf hon, neu
  - (b) na chydymffurfiwyd â gofyniad yn y Ddeddf hon, neu mewn is-ddeddfwriaeth a wneir odani, mewn perthynas â'r penderfyniad neu'r gorchymyn.
- (3) Ni chaniateir gwneud cais am adolygiad statudol ond gyda chaniatâd yr Uchel Lys.
- (4) Rhaid i gais am ganiatâd gael ei wneud cyn diwedd 6 wythnos sy'n dechrau â thrannoeth –
  - (a) yn achos cais sy'n ymwneud â penderfyniad a grybwyllir yn adran 182(2), y diwrnod y gwneir y penderfyniad;
  - (b) yn achos cais sy'n ymwneud â gorchymyn a wneir gan awdurdod cynllunio o dan adran 107 ac a gadarnheir gan Weinidogion Cymru (gydag addasiadau neu hebddynt), y diwrnod y cadarnheir y gorchymyn;
  - (c) yn achos unrhyw gais arall sy'n ymwneud â gorchymyn o dan adran 107, y diwrnod y mae'r gorchymyn yn cymryd effaith;
  - (d) yn achos cais sy'n ymwneud â gorchymyn a wneir gan awdurdod cynllunio o dan adran 115, y diwrnod y cadarnheir y gorchymyn;
  - (e) yn achos cais sy'n ymwneud ag unrhyw orchymyn arall a grybwyllir yn adran 182(3), y diwrnod y gwneir y gorchymyn.
- (5) Wrth ystyried pa un ai i roi caniatâd, caiff yr Uchel Lys wneud gorchymyn interim sy'n atal dros dro weithrediad y penderfyniad neu'r gorchymyn y mae'r cais arfaethedig am adolygiad statudol yn ymwneud ag ef hyd nes y penderfynir yn derfynol ar yr achos –
  - (a) ar y cais am ganiatâd, neu
  - (b) pan fo caniatâd wedi ei roi, ar y cais am adolygiad statudol.
- (6) Ar gais am adolygiad statudol, caiff yr Uchel Lys –
  - (a) gwneud gorchymyn interim sy'n atal dros dro weithrediad y penderfyniad neu'r gorchymyn y mae'r cais yn ymwneud ag ef hyd nes y penderfynir yn derfynol ar yr achos;
  - (b) diddymu'r penderfyniad hwnnw neu'r gorchymyn hwnnw os yw wedi ei fodloni –
    - (i) nad yw o fewn y pwerau a roddir gan y Ddeddf hon, neu
    - (ii) bod methiant i gydymffurfio â gofyniad yn y Ddeddf hon, neu mewn is-ddeddfwriaeth a wneir odani, mewn perthynas â'r penderfyniad neu'r gorchymyn, wedi cael effaith andwyol sylweddol ar fuddiannau'r ceisydd.
- (7) At ddibenion yr adran hon yr awdurdod sy'n ymwneud yn uniongyrchol â phenderfyniad neu orchymyn yw –
  - (a) yn achos penderfyniad ar gais a atgyfeiriwyd at Weinidogion Cymru o dan adran 94, yr awdurdod cynllunio a wnaeth yr atgyfeiriad;

- (b) yn achos penderfyniad ar apêl o dan adran 100, yr awdurdod cynllunio y gwnaed y cais y mae'r apêl yn ymwneud ag ef iddo;
- (c) yn achos penderfyniad i gadarnhau neu i beidio â chadarnhau hysbysiad prynu –
  - (i) yr awdurdod cynllunio y cyflwynwyd yr hysbysiad prynu iddo (gweler adran 109), a
  - (ii) os yw Gweinidogion Cymru wedi addasu'r hysbysiad yn gyfan gwbl neu'n rhannol drwy roi awdurdod lleol arall neu ymgymwrwr statudol yn lle'r awdurdod cynllunio, yr awdurdod lleol arall hwnnw neu'r ymgymwrwr statudol hwnnw;
- (d) yn achos penderfyniad o dan adran 128(3)(a) neu (b) ar apêl yn erbyn hysbysiad gorfodi a ddyroddwyd gan awdurdod cynllunio, yr awdurdod a ddyroddodd yr hysbysiad;
- (e) yn achos gorchymyn o dan adran 107, yr awdurdod cynllunio y mae'r adeilad y mae'r gorchymyn yn ymwneud ag ef yn ei ardal;
- (f) yn achos gorchymyn o dan adran 115, unrhyw awdurdod cynllunio sy'n barti i'r cytundeb partneriaeth adeilad rhestredig y mae'r gorchymyn yn ymwneud ag ef neu a oedd yn barti i'r cytundeb hwnnw;
- (g) yn achos gorchymyn a wnaed o dan adran 181 mewn cysylltiad â phenderfyniad neu orchymyn a grybwyllir ym mharagraffau (a) i (f), yr awdurdod a oedd yn ymwneud yn uniongyrchol â'r penderfyniad hwnnw neu'r gorchymyn hwnnw.

**184 Apelio i'r Uchel Lys yn erbyn penderfyniad sy'n ymwneud â hysbysiad gorfodi**

- (1) Rhaid i reolau llys ddarparu naill ai –
  - (a) y caiff person sydd â buddiant apelio i'r Uchel Lys ar bwynt cyfreithiol yn erbyn penderfyniad perthnasol a wneir gan Weinidogion Cymru, neu
  - (b) pan fo Gweinidogion Cymru yn gwneud penderfyniad perthnasol, y caiff person sydd â buddiant ei gwneud yn ofynnol iddynt ddatgan a llofnodi achos i gael barn yr Uchel Lys.
- (2) At ddibenion yr adran hon –
  - (a) mae penderfyniad perthnasol yn unrhyw benderfyniad (gan gynnwys cyfarwyddyd neu orchymyn) a wneir mewn achos ar apêl o dan adran 127 yn erbyn hysbysiad gorfodi, ac eithrio penderfyniad o dan adran 128(3)(a) neu (b) i roi cydsyniad neu i ddileu amod mewn cydsyniad;
  - (b) mae'r personau a ganlyn yn bersonau sydd â buddiant –
    - (i) y person a wnaeth yr apêl,
    - (ii) yr awdurdod cynllunio y mae'r adeilad y mae'r hysbysiad gorfodi yn ymwneud ag ef yn ei ardal, a
    - (iii) unrhyw berson arall a chanddo fuddiant yn yr adeilad.
- (3) Ar unrhyw gam o'r achos ar apêl o dan adran 127, caiff Gweinidogion Cymru ddatgan cwestiwn cyfreithiol sy'n codi yn ystod yr achos ar ffurf achos arbennig i gael penderfyniad yr Uchel Lys.

- (4) Mae penderfyniad gan yr Uchel Lys ar achos a ddatgenir o dan is-adran (3) i'w drin fel pe bai'n ddyfarniad gan y llys at ddibenion adran 16 o Ddeddf Uwchlysoedd 1981 (p. 54) (awdurdodaeth y Llys Apêl i glywed a phenderfynu apelau o ddyfarniadau neu orchmynion yr Uchel Lys).
- (5) Pan fo achos yn cael ei ddwyn yn rhinwedd yr adran hon, caiff yr Uchel Lys neu'r Llys Apêl (yn ôl y digwydd) orchymyn bod yr hysbysiad gorfodi i gael effaith, naill ai'n llawn neu i'r graddau a bennir yn y gorchymyn, hyd nes y penderfynir yn derfynol ar yr achos ac unrhyw ail wrandawriad a phenderfyniad ar yr apêl gan Weinidogion Cymru.
- (6) Caniateir gwneud gorchymyn o dan is-adran (5) ar ba delerau bynnag y mae'r llys yn ystyried eu bod yn briodol, a all gynnwys telerau sy'n ei gwneud yn ofynnol i'r awdurdod cynllunio roi ymgymeriad ynghylch iawndal neu unrhyw fater arall.
- (7) Caiff rheolau llys wneud darpariaeth—
  - (a) i Weinidogion Cymru fod yn barti i achos yn yr Uchel Lys neu'r Llys Apêl a ddygir yn rhinwedd yr adran hon, naill ai'n gyffredinol neu o dan amgylchiadau a bennir yn y rheolau;
  - (b) ynghylch pwerau'r Uchel Lys neu'r Llys Apêl i anfon y mater yn ôl at Weinidogion Cymru ar gyfer ail wrandawriad a phenderfyniad yn unol â barn neu gyfarwyddyd y llys.
- (8) Ni chaniateir dwyn achos yn yr Uchel Lys o dan yr adran hon ond gyda chaniatâd yr Uchel Lys.
- (9) Ni chaniateir dwyn apêl i'r Llys Apêl yn rhinwedd yr adran hon ond gyda chaniatâd yr Uchel Lys neu'r Llys Apêl.

*Cywiro penderfyniadau Gweinidogion Cymru*

**185 Ystyr "dogfen penderfyniad" a "gwall cywiradwy"**

- (1) Mae'r adran hon yn gymwys at ddibenion adrannau 186 a 187.
- (2) Ystyr "dogfen penderfyniad" yw dogfen sy'n cofnodi—
  - (a) penderfyniad y mae adran 182 yn gymwys iddo (gweler is-adran (2) o'r adran honno),
  - (b) penderfyniad ar apêl o dan adran 127 (apêl yn erbyn hysbysiad gorfodi), neu
  - (c) unrhyw benderfyniad arall a wneir o dan neu yn rhinwedd Rhan 3, Rhan 4 neu'r Rhan hon sydd o ddisgrifiad a bennir mewn rheoliadau a wneir gan Weinidogion Cymru.
- (3) Ystyr "gwall cywiradwy" yw gwall—
  - (a) sydd wedi ei gynnwys mewn unrhyw ran o'r ddogfen penderfyniad sy'n cofnodi'r penderfyniad, ond
  - (b) nad yw'n rhan o unrhyw resymau a roddir dros y penderfyniad, ac mae "gwall" yn cynnwys hepgoriad.

**186 Pŵer i gywiro gwallau cywiradwy mewn dogfennau penderfyniad**

- (1) Mae'r adran hon yn gymwys pan fo dogfen penderfyniad yn cael ei dyroddi sy'n cynnwys gwall cywiradwy.

- (2) Os bydd Gweinidogion Cymru, cyn diwedd y cyfnod adolygu –
- (a) yn cael cais ysgrifenedig i gywiro'r gwall oddi wrth unrhyw berson, neu
  - (b) yn anfon datganiad ysgrifenedig at y ceisydd sy'n esbonio'r gwall ac yn datgan eu bod yn ystyried ei gywiro,
- rhaid i Weinidogion Cymru benderfynu pa un ai i gywiro'r gwall ai peidio.
- (3) Ond ni chaiff Gweinidogion Cymru wneud cywiriad oni bai eu bod wedi hysbysu'r awdurdod cynllunio eu bod wedi cael y cais a grybwyllir yn is-adran (2)(a) neu wedi anfon y datganiad a grybwyllir yn is-adran (2)(b).
- (4) Y cyfnod adolygu yw –
- (a) pan fo'r ddogfen penderfyniad yn cofnodi penderfyniad y mae adran 182 yn gymwys iddo, y cyfnod y caniateir i gais am ganiatâd i wneud cais am adolygiad statudol o dan adran 183 gael ei wneud ynddo i'r Uchel Lys;
  - (b) pan fo'r ddogfen penderfyniad yn cofnodi penderfyniad ar apêl o dan adran 127 nad yw adran 182 yn gymwys iddo, y cyfnod y caniateir i gais am ganiatâd i ddwyn achos o dan adran 184 gael ei wneud ynddo i'r Uchel Lys, heb gynnwys unrhyw amser y caiff yr Uchel Lys estyn y cyfnod hwnnw,
- ac nid oes gwahaniaeth a wneir unrhyw gais o'r fath mewn gwirionedd.
- (5) Cyn gynted ag y bo'n ymarferol ar ôl i Weinidogion Cymru gywiro'r gwall neu ar ôl iddynt benderfynu peidio â'i gywiro, rhaid iddynt ddyroddi hysbysiad cywiro.
- (6) Mae hysbysiad cywiro yn hysbysiad sydd –
- (a) yn pennu cywiriad y gwall, neu
  - (b) yn rhoi hysbysiad o benderfyniad i beidio â'i gywiro.
- (7) Rhaid i Weinidogion Cymru gyflwyno'r hysbysiad cywiro –
- (a) i'r ceisydd;
  - (b) os nad y ceisydd yw perchennog yr adeilad neu'r tir arall y mae'r penderfyniad gwreiddiol yn ymwneud ag ef, i bob perchennog ar yr adeilad neu'r tir;
  - (c) i'r awdurdod cynllunio;
  - (d) os gofynnodd unrhyw berson arall am y cywiriad, i'r person hwnnw;
  - (e) i unrhyw berson arall a bennir, neu sydd o ddisgrifiad a bennir, mewn rheoliadau a wneir gan Weinidogion Cymru.
- (8) Pan ddyroddwyd y ddogfen penderfyniad gan berson a benodir o dan adran 173, caniateir i swyddogaethau Gweinidogion Cymru o dan yr adran hon gael eu harfer hefyd gan y person hwnnw neu gan unrhyw berson arall a benodir o dan yr adran honno i benderfynu apelau yn lle Gweinidogion Cymru.
- (9) Yn yr adran hon –
- ystyr "yr awdurdod cynllunio" ("*the planning authority*") yw'r awdurdod cynllunio y mae'r adeilad neu'r tir arall y mae'r penderfyniad gwreiddiol yn ymwneud ag ef yn ei ardal;

ystyr “y ceisydd” (“*the applicant*”) yw’r person a wnaeth y cais neu’r apêl, neu a gyflwynodd yr hysbysiad prynu, y mae’r penderfyniad gwreiddiol yn ymwneud ag ef neu hi;

ystyr “perchennog” (“*owner*”), mewn perthynas ag adeilad neu dir arall, yw –

- (a) perchennog ar yr ystad rydd-ddaliadol yn yr adeilad neu’r tir, neu
- (b) tenant o dan les ar yr adeilad neu’r tir a roddir neu a estynnir am gyfnod penodol sydd ag o leiaf 7 mlynedd yn weddill.

#### 187 Effaith a dilysrwydd hysbysiad cywiro

- (1) Os gwneir cywiriad o dan adran 186 –
  - (a) mae’r penderfyniad gwreiddiol i’w drin fel pe na bai wedi ei wneud;
  - (b) mae’r penderfyniad i’w drin at bob diben fel pe bai wedi ei wneud ar y diwrnod y dyroddir yr hysbysiad cywiro.
- (2) Os na wneir cywiriad –
  - (a) mae’r penderfyniad gwreiddiol yn parhau i gael effaith;
  - (b) nid yw adran 186 na’r adran hon yn effeithio ar unrhyw beth a wneir yn unol â’r penderfyniad neu mewn perthynas ag ef.
- (3) Pan fo hysbysiad cywiro yn cael ei ddyroddi mewn perthynas â phenderfyniad y mae adran 182 yn gymwys iddo, mae adran 183 yn gymwys i’r hysbysiad cywiro fel pe bai’n benderfyniad y mae adran 182 yn gymwys iddo.
- (4) Pan fo hysbysiad cywiro yn cael ei ddyroddi mewn perthynas â phenderfyniad y mae adran 184 yn gymwys iddo, mae adran 184 yn gymwys i’r hysbysiad cywiro fel pe bai’n benderfyniad y mae’r adran honno yn gymwys iddo.
- (5) Pan fo rheoliadau o dan adran 185(2)(c) yn pennu disgrifiad o benderfyniad, rhaid i Weinidogion Cymru drwy reoliadau wneud darpariaeth sy’n cyfateb i adran 183 neu 184 ar gyfer cwstyynu dilysrwydd hysbysiad cywiro a ddyroddir mewn perthynas â phenderfyniad o’r disgrifiad hwnnw.
- (6) Ni chaniateir cwstyynu dilysrwydd hysbysiad cywiro mewn unrhyw achos cyfreithiol ac eithrio i’r graddau a ddarperir yn rhinwedd yr adran hon.

### PENNOD 4

#### CYFFREDINOL

##### *Y Goron*

#### 188 Cynrychiolaeth buddiannau’r Goron a buddiannau’r Ddugiaeth mewn tir

- (1) Mae’r adran hon yn gymwys i unrhyw beth y mae’n ofynnol ei wneud neu sydd wedi ei awdurdodi i’w wneud at ddibenion Rhan 3, Rhan 4 neu’r Rhan hon gan berchennog ar fuddiant mewn tir (gan gynnwys buddiant fel meddiannydd ar y tir yn unig) neu mewn perthynas â pherchennog o’r fath.
- (2) I’r graddau y mae’r buddiant yn fuddiant y Goron neu fuddiant y Ddugiaeth, rhaid i’r peth gael ei wneud gan awdurdod priodol y Goron neu mewn perthynas â’r awdurdod hwnnw.

**189 Cyflwyno dogfennau i'r Goron**

- (1) Mae'r adran hon yn gymwys pan fo cyflwyno hysbysiad neu ddogfen arall i'r Goron yn ofynnol neu wedi ei awdurdodi o dan neu yn rhinwedd Rhan 3, Rhan 4 neu'r Rhan hon.
- (2) Rhaid cyflwyno'r ddogfen i awdurdod priodol y Goron.
- (3) Nid yw adrannau 205 a 206 (darpariaethau cyffredinol ynghylch dulliau cyflwyno) yn gymwys i gyflwyno'r ddogfen.

**190 Camau gorfodi mewn perthynas â thir y Goron**

- (1) Ni chaiff awdurdod cynllunio gymryd cam gorfodi perthnasol mewn perthynas â thir y Goron heb gytundeb awdurdod priodol y Goron.
- (2) Caiff awdurdod priodol y Goron roi cytundeb yn ddarostyngedig i amodau.
- (3) Yn yr adran hon ystyr "cam gorfodi perthnasol" yw unrhyw beth a wneir mewn cysylltiad â gorfodi gofyniad neu waharddiad a osodir gan neu o dan Ran 3, Rhan 4 neu'r Rhan hon.
- (4) Mae'n cynnwys –
  - (a) mynd ar dir, a
  - (b) dwyn achos neu wneud cais.
- (5) Ond nid yw'n cynnwys –
  - (a) dyroddi neu gyflwyno hysbysiad (er enghraifft hysbysiad gorfodi neu hysbysiad stop dros dro), neu
  - (b) gwneud gorchymyn (er enghraifft gorchymyn o dan adran 107 neu 115).

*Dehongli***191 Ystyr "awdurdod lleol" yn y Rhan hon**

Yn y Rhan hon mae i "awdurdod lleol" yr ystyr a roddir gan adran 157.

**RHAN 6****ASEDAU TREFTADAETH ERAILL A CHOFNODION***Parciau a gerddi hanesyddol***192 Dyletswydd i gynnal a chyhoeddi cofrestr o barciau a gerddi hanesyddol**

- (1) Rhaid i Weinidogion Cymru gynnal cofrestr o barciau a gerddi yng Nghymru y maent yn ystyried eu bod o ddi-ddordeb hanesyddol arbennig, a rhaid iddynt gyhoeddi'r gofrestr gyfredol.
- (2) Rhaid i Weinidogion Cymru benderfynu pa un ai i gynnwys, neu i ba raddau y dylid cynnwys, fel rhan o gofrestriad parc neu ardd –
  - (a) unrhyw adeilad neu ddŵr sydd arno neu arni, sy'n cydffinio ag ef neu â hi neu sy'n gyfagos iddo neu iddi, neu
  - (b) unrhyw dir sy'n cydffinio ag ef neu â hi neu sy'n gyfagos iddo neu iddi.
- (3) Caiff Gweinidogion Cymru ddiwygio'r gofrestr drwy –
  - (a) ychwanegu cofnod,



- (b) dileu cofnod, neu
- (c) diwygio cofnod.
- (4) Cyn gynted ag y bo'n bosibl ar ôl diwygio'r gofrestr, rhaid i Weinidogion Cymru –
  - (a) cyflwyno hysbysiad eu bod wedi gwneud hynny i'r personau a grybwyllir yn is-adran (5), a
  - (b) yn achos unrhyw ddiwygiad o dan is-adran (3)(a) neu (c), gynnwys gyda'r hysbysiad gopi o'r cofnod neu'r cofnod diwygiedig yn y gofrestr.
- (5) Y personau y cyfeirir atynt yn is-adran (4) yw –
  - (a) pob perchennog a phob meddiannydd ar y parc neu'r ardd o dan sylw (gan gynnwys, os ydynt yn wahanol, berchnogion a meddianwyr unrhyw beth sy'n ymddangos yn y gofrestr yn rhinwedd is-adran (2));
  - (b) yr awdurdod cynllunio y mae'r parc neu'r ardd yn ei ardal (gan gynnwys, os yw'n wahanol, yr awdurdod cynllunio y mae unrhyw beth sy'n ymddangos yn y gofrestr yn rhinwedd is-adran (2) yn ei ardal).
- (6) Yn yr adran hon mae cyfeiriadau at barciau a gerddi yn cynnwys –
  - (a) manau hamdden, a
  - (b) unrhyw diroedd eraill sydd wedi eu dylunio (gan gynnwys tirweddau addurnol sydd wedi eu dylunio).

*Enwau lleoedd hanesyddol***193 Dyletswydd i gynnal a chyhoeddi rhestr o enwau lleoedd hanesyddol**

Rhaid i Weinidogion Cymru gynnal rhestr o enwau lleoedd hanesyddol yng Nghymru, a rhaid iddynt gyhoeddi'r rhestr gyfredol.

*Cofnodion amgylchedd hanesyddol***194 Dyletswydd i gynnal cofnodion amgylchedd hanesyddol**

- (1) Rhaid i Weinidogion Cymru gynnal cofnod amgylchedd hanesyddol ar gyfer pob ardal awdurdod lleol.
- (2) Mae cofnod amgylchedd hanesyddol yn gofnod sy'n darparu –
  - (a) manylion pob heneb gofrestredig yn ardal yr awdurdod,
  - (b) manylion pob adeilad rhestredig yn ardal yr awdurdod,
  - (c) manylion pob ardal gadwraeth yn ardal yr awdurdod,
  - (d) manylion pob parc neu ardd yn ardal yr awdurdod sydd wedi ei gynnwys neu ei chynnwys yn y gofrestr o barciau a gerddi hanesyddol a gynhelir o dan adran 192,
  - (e) manylion pob safle gwrthdaro yn ardal yr awdurdod y mae Gweinidogion Cymru yn ystyried ei fod o ddiddordeb hanesyddol,
  - (f) pan fo awdurdod cyhoeddus (pa un ai ar ei ben ei hun neu ar y cyd â phersonau eraill) yn cynnal rhestr o dirweddau hanesyddol yng Nghymru, fanylion pob tirwedd hanesyddol yn ardal yr awdurdod lleol sydd wedi ei chynnwys yn y rhestr,
  - (g) manylion pob safle treftadaeth y byd yn ardal yr awdurdod,

- (h) manylion pob ardal arall neu safle arall yn ardal yr awdurdod y mae'r awdurdod neu Weinidogion Cymru yn ystyried ei bod neu ei fod o ddiddordeb hanesyddol, archaeolegol neu bensaernïol lleol,
  - (i) gwybodaeth am y ffordd y mae datblygiad hanesyddol, archaeolegol neu bensaernïol ardal yr awdurdod, neu unrhyw ran ohoni, wedi cyfrannu at gymeriad presennol yr ardal neu'r rhan ac am sut y gellir diogelu'r cymeriad hwnnw,
  - (j) manylion ymchwiliadau perthnasol a gynhelir yn ardal yr awdurdod a manylion canfyddiadau'r ymchwiliadau hynny, a
  - (k) dull o gael mynediad at fanylion pob enw lle hanesyddol yn ardal yr awdurdod sydd wedi ei gynnwys yn y rhestr a gynhelir o dan adran 193.
- (3) Yn is-adran (2)(e) ystyr "safle gwrthdaro" yw –
- (a) maes brwydr neu safle lle y digwyddodd rhyw wrthdaro arall yr oedd lluoedd arfog yn rhan ohono, neu
  - (b) safle lle y digwyddodd gweithgareddau sylweddol a oedd yn ymwneud â brwydr neu wrthdaro arall yr oedd lluoedd arfog yn rhan ohono.
- (4) Yn is-adran (2)(g) ystyr "safle treftadaeth y byd" yw unrhyw beth sy'n ymddangos ar Restr Treftadaeth y Byd a gedwir o dan Erthygl 11(2) o Gonfensiwn UNESCO ynghylch Gwarchod Treftadaeth Ddiwylliannol a Naturiol y Byd a fabwysiadwyd ym Mharis ar 16 Tachwedd 1972.
- (5) Yn is-adran (2)(j) ystyr "ymchwiliad perthnasol" yw –
- (a) ymchwiliad gan awdurdod lleol neu Weinidogion Cymru at ddiben cael gwybodaeth o ddiddordeb hanesyddol, archaeolegol neu bensaernïol sy'n ymwneud ag ardal yr awdurdod, a
  - (b) unrhyw ymchwiliad arall at y diben hwnnw y mae Gweinidogion Cymru yn ystyried ei bod yn briodol ei gynnwys yn y cofnod.
- (6) Caiff Gweinidogion Cymru drwy reoliadau ddiwygio'r adran hon i amrywio ystyr "cofnod amgylchedd hanesyddol".
- (7) Cyn gwneud rheoliadau o dan is-adran (6), rhaid i Weinidogion Cymru ymgynghori –
- (a) â phob awdurdod lleol, a
  - (b) ag unrhyw bersonau eraill y mae Gweinidogion Cymru yn ystyried eu bod yn briodol.
- (8) At ddibenion yr adran hon –
- (a) mae unrhyw gyfeiriad at ardal awdurdod lleol yn cynnwys, yn achos awdurdod y mae ei ardal yn cynnwys rhan o lan y môr, unrhyw ran o'r môr sy'n gorwedd tua'r môr o'r rhan honno o'r lan ac sy'n ffurfio rhan o Gymru, a
  - (b) mae ardal, safle neu beth i gael ei thrin neu ei drin fel pe bai mewn ardal awdurdod lleol os yw unrhyw ran ohoni neu ohono yn yr ardal.
- (9) Yn yr adran hon ac adran 196, ystyr "awdurdod lleol" yw cyngor sir neu gyngor bwrdeistref sirol yng Nghymru.

**195 Mynediad at gofnodion amgylchedd hanesyddol**

- (1) Rhaid i Weinidogion Cymru –
  - (a) rhoi pob cofnod amgylchedd hanesyddol ar gael i'r cyhoedd edrych arno, a
  - (b) rhoi ar gael i berson sy'n dymuno edrych ar gofnod amgylchedd hanesyddol gyngor ar adalw a deall gwybodaeth sydd wedi ei darparu yn y cofnod neu y ceir mynediad ati drwy'r cofnod, neu gynhorthwy i wneud hynny.
- (2) Os yw –
  - (a) person yn gofyn am gopi o ran o gofnod amgylchedd hanesyddol neu fanylion y ceir mynediad atynt drwy gofnod o'r fath, a
  - (b) Gweinidogion Cymru yn ystyried bod y cais yn rhesymol,
 rhaid i Weinidogion Cymru ddarparu'r copi hwnnw neu'r manylion hynny i'r person.
- (3) Os yw –
  - (a) person yn gofyn i wybodaeth sydd wedi ei darparu mewn cofnod amgylchedd hanesyddol neu y ceir mynediad ati drwy gofnod o'r fath gael ei hadalw, a
  - (b) Gweinidogion Cymru yn ystyried bod y cais yn rhesymol,
 rhaid i Weinidogion Cymru lunio dogfen ar gyfer y person sy'n cynnwys yr wybodaeth.
- (4) Wrth asesu a yw cais yn rhesymol at ddibenion is-adran (2) neu (3), mae'r materion y caiff Gweinidogion Cymru eu hystyried yn cynnwys unrhyw geisiadau blaenorol a wnaed gan y person o dan sylw neu ar ei ran.
- (5) Caiff Gweinidogion Cymru godi ffi –
  - (a) am ddarparu cyngor neu gynhorthwy o dan is-adran (1)(b);
  - (b) am ddarparu copi neu fanylion o dan is-adran (2);
  - (c) am lunio dogfen o dan is-adran (3).
- (6) Rhaid i ffi gael ei chyfrifo gan ystyried y gost o ddarparu'r gwasanaeth y mae'r ffi yn ymwneud ag ef.

**196 Canllawiau i gyrff cyhoeddus penodol ynghylch cofnodion amgylchedd hanesyddol**

- (1) Rhaid i Weinidogion Cymru ddyroddi canllawiau i'r gyrff a restrir yn is-adran (2) –
  - (a) ar sut y gall y gyrff gyfrannu tuag at lunio cofnodion amgylchedd hanesyddol a chynorthwyo i gynnal y cofnodion, a
  - (b) ar y defnydd o gofnodion amgylchedd hanesyddol wrth arfer swyddogaethau'r gyrff.
- (2) Y gyrff yw –
  - (a) awdurdodau lleol,
  - (b) awdurdodau Parciau Cenedlaethol yng Nghymru, ac
  - (c) Cyfoeth Naturiol Cymru.
- (3) Rhaid i'r gyrff hynny roi sylw i'r canllawiau.
- (4) Cyn dyroddi canllawiau o dan yr adran hon, rhaid i Weinidogion Cymru ymgynghori –
  - (a) â'r gyrff, a

- (b) ag unrhyw bersonau eraill y maent yn ystyried eu bod yn briodol.
- (5) Rhaid i Weinidogion Cymru osod gerbron Senedd Cymru unrhyw ganllawiau a ddyroddir o dan yr adran hon.

## RHAN 7

### CYFFREDINOL

*Pwerau i wneud gwybodaeth am fuddiannau mewn tir yn ofynnol*

#### 197 Pŵer i wneud gwybodaeth yn ofynnol drwy hysbysiad

- (1) Caiff awdurdod perthnasol gyflwyno hysbysiad (“hysbysiad gwybodaeth”) sy’n ei gwneud yn ofynnol i feddiannydd unrhyw dir neu i berson sy’n cael rhent (naill ai’n uniongyrchol neu’n anuniongyrchol) mewn cysylltiad ag unrhyw dir gadarnhau’n ysgrifenedig –
- natur buddiant y person yn y tir, a
  - enw a chyfeiriad unrhyw berson arall sy’n wybyddus i’r person fel rhywun y mae ganddo fuddiant yn y tir.
- (2) Ond ni chaiff awdurdod perthnasol gyflwyno hysbysiad gwybodaeth oni bai bod ar yr awdurdod angen yr wybodaeth sy’n ofynnol gan yr hysbysiad i’w alluogi –
- i arfer unrhyw un neu ragor o swyddogaethau’r awdurdod o dan neu yn rhinwedd Rhan 2, neu
  - i wneud gorchymyn neu ddyroddi neu gyflwyno hysbysiad neu ddogfen arall o dan neu yn rhinwedd Rhan 3, 4 neu 5.
- (3) Caiff hysbysiad gwybodaeth ei gwneud yn ofynnol i’r wybodaeth gael ei rhoi –
- o fewn 21 o ddiwrnodau sy’n dechrau â thrannoeth y diwrnod y cyflwynir yr hysbysiad, neu
  - o fewn unrhyw gyfnod hwy a bennir gan yr hysbysiad neu a ganiateir gan yr awdurdod perthnasol.
- (4) Yn yr adran hon ystyr “awdurdod perthnasol” yw –
- Gweinidogion Cymru;
  - awdurdod lleol (o fewn yr ystyr a roddir gan adran 157).

#### 198 Troseddau mewn cysylltiad ag adran 197

- (1) Mae person y mae hysbysiad o dan adran 197 yn ei gwneud yn ofynnol iddo ddarparu gwybodaeth yn cyflawni trosedd os yw’r person yn methu, heb esgus rhesymol, â darparu’r wybodaeth.
- (2) Mae person sy’n euog o drosedd o dan is-adran (1) yn agored ar euogfarn ddiannod i ddirwy nad yw’n uwch na lefel 3 ar y raddfa safonol.
- (3) Mae person y mae hysbysiad o dan adran 197 yn ei gwneud yn ofynnol iddo ddarparu gwybodaeth yn cyflawni trosedd os yw’r person, gan ymholni ei fod yn cydymffurfio â’r hysbysiad, yn darparu gwybodaeth y mae’n gwybod ei bod yn anwir neu’n gamarweiniol mewn modd perthnasol.

- (4) Mae person sy'n euog o drosedd o dan is-adran (3) yn agored ar euogfarn ddiannod, neu ar euogfarn ar dditiad, i ddirwy.

### 199 Gwybodaeth am fuddiannau yn nhir y Goron

- (1) Mae'r adran hon yn gymwys i fuddiant yn nhir y Goron nad yw'n fuddiant preifat.
- (2) Nid yw adran 197 yn gymwys i fuddiant y mae'r adran hon yn gymwys iddo.
- (3) Ond caiff Gweinidogion Cymru, at ddiben galluogi awdurdod perthnasol i arfer swyddogaeth a grybwyllir yn adran 197(2)(a) neu (b), ofyn i awdurdod priodol y Goron gadarnhau'n ysgrifenedig –
- (a) natur buddiant yr awdurdod yn y tir;
  - (b) enw a chyfeiriad unrhyw berson arall sy'n wybyddus i'r awdurdod fel rhywun y mae ganddo fuddiant yn y tir.
- (4) Rhaid i awdurdod priodol y Goron gydymffurfio â chais o dan is-adran (3) ac eithrio i'r graddau –
- (a) nad yw'r wybodaeth y gofynnir amdani o fewn gwybodaeth yr awdurdod, neu
  - (b) y bydd gwneud hynny yn datgelu gwybodaeth –
    - (i) am ddiogelwch gwladol, neu
    - (ii) am y mesurau sydd wedi eu cymryd neu sydd i'w cymryd i sicrhau diogelwch unrhyw dir neu eiddo arall.

#### *Troseddau*

### 200 Troseddau gan gyrff corfforedig

- (1) Mae'r adran hon yn gymwys pan brofir bod trosedd o dan y Ddeddf hon a gyflawnwyd gan gorff corfforedig wedi ei chyflawni gyda chydysniad neu ymoddefiad y canlynol, neu y gellir ei phriodoli i esgeulustod ar ran y canlynol –
- (a) uwch-swyddog i'r corff, neu
  - (b) person a oedd yn ymholni ei fod yn uwch-swyddog i'r corff.
- (2) Mae'r uwch-swyddog neu'r person (yn ogystal â'r corff corfforedig) yn euog o'r drosedd, ac yn agored i gael ei erlyn a'i gosbi yn unol â hynny.
- (3) Yn yr adran hon ystyr "uwch-swyddog" yw cyfarwyddwr, rheolwr, ysgrifennydd neu swyddog tebyg arall i'r corff corfforedig.
- (4) Ond yn achos corff corfforedig y mae ei faterion yn cael eu rheoli gan ei aelodau, ystyr "cyfarwyddwr" yw aelod o'r corff.

### 201 Sancsiynau sifil

- (1) Caiff Gweinidogion Cymru drwy reoliadau wneud unrhyw ddarpariaeth mewn perthynas â throsedd o dan y Ddeddf hon y gallent ei gwneud o dan Ran 3 o DGRhS 2008 (sanctiynau sifil) pe bai, at ddibenion y Rhan honno –
- (a) Gweinidogion Cymru neu unrhyw awdurdod arall a chanddo swyddogaeth orfodi mewn perthynas â'r drosedd yn rheoleiddiwr, a
  - (b) y drosedd yn drosedd berthnasol mewn perthynas â'r rheoleiddiwr hwnnw.

- (2) Mae adrannau 59(3) a 60(1) a (2) o DGRhS 2008 (ymgyngori) yn gymwys i reoliadau o dan is-adran (1) fel y maent yn gymwys i orchymyn o dan Ran 3 o DGRhS 2008.
- (3) Mae adrannau 63 i 70 o DGRhS 2008 (canllawiau, arfer pwerau, taliadau i Gronfa Gyfunol Cymru a datgelu gwybodaeth) ym gymwys mewn perthynas â darpariaeth a wneir o dan is-adran (1) fel y maent yn gymwys mewn perthynas â darpariaeth a wneir o dan Ran 3 o DGRhS 2008.
- (4) Yn is-adran (1) mae'r cyfeiriad at awdurdod a chanddo swyddogaeth orfodi i'w ddehongli yn unol ag adran 71 o DGRhS 2008.
- (5) Yn yr adran hon ystyr "DGRhS 2008" yw Deddf Gorfodi Rheoleiddiol a Sanctsiynau 2008 (p. 13).

### *Digollediad*

#### **202 Gwneud hawliadau am ddigollediad**

- (1) Caiff Gweinidogion Cymru drwy reoliadau –
  - (a) gwneud darpariaeth ynghylch sut y mae rhaid gwneud hawliad am ddigollediad o dan y Ddeddf hon;
  - (b) diwygio unrhyw ddarpariaeth yn y Ddeddf hon sy'n pennu'r cyfnod y mae rhaid gwneud hawliad am ddigollediad ynddo.
- (2) Caiff Gweinidogion Cymru estyn y cyfnod ar gyfer gwneud hawliad am ddigollediad o dan y Ddeddf hon mewn achos penodol, os ydynt wedi eu bodloni bod rhesymau da dros wneud hynny.
- (3) Caniateir estyn y cyfnod ar gyfer gwneud hawliad –
  - (a) ar unrhyw adeg, pa un ai cyn neu ar ôl i'r cyfnod ddod i ben, a
  - (b) mwy nag unwaith.

#### **203 Penderfynu hawliadau digollediad gan yr Uwch Dribiwnlys**

- (1) Mae unrhyw anghydfod ynghylch digollediad o dan y Ddeddf hon i'w atgyfeirio at yr Uwch Dribiwnlys ac i'w benderfynu ganddo.
- (2) Mae adran 4 o Ddeddf Digollediad Tir 1961 (p. 33) (costau) yn gymwys i benderfynu cwestiwn a atgyfeirir o dan yr adran hon fel y mae'n gymwys i benderfynu cwestiwn a atgyfeirir o dan adran 1 o'r Ddeddf honno, ond fel pe bai cyfeiriadau at yr "acquiring authority" yn gyfeiriadau at y person yr hawlir digollediad oddi wrtho.

#### **204 Digollediad am ddibrisiant yng ngwerth tir**

- (1) Mae'r rheolau yn adran 5 o Ddeddf Digollediad Tir 1961 (p. 33) yn cael effaith at ddiben asesu unrhyw ddigollediad am ddibrisiant sy'n daladwy o dan y Ddeddf hon, i'r graddau y maent yn berthnasol a chydag unrhyw addasiadau angenrheidiol, fel y maent yn cael effaith at ddiben asesu digollediad am gaffael yn orfodol fuddiant mewn tir.
- (2) Pan fo buddiant mewn tir yn ddarostyngedig i forgais –
  - (a) rhaid i unrhyw ddigollediad am ddibrisiant sy'n daladwy o dan y Ddeddf hon mewn cysylltiad â'r buddiant gael ei asesu fel pe na bai'r buddiant yn ddarostyngedig i'r morgais;



- (b) caniateir i hawliad am ddigollediad am ddibrisiant gael ei wneud gan unrhyw forgeisai i'r buddiant, ond nid yw hynny yn effeithio ar hawl y person y mae ei fuddiant yn ddarostyngedig i'r morgais i wneud hawliad;
  - (c) nid oes digollediad am ddibrisiant yn daladwy mewn cysylltiad â buddiant y morgeisai (sy'n wahanol i'r buddiant sy'n ddarostyngedig i'r morgais);
  - (d) rhaid i unrhyw ddigollediad am ddibrisiant sy'n daladwy mewn cysylltiad â'r buddiant sy'n ddarostyngedig i'r morgais gael ei dalu i'r morgeisai neu, os oes mwy nag un morgeisai, i'r morgeisai cyntaf; a rhaid iddo gael ei gymhwyso gan y morgeisai y telir y digollediad iddo fel pe bai'n enillion gwerthu.
- (3) Yn yr adran hon ystyr "digollediad am ddibrisiant" yw digollediad am golled neu ddifrod sy'n ddibrisiant yng ngwerth buddiant mewn tir.

*Cyflwyno dogfennau*

**205 Cyflwyno hysbysiadau a dogfennau eraill: cyffredinol**

- (1) Mae'r adran hon yn gymwys pan fo darpariaeth sydd wedi ei chynnwys yn y Ddeddf hon neu a wneir odani yn ei gwneud yn ofynnol i hysbysiad neu ddogfen arall gael ei gyflwyno neu ei chyflwyno i berson neu'n awdurdodi cyflwyno hysbysiad neu ddogfen arall i berson (pa un a yw'r ddarpariaeth yn defnyddio'r gair "cyflwyno" neu "rhoi" neu unrhyw derm arall).
- (2) Caniateir cyflwyno'r ddogfen i'r person yn unrhyw un o'r ffyrdd a ganlyn –
- (a) drwy ei rhoi â llaw i'r person neu, yn achos person sy'n gorff corfforedig, ei rhoi â llaw i ysgrifennydd neu glerc y corff yn ei swyddfa gofrestrredig neu ei brif swyddfa;
  - (b) drwy ei gadael ym man preswyllo arferol y person neu ym man preswyllo hysbys diwethaf y person neu, os yw'r person wedi rhoi cyfeiriad ar gyfer cyflwyno, yn y cyfeiriad hwnnw;
  - (c) drwy ei hanfon drwy'r post mewn llythyr wedi ei ragdalau –
    - (i) wedi ei gyfeirio at y person ym man preswyllo arferol y person neu ym man preswyllo hysbys diwethaf y person neu, yn achos person sy'n gorff corfforedig, wedi ei gyfeirio at ysgrifennydd neu glerc y corff yn ei swyddfa gofrestrredig neu ei brif swyddfa, neu
    - (ii) os yw'r person wedi rhoi cyfeiriad ar gyfer cyflwyno, wedi ei gyfeirio i'r person yn y cyfeiriad hwnnw;
  - (d) os yw'r person wedi rhoi cyfeiriad ar gyfer cyflwyno gan ddefnyddio cyfathrebiadau electronig, drwy ei hanfon at y person yn y cyfeiriad hwnnw gan ddefnyddio cyfathrebiad electronig sy'n cydymffurfio â'r amodau yn is-adran (3).
- (3) Yr amodau yw –
- (a) bod modd i'r person yr anfonir y ddogfen ato gyrchu'r ddogfen,
  - (b) bod y ddogfen yn ddarllenadwy ym mhob modd perthnasol, ac
  - (c) bod y ddogfen yn gallu cael ei defnyddio i gyfeirio ati yn ddiweddarach.
- (4) Pan fo cyfathrebiad electronig yn cael ei ddefnyddio i gyflwyno dogfen i berson a bod y ddogfen yn dod i law'r person y tu allan i oriau busnes y person, mae'r ddogfen i'w thrin fel pe bai wedi ei chyflwyno ar y diwrnod gwaith nesaf.

- (5) Gweler adran 233 o Ddeddf Llywodraeth Leol 1972 (p. 70) am ddarpariaeth ychwanegol ynghylch y dulliau y caiff awdurdodau lleol eu defnyddio i gyflwyno dogfennau.

**206 Darpariaeth ychwanegol ynghylch cyflwyno i bersonau sydd â buddiant mewn tir neu sy'n meddiannu tir**

- (1) Mae'r adran hon yn gymwys (yn ychwanegol at adran 205) pan fo darpariaeth sydd wedi ei chynnwys yn y Ddeddf hon neu a wneir odani yn ei gwneud yn ofynnol i hysbysiad neu ddogfen arall gael ei gyflwyno neu ei chyflwyno i berson, neu'n awdurdodi cyflwyno hysbysiad neu ddogfen arall i berson –
- (a) am fod ganddo fuddiant mewn adeilad, heneb neu dir, neu
  - (b) am ei fod yn feddiannydd ar adeilad, heneb neu dir.
- (2) Pan fo'r ddogfen i'w chyflwyno i berson am fod ganddo fuddiant mewn adeilad, heneb neu dir, ac na ellir darganfod enw'r person ar ôl gwneud ymholiadau rhesymol, caniateir cyfeirio'r ddogfen at y person fel "y perchennog" ar yr adeilad, yr heneb neu'r tir (y mae rhaid ei ddisgrifio neu ei disgrifio).
- (3) Pan fo'r ddogfen i'w chyflwyno i berson am ei fod yn feddiannydd ar adeilad, heneb neu dir, caniateir ei chyfeirio at y person wrth ei enw neu fel "y meddiannydd" ar yr adeilad, yr heneb neu'r tir (y mae rhaid ei ddisgrifio neu ei disgrifio).
- (4) Mae is-adran (5) yn gymwys –
- (a) pan –
    - (i) bo dogfen i'w chyflwyno i berson am fod ganddo fuddiant mewn adeilad, heneb neu dir,
    - (ii) na fo modd darganfod man preswyllo arferol neu fan preswyllo hysbys diwethaf y person ar ôl gwneud ymholiadau rhesymol, a
    - (iii) na fo'r person wedi rhoi cyfeiriad ar gyfer cyflwyno'r ddogfen, neu
  - (b) pan fo dogfen i'w chyflwyno i berson am ei fod yn feddiannydd ar adeilad, heneb neu dir.
- (5) Mae'r ddogfen i'w thrin fel pe bai wedi ei chyflwyno'n briodol os yw wedi ei chyfeirio at y person, wedi ei marcio'n glir fel cyfathrebiad pwysig sy'n effeithio ar eiddo'r person, a'i bod –
- (a) wedi ei hanfon i'r adeilad, yr heneb neu'r tir drwy'r post ac nad yw wedi ei dychwelyd fel dogfen nas danfonwyd,
  - (b) wedi ei rhoi â llaw i berson sydd, neu yr ymddengys ei fod, yn preswyllo neu wedi ei gyflogi yn neu ar yr adeilad, yr heneb neu'r tir, neu
  - (c) wedi ei gosod yn sownd mewn lle gweladwy ar yr adeilad neu'r heneb neu ar wrthrych ar safle'r heneb neu ar y tir.

*Achosion arbennig*

**207 Diffiniadau sy'n ymwneud â'r Goron**

- (1) Mae'r adran hon yn gymwys at ddibenion y Ddeddf hon.
- (2) Ystyr "tir y Goron" yw tir y mae buddiant y Goron neu fuddiant y Ddugiaeth ynddo.

- (3) Ystyr “buddiant y Goron” yw buddiant –
  - (a) sy’n perthyn i’w Fawrhydi yn hawl y Goron neu yn hawl Ei ystadau preifat, neu
  - (b) sy’n perthyn i adran o’r llywodraeth neu sy’n cael ei ddal mewn ymddiriedolaeth ar gyfer Ei Fawrhydi at ddibenion adran o’r llywodraeth.
- (4) Ystyr “buddiant y Ddugiaeth” yw –
  - (a) buddiant sy’n perthyn i’w Fawrhydi yn hawl Dugiaeth Caerhirfryn, neu
  - (b) buddiant sy’n perthyn i Ddugiaeth Cernyw.
- (5) Ystyr “buddiant preifat”, mewn perthynas â thir y Goron, yw buddiant nad yw’n fuddiant y Goron nac yn fuddiant y Ddugiaeth.
- (6) Ystyr “awdurdod priodol y Goron”, mewn perthynas â thir y Goron, yw –
  - (a) yn achos tir sy’n perthyn i’w Fawrhydi yn hawl y Goron ac sy’n ffurfio rhan o Ystad y Goron, Comisiynwyr Ystad y Goron;
  - (b) mewn perthynas ag unrhyw dir arall sy’n perthyn i’w Fawrhydi yn hawl y Goron, yr adran o’r llywodraeth sy’n rheoli’r tir;
  - (c) mewn perthynas â thir sy’n perthyn i’w Fawrhydi yn hawl Ei ystadau preifat, person a benodir gan Ei Fawrhydi yn ysgrifenedig o dan y Llofnod Brenhinol neu, os na wneir unrhyw benodiad o’r fath, Gweinidogion Cymru;
  - (d) mewn perthynas â thir sy’n perthyn i’w Fawrhydi yn hawl Dugiaeth Caerhirfryn, Canghellor y Ddugiaeth;
  - (e) mewn perthynas â thir sy’n perthyn i Ddugiaeth Cernyw, person a benodir gan Ddug Cernyw neu gan berson sy’n meddu ar y Ddugiaeth am y tro;
  - (f) yn achos tir sy’n perthyn i adran o’r llywodraeth neu sy’n cael ei ddal mewn ymddiriedolaeth ar gyfer Ei Fawrhydi at ddibenion adran o’r llywodraeth, yr adran.
- (7) Mae “y Goron” i’w drin fel pe bai’n cynnwys Comisiwn y Senedd.
- (8) Rhaid atgyfeirio unrhyw gwestiwn sy’n codi ynghylch pwy yw awdurdod priodol y Goron mewn perthynas ag unrhyw dir i’r Trysorlys, y mae ei benderfyniad yn derfynol.
- (9) Yn yr adran hon –
  - (a) mae cyfeiriadau at ystadau preifat Ei Fawrhydi i’w darllen yn unol ag adran 1 o Ddeddf Ystadau Preifat y Goron 1862 (p. 37);
  - (b) mae cyfeiriadau at adran o’r llywodraeth yn cynnwys Gweinidog y Goron a Chomisiwn y Senedd (a gweler adran 85 o Ddeddf Llywodraeth Cymru 2006 (p. 32), sy’n darparu i gyfeiriadau at adran o’r llywodraeth gynnwys Gweinidogion Cymru, y Prif Weinidog a’r Cwnsler Cyffredinol).

## 208 Tir Eglwys Loegr

- (1) Pan fo unrhyw ddarpariaeth sydd wedi ei chynnwys yn y Ddeddf hon neu a wneir odani yn ei gwneud yn ofynnol neu’n awdurdodi cyflwyno hysbysiad neu ddogfen arall i berchennog ar dir, a thir Eglwys Loegr yw’r tir, rhaid cyflwyno dogfen gyfatebol i’r Bwrdd Cyllid priodol hefyd.
- (2) Mae tir Eglwys Loegr sy’n perthyn i fywoliaeth eglwysig sydd heb ddeiliad i’w drin at ddibenion y Ddeddf hon fel pe bai’n perthyn i’r Bwrdd Cyllid priodol.

- (3) Rhaid i unrhyw ddigollediad sy'n daladwy o dan y Ddeddf hon mewn perthynas â thir Eglwys Loegr –
- cael ei dalu i'r Bwrdd Cyllid priodol, a
  - cael ei gymhwyso gan y Bwrdd hwnnw at y dibenion y byddai enillion gwerthu'r tir drwy gytundeb yn gymwys iddynt o dan unrhyw ddeddfiad neu Fesur gan Eglwys Loegr sy'n awdurdodi neu'n gwaredu enillion gwerthiant o'r fath.
- (4) Pan fo swm yn adenilladwy o dan adran 22 mewn perthynas â thir Eglwys Loegr, caiff y Bwrdd Cyllid priodol gymhwyso unrhyw arian neu unrhyw warannau a ddelir ganddo i ad-dalu'r swm hwnnw.
- (5) Yn yr adran hon –
- ystyr "Bwrdd Cyllid priodol" (*"appropriate Board of Finance"*), mewn perthynas ag unrhyw dir, yw'r Bwrdd Cyllid Esgobaethol ar gyfer yr esgobaeth y mae'r tir ynddi; ystyr "Mesur gan Eglwys Loegr" (*"Church Measure"*) yw Mesur gan Gynulliad Eglwys Loegr neu gan Synod Cyffredinol Eglwys Loegr;
- ystyr "tir Eglwys Loegr" (*"Church of England land"*) yw tir –
- sy'n perthyn i fywoliaeth eglwysig i Eglwys Loegr,
  - sy'n eglwys neu'n ffurfio rhan o eglwys sy'n ddarostyngedig i awdurdodaeth esgob yn un o esgobaethau Eglwys Loegr neu safle eglwys o'r fath, neu
  - sy'n gladdfa neu'n ffurfio rhan o gladdfa sy'n ddarostyngedig i awdurdodaeth esgob o'r fath.

*Cyffredinol*

**209 Rheoliadau o dan y Ddeddf hon**

- Mae pŵer i wneud rheoliadau o dan y Ddeddf hon yn arferadwy drwy offeryn statudol.
- Mae pŵer i wneud rheoliadau o dan y Ddeddf hon yn cynnwys pŵer –
  - i wneud darpariaeth wahanol at ddibenion gwahanol;
  - i wneud darpariaeth ddeilliadol, darpariaeth atodol, darpariaeth ganlyniadol, darpariaeth ddarfodol, darpariaeth drosiannol neu ddarpariaeth arbed.
- Yn achos rheoliadau a wneir o dan y pwerau a grybwyllir yn is-adran (4), mae'r ddarpariaeth y caniateir ei gwneud yn rhinwedd is-adran (2)(b) yn cynnwys darpariaeth sy'n diwygio, yn diddymu neu'n dirymu unrhyw ddeddfiad, gan gynnwys unrhyw ddarpariaeth yn y Ddeddf hon.
- Y pwerau y cyfeirir atynt yn is-adran (3) yw'r pwerau a roddir gan –
  - adran 167 (ffioedd am arfer swyddogaethau awdurdodau cynllunio);
  - adran 172 (ffioedd am apelau sy'n ymwneud ag adeiladau rhestredig ac adeiladau mewn ardaloedd cadwraeth);
  - adran 174(8) (achosion y mae rhaid i Weinidogion Cymru benderfynu'r weithdrefn ar eu cyfer);
  - adrannau 185(2)(c), 186(7)(e) a 187(5) (cywiro penderfyniadau).

- (5) Ni chaniateir gwneud offeryn statudol sy'n cynnwys unrhyw un o'r canlynol oni bai bod drafft o'r offeryn wedi ei osod gerbron Senedd Cymru ac wedi ei gymeradwyo ganddi drwy benderfyniad –
- (a) rheoliadau o dan adran 2(3) (adeiladau crefyddol sydd i'w trin fel pe baent yn henebion);
  - (b) rheoliadau o dan adran 26(8) (cymhwysio darpariaethau i gytundebau partneriaethau henebion cofrestredig);
  - (c) rheoliadau o dan adran 114(8) (cymhwysio darpariaethau i gytundebau partneriaethau adeiladau rhestredig);
  - (d) rheoliadau o dan adran 147 (camau ar gyfer diogelu adeiladau rhestredig sydd mewn cyflwr gwael);
  - (e) rheoliadau o dan adran 167 (ffioedd am arfer swyddogaethau awdurdodau cynllunio);
  - (f) rheoliadau o dan adran 172 (ffioedd am apelau sy'n ymwneud ag adeiladau rhestredig ac adeiladau mewn ardaloedd cadwraeth);
  - (g) rheoliadau o dan adran 201 (sanctsiynau sifil);
  - (h) rheoliadau sy'n diwygio neu'n diddymu unrhyw ddeddfiad sydd wedi ei gynnwys mewn deddfwriaeth sylfaenol (gan gynnwys unrhyw ddarpariaeth yn y Ddeddf hon).
- (6) Mae unrhyw offeryn statudol arall sy'n cynnwys rheoliadau o dan y Ddeddf hon yn ddarostyngedig i'w diddymu yn unol â phenderfyniad gan Senedd Cymru.
- (7) Yn is-adran (5)(h) ystyr "deddfwriaeth sylfaenol" yw –
- (a) Deddf gan Senedd Cymru;
  - (b) Mesur gan y Cynulliad;
  - (c) Deddf gan Senedd y Deyrnas Unedig.

## 210 Dehongli

Yn y Ddeddf hon –

ystyr "adeilad" ("*building*") (ac eithrio yn Rhan 2) yw –

- (a) unrhyw adeilad neu unrhyw strwythur, neu
- (b) unrhyw ran o adeilad neu strwythur,

ond nid yw'n cynnwys (ac eithrio yn adran 148) gyfarpar neu beiriannau sy'n ffurfio rhan o adeilad neu strwythur;

mae i "adeilad rhestredig" ("*listed building*") yr ystyr a roddir gan adran 76;

ystyr "ardal gadwraeth" ("*conservation area*") yw ardal sydd wedi ei dynodi o dan adran 158;

ystyr "awdurdod cynllunio" ("*planning authority*") yw awdurdod cynllunio lleol, o fewn yr ystyr a roddir i "local planning authority" gan Ran 1 o Ddeddf Cynllunio Gwlad a Thref 1990 (p. 8), ar gyfer ardal yng Nghymru;

mae i "awdurdod priodol y Goron" ("*appropriate Crown authority*") yr ystyr a roddir gan adran 207(6);

mae i "buddiant y Ddugiaeth" ("*Duchy interest*") yr ystyr a roddir gan adran 207(4);

mae i "buddiant y Goron" ("*Crown interest*") yr ystyr a roddir gan adran 207(3);

mae i "buddiant preifat" ("*private interest*"), mewn perthynas â thir y Goron, yr ystyr a roddir gan adran 207(5);

mae i "caniatâd cynllunio" yr ystyr a roddir i "planning permission" gan adran 336(1) o Ddeddf Cynllunio Gwlad a Thref 1990 (p. 8);

mae i "cydsyniad adeilad rhestredig" ("*listed building consent*") yr ystyr a roddir gan adran 89;

mae i "cydsyniad ardal gadwraeth" ("*conservation area consent*") yr ystyr a roddir gan adran 162;

mae i "cyfathrebiad electronig" yr ystyr a roddir i "electronic communication" gan adran 15(1) o Ddeddf Cyfathrebiadau Electronig 2000 (p. 7);

ystyr "cyfeiriad" ("*address*"), mewn perthynas â chyfathrebiadau electronig, yw unrhyw rif neu unrhyw gyfeiriad a ddefnyddir at ddiben cyfathrebiadau electronig;

mae i "cytundeb partneriaeth adeilad rhestredig" ("*listed building partnership agreement*") yr ystyr a roddir gan adran 113(5);

mae i "datblygiad" yr ystyr a roddir i "development" gan adran 55 o Ddeddf Cynllunio Gwlad a Thref 1990 (p. 8);

ystyr "deddfiad" ("*enactment*") yw unrhyw ddeddfiad, pryd bynnag y'i deddfir neu y'i gwneir;

mae "y Goron" ("*the Crown*") i'w ddehongli yn unol ag adran 207(7);

ystyr "gwaredu" ("*disposal*"), mewn perthynas â thir, yw gwaredu drwy werthu, drwy gyfnewid neu drwy les, drwy greu hawddfrait, hawl neu frait, neu mewn unrhyw ffordd arall, ond nid yw'n cynnwys gwaredu drwy neilltuo, drwy rodd neu drwy forgais;

mae "heneb" ("*monument*") i'w ddehongli yn unol ag adran 2;

mae i "heneb gofrestredig" ("*scheduled monument*") yr ystyr a roddir gan adran 3(7);

mae "les" ("*lease*") yn cynnwys is-les a chytundeb am les neu is-les, ond nid yw'n cynnwys opsiwn i gymryd les neu forgais;

ystyr "perchennog" ("*owner*"), mewn perthynas â thir (ac eithrio yn adrannau 15, 25, 26, 91, 113 a 186), yw person, pa un ai yn ei hawl ei hun neu fel ymddiriedolwr ar gyfer unrhyw berson arall –

(a) sydd â hawlogaeth i gael crogent y tir, neu

(b) a fyddai â hawlogaeth o'r fath pe bai'r tir yn cael ei osod am grogent,

ond nid yw'n cynnwys morgaisai nad yw mewn meddiant;

mae "safle" ("*site*"), mewn perthynas â heneb, i'w ddehongli yn unol ag adran 2;

mae "swyddogaethau" ("*functions*") yn cynnwys pwerau a dyletswyddau;



o ran “tir” (“land”)—

- (a) ei ystyr yw unrhyw hereditament corfforol, gan gynnwys adeilad neu heneb, a
- (b) mewn perthynas â chaffael tir, mae’n cynnwys unrhyw fuddiant mewn tir neu unrhyw hawl dros dir;

mae i “tir y Goron” (“Crown land”) yr ystyr a roddir gan adran 207(2);

ystyr “ymgymerwr statudol” (“statutory undertaker”) yw person—

- (a) sy’n ymgwymerwr statudol o fewn yr ystyr a roddir i “statutory undertakers” gan adran 262 o Ddeddf Cynllunio Gwlad a Thref 1990 (p. 8), neu
- (b) y tybir gan yr adran honno ei fod yn ymgwymerwr statudol at ddibenion unrhyw ddarpariaeth yn y Ddeddf honno,

ac mae cyfeiriadau at “ymgymeriad” ymgwymerwr statudol i’w dehongli yn unol â’r adran honno.

## 211 Darpariaeth ganlyniadol a darpariaeth drosiannol etc.

- (1) Mae Atodlen 13 yn cynnwys mân ddiwygiadau, diwygiadau canlyniadol a diddymadau.
- (2) Mae Atodlen 14 yn cynnwys darpariaethau trosiannol a darpariaethau arbed.
- (3) Caiff Gweinidogion Cymru drwy reoliadau—
  - (a) gwneud darpariaeth sy’n ddeilliadol neu’n atodol i unrhyw ddarpariaeth yn y Ddeddf hon neu sy’n ganlyniadol ar unrhyw ddarpariaeth yn y Ddeddf hon;
  - (b) gwneud darpariaeth drosiannol, darpariaeth ddarfodol neu ddarpariaeth arbed mewn cysylltiad ag unrhyw ddarpariaeth yn y Ddeddf hon.
- (4) Caiff rheoliadau o dan is-adran (3) ddiwygio, diddymu neu ddirymu unrhyw ddeddfiad (gan gynnwys unrhyw ddarpariaeth yn y Ddeddf hon).

## 212 Dod i rym

- (1) Daw’r darpariaethau a ganlyn i rym drannoeth y diwrnod y mae’r Ddeddf hon yn cael y Cydsyniad Brenhinol—
  - (a) Rhan 1;
  - (b) adran 209;
  - (c) adran 210;
  - (d) adran 211(3) a (4);
  - (e) yr adran hon;
  - (f) adran 213.
- (2) Daw darpariaethau eraill y Ddeddf hon i rym ar ddiwrnod a bennir gan Weinidogion Cymru mewn gorchymyn a wneir drwy offeryn statudol.
- (3) Caiff gorchymyn o dan is-adran (2) wneud darpariaeth drosiannol, darpariaeth ddarfodol neu ddarpariaeth arbed mewn cysylltiad â dyfodiad darpariaeth yn y Ddeddf hon i rym.

**213 Enw byr**

Enw byr y Ddeddf hon yw Deddf yr Amgylchedd Hanesyddol (Cymru) 2023.

ATODLEN 1  
(a gyflwynir gan adran 7(4))

DIWEDD GWARCHODAETH INTERIM AR GYFER HENEBION

*Cymhwyso'r Atodlen hon*

- 1 Mae'r Atodlen hon yn gymwys pan fo gwarchodaeth interim yn dod i ben mewn perthynas â heneb oherwydd hysbysiad o dan adran 7(1)(b) neu (2)(b).

*Atebolrwydd troseddol*

- 2 Nid yw'r ffaith bod gwarchodaeth interim wedi dod i ben yn effeithio ar atebolrwydd unrhyw berson i gael ei erlyn a'i gosbi am drosedd o dan y Ddeddf hon a gyflawnwyd tra oedd y warchodaeth interim yn cael effaith.

*Cydsyniad heneb gofrestredig*

- 3 Mae unrhyw achos sy'n ymwneud â chais am gydsyniad heneb gofrestredig sy'n ymwneud â'r heneb neu sy'n deillio o gais o'r fath yn darfod, i'r graddau y mae'n ymwneud â chydsyniad sy'n ofynnol yn rhinwedd y warchodaeth interim; ac mae unrhyw gydsyniad o'r fath yn peidio â chael effaith i'r un graddau.

*Hysbysiadau stop dros dro*

- 4 Mae unrhyw hysbysiad stop dros dro sy'n ymwneud â'r heneb yn peidio â chael effaith, i'r graddau y mae'r hysbysiad yn ymwneud â gwaith sy'n effeithio ar unrhyw beth yr oedd y warchodaeth interim yn cael effaith mewn cysylltiad ag ef.

*Hysbysiadau gorfodi*

- 5 (1) Mae unrhyw hysbysiad gorfodi sy'n ymwneud â'r heneb yn peidio â chael effaith, i'r graddau y mae'r hysbysiad yn ymwneud â gwaith sy'n effeithio ar unrhyw beth yr oedd y warchodaeth interim yn cael effaith mewn cysylltiad ag ef.
- (2) Mae unrhyw achos o dan adran 39 neu 40(3) sy'n ymwneud â hysbysiad gorfodi yn darfod, i'r graddau y mae'r hysbysiad yn ymwneud â gwaith sy'n effeithio ar unrhyw beth yr oedd y warchodaeth interim yn cael effaith mewn cysylltiad ag ef.
- (3) Er gwaethaf is-baragraff (1), mae adran 40(1) a (2) yn parhau i gael effaith mewn perthynas ag—
- (a) unrhyw dreuliau yr eir iddynt gan berson sydd wedi ei awdurdodi gan Weinidogion Cymru fel y'i crybwyllir yn yr adran honno, a
- (b) unrhyw symiau a delir o ganlyniad i'r treuliau hynny.

*Gwaharddebau*

- 6 Mae unrhyw achos sy'n ymwneud â chais am waharddeb o dan adran 42 sy'n ymwneud â'r heneb yn darfod, i'r graddau y mae'n ymwneud ag atal unrhyw doriad gwirioneddol neu unrhyw doriad disgwylledig mewn perthynas ag unrhyw beth yr oedd y warchodaeth interim yn cael effaith mewn cysylltiad ag ef.

## ATODLEN 2

(a gyflwynir gan adrannau 10(5) a 82(6))

## PENDERFYNIAD AR ADOLYGIAD GAN BERSON A BENODIR GAN WEINIDOGION CYMRU

*Cymhwyso'r Atodlen hon ac ystyr "person a benodir"*

- 1 (1) Mae'r Atodlen hon yn gymwys i adolygiad a gynhelir gan berson a benodir –
- (a) o dan adran 9 (adolygiadau o ddiwygiadau penodol i'r gofrestr), neu
  - (b) o dan adran 81 (adolygu penderfyniadau i restru adeiladau).
- (2) Yn yr Atodlen hon ystyr "person a benodir" yw person a benodir o dan adran 9(3) neu 81(3) (yn ôl y digwydd) i gynnal adolygiad a gwneud penderfyniad arno.

*Penodi person arall i wneud penderfyniad ar adolygiad*

- 2 (1) Ar unrhyw adeg cyn i berson a benodir wneud penderfyniad ar adolygiad caiff Gweinidogion Cymru –
- (a) dirymu penodiad y person, a
  - (b) penodi person arall i wneud y penderfyniad yn ei le.
- (2) Pan fo penodiad newydd wedi ei wneud, rhaid dechrau'r adolygiad, ac unrhyw ymchwiliad neu unrhyw wrandawriad arall mewn cysylltiad â'r adolygiad, o'r newydd.
- (3) Nid yw is-baragraff (2) yn ei gwneud yn ofynnol rhoi cyfle i unrhyw berson i gyflwyno sylwadau newydd nac i addasu neu i dynnu'n ôl unrhyw sylwadau a gyflwynwyd eisoes.

*Penodi asesydd i gynorthwyo person a benodir*

- 3 Caiff person a benodir benodi asesydd i ddarparu cyngor –
- (a) ar unrhyw faterion sy'n codi mewn ymchwiliad lleol neu mewn gwrandawriad a gynhelir gan y person a benodir mewn cysylltiad ag adolygiad neu o ganlyniad i ymchwiliad neu wrandawriad o'r fath, neu
  - (b) ar unrhyw faterion sy'n codi mewn sylwadau ysgrifenedig a gyflwynir i'r person a benodir mewn cysylltiad ag adolygiad o'r fath neu o ganlyniad i sylwadau o'r fath.

*Cyfarwyddydau*

- 4 Caiff Gweinidogion Cymru gyfarwyddo bod unrhyw beth y byddai'n dod i ran person a benodir i'w wneud mewn cysylltiad ag adolygiad, ac eithrio gwneud penderfyniad ar yr adolygiad, i'w wneud gan Weinidogion Cymru yn lle hynny.

*Dirprwyo*

- 5 (1) Caiff person a benodir ddirprwyo i berson arall unrhyw beth y byddai'n dod i ran y person a benodir i'w wneud mewn cysylltiad ag adolygiad, ac eithrio –
- (a) cynnal ymchwiliad lleol neu wrandawriad a gosod y dull y'i cynhelir, a

- (b) gwneud penderfyniad ar yr adolygiad o dan adran 9(3)(b) neu 81(3)(b) a gosod y dull y'i gwneir.
- (2) Caiff y person a benodir benderfynu graddau a thelerau dirprwyad o dan is-baragraff (1) a chaiff ddiwygio neu ddirymu'r dirprwyad.

*Deddf Ombwdsmon Gwasanaethau Cyhoeddus (Cymru) 2019 (dccc 3)*

- 6 Pan fo person a benodir yn aelod o staff Llywodraeth Cymru, mae swyddogaethau'r person o wneud penderfyniad ar adolygiad a gwneud unrhyw beth mewn cysylltiad ag ef i'w trin at ddibenion Deddf Ombwdsmon Gwasanaethau Cyhoeddus (Cymru) 2019 (dccc 3) fel swyddogaethau Llywodraeth Cymru.

## ATODLEN 3

(a gyflwynir gan adran 12(1))

## AWDURDODIAD AR GYFER DOSBARTHAU O WAITH

## TABL

Enw'r dosbarth	Gwaith awdurdodedig
<p><b>Dosbarth 1: Gwaith Amaethyddol, Gwaith Garddwriaethol a Gwaith Coedwigaeth</b></p>	<p>Gwaith amaethyddol, gwaith garddwriaethol a gwaith coedwigaeth o'r un math â gwaith a gyflawnwyd yn gyfreithlon yn yr un man o fewn y 6 mlynedd cyn y diwrnod y mae'r gwaith yn dechrau; ac eithrio –</p> <ul style="list-style-type: none"> <li>(a) yn achos tir y cyflawnwyd gwaith aredig arno'n flaenorol, gwaith sy'n debygol o aflonyddu ar y pridd o dan y dyfnder y cyflawnwyd gwaith aredig arno'n gyfreithlon yn flaenorol;</li> <li>(b) yn achos tir arall, gwaith sy'n debygol o aflonyddu ar y pridd o dan ddyfnder o 300 o filimetrau;</li> <li>(c) troi'r isbridd, gwaith draenio, plannu neu ddadwreiddio coed, gwrychoedd neu berthi neu lwyni, stripio'r uwchbridd, gweithrediadau tipio, neu dorri a symud ymaith dyweirch yn fasnachol;</li> <li>(d) dymchwel, symud ymaith, estyn, addasu neu aflonyddu ar adeilad, strwythur neu waith, neu olion adeilad, strwythur neu waith;</li> <li>(e) codi adeilad neu strwythur;</li> <li>(f) yn achos gwaith ac eithrio gwaith garddio domestig, gosod llwybrau, manau arwyneb caled neu sylfeini ar gyfer adeiladau neu godi ffensys neu rwystrau eraill.</li> </ul> <p><i>Dehongli</i></p> <p>At ddibenion y dosbarth hwn –</p> <ul style="list-style-type: none"> <li>(a) mae "gwaith garddio domestig" yn cynnwys gwaith a gyflawnir wrth drin rhandiroedd yn anfasnachol;</li> <li>(b) mae "gwaith garddwriaethol" yn cynnwys gwaith garddio domestig;</li> <li>(c) mae gwaith i'w drin fel pe bai wedi ei gyflawni'n gyfreithlon os – <ul style="list-style-type: none"> <li>(i) mewn perthynas ag unrhyw adeg ar ôl i'r Atodlen hon ddod i rym, cyflawnwyd y gwaith yn unol â thelerau'r dosbarth hwn, neu byddai wedi cael ei gyflawni felly pe bai'r heneb, yn ystod y cyfnod o dan sylw, wedi bod yn heneb gofrestredig;</li> <li>(ii) mewn perthynas ag unrhyw adeg cyn i'r Atodlen hon ddod i rym, cyflawnwyd y gwaith yn unol â thelerau Dosbarth 1 o'r Atodlen i Orchymyn Henebion Hynafol (Cydsyniadau Dosbarth) 1994 (O.S. 1994/1381), neu byddai wedi cael ei gyflawni felly pe bai'r heneb, yn ystod y cyfnod o dan sylw, wedi bod yn heneb gofrestredig at ddibenion Deddf Henebion Hynafol ac Ardaloedd Archaeolegol 1979 (p. 46).</li> </ul> </li> </ul>



<b>Dosbarth 2: Gweithrediadau mwyngloddio glo</b>	Gwaith a gyflawnir fwy na 10 metr o dan lefel y ddaear gan unrhyw weithredwr trwyddedig (o fewn yr ystyr a roddir i “licensed operator” yn Neddf y Diwydiant Glo 1994 (p. 21)).
<b>Dosbarth 3: Gwaith gan Glandŵr Cymru</b>	Gwaith atgyweirio neu gynnal a chadw a gyflawnir gan Glandŵr Cymru, mewn perthynas â thir y mae’n berchen arno neu sydd wedi ei feddiannu ganddi, sy’n hanfodol er mwyn sicrhau gweithrediad camlas; ac eithrio gwaith sy’n ymwneud ag addasiad sylweddol i heneb gofrestredig.
<b>Dosbarth 4: Gwaith i atgyweirio neu gynnal a chadw peiriannau</b>	Gwaith i atgyweirio neu gynnal a chadw peiriannau, ac eithrio gwaith sy’n ymwneud ag addasiad sylweddol i heneb gofrestredig.
<b>Dosbarth 5: Gwaith a gyflawnir gan Historic England</b>	Gwaith a gyflawnir gan Gomisiwn Adeiladau Hanesyddol a Henebion Lloegr.
<b>Dosbarth 6: Gwaith gwerthuso archaeolegol</b>	Gwaith gwerthuso archaeolegol a gyflawnir gan berson sydd wedi gwneud cais am gydsyniad heneb gofrestredig, neu ar ran person o’r fath, pan fo’r gwaith yn cael ei gyflawni – (a) i roi i Weinidogion Cymru wybodaeth sy’n ofynnol ganddynt i benderfynu’r cais, (b) o dan oruchwyliaeth person sydd wedi ei gymeradwyo’n ysgrifenedig gan Weinidogion Cymru, ac (c) yn unol â manyleb ysgrifenedig sydd wedi ei chymeradwyo gan Weinidogion Cymru.
<b>Dosbarth 7: Gwaith gyda chymorth grant gan Weinidogion Cymru</b>	Gwaith i ddiogelu, cynnal a chadw neu reoli heneb gofrestredig pan fo’r gwaith yn cael ei gyflawni yn unol â thelerau cytundeb ysgrifenedig y mae Gweinidogion Cymru yn talu costau’r gwaith hwnnw, neu’n cyfrannu tuag at y costau hynny, odano.
<b>Dosbarth 8: Gwaith a gyflawnir gan Gomisiwn Brenhinol Henebion Cymru</b>	Gwaith i osod marcwyr arolwg i ddyfnder nad yw’n fwy na 300 o filimetrau at ddiben arolygon wedi eu mesur o olion gweladwy, pan fo’r gwaith wedi ei gyflawni gan Gomisiwn Brenhinol Henebion Cymru.

*Pŵer i ddiwygio’r Atodlen*

1 Caiff Gweinidogion Cymru drwy reoliadau ddiwygio’r Atodlen hon –

- (a) i ychwanegu dosbarth o waith at y tabl;
- (b) i addasu disgrifiad o ddosbarth o waith;
- (c) i ddileu dosbarth o waith.

## ATODLEN 4

*(a gyflwynir gan adran 20(3))*Y WEITHDREFN AR GYFER GORCHMYNION SY’N ADDASU NEU’N DIRYMU  
CYDSYNIAD HENEB GOFRESTREDIG

## RHAN 1

## HYSBYSIAD O ADDASIAD NEU DDIRYMIAD ARFAETHEDIG

*Gofyniad i gyflwyno hysbysiad o addasiad neu ddirymiad arfaethedig*

- 1 (1) Cyn gwneud gorchymyn o dan adran 20 sy’n addasu neu’n dirymu cydsyniad heneb gofrestredig rhaid i Weinidogion Cymru gyflwyno hysbysiad o’r addasiad arfaethedig neu’r dirymiad arfaethedig—
  - (a) i bob perchennog a phob meddiannydd ar yr heneb, a
  - (b) i unrhyw berson arall y mae Gweinidogion Cymru yn ystyried y byddai’r cynnig yn effeithio arno.
- (2) Rhaid i hysbysiad o dan y paragraff hwn—
  - (a) cynnwys copi o’r gorchymyn y mae Gweinidogion Cymru yn cynnig ei wneud,
  - (b) nodi’r rhesymau dros yr addasiad arfaethedig neu’r dirymiad arfaethedig,
  - (c) datgan bod gan y person y cyflwynir yr hysbysiad iddo 28 o ddiwrnodau, sy’n dechrau â thrannoeth y diwrnod y cyflwynir yr hysbysiad, i wneud gwrthwynebiad ynghylch y cynnig i Weinidogion Cymru, a
  - (d) datgan y ffordd y mae rhaid i wrthwynebiad gael ei wneud.
- (3) Pan fyddai addasiad arfaethedig yn eithrio unrhyw waith o gwmpas y cydsyniad heneb gofrestredig, rhaid i’r hysbysiad ddarparu na chaniateir i’r gwaith hwnnw gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw.
- (4) Pan fyddai addasiad arfaethedig yn effeithio ar gyflawni unrhyw waith y mae’r cydsyniad yn ymwneud ag ef mewn unrhyw ffordd arall, rhaid i’r hysbysiad ddarparu na chaniateir i’r gwaith gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw mewn ffordd a bennir yn yr hysbysiad.
- (5) Rhaid i hysbysiad o ddirymiad arfaethedig ddarparu na chaniateir i’r gwaith y mae’r cydsyniad heneb gofrestredig yn ymwneud ag ef gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw.

*Effaith hysbysiad o dan baragraff 1 ar awdurdodiad i gyflawni gwaith*

- 2 (1) Pan fo hysbysiad o dan baragraff 1 yn darparu na chaniateir i waith a bennir yn yr hysbysiad gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw, nid yw’r gwaith penodedig wedi ei awdurdodi at ddibenion Pennod 3 o Ran 2 o’r Ddeddf hon o ddechrau’r diwrnod hwnnw.

- (2) Pan fo hysbysiad o dan baragraff 1 yn darparu na chaniateir i waith a bennir yn yr hysbysiad gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw mewn ffordd a bennir yn yr hysbysiad, nid yw'r gwaith penodedig, os yw wedi ei gyflawni yn y ffordd honno, wedi ei awdurdodi at ddibenion Pennod 3 o Ran 2 o'r Ddeddf hon o ddechrau'r diwrnod hwnnw.
- (3) Pan fo hysbysiad o dan baragraff 1 yn darparu na chaniateir i'r gwaith y mae'r cydsyniad heneb gofrestredig yn ymwneud ag ef gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw, nid yw'r gwaith hwnnw wedi ei awdurdodi o dan Bennod 3 o Ran 2 o'r Ddeddf hon o ddechrau'r diwrnod hwnnw.
- (4) Mae darpariaethau blaenorol y paragraff hwn yn peidio â bod yn gymwys mewn perthynas ag unrhyw waith y mae hysbysiad o dan baragraff 1 yn effeithio arno—
  - (a) pan fo Gweinidogion Cymru yn gwneud gorchymyn o dan adran 20 o fewn y cyfnod o 21 mis sy'n dechrau â'r diwrnod y cyflwynwyd yr hysbysiad ("y cyfnod o 21 mis"), pan gaiff y gorchymyn ei wneud (a phryd hynny, mae'r awdurdodiad yn peidio i'r graddau a ddarperir yn y gorchymyn),
  - (b) pan fo Gweinidogion Cymru, o fewn y cyfnod o 21 mis, yn cyflwyno hysbysiad i bob perchennog ac i bob meddiannydd ar yr heneb eu bod wedi penderfynu peidio â gwneud y gorchymyn, ar ddechrau'r diwrnod a bennir gan Weinidogion Cymru at ddibenion y paragraff hwn yn yr hysbysiad, neu
  - (c) mewn unrhyw achos arall, ar ddiwedd y cyfnod o 21 mis.

## RHAN 2

## MYND YMLAEN I WNEUD GORCHYMYN AR ÔL CYFLWYNO HYSBYSIAD

*Gwneud gorchymyn o dan adran 20*

- 3 (1) Mae'r paragraff hwn yn gymwys pan fo hysbysiad o dan baragraff 1 wedi ei gyflwyno o dan Ran 1 o'r Atodlen hon.
- (2) Ni chaiff Gweinidogion Cymru wneud y gorchymyn y mae'r hysbysiad yn ymwneud ag ef oni bai—
  - (a) bod y cyfnod ar gyfer gwneud gwrthwynebiadau i'r cynnig wedi dod i ben heb i wrthwynebiad gael ei wneud gan berson y cyflwynwyd yr hysbysiad iddo,
  - (b) os gwnaed gwrthwynebiad gan berson o'r fath o fewn y cyfnod hwnnw, fod pob gwrthwynebiad o'r fath wedi ei dynnu'n ôl, neu
  - (c) os gwnaed gwrthwynebiad yn ystod y cyfnod hwnnw gan berson o'r fath ac nad yw'r gwrthwynebiad wedi ei dynnu'n ôl, fod gofynion is-baragraffau (3) a (4) wedi eu bodloni.
- (3) Mae gofynion yr is-baragraff hwn wedi eu bodloni os yw Gweinidogion Cymru—
  - (a) yn peri i ymchwiliad lleol gael ei gynnal, neu
  - (b) yn rhoi i'r person a wnaeth y gwrthwynebiad gyfle i ymddangos gerbron person a benodir ganddynt a chael gwrandawriad ganddo.
- (4) Mae gofynion yr is-baragraff hwn wedi eu bodloni os yw Gweinidogion Cymru—

- (a) yn ystyried pob gwrthwynebiad a wnaed fel y'i disgrifir yn is-baragraff (2)(c) ac nas tynnwyd yn ôl, a
  - (b) os oes ymchwiliad neu wrandawriad wedi ei gynnal o dan is-baragraff (3), yn ystyried adroddiad y person a'i cynhaliodd.
- (5) Pan fo person yn cymryd y cyfle i ymddangos gerbron person a benodir gan Weinidogion Cymru o dan is-baragraff (3)(b) a chael gwrandawriad ganddo, rhaid i Weinidogion Cymru roi'r cyfle i bob un o'r personau a ganlyn i gael gwrandawriad ar yr un pryd –
- (a) pob person arall y cyflwynwyd yr hysbysiad o dan baragraff 1 iddo, a
  - (b) unrhyw berson arall y mae Gweinidogion Cymru yn ystyried ei fod yn briodol.
- (6) Pan fo Gweinidogion Cymru yn gwneud gorchymyn o dan adran 20 yn rhinwedd is-baragraff (2)(a) neu (b), rhaid i'r gorchymyn gael ei wneud ar y telerau a nodir gan yr hysbysiad.
- (7) Pan fo Gweinidogion Cymru yn gwneud gorchymyn o dan adran 20 yn rhinwedd is-baragraff (2)(c), caniateir i'r gorchymyn gael ei wneud naill ai ar y telerau a nodir yn yr hysbysiad neu gydag addasiadau.

*Hysbysu ar ôl gwneud gorchymyn*

- 4 Cyn gynted ag y bo'n ymarferol ar ôl gwneud gorchymyn o dan adran 20 rhaid i Weinidogion Cymru anfon copi o'r gorchymyn –
- (a) at bob person y cyflwynwyd hysbysiad o dan baragraff 1 iddo, a
  - (b) pan –
    - (i) bo ymchwiliad wedi ei gynnal o dan baragraff 3(3)(a), at unrhyw berson arall a roddodd dystiolaeth yn yr ymchwiliad, neu
    - (ii) bo gwrandawriad wedi ei gynnal at ddibenion paragraff 3(3)(b), at unrhyw berson arall y rhoddwyd y cyfle iddo i ymddangos yn y gwrandawriad.

RHAN 3

ATODOL

*Y weithdrefn ar ôl gwrandawriad neu ymchwiliad*

- 5 (1) Rhaid i'r person a benodir i gynnal gwrandawriad neu ymchwiliad o dan baragraff 3 lunio adroddiad ysgrifenedig i Weinidogion Cymru ar ôl diwedd y gwrandawriad neu'r ymchwiliad.
- (2) Rhaid i'r adroddiad gynnwys casgliadau ac argymhelliad y person a benodir ynghylch a ddylid gwneud yr addasiad neu'r dirymiad (neu resymau'r person a benodir dros beidio â gwneud argymhelliad).

## ATODLEN 5

*(a gyflwynir gan adran 27(4))*TERFYNU DRWY ORCHYMYN GYTUNDEB PARTNERIAETH HENEB  
GOFRESTREDIG

## RHAN 1

## HYSBYSIAD O DERFYNIAD ARFAETHEDIG

*Gofyniad i gyflwyno hysbysiad o derfyniad arfaethedig*

- 1 (1) Cyn gwneud gorchymyn o dan adran 27 sy'n terfynu cytundeb partneriaeth heneb gofrestredig neu ddarpariaeth mewn cytundeb o'r fath, rhaid i Weinidogion Cymru gyflwyno hysbysiad o gynnig i wneud y gorchymyn ("hysbysiad o derfyniad arfaethedig")—
  - (a) i'r partion eraill i'r cytundeb, a
  - (b) i unrhyw berson arall y mae Gweinidogion Cymru yn ystyried bod ganddo fuddiant yn y cytundeb.
- (2) Rhaid i hysbysiad o derfyniad arfaethedig—
  - (a) cynnwys copi o'r gorchymyn y mae Gweinidogion Cymru yn cynnig ei wneud,
  - (b) nodi'r rhesymau dros y terfyniad arfaethedig,
  - (c) datgan bod gan y person y cyflwynir yr hysbysiad iddo 28 o ddiwrnodau, sy'n dechrau â thrannoeth y diwrnod y cyflwynir yr hysbysiad, i wneud gwrthwynebiad ynghylch y cynnig i Weinidogion Cymru, a
  - (d) datgan y ffordd y mae rhaid i wrthwynebiad gael ei wneud.
- (3) Pan mai effaith y gorchymyn y cynigir ei wneud o dan adran 27 fyddai dirymu cydsyniad heneb gofrestredig a roddwyd gan y cytundeb, rhaid i'r hysbysiad o derfyniad arfaethedig ddarparu na chaniateir i'r gwaith y mae'r cydsyniad yn ymwneud ag ef gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw.
- (4) Pan mai effaith gorchymyn y cynigir ei wneud o dan adran 27 fyddai eithrio unrhyw waith o gwmpas cydsyniad heneb gofrestredig a roddwyd gan y cytundeb, rhaid i'r hysbysiad o derfyniad arfaethedig ddarparu na chaniateir i'r gwaith yr effeithir arno gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw.

*Effaith cyflwyno hysbysiad o derfyniad arfaethedig ar waith awdurdodedig*

- 2 (1) Pan fo hysbysiad o derfyniad arfaethedig yn darparu na chaniateir i'r gwaith y mae cydsyniad heneb gofrestredig yn ymwneud ag ef gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw, nid yw'r gwaith hwnnw wedi ei awdurdodi at ddibenion Pennod 3 o Ran 2 o'r Ddeddf hon o ddechrau'r diwrnod hwnnw.
- (2) Pan fo hysbysiad o derfyniad arfaethedig yn darparu na chaniateir i waith a bennir yn yr hysbysiad gael ei gyflawni ar ddiwrnod a bennir gan yr hysbysiad nac ar ôl y diwrnod hwnnw, nid yw'r gwaith penodedig wedi ei awdurdodi at ddibenion Pennod 3 o Ran 2 o'r Ddeddf hon o ddechrau'r diwrnod hwnnw.

- (3) Mae darpariaethau blaenorol y paragraff hwn yn peidio â bod yn gymwys mewn perthynas ag unrhyw waith y mae hysbysiad o derfyniad arfaethedig yn effeithio arno –
- (a) pan fo Gweinidogion Cymru yn gwneud gorchymyn o dan adran 27 o fewn y cyfnod o 21 mis sy'n dechrau â'r diwrnod y cyflwynwyd yr hysbysiad o derfyniad arfaethedig ("y cyfnod o 21 mis"), pan gaiff y gorchymyn ei wneud (a phryd hynny, mae'r awdurdodiad yn peidio i'r graddau a ddarperir yn y gorchymyn),
  - (b) pan fo Gweinidogion Cymru, o fewn y cyfnod o 21 mis, yn cyflwyno hysbysiad i bob person y cyflwynwyd yr hysbysiad o derfyniad arfaethedig iddo eu bod wedi penderfynu peidio â gwneud y gorchymyn, ar ddechrau'r diwrnod a bennir gan Weinidogion Cymru at ddibenion y paragraff hwn yn yr hysbysiad, neu
  - (c) mewn unrhyw achos arall, ar ddiwedd y cyfnod o 21 mis.

## RHAN 2

## MYND YMLAEN I WNEUD GORCHYMYN AR ÔL CYFLWYNO HYSBYSIAD

*Gwneud gorchymyn o dan adran 27*

- 3 (1) Mae'r paragraff hwn yn gymwys pan fo hysbysiad o derfyniad arfaethedig wedi ei gyflwyno o dan Ran 1 o'r Atodlen hon.
- (2) Ni chaiff Gweinidogion Cymru wneud y gorchymyn y mae'r hysbysiad yn ymwneud ag ef oni bai –
- (a) bod y cyfnod ar gyfer gwneud gwrthwynebiadau i'r cynnig wedi dod i ben heb i wrthwynebiad gael ei wneud gan berson y cyflwynwyd yr hysbysiad iddo,
  - (b) os gwnaed gwrthwynebiad gan berson o'r fath o fewn y cyfnod hwnnw, fod pob gwrthwynebiad o'r fath wedi ei dynnu'n ôl, neu
  - (c) os gwnaed gwrthwynebiad yn ystod y cyfnod hwnnw gan berson o'r fath ac nad yw'r gwrthwynebiad wedi ei dynnu'n ôl, fod gofynion is-baragraffau (3) a (4) wedi eu bodloni.
- (3) Mae gofynion yr is-baragraff hwn wedi eu bodloni os yw Gweinidogion Cymru –
- (a) yn peri i ymchwiliad lleol gael ei gynnal, neu
  - (b) yn rhoi i'r person a wnaeth y gwrthwynebiad gyfle i ymddangos gerbron person a benodir ganddynt a chael gwrandawriad ganddo.
- (4) Mae gofynion yr is-baragraff hwn wedi eu bodloni os yw Gweinidogion Cymru –
- (a) yn ystyried pob gwrthwynebiad a wnaed fel y'i disgrifir yn is-baragraff (2)(c) ac nas tynnwyd yn ôl, a
  - (b) os oes ymchwiliad neu wrandawriad wedi ei gynnal o dan is-baragraff (3), yn ystyried adroddiad y person a'i cynhaliodd.
- (5) Pan fo person yn cymryd y cyfle i ymddangos gerbron person a benodir gan Weinidogion Cymru a chael gwrandawriad ganddo o dan is-baragraff (3)(b), rhaid i Weinidogion Cymru roi cyfle i bob un o'r personau a ganlyn i gael gwrandawriad ar yr un pryd –
- (a) pob person arall y cyflwynwyd yr hysbysiad o derfyniad arfaethedig iddo, a
  - (b) unrhyw berson arall y mae Gweinidogion Cymru yn ystyried ei fod yn briodol.



- (6) Pan fo Gweinidogion Cymru yn gwneud gorchymyn o dan adran 27 yn rhinwedd is-baragraff (2)(a) neu (b), rhaid gwneud y gorchymyn ar y telerau a nodir gan yr hysbysiad o derfyniad arfaethedig.
- (7) Pan fo Gweinidogion Cymru yn gwneud gorchymyn o dan adran 27 yn rhinwedd is-baragraff (2)(c), caniateir gwneud y gorchymyn naill ai ar y telerau a nodir gan yr hysbysiad o derfyniad arfaethedig neu gydag addasiadau.

*Hysbysiad ar ôl gwneud gorchymyn*

- 4 Cyn gynted ag y bo'n ymarferol ar ôl gwneud gorchymyn o dan adran 27, rhaid i Weinidogion Cymru anfon copi o'r gorchymyn –
- (a) at bob person y cyflwynwyd hysbysiad o derfyniad arfaethedig iddo, a
  - (b) pan –
    - (i) bo ymchwiliad wedi ei gynnal o dan baragraff 3(3)(a), at unrhyw berson arall a roddodd dystiolaeth yn yr ymchwiliad, neu
    - (ii) bo gwrandawriad wedi ei gynnal o dan baragraff 3(3)(b), at unrhyw berson arall y rhoddwyd y cyfle iddo i ymddangos yn y gwrandawriad.

RHAN 3

ATODOL

*Y weithdrefn ar ôl gwrandawriad neu ymchwiliad*

- 5 (1) Rhaid i'r person a benodir i gynnal gwrandawriad neu ymchwiliad o dan baragraff 3 lunio adroddiad ysgrifenedig i Weinidogion Cymru ar ôl diwedd y gwrandawriad neu'r ymchwiliad.
- (2) Rhaid i'r adroddiad gynnwys casgliadau ac argymhelliad y person a benodir ynghylch a ddylid gwneud gorchymyn o dan adran 27 (neu resymau'r person a benodir dros beidio â gwneud argymhelliad).

## ATODLEN 6

*(a gyflwynir gan adrannau 10(5), 17(6), 20(3) a 27(4))*

## ACHOSION O DAN RAN 2

*Tystiolaeth mewn ymchwiliadau lleol*

- 1 (1) Caiff person a benodir i gynnal ymchwiliad lleol o dan Ran 2 o'r Ddeddf hon, drwy wŷs, ei gwneud yn ofynnol i unrhyw berson –
- (a) bod yn bresennol yn yr ymchwiliad, ar adeg ac mewn man a ddatgenir yn y wŷs, a rhoi tystiolaeth, neu
  - (b) dangos unrhyw ddogfennau sydd ym meddiant y person neu o dan reolaeth y person, sy'n ymwneud ag unrhyw fater sydd o dan sylw yn yr ymchwiliad.
- (2) Caiff y person a benodir i gynnal yr ymchwiliad gymryd tystiolaeth ar lw, ac at y diben hwnnw caiff weinyddu llwon.
- (3) Nid yw gwŷs o dan y paragraff hwn yn ei gwneud yn ofynnol i berson fod yn bresennol yn yr ymchwiliad oni bai bod treuliau angenrheidiol y person ar gyfer bod yn bresennol yn cael eu talu neu eu cynnig i'r person.
- (4) Ni chaniateir ei gwneud yn ofynnol o dan y paragraff hwn i berson ddangos teitl (nac unrhyw offeryn sy'n ymwneud â theitl) unrhyw dir nad yw'n perthyn i awdurdod lleol.

*Trosedd sy'n ymwneud â methu â chydymffurfio â gwŷs o dan baragraff 1*

- 2 (1) Mae'n drosedd i berson –
- (a) gwrthod cydymffurfio â gofyniad mewn gwŷs o dan baragraff 1 neu fetu'n fwriadol â chydymffurfio â gofyniad o'r fath, neu
  - (b) newid, atal, cuddio neu ddinistrio'n fwriadol ddogfen y mae'n ofynnol i'r person ei dangos, neu y mae'r person yn agored i orfod ei dangos, o dan y paragraff hwnnw.
- (2) Mae person sy'n euog o drosedd o dan is-baragraff (1) yn agored ar euogfarn ddiannod i ddirwy nad yw'n uwch na lefel 3 ar y raddfa safonol neu i'w garcharu am gyfnod nad yw'n hwy na'r uchafswm cyfnod am droseddau diannod, neu i'r ddau.
- (3) Yn is-baragraff (2) ystyr "yr uchafswm cyfnod am droseddau diannod" yw –
- (a) mewn perthynas â throsedd a gyflawnir cyn i adran 281(5) o Ddeddf Cyfiawnder Troseddol 2003 (p. 44) ddod i rym, 6 mis;
  - (b) mewn perthynas â throsedd a gyflawnir ar ôl iddi ddod i rym, 51 o wythnosau.

*Costau achosion penodol o dan y Rhan hon*

- 3 (1) Mae'r paragraff hwn yn gymwys mewn perthynas â'r achosion a ganlyn –
- (a) adolygiad gan Weinidogion Cymru o dan adran 9 (adolygiadau o benderfyniadau i ychwanegu heneb at y gofrestr etc.);
  - (b) ymchwiliad lleol neu wrandawriad, neu gyfle i gyflwyno sylwadau ysgrifenedig, o dan adran 17 (penderfynu ceisiadau am gydsyniad heneb gofrestredig);

- (c) ymchwiliad lleol neu wrandawriad o dan Ran 2 o Atodlen 4 (addasiad neu ddirymiad arfaethedig o gydsyniad heneb gofrestredig).
- (2) Caiff Gweinidogion Cymru gyfarwyddo bod rhaid i'r costau y maent yn mynd iddynt mewn perthynas â'r achos (gan gynnwys costau unrhyw berson a benodir ganddynt i gynnal yr achos) gael eu talu gan unrhyw barti i'r achos a bennir yn y cyfarwyddyd.
- (3) Caniateir i swm y costau yr eir iddynt ac y cyfarwyddir iddynt gael eu talu fel y'i crybwyllir yn is-baragraff (2) gael ei adennill gan Weinidogion Cymru yn ddiannod fel dyled sifil.
- (4) Caiff Gweinidogion Cymru, mewn perthynas â'r achos, wneud gorchmynion ynghylch—
- (a) costau'r partiön i'r achos, a
  - (b) y parti neu'r partiön y mae rhaid iddynt dalu'r costau.
- (5) Caniateir adennill costau sy'n daladwy yn rhinwedd is-baragraff (4) fel pe baent yn daladwy o dan orchymyn gan yr Uchel Lys, os yw'r Uchel Lys yn gorchymyn felly ar gais y person y mae'r costau yn ddyledus iddo.
- (6) Ni chaiff Gweinidogion Cymru wneud gorchymyn o dan is-baragraff (4) sy'n ei gwneud yn ofynnol i berson dalu costau parti arall i'r achos oni bai bod Gweinidogion Cymru wedi eu bodloni—
- (a) bod y person wedi ymddwyn yn afresymol mewn perthynas â'r achos, a
  - (b) bod ymddygiad afresymol y person wedi peri i'r parti arall fynd i wariant diangen neu wariant a wastraffwyd.
- (7) Mae cyfeiriadau yn y paragraff hwn at gostau y mae Gweinidogion Cymru yn mynd iddynt yn cynnwys—
- (a) y gost weinyddol gyfan y maent yn mynd iddi mewn cysylltiad â'r achos, gan gynnwys yn benodol swm rhesymol y maent yn ei benderfynu mewn cysylltiad â chostau cyffredinol staff a gorbenion Llywodraeth Cymru;
  - (b) costau y maent (neu y mae personau a benodir ganddynt) yn mynd iddynt mewn cysylltiad ag achos nad yw'n digwydd.

*Costau adolygiadau a gynhelir o dan adran 9 gan berson a benodir*

- 4 Pan fo adolygiad o dan adran 9 yn cael ei gynnal gan berson a benodir gan Weinidogion Cymru o dan is-adran (3) o'r adran honno, mae gan y person a benodir yr un pwerau mewn perthynas â'r adolygiad ag sydd gan Weinidogion Cymru o dan baragraff 3.

## ATODLEN 7

(a gyflwynir gan adrannau 79(6) a 85(4))

DIWEDD GWARCHODAETH INTERIM NEU RESTRU DROS DRO AR GYFER  
ADEILADAU*Cyflwyniad*

1 Mae'r Atodlen hon yn gymwys –

- (a) pan fo gwarchodaeth interim yn dod i ben mewn perthynas ag adeilad oherwydd bod Gweinidogion Cymru yn cyflwyno hysbysiad o dan adran 79(5)(b) eu bod wedi penderfynu peidio â rhestru'r adeilad, neu
- (b) pan fo rhestru dros dro yn dod i ben mewn perthynas ag adeilad –
  - (i) ar ddiwedd y cyfnod o 6 mis a grybwyllir yn adran 85(1), neu
  - (ii) oherwydd bod Gweinidogion Cymru yn rhoi hysbysiad o dan adran 85(3) nad ydynt yn bwriadu ymgynghori ar gynnig i restru'r adeilad.

*Atebolrwydd troseddol*

2 Nid yw'r ffaith nad yw'r adeilad yn cael ei drin mwyach fel pe bai'n adeilad rhestredig yn effeithio ar atebolrwydd unrhyw berson i gael ei erlyn a'i gosbi am drosedd o dan y Ddeddf hon a gyflawnwyd tra oedd yr adeilad yn cael ei drin fel adeilad rhestredig.

*Cydsyniad adeilad rhestredig*

3 Mae unrhyw achos ynghylch cais am gydsyniad adeilad rhestredig sy'n ymwneud â'r adeilad, neu sy'n deillio o gais o'r fath, yn darfod; ac mae unrhyw gydsyniad o'r fath yn peidio â chael effaith.

*Hysbysiadau stop dros dro*

4 Mae unrhyw hysbysiad stop dros dro sy'n ymwneud â'r adeilad yn peidio â chael effaith.

*Hysbysiadau gorfodi*

- 5 (1) Mae unrhyw hysbysiad gorfodi sy'n ymwneud â'r adeilad yn peidio â chael effaith.
- (2) Mae unrhyw achos ynghylch apêl yn erbyn hysbysiad o'r fath yn darfod.
- (3) Er gwaethaf is-baragraff (1), mae adran 132(1) i (6) yn parhau i gael effaith mewn perthynas –
  - (a) ag unrhyw dreuliau yr eir iddynt gan awdurdod cynllunio neu Weinidogion Cymru, neu gan berchennog neu feddiannydd, fel y'i crybwyllir yn yr adran honno, a
  - (b) ag unrhyw symiau a delir o ganlyniad i'r treuliau hynny.

*Gwaharddebau*

6 Mae unrhyw achos ynghylch cais am waharddeb o dan adran 135 sy'n ymwneud â'r adeilad yn darfod.

## ATODLEN 8

*(a gyflwynir gan adran 107(3))*Y WEITHDREFN AR GYFER GORCHMYNION SY'N ADDASU NEU'N DIRYMU  
CYDSYNIAD ADEILAD RHESTREDIG

## RHAN 1

## GORCHMYNION A WNEIR GAN AWDURDODAU CYNLLUNIO

*Yr amgylchiadau pan fydd gorchmynion yn cymryd effaith*

- 1 Nid yw gorchmyn o dan adran 107 a wneir gan awdurdod cynllunio ond yn cymryd effaith—
- (a) os caiff ei gadarnhau gan Weinidogion Cymru o dan baragraff 2, neu
  - (b) yn unol â pharagraff 3.

*Y weithdrefn ar gyfer cadarnhau gorchmynion gan Weinidogion Cymru*

- 2 (1) Pan fo awdurdod cynllunio yn cyflwyno gorchmyn o dan adran 107 i Weinidogion Cymru i'w gadarnhau, rhaid iddo gyflwyno hysbysiad o gyflwyno'r gorchmyn—
- (a) i bob perchennog a phob meddiannydd ar yr adeilad rhestredig y mae'r gorchmyn yn ymwneud ag ef, a
  - (b) i unrhyw berson arall y mae'n meddwl y bydd y gorchmyn yn effeithio arno.
- (2) Rhaid i'r hysbysiad bennu o fewn pa gyfnod y caiff person y'i cyflwynir iddo wneud cais ysgrifenedig i Weinidogion Cymru am gyfle i ymddangos gerbron person a benodir gan Weinidogion Cymru a chael gwrandawriad ganddo.
- (3) Os yw person y cyflwynir yr hysbysiad iddo yn gwneud cais o'r fath o fewn y cyfnod hwnnw, cyn cadarnhau'r gorchmyn rhaid i Weinidogion Cymru roi cyfle o'r fath i'r person hwnnw a'r awdurdod cynllunio.
- (4) Rhaid i'r cyfnod a bennir o dan is-baragraff (2) fod o leiaf 28 o ddiwrnodau sy'n dechrau â thrannoeth y diwrnod y cyflwynir yr hysbysiad.
- (5) Caiff Gweinidogion Cymru gadarnhau'r gorchmyn gydag addasiadau neu hebddynt.

*Y weithdrefn i orchmynion gymryd effaith heb gadarnhad*

- 3 (1) Mae'r paragraff hwn yn gymwys pan—
- (a) bo awdurdod cynllunio wedi gwneud gorchmyn o dan adran 107, a
  - (b) bo'r personau a ganlyn wedi hysbysu'r awdurdod yn ysgrifenedig nad ydynt yn gwrthwynebu'r gorchmyn—
    - (i) pob perchennog a phob meddiannydd ar yr adeilad rhestredig y mae'r gorchmyn yn ymwneud ag ef, a
    - (ii) pob person arall y mae'r awdurdod yn meddwl y bydd y gorchmyn yn effeithio arno.

- (2) Rhaid i'r awdurdod cynllunio (yn lle cyflwyno'r gorchymyn i Weinidogion Cymru i'w gadarnhau) –
- (a) cyhoeddi hysbysiad yn y ffordd a bennir mewn rheoliadau a wneir gan Weinidogion Cymru fod y gorchymyn wedi ei wneud,
  - (b) cyflwyno copi o'r hysbysiad i'r personau a grybwyllir yn is-baragraff (1)(b), ac
  - (c) anfon copi o'r hysbysiad at Weinidogion Cymru heb fod yn hwyrach na 3 diwrnod ar ôl y diwrnod y'i cyhoeddir.
- (3) Rhaid i'r hysbysiad bennu –
- (a) o fewn pa gyfnod y caiff personau y mae'r gorchymyn yn effeithio arnynt roi hysbysiad i Weinidogion Cymru eu bod am i'r gorchymyn gael ei gyflwyno i Weinidogion Cymru i'w gadarnhau o dan y weithdrefn ym mharagraff 2;
  - (b) y cyfnod, os na roddir hysbysiad o'r fath ac nad yw Gweinidogion Cymru yn cyfarwyddo bod rhaid cyflwyno'r gorchymyn iddynt i'w gadarnhau, y bydd y gorchymyn yn cymryd effaith heb gael ei gadarnhau gan Weinidogion Cymru ar ei ddiwedd.
- (4) Os, ar ddiwedd y cyfnod a bennir o dan is-baragraff (3)(a) –
- (a) nad yw unrhyw berson y mae'r gorchymyn yn effeithio arno wedi rhoi hysbysiad i Weinidogion Cymru fel y'i crybwyllir yn is-baragraff (3)(a), a
  - (b) nad yw Gweinidogion Cymru wedi cyfarwyddo bod rhaid cyflwyno'r gorchymyn iddynt i'w gadarnhau,
- mae'r gorchymyn yn cymryd effaith ar ddiwedd y cyfnod a bennir o dan is-baragraff (3)(b).
- (5) Rhaid i'r cyfnod a bennir o dan is-baragraff (3)(a) fod o leiaf 28 o ddiwrnodau sy'n dechrau â thrannoeth y diwrnod y caiff yr hysbysiad o wneud y gorchymyn ei gyhoeddi am y tro cyntaf.
- (6) Rhaid i'r cyfnod a bennir o dan is-baragraff (3)(b) fod o leiaf 14 o ddiwrnodau ar ôl diwedd y cyfnod a bennir o dan is-baragraff (3)(a).

## RHAN 2

## GORCHMYNION A WNEIR GAN WEINIDOGION CYMRU

*Y weithdrefn i'w dilyn cyn gwneud gorchymyn*

- 4 (1) Ni chaiff Gweinidogion Cymru wneud gorchymyn o dan adran 107 heb ymgynghori â'r awdurdod cynllunio y mae'r adeilad rhestredig y mae'r gorchymyn yn ymwneud ag ef yn ei ardal.
- (2) Cyn gwneud gorchymyn o dan adran 107 rhaid i Weinidogion Cymru hefyd gyflwyno hysbysiad o'r gorchymyn arfaethedig –
- (a) i bob perchennog a phob meddiannydd ar yr adeilad, a
  - (b) i unrhyw berson arall y maent yn meddwl y bydd y gorchymyn yn effeithio arno.
- (3) Rhaid i'r hysbysiad bennu o fewn pa gyfnod y caiff person y'i cyflwynir iddo wneud cais ysgrifenedig i Weinidogion Cymru am gyfle i ymddangos gerbron person a benodir gan Weinidogion Cymru a chael gwrandawriad ganddo.



- (4) Os yw person y cyflwynir yr hysbysiad iddo yn gwneud cais o'r fath o fewn y cyfnod hwnnw, cyn gwneud y gorchymyn rhaid i Weinidogion Cymru roi cyfle o'r fath i'r person hwnnw a'r awdurdod cynllunio.
- (5) Rhaid i'r cyfnod a bennir o dan is-baragraff (3) fod o leiaf 28 o ddiwrnodau sy'n dechrau â thrannoeth y diwrnod y cyflwynir yr hysbysiad.

ATODLEN 9  
(a gyflwynir gan adran 112)

CAMAU GWEITHREDU YN DILYN CYFLWYNO HYSBYSIAD PRYNU

*Ymateb i hysbysiad prynu gan awdurdod cynllunio*

- 1 (1) Pan fo person wedi cyflwyno hysbysiad prynu i awdurdod cynllunio, rhaid i'r awdurdod gyflwyno hysbysiad derbyn neu hysbysiad gwrthod i'r person.
- (2) Mae hysbysiad derbyn yn hysbysiad sy'n datgan naill ai –
  - (a) bod yr awdurdod cynllunio yn fodlon cydymffurfio â'r hysbysiad prynu, neu
  - (b) bod awdurdod lleol arall neu ymgymwrwr statudol a bennir yn yr hysbysiad derbyn wedi cytuno i gydymffurfio â'r hysbysiad prynu.
- (3) Mae hysbysiad gwrthod yn hysbysiad sy'n datgan –
  - (a) nad yw'r awdurdod cynllunio, am resymau a bennir yn yr hysbysiad, yn fodlon cydymffurfio â'r hysbysiad prynu ac nad yw wedi dod o hyd i unrhyw awdurdod lleol arall neu ymgymwrwr statudol sy'n fodlon cydymffurfio ag ef, a
  - (b) bod yr awdurdod cynllunio wedi anfon copïau o'r hysbysiad prynu a'r hysbysiad gwrthod at Weinidogion Cymru.
- (4) Rhaid cyflwyno hysbysiad derbyn neu hysbysiad gwrthod cyn diwedd 3 mis sy'n dechrau â'r diwrnod y cyflwynwyd yr hysbysiad prynu.
- (5) Pan fo'r awdurdod cynllunio yn cyflwyno hysbysiad derbyn i berson, mae'r awdurdod hwnnw neu (yn achos hysbysiad sy'n dod o fewn is-baragraff (2)(b)) yr awdurdod lleol arall neu'r ymgymwrwr statudol a bennir yn yr hysbysiad i'w drin –
  - (a) fel pe bai wedi ei awdurdodi o dan adran 137 i gaffael buddiant y person yn orfodol, a
  - (b) fel pe bai wedi cyflwyno hysbysiad i drafod telerau mewn cysylltiad â'r buddiant hwnnw ar y diwrnod y cyflwynir yr hysbysiad derbyn.
- (6) Cyn cyflwyno hysbysiad gwrthod i berson, rhaid i'r awdurdod cynllunio anfon at Weinidogion Cymru –
  - (a) copi o'r hysbysiad gwrthod, a
  - (b) copi o'r hysbysiad prynu.
- (7) Ni chaniateir i hysbysiad i drafod telerau a drinnir fel pe bai wedi ei gyflwyno yn rhinwedd is-baragraff (5)(b) gael ei dynnu'n ôl o dan adran 31 o Ddeddf Digollediad Tir 1961 (p. 33).

*Camau gweithredu i'w cymryd gan Weinidogion Cymru os caiff hysbysiad prynu ei wrthod gan awdurdod cynllunio*

- 2 (1) Mae'r paragraff hwn yn gymwys pan fo copi o hysbysiad prynu yn cael ei anfon at Weinidogion Cymru o dan baragraff 1(6).
- (2) Rhaid i Weinidogion Cymru gadarnhau'r hysbysiad prynu os ydynt wedi eu bodloni –
  - (a) bod y setiau o amodau yn adran 109 wedi eu bodloni mewn perthynas â'r tir y mae'r hysbysiad yn ymwneud ag ef, a

- (b) bod y tir y mae'r hysbysiad yn ymwneud ag ef yn cynnwys yr holl dir sy'n cydffinio â'r adeilad rhestredig neu sy'n gyfagos iddo y maent yn ystyried bod ei angen –
- (i) ar gyfer diogelu'r adeilad neu ei amwynderau,
  - (ii) ar gyfer darparu neu hwyluso mynediad iddo, neu
  - (iii) ar gyfer ei reolaethu'n briodol neu ei reoli'n briodol,
- ond mae hyn yn ddarostyngedig i'r darpariaethau a ganlyn.
- (3) Os yw Gweinidogion Cymru wedi eu bodloni nad yw'r setiau o amodau yn adran 109 wedi eu bodloni ond mewn perthynas â rhan o'r tir, rhaid iddynt gadarnhau'r hysbysiad mewn perthynas â'r rhan honno yn unig.
- (4) Yn lle cadarnhau'r hysbysiad prynu, caiff Gweinidogion Cymru –
- (a) yn achos hysbysiad a gyflwynir o ganlyniad i wrthod cydsyniad adeilad rhestredig ar gyfer unrhyw waith, roi cydsyniad adeilad rhestredig ar gyfer y gwaith;
  - (b) yn achos hysbysiad a gyflwynir o ganlyniad i roi cydsyniad adeilad rhestredig ar gyfer unrhyw waith yn ddarostyngedig i amodau, amrywio neu ddileu'r amodau i'r graddau y maent yn ystyried bod hynny yn angenrheidiol i alluogi gwneud y tir y mae'r hysbysiad yn ymwneud ag ef yn ddefnyddiadwy drwy gyflawni'r gwaith;
  - (c) yn achos hysbysiad a gyflwynir o ganlyniad i orchymyn o dan adran 107 sy'n dirymu cydsyniad adeilad rhestredig, ddirymu'r gorchymyn;
  - (d) yn achos hysbysiad a gyflwynir o ganlyniad i orchymyn o dan yr adran honno sy'n addasu cydsyniad adeilad rhestredig ar gyfer unrhyw waith drwy osod amodau, amrywio neu ddileu'r amodau i'r graddau y maent yn ystyried bod hynny yn angenrheidiol i alluogi gwneud y tir y mae'r hysbysiad yn ymwneud ag ef yn ddefnyddiadwy drwy gyflawni'r gwaith.
- (5) Mae is-baragraff (6) yn gymwys os yw Gweinidogion Cymru yn ystyried y gellid gwneud y tir y mae'r hysbysiad yn ymwneud ag ef, neu unrhyw ran ohono, yn ddefnyddiadwy o fewn amser rhesymol drwy gyflawni –
- (a) unrhyw waith arall y dylai cydsyniad adeilad rhestredig gael ei roi ar ei gyfer, neu
  - (b) unrhyw ddatblygiad y dylai caniatâd cynllunio gael ei roi ar ei gyfer.
- (6) Yn lle cadarnhau'r hysbysiad prynu mewn perthynas â'r tir neu'r rhan honno ohono, caiff Gweinidogion Cymru gyfarwyddo, os gwneir cais am gydsyniad adeilad rhestredig ar gyfer y gwaith hwnnw, neu am ganiatâd cynllunio ar gyfer y datblygiad hwnnw, fod rhaid ei roi.
- (7) Wrth gadarnhau hysbysiad prynu caiff Gweinidogion Cymru, os ydynt yn ystyried ei bod yn briodol gan roi sylw i'r defnydd tebygol yn y pen draw o'r tir y mae'r hysbysiad yn ymwneud ag ef, addasu'r hysbysiad mewn perthynas â'r holl dir neu unrhyw ran ohono drwy roi awdurdod lleol arall neu ymgymerwr statudol yn lle'r awdurdod cynllunio y cyflwynwyd yr hysbysiad iddo.
- (8) Os nad yw Gweinidogion Cymru wedi eu bodloni fel a grybwyllir yn is-baragraff (2) mewn perthynas â hysbysiad prynu, rhaid iddynt wrthod cadarnhau'r hysbysiad.
- (9) Yn y paragraff hwn mae cyfeiriadau at y tir y mae hysbysiad prynu yn ymwneud ag ef yn gyfeiriadau at yr adeilad rhestredig a'r tir cysylltiedig (os oes tir cysylltiedig) y cyflwynir yr hysbysiad mewn cysylltiad ag ef.

*Y weithdrefn cyn i Weinidogion Cymru gymryd camau gweithredu mewn perthynas â hysbysiad prynu*

- 3 (1) Cyn cymryd unrhyw gamau gweithredu mewn perthynas â hysbysiad prynu o dan baragraff 2, rhaid i Weinidogion Cymru gyflwyno hysbysiad o'u camau gweithredu arfaethedig—
- (a) i'r person a gyflwynodd yr hysbysiad prynu,
  - (b) i'r awdurdod cynllunio y cyflwynwyd yr hysbysiad prynu iddo, ac
  - (c) os ydynt yn cynnig rhoi unrhyw awdurdod lleol arall neu ymgymwrwr statudol yn lle'r awdurdod cynllunio, i'r awdurdod lleol arall neu'r ymgymwrwr statudol.
- (2) Rhaid i hysbysiad o dan is-baragraff (1) bennu o fewn pa gyfnod y caiff unrhyw un neu ragor o'r personau y'i cyflwynir iddynt wneud cais ysgrifenedig i Weinidogion Cymru am gyfle i ymddangos gerbron person a benodir gan Weinidogion Cymru a chael gwrandawriad ganddo.
- (3) Os yw person y cyflwynir yr hysbysiad iddo yn gwneud cais o fewn y cyfnod hwnnw, rhaid i Weinidogion Cymru roi cyfle o'r fath i'r person hwnnw cyn iddynt gymryd unrhyw gamau gweithredu mewn perthynas â'r hysbysiad prynu o dan baragraff 2.
- (4) Rhaid i'r cyfnod a bennir o dan is-baragraff (2) fod o leiaf 28 o ddiwrnodau sy'n dechrau â thrannoeth y diwrnod y cyflwynir yr hysbysiad o dan is-baragraff (1).
- (5) Os yw Gweinidogion Cymru, ar ôl i unrhyw bersonau ymddangos gerbron person a benodir a chael gwrandawriad ganddo, yn ystyried ei bod yn briodol cymryd camau gweithredu o dan baragraff 2 nad ydynt yn unol â'r hysbysiad a gyflwynir o dan is-baragraff (1), cânt wneud hynny.

*Effaith camau gweithredu gan Weinidogion Cymru mewn perthynas â hysbysiad prynu*

- 4 (1) Pan fo Gweinidogion Cymru yn cadarnhau hysbysiad prynu, mae'r awdurdod a grybwyllir yn is-baragraff (2) i'w drin—
- (a) fel pe bai wedi ei awdurdodi o dan adran 137 i gaffael yn orfodol fuddiant y person a gyflwynodd yr hysbysiad, a
  - (b) fel pe bai wedi cyflwyno hysbysiad i drafod telerau mewn cysylltiad â'r buddiant hwnnw ar y dyddiad y mae Gweinidogion Cymru yn ei gyfarwyddo.
- (2) Yr awdurdod y cyfeirir ato yn is-baragraff (1) yw—
- (a) yr awdurdod cynllunio y cyflwynwyd yr hysbysiad prynu iddo, neu
  - (b) os addasodd Gweinidogion Cymru yr hysbysiad prynu o dan baragraff 2(7) drwy roi awdurdod lleol arall neu ymgymwrwr statudol yn lle'r awdurdod cynllunio, yr awdurdod lleol arall neu'r ymgymwrwr statudol.
- (3) Os anfonir hysbysiad prynu at Weinidogion Cymru o dan baragraff 1(6) ac nad ydynt yn cymryd unrhyw gamau gweithredu mewn perthynas ag ef o dan baragraff 2 erbyn diwedd y cyfnod perthnasol—
- (a) mae'r hysbysiad prynu i'w drin fel pe bai wedi ei gadarnhau ganddynt ar ddiwedd y cyfnod perthnasol, a
  - (b) mae'r awdurdod cynllunio y cyflwynwyd yr hysbysiad prynu iddo i'w drin—

- (i) fel pe bai wedi ei awdurdodi o dan adran 137 i gaffael yn orfodol fuddiant y person a gyflwynodd yr hysbysiad, a
  - (ii) fel pe bai wedi cyflwyno hysbysiad i drafod telerau mewn cysylltiad â'r buddiant hwnnw ar ddiwedd y cyfnod perthnasol.
- (4) Pan na fo hysbysiad prynu yn cael ei gadarnhau ond mewn perthynas â rhan o'r tir y mae'n ymwneud ag ef, mae cyfeiriadau yn y paragraff hwn at fuddiant y perchennog yn gyfeiriadau at fuddiant y perchennog yn y rhan honno.
- (5) Yn is-baragraff (3) ystyr y "cyfnod perthnasol" yw pa un bynnag o'r canlynol sy'n dod i ben yn gynharach –
- (a) 9 mis sy'n dechrau â'r diwrnod y cyflwynwyd yr hysbysiad prynu i'r awdurdod cynllunio;
  - (b) 6 mis sy'n dechrau â'r diwrnod yr anfonwyd copi o'r hysbysiad at Weinidogion Cymru o dan baragraff 1(6).
- (6) Ond nid yw'r cyfnod perthnasol yn cynnwys unrhyw adeg pan fydd gan Weinidogion Cymru ger eu bron y naill a'r llall o'r canlynol –
- (a) copi o'r hysbysiad prynu a anfonwyd atynt o dan baragraff 1(6), a
  - (b) hysbysiad o apêl o dan adran 100 (apêl yn erbyn gwrthod etc. cydsyniad adeilad rhestredig) neu 127 (apêl yn erbyn hysbysiad gorfodi) sy'n ymwneud ag unrhyw ran o'r tir y mae'r hysbysiad prynu yn ymwneud ag ef.
- (7) Ni chaniateir i hysbysiad i drafod telerau a drinnir fel pe bai wedi ei gyflwyno yn rhinwedd is-baragraff (1)(b) neu (3)(b)(ii) gael ei dynnu'n ôl o dan adran 31 o Ddeddf Digollediad Tir 1961 (p. 33).
- (8) Yn y paragraff hwn mae cyfeiriadau at y tir y mae hysbysiad prynu yn ymwneud ag ef yn gyfeiriadau at yr adeilad rhestredig a'r tir cysylltiedig (os oes tir cysylltiedig) y cyflwynir yr hysbysiad mewn perthynas â hwy.

*Her gyfreithiol i gamau gweithredu Gweinidogion Cymru mewn perthynas â hysbysiad prynu*

- 5 (1) Os caiff penderfyniad gan Weinidogion Cymru i gymryd unrhyw gamau gweithredu mewn perthynas â hysbysiad prynu o dan baragraff 2 ei ddiddymu mewn achos o dan adran 183, mae'r hysbysiad prynu i'w drin fel pe bai wedi ei ganslo, ond caiff y person a'i cyflwynodd gyflwyno hysbysiad prynu pellach.
- (2) At ddiben penderfynu a yw'r hysbysiad prynu pellach wedi ei gyflwyno o fewn yr amser a bennir yn adran 111(1), mae'r penderfyniad y mae'r hysbysiad yn ymwneud ag ef i'w drin fel pe bai wedi ei wneud, neu mae'r gorchymyn y mae'n ymwneud ag ef i'w drin fel pe bai wedi cymryd effaith, ar y diwrnod y diddymwyd penderfyniad Gweinidogion Cymru.

*Didynnu digollediad sy'n daladwy o dan adran 108 wrth gaffael*

- 6 Pan fo digollediad yn daladwy o dan adran 108 (digollediad pan fo cydsyniad yn cael ei addasu neu ei ddirymu) am wariant yr eir iddo wrth gyflawni gwaith i adeilad rhestredig, rhaid lleihau unrhyw ddigollediad sy'n dod yn daladwy mewn cysylltiad â chaffael buddiant yn yr adeilad ac unrhyw dir cysylltiedig yn unol â hysbysiad prynu gan swm y digollediad sy'n ymwneud â'r gwaith.

*Dehongli'r Atodlen*

## 7 (1) Yn yr Atodlen hon—

mae i “defnyddiadwy” (“usable”) a “tir cysylltiedig” (“associated land”) yr ystyron a roddir gan adran 109(6);

mae “ymgymerwr statudol” (“statutory undertaker”) yn cynnwys gweithredwr cod cyfathrebu electronig a chyn-weithredwr telathrebu cyhoeddus.

## (2) Yn y diffiniad o “ymgymerwr statudol” yn is-baragraff (1)—

mae i “cyn-weithredwr telathrebu cyhoeddus” (“former public telecommunications operator”) yr ystyr a roddir i “former PTO” gan baragraff 1(1) o Atodlen 17 i Ddeddf Cyfathrebiadau 2003 (p. 21);

mae i “gweithredwr cod cyfathrebu electronig” yr ystyr a roddir i “electronic communications code operator” gan baragraff 1(1) o Atodlen 17 i Ddeddf Cyfathrebiadau 2003.



## ATODLEN 10

*(a gyflwynir gan adran 115(5))*Y WEITHDREFN AR GYFER GORCHMYNION SY'N TERFYNU CYTUNDEBAU  
PARTNERIAETHAU ADEILADAU RHESTREDIG

## RHAN 1

## GORCHMYNION A WNEIR GAN AWDURDODAU CYNLLUNIO

*Gofyniad i gael cadarnhad Gweinidogion Cymru*

- 1 (1) Nid yw gorchymyn o dan adran 115 a wneir gan awdurdod cynllunio yn cymryd effaith oni bai ei fod yn cael ei gadarnhau gan Weinidogion Cymru.
- (2) Pan fo awdurdod cynllunio yn cyflwyno gorchymyn i Weinidogion Cymru i'w gadarnhau, rhaid iddo gyflwyno hysbysiad o gyflwyno'r gorchymyn—
  - (a) i'r partïon eraill i'r cytundeb partneriaeth adeilad rhestredig,
  - (b) i unrhyw berson arall sy'n meddiannu'r adeilad rhestredig, neu'r rhan o adeilad rhestredig, y mae'r cytundeb yn ymwneud ag ef o dan les a roddir neu a estynnir am gyfnod penodol sydd ag o leiaf 2 flynedd yn weddill, ac
  - (c) i unrhyw berson arall y mae'r awdurdod yn meddwl y bydd y gorchymyn yn effeithio arno.
- (3) Rhaid i'r hysbysiad bennu o fewn pa gyfnod y caiff person y'i cyflwynir iddo wneud cais ysgrifenedig i Weinidogion Cymru am gyfle i ymddangos gerbron person a benodir gan Weinidogion Cymru a chael gwrandawriad ganddo.
- (4) Os yw person y cyflwynir yr hysbysiad iddo yn gwneud cais o'r fath o fewn y cyfnod hwnnw, cyn cadarnhau'r gorchymyn rhaid i Weinidogion Cymru roi cyfle o'r fath i'r person hwnnw a phob awdurdod cynllunio sy'n barti i'r cytundeb partneriaeth adeilad rhestredig.
- (5) Rhaid i'r cyfnod a bennir o dan is-baragraff (3) fod o leiaf 28 o ddiwrnodau sy'n dechrau â thrannoeth y diwrnod y cyflwynir yr hysbysiad.
- (6) Caiff Gweinidogion Cymru gadarnhau'r gorchymyn gydag addasiadau neu hebddynt.

## RHAN 2

## GORCHMYNION A WNEIR GAN WEINIDOGION CYMRU

*Y weithdrefn i'w dilyn cyn gwneud gorchymyn*

- 2 (1) Cyn gwneud gorchymyn o dan adran 115, rhaid i Weinidogion Cymru gyflwyno hysbysiad o'r gorchymyn arfaethedig—
  - (a) i'r partïon i'r cytundeb partneriaeth adeilad rhestredig (neu os yw Gweinidogion Cymru yn barti i'r cytundeb, y partïon eraill iddo),
  - (b) i unrhyw berson arall sy'n meddiannu'r adeilad rhestredig, neu'r rhan o adeilad rhestredig, y mae'r cytundeb yn ymwneud ag ef o dan les a roddir neu a estynnir am gyfnod penodol sydd ag o leiaf 2 flynedd yn weddill, a

- (c) i unrhyw berson arall y mae Gweinidogion Cymru yn meddwl y bydd y gorchymyn yn effeithio arno.
- (2) Rhaid i'r hysbysiad bennu o fewn pa gyfnod y caiff person y'i cyflwynir iddo wneud cais ysgrifenedig i Weinidogion Cymru am gyfle i ymddangos gerbron person a benodir gan Weinidogion Cymru a chael gwrandawriad ganddo.
- (3) Os yw person y cyflwynir yr hysbysiad iddo yn gwneud cais o'r fath o fewn y cyfnod hwnnw, cyn gwneud y gorchymyn rhaid i Weinidogion Cymru roi cyfle o'r fath i'r person hwnnw ac i unrhyw awdurdod cynllunio sy'n barti i'r cytundeb partneriaeth adeilad rhestredig.
- (4) Rhaid i'r cyfnod a bennir o dan is-baragraff (2) fod o leiaf 28 o ddiwrnodau sy'n dechrau â thrannoeth y diwrnod y cyflwynir yr hysbysiad.

## ATODLEN 11

(a gyflwynir gan adran 161(5))

## EFFAITH ADRAN 161 YN PEIDIO Â BOD YN GYMWYS I ADEILAD

*Cyflwyniad*

- 1 Mae'r Atodlen hon yn gymwys pan fo adeilad yn peidio â bod yn adeilad y mae adran 161 yn gymwys iddo.

*Atebolrwydd troseddol*

- 2 Nid yw'r ffaith bod yr adeilad yn peidio â bod yn adeilad y mae adran 161 yn gymwys iddo yn effeithio ar atebolrwydd unrhyw berson i gael ei erlyn a'i gosbi am drosedd o dan y Ddeddf hon a gyflawnwyd tra oedd adran 161 yn gymwys iddo.

*Cydsyniad ardal gadwraeth*

- 3 Mae unrhyw achos ynghylch cais am gydsyniad ardal gadwraeth sy'n ymwneud â'r adeilad, neu sy'n deillio o gais o'r fath, yn darfod; ac mae unrhyw gydsyniad o'r fath yn peidio â chael effaith.

*Hysbysiadau stop dros dro*

- 4 Mae unrhyw hysbysiad stop dros dro sy'n ymwneud â'r adeilad yn peidio â chael effaith.

*Hysbysiadau gorfodi*

- 5 (1) Mae unrhyw hysbysiad gorfodi a ddyroddir sy'n ymwneud â'r adeilad yn peidio â chael effaith.
- (2) Mae unrhyw achos ynghylch apêl yn erbyn hysbysiad o'r fath yn darfod.
- (3) Er gwaethaf is-baragraff (1), mae adran 132(1) i (6) (fel y'i cymhwysir gan adran 163) yn parhau i gael effaith mewn perthynas –
- (a) ag unrhyw dreuliau yr eir iddynt gan awdurdod cynllunio neu Weinidogion Cymru, neu gan berchennog neu feddiannydd, fel y'i crybwyllir yn yr adran honno, a
- (b) ag unrhyw symiau a delir o ganlyniad i'r treuliau hynny.

*Gwaharddebau*

- 6 Mae unrhyw achos ynghylch cais am waharddeb o dan adran 135 (fel y'i cymhwysir gan adran 163) sy'n ymwneud â'r adeilad yn darfod.

## ATODLEN 12

(a gyflwynir gan adran 173(6))

## PENDERFYNU APÊL GAN BERSON A BENODIR NEU WEINIDOGION CYMRU

*Cyflwyniad*

1 Yn yr Atodlen hon –

ystyr “yr awdurdod cynllunio” (“*the planning authority*”) yw’r awdurdod cynllunio y mae’r adeilad y mae’r apêl yn ymwneud ag ef yn ei ardal;

ystyr “person a benodir” (“*appointed person*”) yw person a benodir gan Weinidogion Cymru o dan adran 173 i benderfynu apêl o dan adran 100 neu 127.

*Pwerau a dyletswyddau person a benodir*

2 (1) Mae gan berson a benodir yr un pwerau a dyletswyddau –

(a) mewn perthynas ag apêl o dan adran 100 ag sydd gan Weinidogion Cymru o dan adran 104;

(b) mewn perthynas ag apêl o dan adran 127 ag sydd gan Weinidogion Cymru o dan adran 128.

(2) Mae is-baragraff (3) yn gymwys pan fo unrhyw ddeddfiad (ac eithrio’r Atodlen hon neu adran 174) –

(a) yn cyfeirio (neu i’w ddarllen fel pe bai’n cyfeirio) at Weinidogion Cymru mewn cyd-destun sy’n ymwneud neu sy’n gallu ymwneud ag apêl y mae adran 173 yn gymwys iddi, neu

(b) yn cyfeirio (neu i’w ddarllen fel pe bai’n cyfeirio) at unrhyw beth a wneir neu a awdurdodir neu y mae’n ofynnol ei wneud gan Weinidogion Cymru, iddynt neu ger eu bron mewn cysylltiad ag unrhyw apêl o’r fath.

(3) I’r graddau y mae’r cyd-destun yn caniatáu hynny, mae’r deddfiad i’w ddarllen, mewn perthynas ag apêl a benderfynir neu sydd i’w phenderfynu gan berson a benodir, fel pe bai’r cyfeiriad at Weinidogion Cymru yn gyfeiriad at berson a benodir neu’n cynnwys cyfeiriad o’r fath.

*Ymchwiliad lleol, gwrandawriad neu sylwadau ysgrifenedig*

3 (1) Caiff person a benodir gynnal ymchwiliad lleol neu wrandawriad mewn cysylltiad ag apêl pan fo penderfyniad o dan adran 174 yn darparu i’r apêl gael ei hystyried yn y ffordd honno.

(2) Caiff Gweinidogion Cymru neu berson a benodir benodi asesydd i gynghori’r person a benodir ar unrhyw faterion sy’n codi –

(a) mewn ymchwiliad lleol neu wrandawriad a gynhelir gan y person a benodir mewn cysylltiad ag apêl neu o ganlyniad i ymchwiliad neu wrandawriad o’r fath, neu

(b) mewn sylwadau ysgrifenedig a gyflwynir i’r person a benodir mewn cysylltiad ag apêl neu o ganlyniad i sylwadau o’r fath.

*Amnewid y person a benodir*

- 4 (1) Ar unrhyw adeg cyn i berson a benodir benderfynu apêl, caiff Gweinidogion Cymru –
- (a) dirymu penodiad y person, a
  - (b) penodi person arall o dan adran 173 i benderfynu'r apêl.
- (2) Pan fo penodiad newydd yn cael ei wneud, rhaid dechrau ystyried yr apêl, ac unrhyw ymchwiliad neu unrhyw wrandawriad arall mewn cysylltiad â'r apêl, o'r newydd.
- (3) Nid yw is-baragraff (2) yn ei gwneud yn ofynnol i unrhyw berson gael cyfle –
- (a) i gyflwyno sylwadau newydd, neu
  - (b) i addasu neu dynnu'n ôl unrhyw sylwadau y mae'r person eisoes wedi eu cyflwyno.

*Cyfarwyddyd o dan adran 173(3)(b) bod apêl i'w phenderfynu gan Weinidogion Cymru*

- 5 (1) Mae'r paragraff hwn yn gymwys pan fo Gweinidogion Cymru yn rhoi cyfarwyddyd o dan adran 173(3)(b) bod apêl a fyddai fel arall yn cael ei phenderfynu gan berson a benodir i'w phenderfynu ganddynt hwy yn lle hynny.
- (2) Rhaid i'r cyfarwyddyd ddatgan y rhesymau dros ei roi a rhaid ei gyflwyno –
- (a) i'r person, os oes un, a benodir i benderfynu'r apêl,
  - (b) i'r apelydd,
  - (c) i'r awdurdod cynllunio, a
  - (d) yn achos apêl o dan adran 100, i unrhyw berson a gyflwynodd sylwadau sy'n ymwneud â phwnc yr apêl y mae rheoliadau o dan adran 91(4) yn ei gwneud yn ofynnol i'r awdurdod cynllunio eu hystyried.
- (3) Rhaid i Weinidogion Cymru roi cyfle i'r personau a grybwyllir yn is-baragraff (2)(b) i (d) i gyflwyno sylwadau pellach os yw'r rhesymau dros y cyfarwyddyd yn codi materion nad yw unrhyw un neu ragor o'r personau hynny wedi cyflwyno sylwadau yn eu cylch.
- (4) Ac eithrio fel y'i darperir gan is-baragraff (3), nid oes angen i Weinidogion Cymru roi cyfle i unrhyw berson –
- (a) i ymddangos gerbron person a benodir ganddynt ac i gael gwrandawriad ganddo,
  - (b) i gyflwyno sylwadau newydd, neu
  - (c) i addasu neu dynnu'n ôl unrhyw sylwadau y mae'r person eisoes wedi eu cyflwyno.
- (5) Wrth benderfynu'r apêl caiff Gweinidogion Cymru ystyried unrhyw adroddiad a wneir iddynt gan berson a benodwyd yn flaenorol i'w phenderfynu.
- (6) Yn ddarostyngedig i'r paragraff hwn, mae'r darpariaethau yn y Ddeddf hon sy'n berthnasol i'r apêl yn gymwys iddi fel pe na bai'r Atodlen hon erioed wedi bod yn gymwys.

*Dirymu cyfarwyddyd o dan adran 173(3)(b)*

- 6 (1) Caiff Gweinidogion Cymru drwy gyfarwyddyd pellach ddirymu cyfarwyddyd o dan adran 173(3)(b) ar unrhyw adeg cyn i'r apêl gael ei phenderfynu.

- (2) Rhaid i'r cyfarwyddyd pellach ddatgan y rhesymau dros ei roi a rhaid ei gyflwyno i'r personau yr oedd paragraff 5(2) yn ei gwneud yn ofynnol i'r cyfarwyddyd o dan adran 173(3)(b) gael ei gyflwyno iddynt.
- (3) Pan fo cyfarwyddyd pellach yn cael ei roi o dan y paragraff hwn, mae adran 173 a'r Atodlen hon yn gymwys fel pe na bai cyfarwyddyd wedi ei roi o dan baragraff 5 (ac yn unol â hynny rhaid i Weinidogion Cymru benodi person o dan yr adran honno i benderfynu'r apêl).
- (4) Ond mae unrhyw beth a wneir gan Weinidogion Cymru neu ar eu rhan mewn cysylltiad â'r apêl a allai fod wedi cael ei wneud gan y person a benodir (gan gynnwys unrhyw drefniadau a wneir ar gyfer cynnal gwrandawriad neu ymchwiliad lleol), oni bai bod y person a benodir yn cyfarwyddo fel arall, i'w drin fel pe bai wedi ei wneud gan y person a benodir.

#### *Darpariaethau atodol*

- 7 (1) Nid yw'n sail i gais i'r Uchel Lys o dan adran 183, nac i apêl i'r Uchel Lys o dan adran 184, y dylai apêl fod wedi cael ei phenderfynu gan Weinidogion Cymru yn hytrach na pherson a benodir, oni bai bod yr apelydd neu'r awdurdod cynllunio yn herio pŵer y person a benodir i benderfynu'r apêl cyn i'r penderfyniad ar yr apêl gael ei roi.
- (2) Pan fo person a benodir yn aelod o staff Llywodraeth Cymru, mae swyddogaethau'r person o ran penderfynu apêl a gwneud unrhyw beth mewn cysylltiad â hi i'w trin at ddibenion Deddf Ombwdsmon Gwasanaethau Cyhoeddus (Cymru) 2019 (dccc 3) fel pe baent yn swyddogaethau Llywodraeth Cymru.



## ATODLEN 13

*(a gyflwynir gan adran 211(1))*

## MÂN DDIWYGIADAU, DIWYGIADAU CANLYNIADOL A DIDDYMIADAU

*Deddf Tir Setledig 1925 (p. 18)*

- 1 Yn Rhan 2 o Atodlen 3 i Ddeddf Tir Setledig 1925, ar ôl paragraff (vi) mewnosoder –
- “(vii) Works specified by the Welsh Ministers as being required for properly maintaining a listed building (within the meaning given by section 76 of the Historic Environment (Wales) Act 2023) on the settled land.”

*Deddf Adeiladau Hanesyddol a Henebion Hynafol 1953 (p. 49)*

- 2 Mae Deddf Adeiladau Hanesyddol a Henebion Hynafol 1953 wedi ei diwygio fel a ganlyn.
- 3 Hepgorer adran 4.
- 4 Yn adran 4A –
- (a) yn y pennawd, yn lle “section 4” rhodder “section 3A”;
- (b) yn is-adran (1) –
- (i) hepgorer “or 4”;
- (ii) hepgorer “or (as the case may be) by the Secretary of State”;
- (c) yn is-adrannau (3), (4) ac (8), hepgorer “or (as the case may be) by the Secretary of State”.
- 5 (1) Yn adran 5, ar ôl is-adran (5) mewnosoder –
- “(6) In this section references to a building do not include a building situated wholly or mainly in Wales.”
- (2) Nid yw’r paragraff hwn yn gymwys mewn perthynas ag eiddo a gaffaelwyd neu a dderbyniwyd cyn iddo ddod i rym.
- 6 Hepgorer adran 6.
- 7 Yn adran 8, ar ôl is-adran (7) mewnosoder –
- “(8) In this section references to a building do not include a building situated wholly or mainly in Wales.”

*Deddf Pwerau Tir (Amddiffyn) 1958 (p. 30)*

- 8 Yn adran 6(4)(b) o Ddeddf Pwerau Tir (Amddiffyn) 1958, ar ôl “the Ancient Monuments and Archaeological Areas Act 1979” mewnosoder “or section 3 of the Historic Environment (Wales) Act 2023”.

*Deddf Iechyd y Cyhoedd 1961 (p. 64)*

- 9 Yn y tabl yn Atodlen 4 i Ddeddf Iechyd y Cyhoedd 1961, ar ôl y cofnod sy’n ymwneud ag adran 1 o Ddeddf Cynllunio (Adeiladau Rhestredig ac Ardaloedd Cadwraeth) 1990 mewnosoder –

<p>“A building which is included in the schedule of monuments maintained under section 3 of the Historic Environment (Wales) Act 2023 or the list of buildings maintained under section 76 of that Act, except –</p> <p>(a) a building owned by railway, canal, dock, harbour or inland navigation undertakers,</p> <p>(b) a building owned by a holder of a licence under section 6 of the Electricity Act 1989 (c. 29),</p> <p>(c) a building owned by a gas transporter (within the meaning given by section 7(1) of the Gas Act 1986 (c. 44)), or</p> <p>(d) a building forming part of an aerodrome.</p>	<p>The Welsh Ministers.”</p>
---	------------------------------

*Deddf Prynu Gorfodol 1965 (p. 56)*

10 Yn adran 1(4) o Ddeddf Prynu Gorfodol 1965 –

- (a) yn lle “or section 52 of the Planning (Listed Buildings and Conservation Areas) Act 1990” rhodder “, section 52 of the Planning (Listed Buildings and Conservation Areas) Act 1990 or section 136 of the Historic Environment (Wales) Act 2023,”;
- (b) ar ôl “section 52(2) of the Planning (Listed Buildings and Conservation Areas) Act 1990” mewnosoder “or section 136(4) of the Historic Environment (Wales) Act 2023”.

*Deddf Mwyngloddiau (Cyfleusterau Gweithio a Chynnal) 1966 (p. 4)*

11 Yn adran 7 o Ddeddf Mwyngloddiau (Cyfleusterau Gweithio a Chynnal) 1966, ar ôl is-adran (8) mewnosoder –

- “(9) For the purposes of this section, where any building or work is a monument of special historic interest within the meaning of Part 2 of the Historic Environment (Wales) Act 2023 and is, in pursuance of that Part, under the guardianship of the Welsh Ministers or a local authority, the Welsh Ministers or the local authority, as the case may be, shall be deemed to be persons entitled to make an application under this section.”

*Deddf Amwynderau Dinesig (p. 69)*

12 Hepgorer adran 4 o Ddeddf Amwynderau Dinesig 1967.

*Deddf Eglwysi ac Adeiladau Crefyddol Afreidiol eraill 1969 (p. 22)*

13 Mae Deddf Eglwysi ac Adeiladau Crefyddol Afreidiol eraill 1969 wedi ei diwygio fel a ganlyn.

14 Yn adran 4 –

- (a) yn is-adran (2)(b), ar ôl is-baragraff (i) mewnosoder –
- “(ia) the Welsh Ministers,”;
- (b) yn is-adran (9), ar ôl “in relation to” mewnosoder “the Secretary of State and”;

(c) ar ôl is-adran (9) mewnosoder –

“(9A) In relation to the Welsh Ministers –

- (a) this section only applies to any premises falling within subsection (1) if they are situated in Wales, and
- (b) references in this section to land are references only to land situated in Wales.”;

(d) yn is-adran (10) –

- (i) ym mharagraff (a), ar ôl “the Planning (Listed Buildings and Conservation Areas) Act 1990” mewnosoder “or the Historic Environment (Wales) Act 2023”;
- (ii) ym mharagraff (b), ar ôl “the Ancient Monuments and Archaeological Areas Act 1979” mewnosoder “or the Historic Environment (Wales) Act 2023”.

15 Yn adran 5(1), ar ôl “Secretary of State,”, yn y ddau le, mewnosoder “the Welsh Ministers,”.

*Deddf Llywodraeth Leol 1972 (p. 70)*

16 Yn adran 131(2) o Ddeddf Llywodraeth Leol 1972, ar ôl paragraff (m) mewnosoder –

“and

(n) Part 2 of the Historic Environment (Wales) Act 2023.”

*Deddf Digollediad Tir 1973 (p. 26)*

17 Yn adran 33D(4)(d) o Ddeddf Digollediad Tir 1973, ar ôl “section 48 of the Planning (Listed Buildings and Conservation Areas) Act 1990” mewnosoder “or section 138 of the Historic Environment (Wales) Act 2023”.

*Deddf Asiantiaid Eiddo 1979 (p. 38)*

18 Yn adran 1(2)(e) o Ddeddf Asiantiaid Eiddo 1979, ar ôl “the Planning (Listed Buildings and Conservation Areas) Act 1990,” mewnosoder “Parts 3 to 5 of the Historic Environment (Wales) Act 2023,”.

*Deddf Henebion Hynafol ac Ardaloedd Archaeolegol 1979 (p. 46)*

19 Mae Deddf Henebion Hynafol ac Ardaloedd Archaeolegol 1979 wedi ei diwygio fel a ganlyn.

20 Yn adran 1 –

(a) yn is-adran (3), yn lle “subsection” rhodder “subsections (3A) and”;

(b) ar ôl is-adran (3) mewnosoder –

“(3A) The power of the Secretary of State under subsection (3) above to include any monument in the Schedule does not apply to a monument situated in Wales (and in this subsection “Wales” has the meaning given by section 158(1) of the Government of Wales Act 2006).”

(c) hepgorer is-adran (5A);

(d) yn lle is-adran (6A) rhodder –

“(6A) As soon as may be after –

- (a) including any monument in England in the Schedule under subsection (3) above;
- (b) amending the entry in the Schedule relating to any such monument; or
- (c) excluding the entry in the Schedule relating to any such monument;

the Secretary of State shall inform the Commission of the action taken and, in a case falling within paragraph (a) or (b), shall also send to the Commission a copy of the entry or (as the case may be) of the amended entry in the Schedule relating to that monument.”;

(e) hepgorer is-adrannau (6B) a (6C);

(f) yn is-adran (9) hepgorer “and Wales”.

21 Hepgorer adrannau 1AA i 1AE.

22 Yn adran 2 –

(a) hepgorer is-adrannau (3A) a (3B);

(b) yn is-adran (5) –

(i) ym mharagraff (a), hepgorer “(in a case where the monument in question is situated in England), or”;

(ii) hepgorer paragraff (b);

(c) hepgorer is-adrannau (5A) a (5B);

(d) hepgorer is-adran (6A);

(e) yn is-adran (8), hepgorer “which have been executed in relation to a scheduled monument situated in England or land in, on or under which there is such a scheduled monument”;

(f) hepgorer is-adran (8A).

23 Yn adran 4(3), hepgorer “Where a direction would (if given) affect a monument situated in England,”.

24 Yn adran 6, hepgorer is-adran (5).

25 Yn adran 7(1), hepgorer “the Secretary of State or (where the monument in question is situated in England)”.

26 Yn adran 8 –

(a) yn is-adran (2A), hepgorer paragraff (c);

(b) yn is-adran (6), hepgorer “and Wales”.

27 Yn adran 9(1), hepgorer “the Secretary of State or (where the monument in question is situated in England)”.

28 Hepgorer adrannau 9ZA a 9ZB a’r pennawd italg o flaen adran 9ZA.

29 Hepgorer adrannau 9ZC i 9ZH a’r pennawd italg o flaen adran 9ZC.

- 30 Hepgorer adrannau 9ZI i 9ZL a'r pennawd italig o flaen adran 9ZI.
- 31 Hepgorer adran 9ZM a'r pennawd italig o'i blaen.
- 32 Yn adran 26, hepgorer is-adran (4).
- 33 Yn adran 27(2), yn lle "section 1AD, 7, 9 or 9ZL" rhodder "section 7 or 9".
- 34 Yn adran 28 –
- (a) yn is-adran (1), hepgorer "situated in England";
  - (b) hepgorer is-adran (1A).
- 35 Yn adran 33 –
- (a) ar ôl is-adran (1) mewnosoder –  
“(1A) An order under subsection (1) may not designate an area in Wales.”;
  - (b) yn is-adran (5), hepgorer "and Wales".
- 36 Yn adran 35(5), hepgorer paragraff (aa).
- 37 Yn adran 38 –
- (a) yn is-adran (3)(b), hepgorer "and Wales";
  - (b) yn is-adran (9)(b), hepgorer "and Wales".
- 38 Hepgorer adran 41A a'r pennawd italig o'i blaen.
- 39 Yn adran 42 –
- (a) yn is-adran (1), hepgorer "or of the Secretary of State (in any other case)";
  - (b) yn is-adran (3), hepgorer "or of the Secretary of State (in any other case)";
  - (c) yn is-adran (4), hepgorer "the Secretary of State or";
  - (d) yn is-adran (5)(a), hepgorer "the Secretary of State or";
  - (e) yn is-adran (7), hepgorer "relating to a protected place situated in England";
  - (f) hepgorer is-adran (8).
- 40 Yn adran 44(2), yn yr ail frawddeg, hepgorer y geiriau o " , or in relation to" hyd at y diwedd.
- 41 Yn adran 45 –
- (a) hepgorer is-adran (1);
  - (b) yn is-adran (3), hepgorer "The Secretary of State or".
- 42 Yn adran 46(3), hepgorer "9ZF, 9ZJ,".
- 43 Yn adran 50, hepgorer is-adran (3A).
- 44 Yn adran 51(3), hepgorer "1AD, 9ZL,".
- 45 Yn adran 53 –
- (a) yn is-adran (2), yn lle " , or of Wales; and, subject to subsection (2B)," rhodder "and";
  - (b) hepgorer is-adrannau (2A) a (2B).
- 46 Yn adran 55, hepgorer is-adran (3A).
- 47 Yn adran 56 –

- (a) yn is-adran (1), hepgorer paragraff (ca) a'r "or" ar ei ôl;
- (b) hepgorer is-adran (1A);
- (c) hepgorer is-adran (3).

48 Yn adran 60 –

- (a) hepgorer is-adran (1A);
- (b) hepgorer is-adrannau (3), (4) a (5).

49 Yn adran 61 –

- (a) yn is-adran (1) –
  - (i) hepgorer y diffiniadau o "address", "electronic communication" ac "interim protection";
  - (ii) yn y diffiniad o "local authority", hepgorer paragraff (aa);
  - (iii) yn y diffiniad o "owner", hepgorer "sections 9ZA and 9ZB and";
  - (iv) yn y diffiniad o "scheduled monument consent", hepgorer "and (3B)";
- (b) hepgorer is-adran (2B);
- (c) yn is-adran (6), hepgorer "(other than in section 9ZA)";
- (d) yn is-adran (7), hepgorer paragraff (d) a'r "and" o'i flaen;
- (e) hepgorer is-adran (7A);
- (f) yn is-adran (12), ym mharagraff (b), ar y diwedd mewnosoder " , except any monument situated wholly or mainly in Wales".

50 Hepgorer Atodlenni A1 ac A2.

51 Yn Atodlen 1 –

- (a) ym mharagraff 1, hepgorer is-baragraff (3);
- (b) ym mharagraff 2(4), hepgorer "or of regulations made by the Welsh Ministers under it";
- (c) hepgorer paragraff 2B;
- (d) ym mharagraff 3, hepgorer is-baragraff (5);
- (e) hepgorer paragraff 3A;
- (f) ym mharagraff 4(1), hepgorer "and Wales";
- (g) ym mharagraff 5(1A), hepgorer "Where the monument in question is situated in England,".

*Deddf Llywodraeth Leol, Cynllunio a Thir 1980 (p. 65)*

52 Yn adran 148(3) o Ddeddf Llywodraeth Leol, Cynllunio a Thir 1980, ar ôl "(which relates to the compilation or approval by the Secretary of State of lists of buildings of special architectural or historic interest)" mewnosoder " , under section 76 of the Historic Environment (Wales) Act 2023 (which makes similar provision for Wales),".



*Deddf Priffyrdd 1980 (p. 66)*

53 Mae Deddf Priffyrdd 1980 wedi ei diwygio fel a ganlyn.

54 Yn adran 79(15)–

- (a) ym mharagraff (a), ar ôl “local highway authority” mewnosoder “in England”;
- (b) ar ôl y paragraff hwnnw mewnosoder –

“(aa) authorises the service by a local highway authority in Wales of a notice under this section with respect to any wall forming part of a monument of special historic interest (within the meaning of Part 2 of the Historic Environment (Wales) Act 2023) or other object of archaeological interest, except with the consent of the Welsh Ministers; or”

55 Yn adran 105ZA(1), ym mharagraff (g) o’r diffiniad o “sensitive area”, ar ôl “the Ancient Monuments and Archaeological Areas Act 1979” mewnosoder “or the Historic Environment (Wales) Act 2023”.

*Deddf Trefi Newydd 1981 (p. 64)*

56 Yn adran 8 o Ddeddf Trefi Newydd 1981, ar y diwedd mewnosoder “or under section 76 of the Historic Environment (Wales) Act 2023 (which makes similar provision for Wales)”.

*Deddf Caffael Tir 1981 (p. 67)*

57 Yn adran 31(1)(a) o Ddeddf Caffael Tir 1981, ar ôl “Planning (Listed Buildings and Conservation Areas) Act 1990” mewnosoder “or Part 3 of the Historic Environment (Wales) Act 2023”.

*Deddf Treftadaeth Genedlaethol 1983 (p. 47)*

58 Yn Atodlen 4 i Ddeddf Treftadaeth Genedlaethol 1983 –

- (a) hepgorer paragraff 4;
- (b) hepgorer paragraff 8;
- (c) hepgorer paragraff 31.

*Deddf Treth Etifeddiant 1984 (p. 51)*

59 Yn adran 230(3)(c) o Ddeddf Treth Etifeddiant 1984, ar ôl “the Ancient Monuments and Archaeological Areas Act 1979” mewnosoder “, or of which the Welsh Ministers are guardians under Part 2 of the Historic Environment (Wales) Act 2023”.

*Deddf Adeiladu 1984 (p. 55)*

60 Mae Deddf Adeiladu 1984 wedi ei diwygio fel a ganlyn.

61 Yn adran 1A(2)–

- (a) ym mharagraff (a), ar ôl “(see section 1(5) of that Act)” mewnosoder “or the Historic Environment (Wales) Act 2023 (see section 76 of that Act)”;

(b) ym mharagraff (b), yn lle “that Act” rhodder “the Planning (Listed Buildings and Conservation Areas) Act 1990 or under section 158 of the Historic Environment (Wales) Act 2023”.

62 Yn adran 20(1), ar ôl “the Planning (Listed Buildings and Conservation Areas) Act 1990” mewnosoder “, Part 3 of the Historic Environment (Wales) Act 2023”.

63 Yn adran 77(3), ar ôl “subject to” mewnosoder “section 79A and to”.

64 Yn adran 79(5), ar ôl “subject to” mewnosoder “section 79A and to”.

65 Ar ôl adran 79 mewnosoder –

**“79A Wales: exercise of powers under sections 77 and 79 in relation to listed buildings, buildings in conservation areas etc.**

(1) Before taking any steps mentioned in subsection (3) in relation to a listed building, a local authority in Wales must –

(a) if it is the planning authority for the area in which the building is situated, consider whether it should instead exercise its powers under sections 137 and 138 of the Historic Environment (Wales) Act 2023 (compulsory acquisition and repairs notices), and

(b) in any case, consider whether it should instead exercise its powers under section 144 of that Act (urgent preservation works).

(2) Before taking any steps mentioned in subsection (3) in relation to –

(a) a building in relation to which interim protection or temporary listing has effect under Chapter 1 of Part 3 of the Historic Environment (Wales) Act 2023, or

(b) a building that is subject to a direction under section 164 of that Act (urgent works to preserve buildings in conservation areas),

a local authority in Wales must consider whether it should instead exercise its powers under section 144 of that Act.

(3) The steps referred to in subsections (1) and (2) are steps with a view to –

(a) obtaining an order under section 77(1)(a), or

(b) serving a notice under section 79(1).

(4) In subsection (1), “listed building” and “planning authority” have the same meanings as in the Historic Environment (Wales) Act 2023.”

*Deddf Tai 1985 (p. 68)*

66 Mae Deddf Tai 1985 wedi ei diwygio fel a ganlyn.

67 Yn adran 303, ar ôl “section 1 of the Planning (Listed Buildings and Conservation Areas) Act 1990” mewnosoder “or section 76 of the Historic Environment (Wales) Act 2023”.

68 Yn adran 305 –

- (a) yn is-adran (1), ar ôl “Where a building” mewnosoder “in England”;
- (b) ar ôl is-adran (1) mewnosoder –
  - “(1A) Where a building in Wales to which a compulsory purchase order under section 290 applies becomes a listed building at any time after the making of the order, the authority making the order may, within the period of three months beginning with the date on which the building becomes a listed building, apply to the Welsh Ministers (and only to them) for their consent under section 89 of the Historic Environment (Wales) Act 2023 to the demolition of the building.”;
- (c) yn is-adran (2), ar ôl “Secretary of State gives” mewnosoder “, or (as the case may be) the Welsh Ministers give,”.

69 Yn adran 306 –

- (a) yn is-adran (1), ar ôl “applies to a building” mewnosoder “in England”;
- (b) ar ôl is-adran (1) mewnosoder –
  - “(1A) Where section 291 applies to a building in Wales purchased by the local housing authority by agreement and the building becomes a listed building, the authority may, within the period of three months beginning with the date on which the building becomes a listed building, apply to the Welsh Ministers (and only to them) for their consent under section 89 of the Historic Environment (Wales) Act 2023 to the demolition of the building.”

*Deddf Gwarchod Olion Milwrol 1986 (p. 35)*

70 Yn adran 9(1) o Ddeddf Gwarchod Olion Milwrol 1986, yn y diffiniad o “Crown land”, ar ôl “the Ancient Monuments and Archaeological Areas Act 1979” mewnosoder “except that in relation to land in Wales, it has the meaning given in section 207 of the Historic Environment (Wales) Act 2023”.

*Deddf Cynllunio Gwlad a Thref 1990 (p. 8)*

- 71 Mae Deddf Cynllunio Gwlad a Thref 1990 wedi ei diwygio fel a ganlyn.
- 72 Yn adran 70(3), fel y mae’n cael effaith cyn y daw adran 5(8) o Ddeddf Tai a Chynllunio 2016 (p. 22) i rym, ar ôl “Planning (Listed Buildings and Conservation Areas) Act 1990” mewnosoder “, to section 160 of the Historic Environment (Wales) Act 2023”.
- 73 Yn adran 108(3F), ar y diwedd mewnosoder “or the Historic Environment (Wales) Act 2023”.
- 74 Yn adran 137 –
- (a) yn is-adran (6) –
    - (i) yn y geiriau o flaen paragraff (a), ar ôl “section 48 of the Planning (Listed Buildings and Conservation Areas) Act 1990” mewnosoder “or section 138 of the Historic Environment (Wales) Act 2023”;

- (ii) ym mharagraff (b), yn lle “that Act” rhodder “the Planning (Listed Buildings and Conservation Areas) Act 1990 or section 137 of the Historic Environment (Wales) Act 2023”;
  - (b) yn is-adran (7)(b)(i) –
    - (i) ar ôl “Secretary of State” mewnosoder “or the Welsh Ministers”;
    - (ii) ar ôl “he decides” mewnosoder “or they decide”.
- 75 Yn adran 143(4), ar ôl “Planning (Listed Buildings and Conservation Areas) Act 1990” mewnosoder “or section 100 or 127 of the Historic Environment (Wales) Act 2023”.
- 76 Yn adran 157(1)(b) –
- (a) ar ôl “section 47 of the Planning (Listed Buildings and Conservation Areas) Act 1990” mewnosoder “or section 137 of the Historic Environment (Wales) Act 2023”;
  - (b) ar ôl “section 50 of that Act of 1990” mewnosoder “or section 140 of that Act of 2023”.
- 77 Yn adran 232(1), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 78 Yn adran 235(6), yn y diffiniad o “alternative enactment”, ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 79 Yn adran 240(3), yn y diffiniad o “relevant acquisition or appropriation”, ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 80 Yn adran 241(1), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 81 Yn adran 243(3)(b), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 82 Yn adran 246(1)(a), ar ôl “section 52 of the Planning (Listed Buildings and Conservation Areas) Act 1990” mewnosoder “or section 136 of the Historic Environment (Wales) Act 2023”.
- 83 Yn adran 271(1), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 84 Yn adran 272(1), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.
- 85 Yn adran 275 –
- (a) yn is-adran (1)(a), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”;
  - (b) yn is-adran (2)(a), yn lle “that Chapter” rhodder “either of those Chapters”;

(c) yn is-adran (3), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.

86 Yn adran 277(2)(a), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.

87 Yn adran 303, ar ôl is-adran (1) mewnosoder –

“(1ZZA) References in subsection (1) to functions of a local planning authority do not, in the case of a local planning authority in Wales, include functions under the Historic Environment (Wales) Act 2023 (as to which, see section 167 of that Act).”

88 Yn adran 303ZA(5)(b), sydd wedi ei mewnosod gan adran 200 o Ddeddf Cynllunio 2008 (p. 29), ar ôl “the Welsh Ministers” mewnosoder “in relation to appeals under any provision made by or under this Act as it applies”.

89 Yn adran 306(1)(a), ar ôl “Chapter V of Part 1 of the Planning (Listed Buildings and Conservation Areas) Act 1990” mewnosoder “or Chapter 5 of Part 3 of the Historic Environment (Wales) Act 2023”.

90 O flaen adran 315 (ond ar ôl y pennawd italig o flaen yr adran honno) mewnosoder –

**“314A Wales: duties relating to listed buildings and features of architectural or historic interest**

- (1) In considering whether to grant planning permission for development which affects a listed building or its setting, the Welsh Ministers or a local planning authority in Wales must have special regard to the desirability of preserving –
  - (a) the listed building,
  - (b) the setting of the building, or
  - (c) any features of special architectural or historic interest the building possesses.
- (2) In exercising the powers conferred by sections 232, 233 and 235(1) (appropriation, disposal and development of land held for planning purposes), a relevant local authority must have regard to the desirability of preserving features of special architectural or historic interest, and in particular listed buildings.
- (3) In subsection (2), “relevant local authority” means –
  - (a) a county council or county borough council in Wales;
  - (b) a National Park authority in Wales;
  - (c) a joint planning board constituted under section 2(1B).
- (4) In this section, “listed building” means –
  - (a) a listed building (within the meaning given by section 76 of the Historic Environment (Wales) Act 2023) situated in Wales, or

- (b) a listed building (within the meaning given by section 1 of the Planning (Listed Buildings and Conservation Areas) Act 1990) situated in England."

91 Yn adran 336(1) –

- (a) yn y diffiniad o "conservation area", ar ôl "section 69 of the Planning (Listed Buildings and Conservation Areas) Act 1990" mewnosoder "or section 158 of the Historic Environment (Wales) Act 2023";
- (b) yn y diffiniad o "the planning Acts", ar ôl "Planning (Listed Buildings and Conservation Areas) Act 1990," mewnosoder "Parts 3 to 5 of the Historic Environment (Wales) Act 2023 (and Part 7 of that Act as it applies for the purposes of those Parts)".

92 Yn Atodlen 4B, ym mharagraff 8(5), yn lle "has the same meaning as in the Planning (Listed Buildings and Conservation Areas) Act 1990" rhodder –

"means –

- (a) a listed building (within the meaning given by section 1 of the Planning (Listed Buildings and Conservation Areas) Act 1990) situated in England, or
- (b) a listed building (within the meaning given by section 76 of the Historic Environment (Wales) Act 2023) situated in Wales."

*Deddf Cynllunio (Adeiladau Rhestredig ac Ardaloedd Cadwraeth) 1990 (p. 9)*

93 Mae Deddf Cynllunio (Adeiladau Rhestredig ac Ardaloedd Cadwraeth) 1990 wedi ei diwygio fel a ganlyn.

94 Yn adran 1 –

- (a) yn is-adran (1), ar ôl "buildings of special architectural or historic interest" mewnosoder "in England";
- (b) hepgorer is-adran (2);
- (c) yn is-adran (4), hepgorer "in relation to buildings which are situated in England";
- (d) hepgorer is-adran (4A);
- (e) yn is-adran (5A), hepgorer "situated in England".

95 Yn adran 2 –

- (a) yn is-adran (1) –
  - (i) yn y geiriau o flaen paragraff (a), hepgorer ", Welsh county, county borough,";
  - (ii) ar ôl paragraff (a), mewnosoder "and";
  - (iii) hepgorer paragraff (c) a'r "and" o'i flaen;
- (b) yn is-adran (3), yn y geiriau o flaen paragraff (a) –
  - (i) hepgorer "situated in England";
  - (ii) yn lle "any such building" rhodder "any building";
- (c) hepgorer is-adrannau (3A) a (3B).



- 96 Hepgorer adrannau 2A i 2D.
- 97 Yn adran 3—
- (a) yn y pennawd, hepgorer “in England”;
  - (b) yn is-adran (1), yn lle “If it appears to a local planning authority in England who are not a county planning authority” rhodder “If it appears to a local planning authority, other than a county planning authority,”;
  - (c) yn is-adrannau (2), (3), (4), (5) a (6), hepgorer “under this section”.
- 98 Hepgorer adran 3A.
- 99 Yn adran 4(2), yn lle “sections 3 and 3A,” rhodder “section 3,”.
- 100 Yn adran 5—
- (a) ar ddechrau is-adran (1), hepgorer “(1)”;
  - (b) hepgorer is-adran (2).
- 101 Yn adran 6—
- (a) yn y pennawd, hepgorer “: England”;
  - (b) yn is-adran (A1), hepgorer “situated in England”.
- 102 Hepgorer adran 6A.
- 103 Yn adran 8—
- (a) yn is-adran (4)—
    - (i) ym mharagraff (a), hepgorer “in relation to England,”;
    - (ii) hepgorer paragraff (b);
  - (b) yn is-adran (6), hepgorer paragraff (b) a’r “and” o’i flaen.
- 104 Yn adran 9, hepgorer is-adran (3A).
- 105 Yn adran 12, hepgorer is-adran (4B).
- 106 Yn adran 15(3), hepgorer “in England”.
- 107 Yn adran 20—
- (a) yn is-adran (4), hepgorer “in relation to England”;
  - (b) hepgorer is-adran (5).
- 108 Yn adran 21—
- (a) yn is-adran (4), hepgorer “interim protection has effect or”;
  - (b) hepgorer is-adrannau (4A) a (4B);
  - (c) hepgorer is-adran (9).
- 109 Yn adran 22—
- (a) hepgorer is-adran (2B);
  - (b) yn is-adran (3), yn lle “an appeal under section 20” rhodder “the appeal”.
- 110 Yn adran 26A(1), hepgorer “, situated in England”.
- 111 Yn adran 26C(1), hepgorer “in England”.

- 112 Yn adran 26D(1), hepgorer “for any area in England”.
- 113 Yn adran 26H(1), hepgorer “in England”.
- 114 Hepgorer adrannau 26L a 26M a’r pennawd italg o flaen adran 26L.
- 115 Hepgorer adran 28B.
- 116 Yn adran 29—
- (a) yn is-adran (1), hepgorer “in respect of a building situated in England”;
  - (b) hepgorer is-adran (1A).
- 117 Yn adran 31(2), yn lle “28, 28B, 29 and 44D” rhodder “28 and 29”.
- 118 Yn adran 32(1), yn y geiriau ar ôl paragraff (b), hepgorer “, Welsh county, county borough,”.
- 119 Yn adran 34(2)—
- (a) ym mharagraff (c), hepgorer “in England”;
  - (b) hepgorer paragraff (cc).
- 120 Yn adran 40, hepgorer is-adran (2B).
- 121 Yn adran 41—
- (a) yn is-adran (4)—
    - (i) hepgorer “section 40(2) would otherwise apply and”;
    - (ii) hepgorer “of this section”;
  - (b) yn is-adran (8), hepgorer “in England”.
- 122 Yn adran 44A(4), hepgorer “, as respects England,”.
- 123 Hepgorer adrannau 44B i 44D.
- 124 Yn adran 46—
- (a) yn is-adran (2)(b), hepgorer “if the land is situated in England,”;
  - (b) yn is-adran (5), hepgorer “in England”.
- 125 Yn adran 47—
- (a) yn is-adran (3)(a), hepgorer “situated in England”;
  - (b) yn is-adran (7), yn y diffiniad o “the appropriate authority,” ym mharagraff (a), hepgorer “, county borough”.
- 126 Yn adran 48(4), hepgorer “situated in England”.
- 127 Yn adran 49—
- (a) yn y pennawd, ar ôl “listed building” mewnosoder “in England or Wales”;
  - (b) daw’r ddarpariaeth bresennol yn is-adran (1);
  - (c) ar ôl yr is-adran honno mewnosoder—
    - “(2) In subsection (1)—
      - (a) the reference to a building which was listed includes a building in Wales which was included in the list maintained under section 76 of the Historic Environment (Wales) Act 2023;

- (b) in relation to such a building –
- (i) the reference to section 50 of this Act is to be read as a reference to section 140 of that Act;
  - (ii) the reference to listed building consent is a reference to consent under section 89 of that Act.”
- 128 Yn adran 52(1) –
- (a) yn y geiriau o flaen paragraff (a) –
    - (i) yn lle “, county borough,” rhodder “in England,”;
    - (ii) ar ôl “joint planning board for an area” mewnosoder “in England”;
  - (b) ym mharagraff (a), ar ôl “building” mewnosoder “situated wholly or mainly in England”.
- 129 Yn adran 53(3), hepgorer “if they relate to property situated in England”.
- 130 Yn adran 54 –
- (a) yn is-adran (2) –
    - (i) ym mharagraff (a), hepgorer “if the building is in England”;
    - (ii) hepgorer paragraff (b);
  - (b) yn is-adran (4), hepgorer “, in the case of a building in England,”;
  - (c) hepgorer is-adran (4A);
  - (d) hepgorer is-adran (5A);
  - (e) yn is-adran (6), hepgorer “or (5A)”.
- 131 Yn adran 55, hepgorer is-adrannau (5A) i (5G).
- 132 Yn adran 57(7) –
- (a) ym mharagraff (a), yn lle “, county borough,” rhodder “in England,”;
  - (b) ym mharagraff (b), ar ôl “principal Act” mewnosoder “for an area in England”.
- 133 Yn adran 60(2), hepgorer “, 3A”.
- 134 Yn adran 61(2), yn lle “sections 2B, 3, 3A,” rhodder “sections 3,”.
- 135 Yn adran 62(2), hepgorer paragraff (za).
- 136 Yn adran 66, ar ôl is-adran (4) mewnosoder –
- “(5) In this section, “listed building” includes a listed building (within the meaning given by section 76 of the Historic Environment (Wales) Act 2023) situated in Wales.”
- 137 Yn adran 70 –
- (a) yn is-adran (5)(b), hepgorer “it affects an area in England and”;
  - (b) yn is-adran (6)(b), hepgorer “if it affects an area in England,”.
- 138 Yn adran 74 –
- (a) hepgorer is-adrannau (1), (1A) a (2);
  - (b) yn is-adran (2A), hepgorer “in England”;

- (c) hepgorer is-adrannau (3) a (4).
- 139 Yn adran 75 –
- (a) hepgorer is-adran (6);
  - (b) hepgorer is-adran (10);
  - (c) yn is-adran (11), hepgorer “under section 9 or 43 or”.
- 140 Yn adran 76(2), hepgorer “in respect of a building in England”.
- 141 Yn adran 77 –
- (a) yn is-adran (1), hepgorer “situated in England”;
  - (b) hepgorer is-adran (2);
  - (c) yn is-adran (3), hepgorer “or (2)”;
  - (d) yn is-adran (4), hepgorer “or, as the case may be, the Secretary of State”;
  - (e) hepgorer is-adran (6).
- 142 Yn adran 79 –
- (a) yn is-adran (1), hepgorer “, or the Secretary of State and one or more local authorities in Wales,”;
  - (b) yn is-adran (3), hepgorer paragraff (aa).
- 143 Yn adran 80 –
- (a) yn is-adran (1)(b), hepgorer “in England”;
  - (b) hepgorer is-adran (2);
  - (c) yn is-adran (3), hepgorer “or, as the case may be, the Secretary of State” yn y ddau le;
  - (d) yn is-adran (5), hepgorer “or the Secretary of State”.
- 144 Yn adran 81, ar ôl ““local planning authority”” mewnosoder “means a local planning authority for an area in England and”.
- 145 Yn adran 82 –
- (a) yn is-adran (1) –
    - (i) hepgorer “, (2)”;
    - (ii) hepgorer “to 2D,”;
  - (b) yn is-adran (3) –
    - (i) hepgorer “2B, 2C,”;
    - (ii) hepgorer “28B,”;
    - (iii) hepgorer “, 1A”.
- 146 Yn adran 82A(2), hepgorer paragraff (fa).
- 147 Yn adran 86(2) –
- (a) ym mharagraff (a), hepgorer “if the property is situated in England, then”;
  - (b) ym mharagraff (b), hepgorer “in any case,”.
- 148 Yn adran 88 –

- (a) hepgorer is-adran (3A);
- (b) yn is-adran (4), yn lle “, 28B, 29 or 44D” rhodder “or 29”.
- 149 Yn adran 88B, hepgorer is-adran (1A).
- 150 Yn adran 88D –
- (a) yn y pennawd, hepgorer “: England”;
- (b) yn is-adran (7), ym mharagraffau (a), (b) ac (c), hepgorer “in England”.
- 151 Hepgorer adran 88E.
- 152 Yn adran 89 –
- (a) yn is-adran (1) –
- (i) hepgorer y cofnod ar gyfer adrannau 319ZA i 319ZD;
- (ii) yn y cofnod ar gyfer adran 322, hepgorer “: England”;
- (iii) hepgorer y cofnod ar gyfer adran 322C;
- (iv) yn y cofnod ar gyfer adran 323, hepgorer “: England”;
- (v) hepgorer y cofnod ar gyfer adran 323A;
- (b) yn is-adran (1A), hepgorer “In the case of a building situated in England,”.
- 153 Yn adran 90(5), ar ôl “council of a county” mewnosoder “in England”.
- 154 Yn adran 91 –
- (a) yn is-adran (1) –
- (i) yn y diffiniad o “building preservation notice”, yn lle “sections 3(1) and 3A(1)” rhodder “section 3(1);
- (ii) hepgorer y diffiniad o “interim protection”;
- (b) yn is-adran (2), yn y geiriau ar ôl y rhestr o ymadroddion, hepgorer “, 26L or 26M”.
- 155 Yn adran 93 –
- (a) yn is-adran (1), hepgorer “in relation to England and the Welsh Ministers may make regulations under this Act in relation to Wales”;
- (b) yn is-adran (3) –
- (i) hepgorer “, other than regulations under section 2A, 26M or 56A,”;
- (ii) hepgorer “(in the case of regulations made by the Secretary of State) or the National Assembly for Wales (in the case of regulations made by the Welsh Ministers)”;
- (c) hepgorer is-adran (3A);
- (d) yn is-adran (4) –
- (i) hepgorer “55(5B),”;
- (ii) hepgorer “, 88E”;
- (e) yn is-adran (5) –
- (i) hepgorer “55(5B),”;

- (ii) hepgorer “(in the case of an order made by the Secretary of State) or the National Assembly for Wales (in the case of an order made by the Welsh Ministers)”;
- (f) yn is-adran (6), hepgorer “or (as the case may be) the Welsh Ministers”.
- 156 Yn Atodlen 1, ym mharagraff 2 –
- (a) yn is-baragraff (3), hepgorer “situated in England”;
- (b) hepgorer is-baragraff (4).
- 157 Hepgorer Atodlenni 1A ac 1B.
- 158 Yn Atodlen 2 –
- (a) ym mharagraff 1 –
- (i) ar ôl is-baragraff (a) mewnosoder “or”;
- (ii) hepgorer is-baragraffau (c) a (d);
- (b) ym mharagraff 2, yn lle “, 43 or 44C” rhodder “or 43”;
- (c) hepgorer paragraff 5.
- 159 Yn Atodlen 3 –
- (a) ym mharagraff 2 –
- (i) hepgorer is-baragraff (4B);
- (ii) hepgorer is-baragraff (10);
- (b) ym mharagraff 3 –
- (i) hepgorer is-baragraffau (4C) a (4D);
- (ii) yn is-baragraff (5), hepgorer “or (4D)”;
- (c) ym mharagraff 6 –
- (i) hepgorer is-baragraff (1B);
- (ii) yn is-baragraff (2)(a), hepgorer “or this paragraph”;
- (iii) yn is-baragraff (4), hepgorer “in England”;
- (iv) hepgorer is-baragraff (4A);
- (v) yn is-baragraff (5), yn lle “inquiry held by virtue of this paragraph” rhodder “such inquiry”;
- (vi) yn is-baragraff (8), hepgorer “in England”;
- (d) ym mharagraff 7, hepgorer is-baragraff (3);
- (e) hepgorer paragraff 8 a’r pennawd italg o’i flaen.
- 160 Yn Atodlen 4 –
- (a) ym mharagraff 1 –
- (i) ar ddechrau is-baragraff (1), hepgorer “(1)”;
- (ii) hepgorer is-baragraff (2);
- (b) ym mharagraff 7(1) –
- (i) hepgorer “3A,”;



(ii) hepgorer “44D”.

*Deddf Cynllunio a Digolledu 1991 (p. 34)*

161 Yn Rhan 1 o Atodlen 18 i Ddeddf Cynllunio a Digolledu 1991, ar ôl y cofnod sy’n ymwneud ag adran 29(5) o Deddf Draenio Tir 1991 mewnosoder –

“Section 8 of the Historic Environment (Wales) Act 2023	Date interim protection takes effect
Section 21 of that Act	Date scheduled monument consent is refused or granted subject to conditions
Section 24 of that Act	Date works ceased to be authorised
Section 28 of that Act	Date notice of proposed termination is served
Section 34 of that Act	Date temporary stop notice takes effect
Section 70 of that Act	Date damage is caused
Section 80 of that Act	Date interim protection takes effect
Section 86 of that Act	Date temporary listing notice is served
Section 108 of that Act	Date modification or revocation of consent takes effect
Section 116 of that Act	Date termination of agreement or provision takes effect
Section 122 of that Act	Date temporary stop notice takes effect
Section 155(4) of that Act	Date damage is caused”

*Deddf Ymsuddiant Glofaol 1991 (p. 45)*

162 Yn adran 19 o Ddeddf Ymsuddiant Glofaol 1991, ar ôl is-adran (1) mewnosoder –

“(1A) This section also applies where any property in Wales which –

- (a) is a scheduled monument within the meaning given by section 3 of the Historic Environment (Wales) Act 2023,
- (b) has been notified to the Corporation by the Secretary of State as a monument of special historic interest, within the meaning given by section 75(6) of that Act, for the time being under the guardianship of the Welsh Ministers, or
- (c) is a listed building within the meaning given by section 76 of that Act, and is not of a description specified in an order made by the Secretary of State,

is affected by subsidence damage and the character of the property as one of historic, architectural, archaeological or other special interest is or may be affected by that damage.”

*Deddf Draenio Tir 1991 (p. 59)*

163 Yn adran 67(3) o Ddeddf Draenio Tir 1991, ar ôl “the Ancient Monuments and Archaeological Areas Act 1979” mewnosoder “or Part 2 of the Historic Environment (Wales) Act 2023”.

*Deddf Gwarchod Moch Daear 1992 (p. 51)*

- 164 Yn adran 10(1)(e) o Ddeddf Gwarchod Moch Daear 1992, ar ôl “the Ancient Monuments and Archaeological Areas Act 1979” mewnosoder “or section 3 of the Historic Environment (Wales) Act 2023”.

*Deddf Tribiwnlysoedd ac Ymchwiliadau 1992 (p. 53)*

- 165 Yn adran 16(1) o Ddeddf Tribiwnlysoedd ac Ymchwiliadau 1992, yn y diffiniad o “statutory inquiry”, yn lle “the Planning (Listed Buildings and Conservation Areas) Act 1990” rhodder “Parts 3 to 5 of the Historic Environment (Wales) Act 2023”.

*Deddf Diwygio Cyfraith Lesddaliad, Tai a Datblygu Trefol 1993 (p. 28)*

- 166 Yn adran 70 o Ddeddf Diwygio Cyfraith Lesddaliad, Tai a Datblygu Trefol 1993 –
- (a) yn is-adran (14) –
    - (i) yn y geiriau o flaen paragraff (a), yn lle “in section 73” rhodder “section 73 as they apply in relation to England,”;
    - (ii) ym mharagraff (a), ar ôl “Town and Country Planning Act 1990” mewnosoder “as it applies in relation to England,”;
  - (b) ar ôl is-adran (14) mewnosoder –
    - “(15) In this section and section 73 as they apply in relation to Wales –
      - (a) “conservation area” has the same meaning as in the Historic Environment (Wales) Act 2023;
      - (b) “local planning authority” is to be interpreted in accordance with Part 1 of the Town and Country Planning Act 1990, and in that Part as it applies in relation to Wales references to “the planning Acts” are to be treated as including this Act.”

*Deddf Llywodraeth Leol (Cymru) 1994 (p. 19)*

- 167 Mae Deddf Llywodraeth Leol (Cymru) 1994 wedi ei diwygio fel a ganlyn.
- 168 Yn Atodlen 6, hepgorer paragraff 25 a’r pennawd italig o’i flaen.
- 169 Yn Atodlen 16, hepgorer paragraff 56 a’r pennawd italig o’i flaen.

*Deddf Treth ar Werth 1994 (p. 23)*

- 170 Yn Atodlen 8 i Ddeddf Treth ar Werth 1994, yng Ngrŵp 6, yn Nodyn (1) –
- (a) ym mharagraff (a), ar ôl is-baragraff (i) mewnosoder –
    - “(ia) the Historic Environment (Wales) Act 2023; or”;
  - (b) ym mharagraff (b), ar ôl is-baragraff (i) mewnosoder –
    - “(ia) the Historic Environment (Wales) Act 2023; or”.

*Deddf Cyfiawnder Troseddol a Threfn Gyhoeddus 1994 (p. 33)*

- 171 Mae Deddf Cyfiawnder Troseddol a Threfn Gyhoeddus 1994 wedi ei diwygio fel a ganlyn.

- 172 Yn adran 60C(8), ym mharagraff (b) o'r diffiniad o "land", ar ôl "the Ancient Monuments and Archaeological Areas Act 1979" mewnosoder "or the Historic Environment (Wales) Act 2023".
- 173 Yn adran 61(9), ym mharagraff (a)(ii) o'r diffiniad o "land", ar ôl "the Ancient Monuments and Archaeological Areas Act 1979" mewnosoder "or the Historic Environment (Wales) Act 2023".
- 174 Yn adran 62E(2)(b), ar ôl "the Ancient Monuments and Archaeological Areas Act 1979" mewnosoder "or the Historic Environment (Wales) Act 2023".

*Deddf yr Amgylchedd 1995 (p. 25)*

- 175 Yn Atodlen 9 i Ddeddf yr Amgylchedd 1995, ym mharagraff 13(1), hepgorer "and in section 6 of the Historic Buildings and Ancient Monuments Act 1953 (under which grants for the acquisition of buildings in Wales may be made)".

*Deddf Cynllunio (Darpariaethau Canlyniadol) (Yr Alban) 1997 (p. 11)*

- 176 Yn Atodlen 2 i Ddeddf Cynllunio (Darpariaethau Canlyniadol) (Yr Alban) 1997, ym mharagraff 4, hepgorer is-baragraff (2).

*Gorchymyn Cynulliad Cenedlaethol Cymru (Trosglwyddo Swyddogaethau) 1999 (O.S. 1999/672)*

- 177 Yn Atodlen 1 i Orchymyn Cynulliad Cenedlaethol Cymru (Trosglwyddo Swyddogaethau) 1999, hepgorer y cofnodion ar gyfer –
- (a) Deddf Adeiladau Hanesyddol a Henebion Hynafol 1953;
  - (b) Deddf Mwyngloddiau (Cyfleusterau Gweithio a Chynnal) 1966;
  - (c) Deddf Henebion Hynafol ac Ardaloedd Archaeolegol 1979;
  - (d) Deddf Cynllunio (Adeiladau Rhestredig ac Ardaloedd Cadwraeth) 1990.

*Deddf Cefn Gwlad a Hawliau Tramwy 2000 (p. 37)*

- 178 Mae Deddf Cefn Gwlad a Hawliau Tramwy 2000 wedi ei diwygio fel a ganlyn.
- 179 Yn adran 15(1), ar ôl paragraff (d) mewnosoder –
- "or
- (e) the public have access to it under subsection (1) of section 55 of the Historic Environment (Wales) Act 2023 (public access to monuments under public control) or would have access to it under that subsection but for any of the things mentioned in paragraphs (a) to (c) of that subsection."
- 180 Yn adran 26(3)(b)(i), ar ôl "the Ancient Monuments and Archaeological Areas Act 1979" mewnosoder "or section 3 of the Historic Environment (Wales) Act 2023".

*Deddf Cynllunio a Phrynu Gorfodol 2004 (p. 5)*

- 181 Yn adran 81 o Ddeddf Cynllunio a Phrynu Gorfodol 2004, hepgorer is-adran (2).

*Deddf Llywodraeth Cymru 2006 (p. 32)*

- 182 Mae Deddf Llywodraeth Cymru 2006 wedi ei diwygio fel a ganlyn.
- 183 Yn Atodlen 3A, yn y tabl ym mharagraff 1, hepgorer y cofnod sy'n ymwneud â pharagraff 6(6) o Atodlen 3 i Ddeddf Cynllunio (Adeiladau Rhestredig ac Ardaloedd Cadwraeth) 1990.
- 184 Yn Atodlen 10, hepgorer paragraff 36.

*Gorchymyn Comisiwn Cynulliad Cenedlaethol Cymru (Statws y Goron) (Rhif 2) 2007 (O.S. 2007/1353)*

- 185 Yng Ngorchymyn Comisiwn Cynulliad Cenedlaethol Cymru (Statws y Goron) (Rhif 2) 2007 –
- (a) hepgorer erthygl 3;
  - (b) hepgorer erthygl 5.

*Deddf Gorfodi Rheoleiddiol a Sanctiynau 2008 (p. 13)*

- 186 Yn Atodlen 7 i Ddeddf Gorfodi Rheoleiddiol a Sanctiynau 2008, yn y lle priodol mewnosoder –
- “Historic Environment (Wales) Act 2023, section 147”.

*Deddf Cynllunio 2008 (p. 29)*

- 187 Yn Atodlen 2 i Ddeddf Cynllunio 2008, hepgorer paragraff 41.

*Deddf Menter a Diwygio Rheoleiddio 2013 (p. 24)*

- 188 Yn Atodlen 17 i Ddeddf Menter a Diwygio Rheoleiddio 2013, ym mharagraff 12 –
- (a) hepgorer is-baragraff (2);
  - (b) hepgorer is-baragraffau (4) a (5).

*Deddf Cynllunio (Cymru) 2015 (dccc 4)*

- 189 Mae Deddf Cynllunio (Cymru) 2015 wedi ei diwygio fel a ganlyn.
- 190 Hepgorer adran 39(3).
- 191 Hepgorer adran 47(3).
- 192 Yn Atodlen 5, hepgorer paragraffau 19 i 22 a'r pennawd italig o flaen paragraff 19.

*Deddf yr Amgylchedd Hanesyddol (Cymru) 2016 (dccc 4)*

- 193 Mae Deddf yr Amgylchedd Hanesyddol (Cymru) 2016 wedi ei diddymu.

*Deddf Tai a Chynllunio 2016 (p. 22)*

- 194 Yn adran 5(8) o Ddeddf Tai a Chynllunio 2016, yn adran 70(3) newydd o Ddeddf Cynllunio Gwlad a Thref 1990, ar ôl paragraff (c) mewnosoder –
- “(ca) section 160 of the Historic Environment (Wales) Act 2023;”.

*Deddf Ombwdsmon Gwasanaethau Cyhoeddus (Cymru) 2019 (dccc 3)*

- 195 Yn Atodlen 5 i Ddeddf Ombwdsmon Gwasanaethau Cyhoeddus (Cymru) 2019 –
- (a) hepgorer paragraff 10 a’r pennawd italg o’i flaen;
  - (b) hepgorer paragraffau 13 a 14 a’r pennawd italg o flaen paragraff 13.

*Deddf Dedfrydu 2020 (p. 17)*

- 196 Yn adran 137(3) o Ddeddf Dedfrydu 2020, yn lle “is to be made” rhodder “in England is to be made, and section 59 of the Historic Environment (Wales) Act 2023 makes equivalent provision for monuments in Wales”.

## ATODLEN 14

*(a gyflwynir gan adran 211(2))*

## DARPARIAETHAU TROSIANNOL A DARPARIAETHAU ARBED

## RHAN 1

## DARPARIAETHAU CYFFREDINOL

*Cyfeiriadau statudol a chyfeiriadau eraill at y Ddeddf hon*

- 1 (1) Mae'r paragraff hwn yn gymwys i unrhyw gyfeiriad (penodol neu ymhlyg) yn y Ddeddf hon neu mewn unrhyw ddeddfiad arall, neu mewn unrhyw offeryn arall neu unrhyw ddogfen arall –
- (a) at ddarpariaeth yn y Ddeddf hon, neu
  - (b) at unrhyw beth a wneir neu sydd i'w wneud o dan ddarpariaeth yn y Ddeddf hon neu at ddibenion darpariaeth o'r fath.
- (2) Mewn perthynas ag unrhyw adeg pan oedd darpariaeth gyfatebol mewn deddfiad a ddiddymwyd (neu mewn unrhyw ddeddfiad cynharach) yn cael effaith, mae'r cyfeiriad i'w ddarllen fel pe bai'n cynnwys cyfeiriad –
- (a) at y ddarpariaeth gyfatebol fel yr oedd yn cael effaith ar yr adeg honno, neu
  - (b) at bethau a wnaed neu a oedd i'w gwneud o dan y ddarpariaeth honno neu at ddibenion y ddarpariaeth honno fel yr oedd yn cael effaith ar yr adeg honno.

*Dogfennau sy'n cyfeirio at ddeddfiadau a ddiddymwyd*

- 2 (1) Mae'r paragraff hwn yn gymwys i unrhyw gyfeiriad at ddeddfiad a ddiddymwyd sydd wedi ei gynnwys mewn dogfen a wneir, a gyflwynir neu a ddyroddir ar ôl i'r deddfiad hwnnw gael ei ddiddymu.
- (2) Oni bai bod y cyd-destun yn mynnu fel arall, mae'r cyfeiriad i'w ddarllen (yn ôl y cyd-destun) fel pe bai'n cyfeirio neu'n cynnwys cyfeiriad at y ddarpariaeth gyfatebol yn y Ddeddf hon.

*Perthynas â Deddf Deddfwriaeth (Cymru) 2019*

- 3 Mae'r Atodlen hon yn gymwys yn ychwanegol at adrannau 34 a 35 o Ddeddf Deddfwriaeth (Cymru) 2019 (dccc 4) (arbedion cyffredinol ac effaith ailddeddfu) ac nid yw'n cyfyngu ar weithrediad yr adrannau hynny mewn cysylltiad â diddymu, dirymu neu ailddeddfu unrhyw ddeddfiad gan y Ddeddf hon.

*Dehongli*

- 4 Yn y Rhan hon o'r Atodlen hon –
- (a) mae cyfeiriadau at ddarpariaeth yn y Ddeddf hon yn cynnwys darpariaeth sydd wedi ei mewnosod mewn unrhyw ddeddfiad arall gan y Ddeddf hon;
  - (b) ystyr "deddfiad a ddiddymwyd" yw unrhyw ddeddfiad sydd wedi ei ddiddymu gan y Ddeddf hon;



- (c) mae cyfeiriadau at ddiddymu deddfiad yn cynnwys eithrio ei gymhwysiad neu ei effaith neu gyfyngu ar ei gymhwysiad neu ei effaith (pa un ai o ran Cymru neu fel arall).

## RHAN 2

## GWARCHEIDIAETH HENEBION

*Gorchymynion gwarcheidiaeth a wnaed o dan Ddeddf 1953*

- 5 (1) Pan fo Gweinidogion Cymru, yn union cyn i Ran 2 o'r Ddeddf hon ddod i rym, yn warcheidwaid heneb yn rhinwedd gorchymyn gwarcheidiaeth—
- (a) a wnaed, neu a gaiff ei drin fel pe bai wedi ei wneud, o dan adran 12(5) o Ddeddf Adeiladau Hanesyddol a Henebion Hynafol 1953 (p. 49), a
- (b) a barheir mewn grym gan baragraff 2(1) o Atodlen 3 i Ddeddf Henebion Hynafol ac Ardaloedd Archaeolegol 1979 (p. 46),
- mae'r gorchymyn yn parhau mewn grym er gwaethaf y ffaith bod y Rhan honno wedi dod i rym.
- (2) Mae'r Rhan honno yn gymwys tra bo'r gorchymyn gwarcheidiaeth mewn grym fel pe bai Gweinidogion Cymru wedi cael eu penodi yn warcheidwaid yr heneb drwy weithred o dan adran 45 o'r Ddeddf hon—
- (a) nad yw'n cynnwys unrhyw gyfyngiad nad yw wedi ei gynnwys yn y gorchymyn, a
- (b) a gyflawnwyd gan yr holl bersonau a oedd, ar yr adeg pan wnaed y gorchymyn, yn gallu drwy weithred benodi Gweinidogion Cymru yn warcheidwaid yr heneb.
- (3) Caiff Gweinidogion Cymru ddirymu gorchymyn gwarcheidiaeth y mae'r paragraff hwn yn gymwys iddo.

*Rheolaethu a rheoli heneb pan fo gwarcheidiaeth yn rhagddyddio Deddf 1979*

- 6 (1) Mae'r paragraff hwn yn gymwys pan—
- (a) cymerwyd heneb i warcheidiaeth cyn 9 Hydref 1981 (y dyddiad y daeth Rhan 1 o Ddeddf Henebion Hynafol ac Ardaloedd Archaeolegol 1979 i rym), a
- (b) yn union cyn i Ran 2 o'r Ddeddf hon ddod i rym, bo'r heneb o dan warcheidiaeth Gweinidogion Cymru neu awdurdod lleol.
- (2) Nid yw adran 47(2) (rheolaethu a rheoli'n llawn) yn gymwys i'r heneb oni bai—
- (a) bod y weithred a oedd yn sefydlu gwarcheidiaeth yn darparu ar gyfer rheolaethu a rheoli'r heneb gan y gwarcheidwaid, neu
- (b) bod y personau y mae gweithrediad y weithred warcheidiaeth, am y tro, yn cael effaith uniongyrchol arnynt wedi cydsynio i'r gwarcheidwaid reolaethu a rheoli'r heneb.

*Mynediad y cyhoedd i heneb pan fo gwarcheidiaeth yn rhagddyddio Deddf 1913*

- 7 (1) Mae'r paragraff hwn yn gymwys pan—

- (a) cymerwyd heneb i warcheidiaeth cyn 15 Awst 1913 (y dyddiad y daeth Deddf Cydgrynhoi a Diwygio Henebion Hynafol 1913 (p. 32) i rym), a
  - (b) yn union cyn i Ran 2 o'r Ddeddf hon ddod i rym, bo'r heneb o dan warcheidiaeth Gweinidogion Cymru neu awdurdod lleol.
- (2) Nid yw adran 55(1) (dyletswydd i sicrhau mynediad y cyhoedd) yn gymwys i'r heneb oni bai –
- (a) bod y weithred a oedd yn sefydlu gwarcheidiaeth yn darparu ar gyfer mynediad y cyhoedd i'r heneb, neu
  - (b) bod y personau y mae gweithrediad y weithred warcheidiaeth, am y tro, yn cael effaith uniongyrchol arnynt wedi cydsynio i'r cyhoedd gael mynediad i'r heneb.

*Dehongli*

- 8 At ddibenion paragraffau 6 a 7, mae gweithrediad gweithred warcheidiaeth sy'n ymwneud â heneb yn cael effaith uniongyrchol ar berson os yw'r person wedi ei rwymo gan y weithred honno a bod yr heneb yn ei feddiant neu yn ei feddiannaeth.

## RHAN 3

## AMRYWIOL

*Y drosedd o dorri hysbysiad stop dros dro mewn perthynas â heneb gofrestrdig*

- 9 Nid yw adran 33(4)(b) yn gymwys mewn perthynas ag achos ar gyfer trosedd sy'n ymwneud â hysbysiad stop dros dro a ddyroddwyd cyn i adran 33 ddod i rym.

*Cyflwyno hysbysiad gorfodi a'r hysbysiad yn cymryd effaith mewn perthynas â heneb gofrestrdig*

- 10 Nid yw adran 36(5)(a) yn gymwys mewn perthynas â chyflwyno hysbysiad gorfodi a ddyroddwyd cyn i adran 36 ddod i rym.

*Hysbysiad prynu a gyflwynir i gyngor mewn perthynas ag adeilad mewn Parc Cenedlaethol*

- 11 (1) Mae is-baragraff (2) yn gymwys mewn perthynas â hysbysiad prynu sydd wedi ei gyflwyno i gyngor sir neu gyngor bwrdeistref sirol yng Nghymru mewn perthynas ag adeilad mewn Parc Cenedlaethol cyn i adran 109 ddod i rym.
- (2) Mae'r darpariaethau a ganlyn i'w darllen fel pe bai cyfeiriadau at awdurdod cynllunio yn gyfeiriadau at y cyngor –
- (a) adran 183(7)(c);
  - (b) adran 186(3) a (7);
  - (c) Atodlen 9.